


Pwapwior we e
Santus



Satawalese: Pwapwior we e Santus (New Testament)

Pwapwior we e Santus

Satawalese: Pwapwior we e Santus (New Testament)

copyright © 2024 Wycliffe Bible Translators, Inc.

Language: (Satawalese)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-03-11

PDF generated using Haiola and XeLaTeX on 18 Mar 2025 from source files dated 11 Mar 2025

6f137abd-4cdf-5de2-a1d6-1be1650a67b8

Contents

Matthew	1
Mark	86
Luke	140
John	229

Fangkenio We Foatogiaen Matthew

*Rhaepeto Kkewe Aaen Jesus Kristus
(Luke 3.23-38)*

¹ Ikkaan tettaenin rhaepeton Jesus Kristus, iiy erhaep saengi David, iwe nge David erhaep saengi Abraham.

² Nge Abraham semaan Isaac, nge Isaac semaan Jacob, nge Jacob semaan Judah me mwaaen kkewe pwiin.

³ Nge Judah semaan Peres me Zerah (itaen ineer nge Tamar), iwe nge Peres semaan Hezron, nge Hezron semaan Ram.

⁴ Nge Ram semaan Amminadab, nge Amminadab semaan Nahshon, nge Nahshon semaan Salmon.

⁵ Nge Salmon semaan Boaz (itaen inan nge Rahab), nge Boaz semaan Obed (itaen inan nge Ruth), nge Obed semaan Jesse,

⁶ nge Jesse semaan *king* David.

Nge David semaan Solomon, iwe enaini me wooan niewe pwiuniuwaen Uriah,

⁷ nge Solomon semaan Rehoboam, nge Rehoboam semaan Abijah, nge Abijah semaan Asa.

⁸ Nge Asa semaan Jehoshaphat, nge Jehoshaphat semaan Jehoram, nge Jehoram semaan Uzziah.

⁹ Nge Uzziah semaan Jotham, nge Jotham semaan Ahaz, nge Ahaz semaan Hezekiah.

¹⁰ Nge Hezekiah semaan Manasseh, nge Manasseh semaan Amon, nge Amon semaan Josiah.

¹¹ Nge Josiah semaan Jehoiachin me mwaaen kkewe pwiin ikkiwe re asiur nong noan Babylon.

¹² Mwirin aar asiur noa Babylon: Jehoiachin semaan Shealtiel, nge Shealtiel semaan Zerubbabel.

¹³ Zerubbabel semaan Abiud, Abiud semaan Eliakim, nge Eliakim semaan Azor.

¹⁴ Azor semaan Zadok, Zadok semaan Achim, nge Achim semaan Eliud.

¹⁵ Eliud semaan Eleazar, Eleazar semaan Matthan, nge Matthan semaan Jacob.

¹⁶ Jacob semaan Joseph iwe pwiuniuwaen Maria, niewe a nainitiw Jesus iwe re faingi pwe Kristus.

¹⁷ Seig me faawu saeren aeremas saengi Abraham ngaeni David, pwan seig me faawu saeren aeremas saengi David ngaeni oaton aar asiur noa noan Babylon, pwan seig me faawu saeren aeremas saengi oaton we re asiur noa Babylon ngaeni wupwutiwen Kristus.

*Wupwutiwen Jesus Kristus
(Luke 2.1-7)*

¹⁸ Ieen wunuunun aen Jesus Kristus wupwutiw. Maria we inan a kkefoat ngaeni Joseph, nge igiwe resaaen pwiup-pwiuniuw mwo nge a pwae pwe niewe a pwoopwo reen kkemenaen Espritu Santus.

¹⁹ Nge Joseph erhai mwaaen wenewen, ese mwerhaen aessaewa Maria me weni mmweer aeremas, iwe a niunni-uwaennei epwene siusaengi, nge epwe feori rhag noan mwoanomwoan.

²⁰ Igiwe erhiuwen niunni-uwaennei wunuunun, erhai naiun Soamwoon angkenus a pwae ngaeni noan aan ttan nge a aengaeni pwe, “Joseph we tettaenin David, wosoapw mesag oamw wopwe pwiuniuwaeni Maria, pwe iiy a pwoopwo reen kkemenaen Espritu Santus.

²¹ Epwene naini erhai aetemwaaen, iwe wopwe aeita ngaeni Jesus,* pwe iga iiy epwe aemenewaar naiun aeremas saengi aar monofit.”

²² A wen oanongaen minikkeei pwe epwe pwaeritae meeta we profeta a aepesa pwe mwaeniaei Soamwoon:

²³ “Erhai aeterhooapwut epwene pwoopwo nge a naini erhai aetemwaaen,
repwe aeitae ngaeni Immanuel”, (wewen nge “Deus eno reerh”).

²⁴ Iwe oatowe Joseph a mmasetae, a feori wunuunun miniwe angkenus we naiun Soamwoon e aepesa ngaeni. Iwe a pwiuniuwaeni Maria.

²⁵ Nge Joseph ese maiur ngaeni Maria toori aan nainitiw aetewe naiun. Iwe, Joseph a aeita aetewe pwe Jesus.

2

Rhooan Emwaamw Saengi Faniuwaen Eotiw

¹ Iwe, Jesus a wupwutiw noan Bethlehem we aepinoam-won Judea wene mweoiun *king* Eroles. Ese ssiunaei mwo mwirin, nge aemweoi mwaaen saengi faniuwaen eotiw re metefaaegini wunuunun fiu ra itto Jerusalem.

² Ra aeineo pwe, “Iya iga eno *king* we aar re Jews ee iwe a supw? Aeiweri taetaen fiu we aeginnen aan ittae me eotiw. Iwe aeiya itto pwe aeipwe aesirowu.”

³ Oatowe *king* Eroles a rongorong iiy kkepas we, a toa-gun aenneew noa neetipan, pwan oanongeer noa rhoan Jerusalem.

* 1:21 Jesus wewen nge Soamwoon aemenewa

⁴ A faingiir oanongeer soamwooniir patere kkewe, me sinsein anniug kkewe nge a aeiiineeor aere iya iga Kristus epwe wupwutiw ee.

⁵ Iwe nge ra iura pwe, “Epwe wupwutiw me noan Bethlehem noan Judea. Pwe ieei wunuunun miniwe profeta we e foatogi pwe:

⁶ ‘Een Bethlehem noan faniuwaen Judah, wosoapw foakkon sessoan me neeiin taeninimwaei Judah, pwe erhai soamwoon epwe toowow saengiug, epwe nemaeni naeyi re Israel.’”

⁷ Iwe Eroles a faingiir rhoan emwaamw kkewe re ittiw me eotiw pwe repwe sseoiu noan mwoanomwoan. Iwe Eroles a aeineo firhiir oaton taetaen fiu we.

⁸ Mwirin nge a aefengaar noa Bethlehem nge a aetiwenig ngaeniir pwe, “Oawpwe noa giutta firhiy iiy aetena. Nge aere oawwa weri, oawwa aengaeniaei, pwe ngaang ipwe pwan noa aesirowu.”

⁹ Mwirin aen *king* we kkepas ngaeniir iwe nge ra noa. Iwe, oatowe re feffaaeraeg noa, ra pwan weri sefaaeniy fiu we reweri mwo me eotiw, nge a gommw noa memmweer a noa iugiu noa me wooan iimw we aetewe eno ee.

¹⁰ Oatowe reweri fiu we nge ra igin kker.

¹¹ Iwe, ra toonong noan iimw we nge ra weri aetewe me Maria iwe inan, iwe ra foatotiw me mmwan nge ra aesirowu. Mwirin ra iseni tiw niffang kkewe aar: *gold, frankincense* me *myrrh* iwe ra fang ngaeni.

¹² Iwe, Deus a kkepas ngaeniir noan aar ttan, pwe resoapw sefaaeniti Eroles, ina minne ra sefaaeniti faniuweer wooan eew noa aan.

Ra Kkewaeg Noa Egypt

¹³ Mwiriir rhoan emwaamw kkewe ra noa, nge erhai naiun Soamwoon angkenus a pwae ngaeni Joseph noan aan ttan nge a aengaeni pwe, “Eroles imwu e giutta aetena pwe epwe niy noa. Rhimwitaewopwe pwigi aetena me niemwu inan nge oawwa kkewaeg noa Egypt. Oawpwe noa no iginan toori oatona ipwe aengaeniug pwe oawpwene sefaaen.”

¹⁴ Iwe, Joseph a rhimwitaewopwe pwongin we iwe a pwigi aetewe me niewe inan nge ra kkewaeg noa Egypt.

¹⁵ Ra noa no Egypt toori aen Eroles mae noa. A wen minneeipwe epwe nnet miniwe profeta a aepesa pwe mwae-niaen Soamwoon, “Iya faingiwow mwaaen na Naeyi saengi Egypt.”

Eroles a Niir Noa Aeten Bethlehem

¹⁶ Oatowe Eroles enoa giuneei noa pwe rhoawe re ittiw me eotiw re oatupwu, nge a igin soong. Iwe, a akkiuneo pwe

repwe niir noa oanongeer aetemwaaen kka a ruwowu raegiir aere wonigaet tiw me faar me noan Bethlehem me niugiun Bethlehem. A feeori minneei, pwe e ayiureoyiura ngaeni oaton taetaen fiu we a giuneei saengiir rhoowe re ittiw me etiw.

¹⁷ A wen minneei pwe epwe pwaeritae miniwe profeta Jeremiah e aepesa pwe:

¹⁸ “Aeremas ra rongorong mweireirei saeng me noan Ramah. Rachel a saengitiir aetekkewe naiun. Iwe esa rhipino, pwe naiun ra maenoa.”

Sefaaen Toor me Egypt

¹⁹ Mwirin aaen Erotos maenoa, erhai naiun Soamwoon angkenus a pwae ngaeni Joseph noan aan ttan me Egypt

²⁰ nge a aengaeni pwe, “Wopwe rhimwitae nge wa pwigi aetena me niemwu inan iwe, oawwa sefaaen noa wooan faniuwaen Israel, pwe rhoowe re niunniwaennei repwe niy noa aetena nge ra maenoa.”

²¹ Iwe Joseph a rhimwitae, a pwigi aetewe me niewe inan nge ra sefaaeniti Israel.

²² Nge oatowe Joseph a rongorong pwe Archelaus a ssiuweniy *king* Erotos we seman me noan Judea, iwe a mesag aan epwe noa igiwe. Noan aan ttan, Deus a pwan aetiwenig ngaeni iwe ina minne a noa wooan faniuwaen Galilee reen

²³ nge a noa no noan aepinoamw we itan Nazareth. Iwe ieei minne epwe pwaeritae minikkiwe profeta kkewe re aepesa, “Epwe ffai pwe iiy re Nazareth.”

3

Aaen John Baptist Fenai

(Mark 1.1-8; Luke 3.1-18; John 1.19-28)

¹ Reen oaton naan nge John Baptist a noa noan eew *desert* me noan Judea iwe a rhaepiy tae aan fenai.

² Iwe, a iura pwe, “Oawpwe toagun saengi monofitimi, pwe Mweoiu Naaeng a arapeto.”

³ Iiy John miniwe profeta Isaiah e aepesa kkepesan iwe e iura pwe,

“Erhai a iyaekkepwas me noan *desert*:

‘Oawpwe oamoannatae ennepaen Soamwoon;

oawpwe awenecchera eew aan pwe epwe faaeraeg wooan.’”

⁴ John ememmengaag mengaag effeoor saengi iunaen *camel*, nge pwaanto na aan effeoor saengi ginin maan, nge anan mwongo ina manni neeiin waniwan ina nirhiugiun-pweon me *honey*.

⁵ Aeremas ra maegeto reen saengi Jerusalem me oanongaen pwiuneoi me noan Judea, pwan saengi oanongaen pwiuneoi me niugiun pwupwu we Jordan.

⁶ Ra pwuwafaiuw noa monofitiir, nge John a paptismusaar noan pwupwu we Jordan.

⁷ Igiwe John a weriir towuneppeer Pharisees me Sadducees kkewe reitto reen pwe epwe paptismusaar, a aengaeniir pwe, “Aaemi sowufaeng! Iyo e aengaenigaemi pwe oawpwe mmwenen kkewaeg saengi aen Deus aegaeregaer iga epwe aefengato?”

⁸ Oawssiuweniy wegitaegimi pwe epwe pwaeri noa pwe oawwa toagun saengi monofitimi.

⁹ Oawsoapw niunniuwaennei pwe oawwa taaw saengi aen Deus aegaeregaer reen aaemi aepesa pwe Abraham minne rhaepetomi. Ngaang ipwe aengaenigaemi, pwe Deus emmwenen feeori faai kaan pwe tettaenin Abraham!

¹⁰ Eew soapaen a oamoannatae pwe epwe gopiy tiw waniwan saengi waeran. Oanongaen waniwan kka ese gacch uwaan nge epwe gopogop tiw nge eaekkaerh nong noan aengaet.

¹¹ “Ngaang iya paptismusaegaemi reen rhaan pwe pwaepwaenoan aaemi toagun saengi monofitimi. Iwe nge erhai ina epwe itto me mwiriy epwe paptismusaegaemi reen Espritu Santus me aengaet. Iiy ina etaegias saengiaei, nge ese fin mwo nge aaei ipwe pwigi nokkaan.

¹² A kkemwarh aan sepwin pwe epwe aeyimweoiuw fe-saenngiy faiun saengi peeon. Iwe, epwe ioni fengaenniy faiun nge a iseni nong noan aan imwaen iseis, nge peeon epwe oatoranong noan aengaet we ese mmwenen gunnoa.”

Paptismusaen Jesus
(Mark 1.9-11; Luke 3.21-22)

¹³ Noan oaton naan nge Jesus a itto me Galilee a itto reen pwupwu we Jordan, pwe John epwe paptismusa.

¹⁴ Nge John a menaen epwe ssiuweniy aan niunniuwaen. Iwe, a aengaeni pwe, “Iureoyiureon pwe een wopwe faer paptismusaeyaei, nge meeta een wa faer noa itto reei reen?”

¹⁵ Nge, Jesus a paniuwaeni pwe, “Wopwe nigiti noa mwo ina. Pwe igina nge sipwe tapweei mwo oanongaen meeta tipaen Deus.” Iwe John a tipieew ngaeni.

¹⁶ Igiwe rhag Jesus a moann me paptismus noa, a teeotae me noan rhaan we. Iwe naaeng a sugaeg ngaeni nge a weri Espritu Santus aan ittiw nge eweei rhag erhai *dove* a ittiw soatiw woan.

17 Iwe nge eew mangiungiu a ittiw me noan naaeng a aepesa pwe, “Teei naeyi mwaaen aerhaengerhaeng, iye efin tipaei reen.”

4

Sessoaton Jesus

(*Mark 1.12-13; Luke 4.1-13*)

1 Iwe Espritu a paeninoa Jesus noan *desert* we pwe epwe noa sessoat me reen Saetan.

2 Nge mwirin aaen Jesus aecchigipin noan faaeig raaen me faaeig pwoong, iwe a meyaefi aan pecchai.

3 Iwe, Saetan we a itto reen nge a aengaeni pwe, “Aere een Naiun Deus, wopwe aengaeniir faai kaan pwe repwe ssiuwen ngaeni fenoawa.”

4 Nge Jesus a paniuwaeni pwe, “Pwapwior we eSantus e aepesa pwe, ‘Saapw fenoawa rhag minne aeremas repwe menaw reen, pwe remenaw reen oanongaen kkepas kka Deus a aepesa.’”

5 Iwe Saetan we a paeninoa Jesus Jerusalem, aepinoamw we e santus, nge a noa aiuwtae pwiuneoi we oarosaen taegias me reen *Temple* we.

6 Iwe, a aengaeni pwe, “Aere een Naiun Deus, wa oatorogotiw me igeei, pwe Pwapwior we eSantus e aepesa pwe,

‘Deus epwe akkiuneeor naiun angkenus repwe aemmwenoag.

Repwe ammwariug tae noan paiiur

pwe pirhemw mwo nge ete woas ngaeni faai.’ ”

7 Jesus a paniuwaeni pwe, “Pwapwior we eSantus epwan aepesa pwe, ‘Wosoapw soatoni Deus na oamw Soamwoon.’”

8 Mwirin Saetan we a pwan paenitae Jesus wooan eew rhug igin taegias nge a pwaeri ngaeni mweoiun feoniufan me oanongaen minikkeena nningen.

9 Iwe, a aengaeni Jesus pwe, “Oanongaen minikkeei ipwe ngaenneog, aere wopwe foatotiw me weni mmwaei nge wa oassotupw ngaeniaei.”

10 Jesus a paniuwaeni pwe, “Siunoa Saetan! Pwe Pwapwior we eSantus e aepesa pwe, ‘Wopwe oassotupw ngaeni Deus na oamw Soamwoon nge iiy rhag wopwe engaang ngaeni.’”

11 Iwe rhag nge Saetan we a siusaengi Jesus, iwe nge angkenus ra itto tipaengi.

Jesus a Rhaepiy Tae Aan Engaang Noan Galilee

(*Mark 1.14-15; Luke 4.14-15*)

12 Igiwe Jesus a rongorong pwe ra iseni nong John noan kanepwus, iiy a noa Galilee.

13 Ese notiw noan Nazareth, pwe a noa no noan Capernaum, eew aepinoamw oaron meoneoiniuniun Galilee noan faniuwaen Zebulun me Naphtali.

14 A feori minneen pwe epwe nnet miniwe profeta Isaiah e aepesa pwe,

15 “Faniuwaen Zebulun me faniuwaen Naphtali woan aanna enoa ngaeni eew meoneoiniun, peiginoan pwupwu we Jordan

me Galilee, faniuweer rhoawe re Gentiles!

16 Aeremas kkewe reno noan rorhappiung repwene weri eew seram faeregit,

nge rhoakkena reno noan rorhappiungiun faniuwaen mae ina eew seram epwene ttinitiw woar.”

17 Saengi iiy oatowe nge Jesus a rhaepiy tae aan fenai, “Oawpwe toagun saengi monofitimi, pwe Mweoiu Naaeng a arapeto!”

*Jesus a Faingiir Faaman Rhooan Fita
(Mark 1.16-20; Luke 5.1-11)*

18 Nipwaen aeen Jesus a faaeraeg ngaerhei meoneoiniuniun Galilee, a weriir riiurhai rhoaan fita nge re pwipwi, Simon (pwan itan Peter) me Andrew iwe pwiin, rewuug fetaen iig noan iiy meoneoiniun we.

19 Jesus a aengaeniir pwe, “Oaw itto tapweaei pwe ipwe oasuguuna ngaenigaemi wunuunun aaemi oawpwe fita aeremas.”

20 Oatowe rhag nge ra siusaengi wuug kkewe aar nge ra tapweei noa mwirin.

21 Jesus a pwan faaeraeg noa nge a pwan weriir riiurhai mwaaen pwipwi, James me John, ikkiwe naiun Zebedee. Reno woan pwoot we waar reen mwaaen we semeer Zebedee, re aemmwena wow wuug kkewe aar. Iwe nge Jesus a faingiir.

22 Oatowe rhag nge ra siusaengi pwoot we waar me mwaaen we semeer nge re tapweei noa mwirin.

*Jesus e Fenai me Aecchipwaar Aeremas
(Luke 6.17-19)*

23 Iwe, Jesus a mwet fetaen woan oanongaen Galilee, nge e fenai me noan wutteeer Jews we nge e fenaiuw Kkepas Mwamwaai we reen Mweoiu Naaeng, me pwan aecchipwaar aeremas kkewe eweriir mesemesaen semwaai.

24 Kkepesaen Jesus a rheoi noa woan oanongaen faniuwaen Syria, iwe aeremas ra pweipwog to oanongeer rhoa semwaai reen, rhoakka eweriir mesemesaen semwaai me metaeg, aeremas kka waen aniu, man ngong me aeremas kka re maemerhoar. Iwe, Jesus a aecchipwaar tae oanongeer.

²⁵ Re towunap aeremas kka rettapw mwirin Jesus saengi Galilee me Decapolis, saengi Jerusalem me Judea me faniuw we eno epeig me reen pwupwu we Jordan.

5

Jesus a Fenai me Weei Rhug

¹ Igiwe Jesus a weri pwuwaen aeremas kkewe, iwe a ittae wooan eew rhug a ittae mooat tiw. Rhooan kkayeo kkewe naiun ra itto reen.

² Iwe, Jesus a rhaepetae aan fenai ngaeniir:

Oanongonniuwaen Wenepwu (Luke 6.20-23)

³ “Ra wenepwu rhoan giuneei pwe ngeoniur e affayeo; pwe iir repwe mweoiuni Mweoiu Naaeng.

⁴ Ra wenepwu rhoa nee tip cchoaw nee tipeer, pwe Deus epwe rhipeer.

⁵ Ra wenepwu rhoa mesoan, pwe iir repwe faniywaeni feoniufan.

⁶ Ra wenepwu rhoan mwerhaen feeori minne epwiung me faaen mesaen Deus, pwe Deus epwe fang ngaeniir minikkena re tipaeni.

⁷ Ra wenepwu rhoa ffayeo, pwe Deus epwe pwan ffayeo ngaeniir.

⁸ Ra wenepwu rhoa nimegacch nee tipeer, pwe iir repwe weri Deus.

⁹ Ra wenepwu rhoan engaengaen oapoas, pwe Deus epwe faingiir pwe iir naiun.

¹⁰ Ra wenepwu rhoa aewwaeiraes reen aar feeori nee tipaen Deus, pwe iir repwe mweoiuni Mweoiu Naaeng.

¹¹ “Oawwenepwu aaemi rhoana reffeeoretæ kkepe-saemi, nge re aewwaeiraesigaemi, me aepesa aenneewa-gaemi pwe aegin ngaang.

¹² Oawkker nge a mwamwaai nee tipaemi, pwe a yor panuwaemi ina eigin faeregite me naaeng. Pwe ieei wunuu-nun aar pwan aewwaeiraesiir profeta kkewe regommw me mmwaemi.

Aesiig me Seram

(Mark 9.50; Luke 14.34-35)

¹³ “Aaemi oawwa taeppen rhag aesiig faaen iteer aeremesaen feoniufan. Pwe aere aesiig esa saaet no, esoapw mmwen sipwe aesaaeti sefaaeny. Iwe esa yor no ipitan, epwe aekkaerh wow pwe aeremas repwe pwuri fetaeneei.

¹⁴ “Aaemi seremaen feoniufan. Eew aepinoamw ne eno wooan eew rhug esoapw mmwennen mwoanonoa.

15 Esooar erhai aeremas ne epwe figi eew oappwun nge a iseni nong faaen eew saepiy, pwe epwe faer iseni tae wooan nenien, pwe epwe aesseremaar rhooran iimw we.

16 Epwe ieei wunuunun seremaemi aan epwe ttin memmweer aeremas, pwe repwe giuneei aaemi wegitaeg mwamwaai iwe nge reaepingepinga Semaemi me woai naaeng.

Jesus a Fenaiuw Wunuunun Anniug

17 “Oawsoapw niunniuwaennei pwe iya itto pwe ipwe oamoai noa Anniug kkewe aaen Moses me aar profeta kkewe kkepessaen fenai. Ngaang ise itto pwe ipwe itto oamoai noa, pwe ifaer itto pwe ipwe pwaeritae minna wenewenen.

18 Ennetaen, ipwe aengaenigaemi, pwe epat mwo aere efai mwo iirh me reen anniug eei nge esoapw aekkaerh noa toori aan toarop noa naaeng me soanop pwan toori aan epwe moann oanongaen meeta.

19 Iwe, ngaere erhai ese tapweei mwo nge eew anniug mwittig kkeei nge eoasuguuna ngaeniir aaemweoi pwe repwe pwan taepfen iyy, iyy epwe igin sessoan me noan Mweoiu Naaeng. Ngaere erhai epwe tapweei iyy anniug kkeei nge e oasuguuna ngaeniir aaemweoi pwe repwe pwan taepfen iyy, iyy epwe taegias me noan Mweoiu Naaeng.

20 Ipwe aengaenigaemi, pwe aaemi oawpwe mmwenen toonong rhag noan Mweoiu Naaeng igine aaemi emwamwaai wegitaegimi saengiir sinsein anniug me Pharisees kkewe.

Fenaiuw Wunuunun Soong

21 “Oawwa rongorong aar aengaeniir aeremesaen mweoiwe pwe, ‘Wosoapw nni menaw aeremas. Iyo enni menaw aeremas epwe toonong noan nenien apwiung.’

22 Nge ngaang ipwene aengaenigaemi: iyo e esoong ngaeni pwiin nge epwe noa noan nenien apwiung, nge iyo e aengaeni pwiin pwe, ‘Een esooar ipitoamw,’ epwe noa noan nenien apwiung na e taegias, nge iyo e aengaeni pwiin pwe, ‘Een wopwurh,’ nge epwe noa noan aengaetaen nifierno.

23 Iwe aere wopwe pwigitae oamw oasoar ngaeni Deus wooan antar, nge a maeng ngaeniug pwe pwiimw ecchoaw tipan woamw,

24 wa nigiti mwo oasoar we oamw weni mmwan antar nge wa sefaaen, pwe oawpwe oamwusomwus fengaen. Mwirin wa sefaaeneto pwigitae oasoar we oamw ngaeni Deus.

25 “Aere erhai a mwerhaen pwigiug noa noan nenien apwiung, wopwe mwetekkaein saeneti ffin nipwaen iga erhiuwen yor oaton, weni mmwaen iga wopwe toori nenien apwiung. Pwe oatona wopwe toori rhag nenien apwiung,

ina nge een wopwene noa reen soaw apwiung we, nge iiy epwene aefengoag noa neepaiur police, nge iir repwene iseniug nong noan kanepwus.

²⁶ Ennetaen, ipwe aengaenigaemi, pwe iginaan iga wopwe noa no etoori oamw wopwe piungiutiw oanongaen paniuwaen monofitimw.

Fenaiun Oamonofitin Maiur Ngaeniir Maan Pwiuppwiuniuw

²⁷ “Oawwa rongorong pwe re aepesa pwe, ‘Wosoapw maiur ngaeni pwiuniuwaen erhai.’

²⁸ Nge ngaang ipwe aengaenigaemi pwe: aere erhai mwaaen a pipiyy erhai rhoapwut nge a rig nee tipan ngaeni, iiy a fasiun monofit reen aan maiur ngaeni pwiuniuwaen erhai me noan nee tipan.

²⁹ Iwe, aere ifirhin mesoamw e paeniug nong noan monofit, oannusuwow wa oatoranoa. Efaer gacch igine egiufet ireiren oanongoamw epwe ppiungiunoa, mmwaen igine wunusaen oanongoamw epwe aekkaerhnong noan nifierno.

³⁰ Ngaere ifirhin poawumw e paeniug nong noan monofit, gopiy noa wa oatoranoa. Efaer gacch igine egiufet ireiren oanongoamw epwe ppiungiunoa, mmwaen igine wunusaen oanongoamw epwe toonong noan nifierno.

Fenaiuw Wunuunun Mweoinoa
(*Mat 19.9; Mark 10.11-12; Luke 16.18*)

³¹ “Epwan aepesa pwe, ‘Erhai ne e asiuw noa pwiuniuwan nge epwe ngaenneei niewe erheo pwapwiron mweoinoa.’

³² Nge ngaang ipwe aengaenigaemi: aere erhai mwaaen a mweoi saengi pwiuniuwan reen ese tiwegin meeta pweoniu, nge soapw reen aen niewe maiur ngaeni pwiuniuwaen erhai, iwe wonowe minne a monofit pwe a feori niewe epwe oamonofit reen aan pwiuppwiuniuw sefaen, nge iiy mwaaen na a pwiuniuwaeni, ina iiy a pwan feori monofit.

Fenaiuw Wunuunun Aekkepan

³³ “Oawwa pwan rongorong aar aengaeniir aeremesaen mweoiwe pwe, ‘Wosoapw misimis oamw aekkepan, nge wopwe faer feori meeta e oamw aekkepan* ngaeni Deus.’

³⁴ Nge ngaang ipwe aengaenigaemi: wosoapw aekkepan rhag. Wosoapw aekkepan faaen itaen naaeng, pwe ina nenien Deus,

³⁵ nge soapw pwan faaen itaen soanop, pwe ina aen Deus nenien aseoseon pirheen, nge soapw pwan faaen itaen Jerusalem, pwe ina aepinoamwon *King* we egin taegias.

* 5:33 *aekkepan*: ppwon faaen mesaen Deus ngaere aeremas

36 Wosoapw pwan aekkepan mwo nge faaen itaen rhimwemw, pwe wosoapw mmwenen aepwerhepwerha aere oarhonaanoa eyaen aennirhimwemw.

37 Wopwe aepesa, 'Ewaer,' aere 'Aapw,' pwe ese tiwegin minne wonaaen aepesa nge eitto saengi Man Aenneew we.

Fenaiuw Wunuunun Appaniuwaenin Aenneew
(Luke 6.29-30)

38 "Oawwa rongorong pwe reaepesa pwe, 'Aere erhai e aettiwow efai mesoamw nge paniuwaenin wa pwan aettiwow efai mesan, nge aere erhai e aettiwow efoarh ngiimw, nge paniuwaenin wa pwan aettiwow efoarh ngiin.'

39 Nge ngaang ipwe aengaenigaemi: oawsoapw paniuwaeni aen aeremas aenneew ngaenigaemi. Aere erhai epeosepa ne oawusupoamw me woan peig mwaanenmw, pwan wegeti ngaeni ne oawusupoamw me woan peig rhoopwutomw.

40 Aere erhai epwigiug noa noan nenien apwiung pwe epwe pwigi mengaagiumw mengaag, faer pwan nigiti ngaeni siketa na pwe pwan mengaagiun.

41 Aere erhai sonotaw eakkiuneog pwe wopwe pwigi ngaeni pisaegin noan eew *mile*, faer pwigi ngaeni noan ruwowu *miles*.

42 Aere erhai a tingoareog meeta oamw, ngaenneei, ngaere erhai a mwerhaen aeyae mwo meeta pisaeginw, fang ngaeni.

Fenaiuw Wunuunun Aarh Sipwe Aerhaengiir Rhoan Oapwutaegirh
(Luke 6.27-28, 32-36)

43 "Oawwa rongorong pwe reaepesa pwe, 'Oawaerhaengiir rhoan weni oaromi, nge oawoapwutaar rhoan oapwutaegaemi.'

44 Nge ngaang ipwe aengaenigaemi: oawpwe aerhaengiir rhoan oapwutaegaemi nge oawwa maeipin faaen iteer rhoakkena re aewwaeiraesigaemi,

45 pwe oawpwe no pwe naiun minna Semaemi woai naaeng. Pwe iya aettina feorian aenet woar aeremas aenneew me aeremas gacch, nge a apiungiutiw worhow woar rhoakkena reffeer mwamwaa me rhoakkena reffeer aenneew.

46 Meeta faan Deus epwe fang niffengaemi aere oawaerhaengiir rhag rhoa na re aerhaengigaemi? Pwan rhoan iyoiyon mwo *tax* nge reffeeri minna.

47 Aere weni maereyaeremi rhag minne wogaen kekkepas ngaeniir, ina nge minna wofeeri nge ese pwan wen saengiir

aaemweoi. Pwan re Gentiles mwo nge refeeri taeppen minna.

⁴⁸ Iwe aaemi oawpwe igin menaw gacch pwe oawpwe taeppen rhag gacchiun minna Semaemi wooai naaeng.

6

Fenaiuw Wunuunun Ammwew Ngaeniir Rhooa Affayeo

¹ “Oawpwe aefaenny pwe oawsoapw feeri feoffeoriun aaemi tiwegin faaen meseer aeremas pwe repwe weri meeta oawwa feeri. Pwe aere oawfeeri taeppen minneen nge oawsoapw pwigi paniuwaemi me reen minna Semaemi wooai naaeng.

² “Iwe aere oawfang ngaeni erhai man affayeo eew aegiaeg, oawsoapw aeni oangonongon minne oawwa feeri, oawte taeppeer rhoa oatupwutupw kka refeeri noan wutteer Jews me pwan woan ennap. Refeeri minneen pwe aeremas repwe ngonotiir. Ennetaen, ipwe aengaenigaemi pwe ra moannon pwigi paniuweer.

³ Ngaere oawwa fang ngaeni erhai man affayeo eew meeta, oawpwe feeri noan mwoanomwoan, pwe rhoan oaromw mwo nge resoopw giuneei wunuunun.

⁴ Ina nge epwe mwoanomwoan meeta oawwa feeri. Nge Semaemi a weri minne oawwa feeri noan mwoanomwoan epwe aesefaeni ngaenigaemi paniuwaenin.

Fenaiuw Wunuunun Maeipin

(Luke 11.2-4)

⁵ “Igin oawpwe maeipin, oawsoapw taeppeer rhoa oatupwutupw kkewe. Retipaeni repwe gaen iutae nge ra maeipin me noan wutteer Jews me noan oapwugopwugon ennap, pwe aeremas repwe weriir. Ennetaen, ipwe aengaenigaemi, pwe ra moann me pwigi paniuweer.

⁶ Ngaere aaemi oawpwe maeipin, oawpwe toonong noan aaemi sengkin, oawwa ttiy noa asam nge oawwa maeipin ngaeni Semaemi ina oawse weri. Iwe, Semaemi epwe weri minikka oawwa feeri noan mwoanomwoan epwe aesefaeni ngaenigaemi paniuwaenin.

⁷ “Ngaere oawmaeipin, oawsoapw aeyae towunepaen petenaen kkepas kka esooar faan, taeppeer re Gentiles regaen feeri minnee, pwe re maengiy pwe aar deus repwe aiusaening aar maeipin pwe iga e igin faeremworh. ⁸ Oawsoapw taeppeer, pwe Semaemi a fasiun giuneei meeta aaemi mwerhaen weni mmwaen iga aaemi oawpwe tingoar ngaeni.

⁹ Iwe, epwe ieei wunuunun aaemi oawpwe maeipin:

‘Semmaem wooai naaeng,

aemwo epwe ssoar minna itoamw ina e santus,

10 aemwo Mweoiumw epwe war,
aemwo nee tipoamw epwe no
woan feoniufan wunuunun rhag noan naaeng.

11 Ngaennegemaem mwongoi raeneei aeipwe mwongo ig-
ina.

12 Wopwe saeneti noa aemaem monofit,
wunuunun pwan aemaem aeiya saenetiir noa rhoakkena
re monofit ngaenigemaem.

13 Wosoapw oatonongegemaem noan sessoat,
nge wopwe aengesagemaem saengi Man Aenneew we.
[Pwe oamw rhag mweoi me manaman me nning esoapw iug.
Amen.]*

14 "Aere oawpwe saeneti noa aar aeremas monofit, ina
nge Semaemi wooai naaeng epwe pwan saeneti noa aemi
monofit.

15 Nge aere oawsoapw saeneti noa aar aeremas monofit,
Semaemi esoapw pwan saeneti noa aemi monofit.

Fenaiuw Wunuunun Aecchigipin

16 "Ngaere oawpwe aecchigipin, oawsoapw mas affayeo
taeppeer rhooa oatupwutupw kkewe regaen feeori. Ra mas
affayeo noa, pwe aeremas repwe giuneei pwe ra aecchigipin.
Ennetaen, ipwe aengaenigaemi, pwe ra faer moannon pwigi
paniuweer.

17 Ngaere aemi oawaecchigipin, oawpwe woraes me
kkomwuw rhimwemi,

18 pwe aeremas resoapw giuneei pwe oawwa aecchigipin,
pwe aen manna rhag Semaemi ina oawse weri minne
egiuneei. Nge Semaemi iwe egiuneei minne oawwa feeori
noan mwoanomwoan epwe aeseaaeni ngaenigaemi pani-
uwaenin.

Fenaiuw Wunuunun Wenepwuwarh me Wooai Naaeng
(Luke 12.33-34)

19 "Oawsoapw iseis wiinaemi wooaisoanop, pwe manep-
wur me iyow repwe fereei noa, nge rhooa mwoarho repwe
fereei nong nge ra pirifa.

20 Nge oawpwe faer iseis wenepwuwaemi wooai naaeng,
iga manepwur me iyow resoapw mmwenen fereei, nge rhooa
mwoarho resoapw mmwenen fereei nong nge ra pirifa.

21 Pwe pwunnomi epwe no rhag iga wenepwuwaemi eno
ee.

Fenaiuw Wunuunun Seremaen Oanong
(Luke 11.34-36)

* 6:13 Petenan eei nge esoano noan aekkaew petenan kka efoatofoat noan
kkepesaen Greek.

22 “Maas eweei rhag oappwunon oanong. Pwe aere mesoamw effat, oanongan noa oanongoamw epwe seram.

23 Ngaere mesoamw ese ffat, oanongan noa oanongoamw epwe rorhappiung. Pwe aere minna aesseremaen oanongoamw ese seram, nge epwe ifa mwo rorhappiungiun minna nee tipaemi!

Fenaiuw Wunuunun Deus me Minikka Pisaegirh
(Luke 16.13; 12.22-31)

24 “Ese mmwen erhai epwe engaang ngaeniir riiurhai maasta. Ina epwe oapwuta erhai, nge aerhaengi iwe erhai, me ngaere epwe mwamwaai ngaeni erhai, nge a aenneew ngaeni erhai. Ese mmwen oawpwe engaangappag ngaeni Deus me senaapiy.

25 “Ina minne ipwe aengaenigaemi, pwe oawsoapw aiunaeng reen mwongo me rhaan pwe oawpwe menaw reen, ngaere mengaagiun oanongaemi. Pwe meeta, ese rhaeng rhag menaw me mmwaen mwongo? Nge ese rhaeng noa rhag oanong me mmwaen mengaag?

26 Oawpipiir man aeniaen: Rese foat faiun waniwan, me giniy uwaan, pwe repwe seoiyeoninong noan soko, nge Semaemi woainaaeng efang rhag aeneer. Pwe meeta, ese temoag noa egius rhaengimi memmweer man aeniaen?

27 Eyor neemi epwe mmwenen enaenaei noa egius mewan reen aan aiunaeng?†

28 “Meeta oawaiunaeng reen mengaag reen? Oawfan ngaeni peon waniwan wunuunun aar menawtae: rese engaang, nge rese pwan ffeor mengaagiur.

29 Nge ngaang ipwe aengaenigaemi, pwe igiwe mwo *king* Solomon emenaw iwe erhai man ssow wiinan nge esooar mengaagiun ne enning noa me mmwaen peon waniwan kaan.

30 Pwe Deus minne aememmengaagiur fetinen neeiin waniwan –fetin kka eyor igina, nge resoapw nonoa naiu, pwe ra figaeg noa newumw. Pwe meeta, Deus esoapw mmwenen aememmengaagiugaemi? Me gaen mwittiginen aaemi niugiuniug!

31 “Teei minne oawsoapw aiunaeng nge aepesa pwe, ‘Meeta sipwe mwongo?’ aere ‘Meeta sipwe iuniumi?’ aere ‘Meeta sipwe memmengaag?’

32 (Pwe ikkaan minikka re Gentiles retip mwaramwar reen.) Semaemi woainaaeng egiuneei pwe oawpwe ammwenei oanongaen minikkei.

† 6:27 aere: Eyor erhai me neemi ne epwe mmwen aenaenaenoa egius taegiasan oanongan reen aan aiunaeng?

³³ Nge oawpwe gommwaen giutta minna Mweoiun Deus me minikkena emwerhaen pwe oawpwe feeri, iwe, iiy epwe ngaennegaemi oanongaen minikkei.

³⁴ Ieei minne oawsoapw aiunaengiy naiu reen, pwe naiu epwe sipegin feeri aiunaengin. Esooar ipitan sipwe oatomoga noa aiunaengiy noan eraaen me eraaen.

7

Wunuunun Apwiungiun Aeremas

(Luke 6.37-38, 41-42)

¹ “Oawsoapw apwiungiu aeremas, pwe Deus ete pwan apwiungiugaemi.

² Pwe Deus ina epwe pwan apwiungiugaemi taepfen rhag aaemi apwiungiuur aaemweoi, epwe pwan aeyae ngaeni-gaemi anniug kena oawpwan aeyae ngaeniir aaemweoi.

³ Meeta wa weri pepei na noan mesaen pwiimw, nge wose weri soapwon irae mwu noan mesoamw?

⁴ Epwe ifa wusun oamw wopwe aengaeni pwiimw pwe, ‘Itto ipwe tipwei wow pepei mwu noan mesoamw,’ iga een nge eno eew soapwon irae noan mesoamw?

⁵ Een erhai man oatupwutupw! Wopwe mmwaen tipwei wow soapwon irae mwu noan mesoamw, nge wopwe naaen weri gacchiuw oamw tipwei wow pepei na noan mesaen pwiimw.

⁶ “Oawsoapw ngaenneei gonaag minne essoar, pwe rete pwan toagun nge regiugaemi. Oawsaapw oatora ngaeniir sino aaemi faiun usowus eyor ipitan, pwe iir repwe pwuritiw faaen pirheer.

Tingoar; Giutta me Apiungiupiung

(Luke 11.9-13)

⁷ “Oawpwe tittingoar, ina nge epwe yo ngaenigaemi; oawpwe giutta, ina nge oawpwe weri; oawpwe apiungiupiung woan asam, ina nge epwe sugaeg ngaenigaemi.

⁸ Pwe iyo a tittingoar nge epwe yo ngaeni, nge iyo a giutta epwe weri, nge asam epwe sugaeg ngaeni iyo na eapiungiupiung.

⁹ Iyo neemi saam epwe ngaenneei naiun efai faai igine etingoar fenoawa?

¹⁰ Ngaere epwe tingoar erhai iig, wopwe mmwennen ngaenneei erhai sowufaeng?

¹¹ Iwe, inamwo aaemi aeremas aenneew, nge oawwa giuneei aaemi oawpwe fang ngaeniir naimi minikka emwamwaai. Epwe pwan ifa mwo nepan aaen minna Semaemi woainaaeng ngaenneer minikka emwamwaai rhoakkena re tingoar ngaeni!

12 “Oawpwe feeori ngaeniir aeremas taeppen meeta na aaemi oawmwerhaen pwe repwe feeori ngaenigaemi. Pwe ieei oawuton aaen Moses Anniug me aar profeta kkewe kkepesaen fenai.

Asam we eRheogit
(Luke 13.24)

13 “Oawtonong noan asam na erheogit! Pwe aese-maen nifierno ina erheonap, nge aan na eyan ngaeni nge emererhaeg, nge towunepaen aeremas retaeri.

14 Nge aese-maen menaw ina erheogit, nge aan na eyan ngaeni nge ewaeiraes, nge fitiman rhag aeremas kka rerhuungi.

Efoarh Waniwan me Uwaan
(Luke 6.43-44)

15 “Oawpwe aefaennigaemi reer profeta oatupwutupw kkewe, ra itto reemi taeppen rhag *sheep*, nge neetipeer a aeffitaeg ngaeni rhag *wolves* kkewe re mwoarho.

16 Oawpwe giuneer reen meeta kka ra feeori. Aekkaew irae towfanfan resoapw uwaeni uwaen *grape*, nge fetin towfanfan resoapw uwaeni uwaen *fig*.

17 Efoarh waniwan gacch epwe uwa gacch, nge efoarh waniwan aenneew epwe uwa aenneew.

18 Efoarh waniwan gacch esoapw mmwenen uwa aenneew, nge efoarh waniwan aenneew esoapw mmwenen uwa gacch.

19 Nge oanongaen waniwan kka ese gacch uwaan repwe gopogop tiw pwe repwe aekkaerhnong noan aengaet.

20 Iwe ina aaemi oawpwene giuneer profeta oatupwutupw me reen minikka ra feeori.

Ngaang Ise Giunegaemi
(Luke 13.25-27)

21 “Saapw oanongeer rhoakka refaingiaei pwe ‘Soamwoon, Soamwoon,’ nge repwe toonong noan Mweoiu Naaeng, pwe rhoawe rhag refeeori neetipaen minna Semaiei woai naaeng.

22 Ngaere enoa tooto Raaenin Apwiung, repwe gin ssow rhoa kkomwu repwe aengaeniaei pwe ‘Soamwoon, Soamwoon! Faaen itoamw minne aeiya fenaiuw minna oanoon Deus, faaen itoamw minne aeiya asiur wow towuneppeer aniu aenneew, nge pwan faaen itoamw minne aeiya feeori towunepaen kkeman.’

23 Iwe ngaang ipwene aengaeniir pwe, ‘Ngaang ise giunegaemi. Oawsiu noa me reei, aaemi man aenneew kena.’

24 “Iwe iyo kka rerongorong minikka mwaeniaei nge retapweei, ina nge re taeppen mwaaen reepiy we e aiuwtae imwan wooan porow.

25 Iwe, a piung worhow, nge a pwurutae rhaan nge a igin ngiung aaeng. Nge iiy iimw we ese toaroponoa, pwe iga e kaiutae wooan porow.

26 “Iwe nge iyo kka re rongorong minikka mwaeniaei nge rese tapweei, ina nge ra taeppen erhai mwaaen tipoarorh, e aiuwtae imwan wooan ppiy.

27 Iwe, a piung worhow nge a pwurutae rhaan nge a igin ngiung aaeng. Nge enoa toarop iimw we, nge a ifa mwo nepaen aan ffeir noa!”

Minna Nemaeniaen Jesus

28 Igiwe Jesus a moann aan aepesa minikkaan nge pwuwaen aeremas ra mwaar reen wunuunun aan fenai,

29 pwe ese taeppen sinsein anniug kkewe, pwe iiy e fenai faaen minna nemaenian.

8

Jesus e Aecchipwa Erhai Mwaaen

(Mark 1.40-45; Luke 5.12-16)

1 Igiwe Jesus a ittiw me wooan rhug we, re towunap aeremas kka re tapwetiw mwirin.

2 Iwe, erhai mwaaen eweri kaenepaai a itto reen Jesus, a foatotiw me mmwan nge a aengaeni pwe, “Menap, aere wo mwerhaen, wa aecchipwanoa aaei semwaai.”

3 Jesus e angenoa nge a geotteopa mwaaen we, nge a paniuwaeni pwe, “Ngaang i mwerhaen, wone cchipw noa!” Reen rhag oatowe nge a cchipw noa miniwe semwaaiun mwaaen we.

4 Iwe Jesus a aengaeni pwe, “Pipiyy, wosoapw aengaeni mwo nge erhai minnee, nge wa faaeraeg uwen noa reen patere pwe epwe weriug. Iwe nge a feori oasoar we Moses e akkiuneo, pwe epwe pwaeri ngaeniir aeremas pwe wa nimegacch noa.”

Jesus a Aecchipwa Erhai Rhooan Engaang Naiun Sonotaw we

(Luke 7.1-10)

5 Oatowe Jesus a toonong noan Capernaum, erhai soamwoonin sonotawaen Rome a itto nge a tingoar maaw ngaeni,

6 iwe a iura pwe, “Soamwoon, naeyi rhoon engaang a no rhag nee iimw, ese mmwenen mwagiut, nge a pwan igin metaeg.”

7 Jesus a aengaeni pwe, “Ipwe noa pwe ipwe noa aecchipwa.”

⁸ Nge soamwoonin sonotaw we a aengaeni pwe, “Soamwoon, ngaang soapw erhai man yor ipitan reen oamw wopwe itto noan imwaei. Nge wopwe aepesa rhag epat kkepas, nge rhooran engaang we naeyi epwe mamaaw tae.

⁹ Ngaang mwo nge pwan ngaang erhai mwaaen ino faaen nemaeniaen erhai e soamwoon saengiaei, nge epwan yor sonotaw kka reno faaen nemaeniaei. Ipwe aengaeni inaan pwe, ‘Wopwe noa,’ iwe a noa; iya aengaeni inaan pwe, ‘Wopwe itto,’ iwe a itto; iwe iya aengaeni rhooran akkiuneo, ‘Feeori minneen,’ iwe a feeori.”

¹⁰ Igiwe Jesus a rongorong kkepas kkeei, a riutae reen nge a aengaeniir aeremas kkewe rettawp noa mwirin pwe, “Ennetaen, ipwe aengaenigaemi, ise giuneei mwo nge erhai me noan Israel epwe ieei wusun aan niugiuniug.

¹¹ Ipwe aengaenigaemi, pwe retowunap aeremas repwe itto saengi eotiw me netow nge repwe mooat oaron Abraham, Isaac me Jacob noan gupwunnap na noan Mweoiu Naaeng.

¹² Nge rhoawe repwe no noan Mweoiu Naaeng repwe oatorawow noan rorhappiung, iga repwe sessaeng nge akkaarengi me ee.”

¹³ Iwe Jesus a aengaeni soamwoonin sonotaw we pwe, “Sefaaen noa noan imwoamw; meeta wa niugiuniug ngaeni, epwe pwan wen ngaeniug.”

Iwe rhag nge rhooran engaang we naiun a mamaaw tae.

*Jesus a Aecchipwa Towunepaen Aeremas
(Mark 1.29-34; Luke 4.38-41)*

¹⁴ Iwe, Jesus a noa reen imwaen Peter. A noa giuneei niewe inaan pwiuniuwaen Peter ewon noan gien pwe a igin pwerhikkar ginin.

¹⁵ Jesus a geotteopa rhag paiun, nge esaer noa pwerhin niewe. Mwirin niewe a rhimwitae a ittae engaang ngaeni.

¹⁶ Igiwe a nee oatofaaef noa, aeremas ra pwigiir to reen Jesus pwuwaen aeremas kkewe eyor aniu aenneew woar. Jesus a asiur wow aniu aenneew reen petenaen mwaenian, nge a aemaemaewaar tae rhoawe re semwaai.

¹⁷ A feeori minneen pwe epwe pwaeritae miniwe profeta we Isaiah a aepesa pwe, “Iiy earhiuwa aarh semwaai nge aiuferanoa mesemesaen aarh semwaai.”

*Rhooran Mwerhaen Tapweei Mwirin Jesus
(Luke 9.57-62)*

¹⁸ Igiwe Jesus a giuneei pwuwaen aeremas kkewe me oaron, a aengaeniir rhooran kkayeo kkewe naiun pwe repwe fatiun noa epeig meoneoiniun we.

19 Iwe, erhai sinsein anniug a itto reen nge a aengaeni pwe, “Sinsei, ese tiwegin iga wopwe noa ee nge ngaang ipwe tapweog.”

20 Jesus a aengaeni pwe, “Fox eyor ngeteer, man aeniaen eyor feseer, iwe nge mwaaen we Naiun Aeremas esooar eew pwiuneoi ne epwe noa wonotiw aseoseo ee.”

21 Nge erhai mwaaen pwan iiy rhoan kkayeo a aengaeni pwe, “Soamwoon, mmwaen fang mwo ngaang ipwe sefaen noa nipwaeni noa mwaaen na semaei.”

22 Jesus a paniuwaeni pwe, “Itto tapweaei nge wa nigitiir rhoa mae repwe sipegin nipwaeni aar mae.”

Jesus a Oapoassaetiw Eew Aaeng Choaw
(Mark 4.35-41; Luke 8.22-25)

23 Jesus a teeotae woan pwoot we nge rhoan kkayeo kkewe naiun ra tapweei.

24 Ese mmwaei mwo nge eew mwoor enoa itto noan meoneoiniun we, nge pwoot we a arapakkaan aan epwene mweoiusiutiw. Nge Jesus emaiur.

25 Rhoan kkayeo kkewe ra noa reen, nge ra faingitae. Ra aengaeni pwe, “Soamwoon, aemenewaegemaem pwe sipwene mae!”

26 Jesus a aengaeniir pwe, “Meeta oawwa mesag reen? Me gaen mwittiginen aaemi niugiuniug!” Iwe a iutae nge a kkepas sseor ngaeni aaeng me noa pwe repwe poas noa, iwe rhag nge a niuwanoa woai saaet.

27 Iwe, mwaaen kkewe ra riutae nge ra aepesa pwe, “Meeta taeppen aeremas een? Iye aaeng mwo me noa nge re tapweei mwaenian!”

Jesus a Aecchipwaar Riurhai Mwaaen Eyor Aniu Aenneew Wooar
(Mark 5.1-20; Luke 8.26-39)

28 Igiwe Jesus a toori faniuwaen Gadara eno epeig meoneoiniun we, a itto rhuungiir riurhai mwaaen retowow me noan paeyi kkewe. Mwaaen kkeei nge ewartae aniu aenneew wooar, nge re igin aemmesag ina minne esooar ne erhiuwen taeri aan een reen.

29 Reen rhag oaton een nge ra aekkepwestae pwe, “Naiun Deus, meeta minne wotipaeni me remaem? Wa itto pwe wopwe itto aeppaetigimaem mmwaen oaton apwiung?”

30 Eno eew chon sino re mwommwongo fetaen me peigi-noar.

31 Iwe aniu aenneew kkewe ra aeffaenipirhe ngaeni Jesus pwe, “Aere wopwe asiugemaem, fangenoa aemaem neeiir sino kenaan.”

32 Jesus a aengaeniir pwe, “Oawnoa!” Iwe ra toowow me wooar mwaaen kkewe nge ra noa wartae wooar sino kkewe.

Iwe cchon sino kkewe ra fattapw tiw wenepengin rhug we eittiw noan meoneoiniun we ittiw moapw noa.

³³ Mwaaen kkewe rhoan ffooanon sino ra fattapw noa ra ittiw nee aepinoamw, iwe ra ittiw floangei oanongan meeta kkewe a wen ngaeniir mwaaen kkewe ewartae aniu aenneew woor.

³⁴ Iwe oanongeer rhoan aepinoamw we ra noa pwe repwe noa rhuungi Jesus. Nge igiwe ra weri, ra aeffaenipirhe ngaeni pwe epwe siusaengi miniwe faniuweer.

9

Jesus a Aecchipwa Erhai Mwaaen Maemerhoar (Mark 2.1-12; Luke 5.17-26)

¹ Jesus a teeotae woan pwoot we nge a sefaaeniti miniwe aepinoamwon iwe eno epeig meoneoiniun we.

² Aaemweoi aeremas ra pwigito reen erhai mwaaen emaemerhoar ewon noan epeo giegiy. Igiwe Jesus a weri nepaen aar niugiuniug rhoawe, a aengaeni mwaaen we emaemerhoar pwe, “Aetemaegin naeyi! Monofitimw a mwusunoa.”

³ Iwe aaemweoi sinsein anniug kkewe ra niuwaennei pwe, “Mwaaen een e aepesa aenneewa Deus!”

⁴ Nge Jesus a giuneei niunniuwaen kkewe aar nge a aengaeniir pwe, “Meeta oaw niuwaennei minikken a aenneew reen?”

⁵ Emererhaeg pwe sipwe aepesa pwe, ‘Monofitimw a mwusunoa,’ aere sipwe aepesa pwe, ‘Iutae wa faaeraeg noa?’

⁶ Iwe, ngaang ipwe pwaeri ngaenigaemi pwe mwaaen we Naiun Aeremas eyor maemaewan woan soanop pwe epwe oamwusa noa monofit.” Iwe, a aengaeni mwaaen maemerhoar we pwe, “Iutae, pwigi giemw nge wa noa noan imwoamw.”

⁷ Iwe mwaaen we a iutae nge a noa noan imwan.

⁸ Igiwe aeremas ra weri miniwe, ra mesag tae nge ra aepingepinga Deus reen aan ngaenneer aeremas taeppen mamaaw we.

Jesus a Faingi Matthew (Mark 2.13-17; Luke 5.27-32)

⁹ Jesus a siusaengi igiwe nge a weri erhai rhoan iyoiyon tax itan Matthew, emooat noan aan *office*. Jesus a aengaeni pwe, “Itto tapweaei.”

Iwe Matthew a iutae nge a tapweei noa mwirin.

¹⁰ Igiwe Jesus a mwongo noan imwaen Matthew, nge retowunap rhoan iyoiyon tax me rhoa monofit ra itto tapweei Jesus me rhoan kkayeo kkewe naiun reen *table* we.

¹¹ Oatowe aemweoi Pharisees kkewe ra giuneei miniwe, ra aeyegiir rhoon kkayeo kkewe naiun pwe, “Meeta faan naimi sinsei a mwongo ngaeniir rhoon iyoiyon *tax* me rhooa monofit kena reen?”

¹² Jesus a rongorong aar kkepas nge a paniuwaeniir pwe, “Rhoakka rese semwaai rese noa reer toagota, pwe rhoakka refaer semwaai.

¹³ Oawnoa giutta faaen kkepas een me noan Pwapwior we e Santus: ‘Faayeow minne ngaang itipaeni, nge saapw maan kkena aar oasoar ngaeniaei.’ Ngaang ise itto pwe ipwe faingiir rhooa mwamwaai, pwe faer rhooa monofit.”

Kkepas Aeiineon Aecchigipin

(Mark 2.18-22; Luke 5.33-39)

¹⁴ Iwe rhoon kkayeo kkewe naiun John Baptist ra itto reen Jesus nge ra aeiineow pwe, “Meeta faan aemaem me Pharisees aiseoaw aecchigipin, nge rhoon kkayeo kkomwu noawumw rese aecchigipin reen?”

¹⁵ Jesus a paniuwaeniir pwe, “Oaw niuwaennei nge epwe aenneew tipeer rhoakkena re itto reen gupwunon appwiuniupai we igiwe *bridegroom* we erhiuwen no reer? Aapw! Nge epwe itto raaenin na repwe pwiigi saengiir *bridegroom* we, nge ina oatona repwene aecchigipin noa.

¹⁶ “Esooar erhai epwe aeyae mengaag ffeo aan epwe pinisa tae wooan erheo mengaag maerhiy, pwe mengaag ffeo we epwe fereei noa mengaag maerhiy we, nge miniwe taeringen epwene faer gin temoag noa.

¹⁷ Esooar erhai epwe aenianong *wine* ffeo noan nenien *wine* maerhiy, pwe ina epwe pwoanoa nge *wine* we enipiwow nge nenien *wine* we epwe ffeir noa. Pwe faer *wine* ffeo epwe itinong noan nenien *wine* ffeo, pwe ina nge oanongaen repwe gacch.”

Jesus eAemenewaetae Erhai Aeterhooapwut Nge eAecchipwatae Erhai Rhoopwut

(Mark 5.21-43; Luke 8.40-56)

¹⁸ Igiwe Jesus e aepesa minneen, erhai soamwoonin Jews a itto reen, a foatotiw mmwan nge a aengaeni pwe, “Naeyi aeterhooapwut a maenoa igina, nge wopwe itto rhag iseni tae poawumw wooan, pwe epwe menaw.”

¹⁹ Iwe, Jesus a iutae nge a tapweei noa, nge rhoon kkayeo kkewe naiun ra pwan tapweei.

²⁰ Eno erhai rhoopwut neeiir eseiug aan peitaeg noa noan seig me ruwowu raeg, a itto me niugiusagiuriun Jesus nge a geotteopa soapwon mengaagiun.

²¹ A niuwaennei nong neetipan, “Aere i geotteopa rhag mengaagiun nge ipwe mamaaw tae.”

²² Iwe, Jesus a toagun, a weri niewe nge a aengaeni pwe, “Naeyi, wopwe aetemaegin, oamw niugiuniug minne a aecchipwoag tae.” Reen rhag oatowe nge rhoopwut we a mamaaw tae.

²³ Mwirin Jesus a noa noan imwaen soamwoon we. Nge a weriir rhoan arhiuwerhiuw kkewe me pwuwa we ra igin saeng,

²⁴ a aengaeniir pwe, “Oawtowow oanongaemi! Aeterhooapwut een nge ese mae, pwe aan rhag maiur!” Iwe ra kekkaei aegini.

²⁵ Nge igiwe aeremas ra toowow niugiun, Jesus a toonong noan sengkin we aaen aeterhooapwut we nge a ammwarihuw tae paiun, iwe a rhimwitae.

²⁶ Iwe, fioangon miniwe a rheoi noa woan oanongaen faniuw we.

Jesus a Aecchipwaar Riiurhai Mwaaen Masparh

²⁷ Oatowe Jesus a siusaengi pwiuneoi we, riiurhai mwaaen masparh ra pwan tapweei noa mwirin. Ra aepwesaegini pwe, “Naiun David, wopwe faayeogemaem!”

²⁸ Iwe, igiwe Jesus a toonong noan iimw we, mwaaen masparh kkewe ra itto reen. Jesus a aeineeor pwe, “Oawniugiuniug pwe ngaang ipwe mmwenen aeffetanao mesaemi?”

Iir ra paniuwaeni pwe, “Ooa, menap.”

²⁹ Iwe Jesus a geotteopa meseer nge aepesa pwe, “Meeta oaw niugiuniug ngaeni, epwe pwan wen ngaenigaemi.”

³⁰ Iwe, a ffatenoa meseer. Nge Jesus a igin ammwir ngaeniir pwe resoapw aengaeni mwo nge erhai miniwe a wen.

³¹ Nge iir ra faer noa arheoiuwa noa wunuunun Jesus woan oanongaen faniuw we.

Jesus a Aecchipwa Erhai Mwaaen Ese Mmwenen Kkepas

³² Igiwe mwaaen kkewe ra noa, aaemweoi aeremas ra pwigito reen Jesus erhai mwaaen ese mmwenen kkepas pwe ewartae aniu aenneew woan.

³³ Reen rhag oaton we Jesus a oatowowuw aniu aenneew we saengi mwaaen we, nge a mmwenen kkepas. Oanongeer aeremas kkewe ra mwaar reen nge ra aepesa pwe, “Esaen yor mwo giuneyarh taeppen minnee me noan Israel.”

³⁴ Nge Pharisees kkewe ra aepesa pwe, “Soamwoonin aniu aenneew minne efang maemaewan pwe epwe asiur noa aniu aenneew.”

Jesus e Faayeow Ngaeniir Aeremas

³⁵ Jesus a faeraeg fetaen woan oanongaen aepinoamw me pwugos kkewe. Efenaiuw me noan wutteeer Jews, efenaiuw Kkepas Mwamwaai we reen Mweoiu Naaeng me

pwan aecchipwaar aeremas kkewe eweriir mesemesaen semwaai.

³⁶ Nge igiwe a weriir pwuwaen aeremas kkewe, nge a igin faayeeor, pwe ra no noan affayeo me waeiraes taeppen *sheep* kkewe esooar no rhoan neginegiir.

³⁷ Iwe a aengaeniir naiun rhoan kkayeo pwe, “A towunap uwaen menaai, nge re fitiman rhag rhoan gin.

³⁸ Oaw maeipin ngaeni soamwoonin maat we pwe epwe fangenoa rhoan engaang pwe repwe giniiy oanongaen uwaen maat we aan.”

10

Oapostonus Kkewe Seig me Riiurhai

(Mark 3.13-19; Luke 6.12-16)

¹ Jesus a faingi fengaenniir rhoawe seig me riiurhai rhoan kkayeo nge a ngaenneer maemaeweer pwe repwe asiuw aniu aenneew me aecchipwaar tae aeremas kka eweriir mesemesaen semwaai.

² Ikkaan iteer oapostonus kkewe seig me riiurhai: mmwan nge Simon (pwan itan Peter) me Andrew we pwiin; James we pwiin John, ikkiwe naiun Zebedee;

³ Philip, Bartholomew, Thomas me Matthew iwe rhoan iyoiyon *tax*; James we naiun Alphaeus iwe me Thaddaeus;

⁴ Simon, iwe erhai man menat,* me Judas Iscariot, iwe e fangenoa tinnimaen Jesus.

Aar Engaang Rhoawe Seig me Riiurhai

(Mark 6.7-13; Luke 9.1-6)

⁵ Jesus a fangenoa rhoawe seig me riiurhai nge a ammwir ngaeniir pwe, “Oawsoapw noa noan faniuweer re Gentiles aere noan aepinoamwoor re Samaria.

⁶ Nge oawpwe faer noa reer aeremesaen Israel pwe iir minne ra weer *sheep* kkewe ra mwaenirh noa.

⁷ Oawnoa nge oawwa fenaiuw kkepas een, ‘Mweoiu Naaeng a arapeto!’

⁸ Oaw aecchipwaar rhoa semwaai, oaw aemenewaar tae manimae, oaw aecchipwaar rhoa kaenepaai iwe me oaw towowuur aniu aenneew. Oawwa pwigi minnee me reei nge esooar paniuwan, nge oawpwene noa fang nge esoapw pwan yor paniuwan.

⁹ Nge oawsoapw pweipwog eew taeppen senaapiy noan pwoarsaemi;

¹⁰ oawsoapw pwan pweipwog pwetoaw me ssiuwenin mengaagiumi me nokka me yomi. Pwe rhoan engaang ina epwe toowow paniuweer.

* **10:4** *man menat*: erhai mwaaen e fiow ngaeniir sonotawaen Rome faaen itaen faniuwan.

11 “Ngaere oawwa toori eew aepinoamw aere pwugos, oawwa pipiiy iyo e tipaeni epwe aetiwaegaemi, iwe oawwa noa no reen toori aaemi oawpwene siusaengi pwiuneoi we.

12 Ngaere oawtonong noan eew iimw, oawwa aengaeniir pwe, ‘Oapoas epwe no reemi.’

13 Aere aeremesaen iimw we re aetiwaegaemi, nigititiw kkepessaen oapoas we aaemi reer. Nge aere rese aetiwaegaemi, nge oawwa pwigi sefaaeny kkepessaen oapoas we aaemi.

14 Iwe, aere rhoan eew aepinoamw me aere eew iimw rese aetiwaegaemi aere aiussaening ngaenigaemi, oaw siusaengi pwiuneoi we nge oawwa iurhiugi noa ppweoniun me woan pirhemi.

15 Ennetaen, ipwe aengaenigaemi pwe noan Raaenin Apwiung nge Deus epwe faayeow re Tyre me Sidon memmweer aeremesaen aepinoamw naan.

Aewwaeiraes Kka Epwe Tooto
(Mark 13.9-13; Luke 21.12-17)

16 “Aiussaening, ngaang ipwene aefengaegaemi wow taeppeer *sheep* reno neeiir cchon *wolves*. Nge oawpwepwe aetipaecchemegaemi taeppen sowufaeng nge oawpwan tipipoas taeppeer *doves*.

17 Oawpwan aefaennigaemi pwe imwu eyor aeremas kka repwe torofigaemi nge re paenigaemi nong noan nenien apwiung, nge repwe pwan wirhigaemi me noan wutteer Jews.

18 Pwe reen minne itaei, minne repwene paenigaemi noa mmweer soamwoon me *king*, pwe oawpwepwe aengaeniir me re Gentiles Kkepas Mwamwaa we.

19 Iwe aere ra isenigaemi nong noa nenien apwiung, oawsoapw pireiir reen meeta oawpwepwe aepesa me wunuunun aaemi aepesa, pwe petenaen kkepas kka oawpwepwe aepesa epwe toorigaemi noan oaton naan.

20 Pwe saapw aaemi minne oawkkepas, pwe Ngeoniun minna Semaemi minne oawwa aepesa mwaenian.

21 “Aeremas repwene afangmaei noa pwiir ngaeni maenoa, nge saam repwe pwan feeori taeppen minneen ngaeni naiiur; nge naiiur repwene pwan appaniuwaeni semeer me ineer nge re fangenoa iir pwe repwe noa niir noa.

22 Onongeer aeremas nge repwe oapwutaegaemi pwe faaen itaei. Nge iyo na e aetemaegin ngaeni minna oaros nge epwe menaw.

23 Iwe, aere re aewwaeiraesigaemi me noan eew aepinoamw, siunoa noan ina eew. Ennetaen, ipwe aengaenigaemi, pwe epwe itto mwaen we Naiun Aeremas

nge aemi oawsogoppaen moann reen aemi engaang wooan oanongaen aepinoamwon Israel.

²⁴ “Esooar erhai aetei suguun epwe taegias saengi aan sinsei, nge esooar erhai rhoan akkiuneo epwe taegias saengi aan maasta.

²⁵ Ieei minne erhai aetei suguun epwe kker tipan aan epwe aeffitaeg ngaeni aan sinsei, nge erhai rhoan akkiuneo epwe kker tipan aan epwe aeffitaeg ngaeni aan maasta. Aere ra aeita ngaeni soamwoonin aeinang we pwe Beelzebul, epwe ifa mwo aenneewan aar repwe faingi ngaeniir oanongeer rhoan aeinang we.

Iyo Sipwe Mesagiu
(Luke 12.2-7)

²⁶ “Iwe, oawsoapw mesagiiur aeremas. Pwe oanongaen meeta ewop epwene pwae noa, iwe me oanongaen kkepas mwoanomwoan repwene giuneei.

²⁷ Meeta ngaang iya aengaenigaemi noan rorhappiung, oawpwe aepesatae noan seram. Nge meeta oawrongorong noan saeningaemi oawpwe aekkepwas aegini noa me wooan wungaen iimw.

²⁸ Oawsoapw mesagiiur rhoamwu regaen niy noa oanongaemi, pwe ina resoapw mmwenen niy noa ngeoniumi. Nge oawpwe faer mesagiu Deus, iwe emmwenen niy noa oanongaemi me ngeoniumi noan nifierno.

²⁹ Reen efai rhag checcha nge wa mmwenen chuwaiuw riiurhai nicchok, nge erhai mwo nge ese ppiungiutiw nee ppweon aere Semaemi ese iura.

³⁰ Iwe nge aemi, oanongaen aennirhimwemi mwo nge Deus epaengi.

³¹ Ina oawsoapw mesag, pwe aemi ina eyor ipitaemi memmweer towuneppeer nicchok!

Pwuwafaai me Oasoarhoawuna Kristus
(Luke 12.8-9)

³² “Rhoakka re aepesa pwe iir naeyi me neeiir aeremas, ngaang ipwe pwan feeori ngaeniir me weni mmwaen Semaie wooai naaeng.

³³ Nge iyo kena resaep saengiaei me neeiir aeremas, ngaang ipwe pwan saep saengiir me weni mmwaen Semaie wooai naaeng.

Saapw Oapoas pwe Efoarh Saeitan
(Luke 12.51-53; 14.26-27)

³⁴ “Oawsoapw maengiy pwe iya itto pwe ipwe pwigito oapoas wooan soanop. Aapw, ise itto pwe ipwe pwigito oapoas, pwe faer efoarh saeitan.

³⁵ Pwe ngaang itto ipwe feeoriir aetemwaaen repwe aengi-maaw ngaeniir semeer, me aeterhooapwut repwe aengi-maaw ngaeniir ineer, pwiuniuwaen naiiur repwene aengi-maaw ngaeniir inaen pwiuniuweer;

³⁶ nge rhooran oapwutoag repwe itto saengi rhag rhooran oamw famini.

³⁷ “Rhoakka etemoag aerhaengerhaengin semeer me ineer me mmwaei, ese fin repwe no pwe naeyi rhooran kkayeo. Nge rhoakka etemoag aerhaengerhaengin naiiur me mmwaei, ese pwan fin repwe no pwe naeyi rhooran kkayeo.

³⁸ Iwe, rhoakka rese aiufera aar kurus nge retapweeito mwiriy, nge ese fin repwe no pwe naeyi rhooran kkayeo.

³⁹ Nge rhoakkena remaengiy repwe kkemwarh wooan meneweer, epwe ppiung saengiir, nge rhoakkena eppiung saengiir meneweer pwe faaen itaei nge repwe weri sefaaeny.

Paniuwaenin
(Mark 9.41)

⁴⁰ “Iyo eatiwaegaemi, eatiwaeyaei, nge iyo a aetiwaeyaei, a pwan aetiwa iwe efangeto ngaang.

⁴¹ Iyo a aetiwa erhai profeta pwe iga iiy erhai profeta, epwe yor paniuwaenin me reen minna paniuwaen. Nge iyo a aetiwa erhai aeremas mwamwaai pwe iga iiy erhai aeremas mwamwaai, epwe yor paniuwaenin taeppen erhai aeremas mwamwaai.

⁴² Aere erhai a aiuniu ngaeni erhai man sessoan kka rhoanuiwaei eew kkepaen rhaan patapat pwe iga iiy erhai rhoanuiwaei, ennetaen, ipwe aengaenigaemi, iiy epwe yo ngaeni minna paniuwaenin.”

11

Rhooran Pweipwogin Kkepas Kkewe Naiun John
(Luke 7.18-35)

¹ Igiwe Jesus a moannon akkiuneeor rhooran kkayeo kkewe naiun iwe seig me riiurhai, a noa saengi pwiuneoi we iwe a noa fenai me oaronga fetaeneei wooan oanongaen aepinoamw kkewe pwiuneoi we.

² Nge oatowe John Baptist a rongorong me noan imwaen kanepwus wunuunun engaang kkewe Kristus a feeorin, a fangenoa aemweoi rhooran kkayeo kkewe naiun reen.

³ Iwe, ra aeineow Jesus pwe, “Een miniwe reiura pwe epwe itto, aere aeipwe wewweti erhai?”

⁴ Jesus a paniuwaeni pwe, “Oawsefaaen noa oawwa aengaeni John minne oawwa rongorong me weri:

⁵ rhooa masparh ra ffatenoa, rhooa pirhemaer ra faaeraeg, rhooa kaenepaai ra gacch noa, rhooa saeningapiung ra rongorong, rhooa mae ra menawtae, nge Kkepas Mwamwaai we a fenai ngaeniir rhooa affayeo.

⁶ Ifa mwo wenepwuweer rhooa se tip mwaramwar reei!"

⁷ Oatowe rhoowe naiun John ra noa, Jesus a kkepas ngaeniir aeremas kkewe reen wunuunun John: "Igiwe oawwa noa reen John noan *desert* we, meeta minne oawniuwaennei pwe oawpwe noa weri? Efoarh fetin emwoaroro reen aaeng?"

⁸ Meeta minne oawnoa pwe oawpwe weri? Erhai mwaaen ememmengaag tae mengaag nning? Aeremas kka e ina wusun mengaagiur nge reno noan imwaen *king!*

⁹ Aengaeniaei, meeta rhag oawnoa pwe oawpwe weri? Erhai profeta? Ooa, ennetaen, oawwa weri erhai etaegias saengi erhai profeta.

¹⁰ Pwe John miniwe Pwapwior we eSantus eiura pwe, 'Deus a kkepas, ngaang ipwene fangetiw naeyi rhoaan pweipwogin kkepas me weni mmwoamw pwe epwe noa maeneti ennepoamw.'

¹¹ Ennetaen, ipwe aengaenigaemi, pwe John Baptist ina etaegias saengiir aeremas towunap kka reno woan soanop. Iwe nge manna oarosaen git me noan Mweoiu Naaeng ina etaegias saengi John.

¹² Saengi rhag oaton we John Baptist a rhaepetae aan fenai toorito igina nge miniwe Mweoiu Naaeng a toonong noan waeiraes pwe aeremas aenneew ra fiow woan pwe repwe nemaeni.

¹³ Toorito oatowe John a no, oanongeer profeta me Anniug kkewe aen Moses ra aepesa wunuunun miniwe Mweoiu Naaeng;

¹⁴ nge aere oawwa niugiuw aar fenai, John nge iiy Elijah, iwe ra fasiun aepesa noa pwe epwe itto.

¹⁵ Iyo eyor saeningan, epwe rongorong!

¹⁶ "Iwe, meeta ipwe aweweei ngaeniir aeremesaen mweoi e igina? Ra aeffitaeg ngaeniir rhag wonigaet kkewe remooat noan nenien chuwaai. Eew mwiirh nge reiyaekkepwas ngaeniir aaemweoi,

¹⁷ 'Aemaem aeiya pwan kker ngaenigaemi, nge aemi oawse maan! Aemaem aeiya arhiuwerhiuw, nge aemi oawse saeng!'

¹⁸ Igiwe John a itto, e aecchigipin nge ese pwan iun *wine*, nge aeremas ra aepesa pwe, 'Iiy eyor aniu aenneew woan!'

¹⁹ Nge igiwe Naiun Aeremas eitto, a mwommwongo nge eiun, nge aeremas ra aepesa pwe, 'Oawpipiiy mwaaen

een! Iiy erhai mwaaen mwongonap me iun *wine*, nge maereyaereer rhoan iyoyon *tax* me rhoa monofit.' Iwe nge minna repiaen Deus reepiy a pwae noa pwe ennet reen meeta a feori."

Aepinoamw Kkewe Rese Niugiuniug
(*Luke 10.13-15*)

²⁰ Aeremesaen aepinoamw kkewe Jesus a feori towunepaen kkeman kkewe aan me ee ina rese toagun saengi aar monofit, iwe Jesus a soong ngaeniir.

²¹ "Ifa mwo aenneewan ngaenigaemi, aemi rhoan Chorazin me Bethsaida! Aere kkeman kka refeeri me wooan igei minne refeeri me wooan Tyre me Sidon, ina nge aeremesaen aepinoamw kenaan a ssiunaei rhag aar memmengaag tutu nge re oamworomwor tae fenang woar, pwe epwe pwae noa aar toagun saengi monofit!

²² Ipwe aengaenigaemi pwe noan Raaenin Apwiung nge Deus epwe faayeow re Tyre me Sidon me mmwaemi.

²³ Nge een Capernaum! Wotipaeni wopwe tooritae naaeng? Een wopwe ppiungiutiw noan nifierno! Aere kke-man kkewe effeew me reemw epwan ffeew me noan Sodom, epwe rhiuwen no rhag igina.

²⁴ Ipwe aengaenigaemi, pwe noan Raaenin Apwiung nge Deus epwe faayeow re Sodom me mmwoamw."

Oaw Itto Aseoseo Reei
(*Luke 10.21-22*)

²⁵ Reen oatowe nge Jesus a aepesa pwe, "Semaedi, Soamwoonin naaeng me soanop, iya ngaenneog oamw aerhigerhig, pwe wa oapanoa minikkei saengiir rhoa reepiy me metefaaegini, nge wa pwaeri ngaeniir rhoa kkewe reweer wonigaet.

²⁶ Ennet, Semaedi, pwe ina minna wo tipaeni epwe wen."

²⁷ "Semaedi a ngaenneaei oanongaen meeta. Esooar erhai ne e giuneei minna Naiun, pwe aeggaen minna Seman rhag, nge esooar erhai e giuneei minna Seman, pwe iiy rhag minna Naiun, iwe me iyo kena minna Naiun a finiir tae pwe epwe pwaeri ngaeniir.

²⁸ "Oawitto reei oanongaemi rhoakkena oawwa aerhig reen pweipwogin mini choaw, pwe ngaang ipwe aseoseogaemi.

²⁹ Oawpwigi *yoke** e aaei nge oawwa iseni tae woami, nge oawwa kapwiung saengiaei, pwe ngaang itip maniuweniuw nge imesoanosan; pwe ina nge aemi oawpwe meyaefi aseoseo.

* **11:29** *yoke*: eew soapwon irae eno wooan iuweer riiurhai wakke, pwe e ammarhiu fengaenniir igine repwe feeri eew engaang choaw.

³⁰ Pwe yoke e ngaang ipwene fang ngaenigaemi iye emererhaeg, nge minne ipwe iseni tae woami oawpwe aiufera iye eppaen.”

12

Kkepas Aeiineon Sabbath (Mark 2.23-28; Luke 6.1-5)

¹ Ese ssiunaei weni mwirin aalen Jesus faaeraeg nong noan aekkaew maetaen *wheat* wooan raaenin Sabbath. Nge rhoan kkayeo kkewe naiun ra pecchai, iwe ra rhaepetae aar ferhiy iuwoapwon *wheat* kkewe nge ra angi minikkewe faiun.

² Nge igiwe Pharisees kkewe ra weri miniwe, ra aengaeni Jesus pwe, “Pipiiy, ese gacch ngaeni aarh anniug pwe rhoan kkayeo kkomwu noawumw repwe feeori minna wooan Sabbath!”

³ Jesus a paniuwaeniir pwe, “Oawse aeraegi mwo miniwe David efeori noan oaton we iiy me rhooa kkewe naiun ra pecchai?”

⁴ A toonong noan imwaen Deus, nge iiy me mwaaen kkewe rhoaniuwan ra mwongo fenoawa kkewe ra aeni oasoar ngaeni Deus, inamwo igiwe e aenneew ngaeni anniug pwe repwe mwongo, pwe patere rhag minne emmwen pwe repwe mwongo fenoawa kkewe.

⁵ Aere oawse aeraegi miniwe effoat noan aalen Moses anniug pwe oanongaen raaenin Sabbath nge patere kkena noan *Temple* we re fereeii anniugiun Sabbath, nge rese monofit?

⁶ Ipwe aengaenigaemi pwe erhai minne eno igeei e taegias saengi *Temple*.

⁷ Pwapwior we eSantus eiura pwe, ‘Faayeow minne ngaang itipaeni, nge saapw maan kkena aar oasoar ngaeniaei.’ Aere aaemi oawgiuneei faaen kkepas een, ina nge oawsoapw oamonofitiir aeremas kena rese monofit.

⁸ Pwe mwaaen we Naiun Aeremas minne Soamwoonin Sabbath.”

Mwaaen we eMaemerhoar Paiun (Mark 3.1-6; Luke 6.6-11)

⁹ Iwe, Jesus a noa saengi pwiuneoi we nge a toonong noan wutteer Jews we,

¹⁰ nge eno erhai mwaaen e maemerhoar paiun. Aemweoi aeremas repwan no igiwe, ra giutta aekkaew rhaepin minikka repwe oaturu Jesus wooan. Iwe ra aeiineow Jesus pwe, “Emwamwaa i ngaeni aarh anniug pwe repwe aecchipwa erhai wooan raaenin Sabbath?”

11 Jesus a paniuwaeniir pwe, “Epwe ifa aere erhai naimi *sheep* a ppiungiunong noan eew niipw wooan raaenin Sabbath? Oawsoapw pwiigi pwe oawpwe taiuwtae?”

12 Pwe erhai aeremas nge eyor ipitan mmwaen erhai *sheep*! Iwe aarh anniug a saeneti aarh sipwe feori minne emwamwaai wooan raaenin Sabbath.”

13 Mwirin Jesus a aengaeni mwaaen we emaemerhoar paiun pwe, “Aeitiwow poawumw.”

Iwe, a aeitiwow paiun nge a mamaaw noa pwan taeppen rhag ina epai.

14 Iwe Pharisees kkewe ra siunoa pwiungiuw wunuunun aar repwe niy noa Jesus.

Deus a Fini Jesus pwe Naiun Rhoan Akkiuneo

15 Oatowe Jesus a rongorong pwiungiupwiung we aar, a noa saengi pwiuneoi we, nge pwuwaen aeremas ra ttapw noa mwirin. Iwe a aecchipwaar oanongeer rhoa semwaai

16 nge a aengaeniir pwe resoapw fioangei ngaeniir aeremas wunuunun iiy.

17 A feori minneen, pwe epwe pwaeritae miniwe Deus a aengaeni profeta Isaiah:

18 “Teen naeyi rhoan akkiuneo iya finitae, iiy minne i aerhaengi, iya igin kker reen.

Ngaang ipwene fangetiw aaei Espritu wooan,

nge iiy epwe arheoiuwa noa wunuunun aaei apwiung ngaeniir oanongaen faniuw.

19 Esoapw aengimaw aere apwas, aere kkepas temoag wooan aan.

20 Esoapw gopiy mwo nge efoarh fetin ppwoar, me pwan gunuw noa naam na e oamoaruporup.

Iiy epwe oarhorho ngaeni toori ssiaaen aan mmwen ngaeni oapoas na efin pwe epwe yo ngaeni oanongaen faeinaengiy.

21 Ina nge oanongaen faniuw repwene aersetip wooan.”

Jesus me Beelzebul

(Mark 3.20-30; Luke 11.14-23)

22 Iwe aemweoi aeremas ra pwigito reen Jesus erhai mwaaen parh nge ese pwan mmwennen kkepas, pwe ewartae aniu aenneew wooan. Jesus a aecchipwa mwaaen we, iwe a mmwennen kkepas me fannoa.

23 Pwuwaen aeremas kkewe ra riutae reen miniwe Jesus a feori nge ra aeineo pwe, “Meeta, epwe ieei mwaaen we naiun David?”

24 Igiwe Pharisees ra rongorong kkepas kkewe, ra aepesa pwe, “Emmwennen asiur noa aniu aenneew pwe iga rhag

Beelzebul we soamwoonin aniu aenneew minne efang mae-maewan.”

²⁵ Jesus a giuneei aar niunniuwaen nge a aengaeniir pwe, “Aere eew faniuw a ginigin fesaeng me fiow fengaen, faniuw een esoapw ssiunaei. Aere rhooran eew aepinoamw aere eew famini repwe ginigin fesaeng me fiow fengaen, nge repwe mwetoar fesaeng.

²⁶ Iwe aere rhooran mweoiun Saetan ra fiow fengaen ina nge ra fasiun mwetoarotoar, nge minna mweoiun epwe iug noa!

²⁷ Ngaere igine e ieei wunuunun aaei asiur noa, iwe nge eifa wusun aar rhoora kkomwu rhoaniuwaemi asiur noa aniu aenneew? Rhoora kkomwu rhoaniuwaemi ra pwaeritae pwe oaw mwaerhei!

²⁸ Aapw, pwe Ngeoniun Deus a ngaenneaei maemaewaei aaei ipwe asiur noa aniu aenneew. Ieei minne a pwaeri noa pwe minna Mweoiun Deus a faer toorigaemi.

²⁹ “Esooar erhai epwe tongaeni toonong noan imwaen erhai mwaaen mamaaw pwe epwe pwigi noa pisaegin; aere epwe mmwaen geoni noa mwo mwaaen we, ina nge epwapw mmwenen piraf me noan iimw we.

³⁰ “Erhai ne ese tapweaei, nge iiy rhoora aenneew ngaeniaei, nge erhai ese tipaengiaei reen ioi, iiy erhai rhooran oammwoatoar.

³¹ Faaen minneeipwe aengaenigaemi: aeremas repwe mmwenen oamwusa noa ese tiwegin monofitiir, me pwan kkepas aenneew kka re aepesa; nge aere erhai ekkepas aenneew ngaeni Espritu Santus nge esoapw mwusunoa.

³² Iyo ekkepas aenneew ngaeni Naiun Aeremas epwe mmwenen mwusunoa. Nge iyo ekkepas aenneew ngaeni Espritu Santus esoapw mmwenen mwusunoa igina toori neesoapw noan.

Efoarh Waniwan me Uwaan
(Luke 6.43-45)

³³ “Aere eyor waniwan gacch, uwaan repwan gacch, nge aere a yor waniwan e aenneew, uwaan repwan aenneew. Pwe sigaen giuneei meeta taeppen waniwan we me reen rhag uwaan.

³⁴ Aaemi sowufaeng! Epwe ifa wusun aaemi aepesa min mwamwaa i nge aaemi aeremas aenneew. Pwe iga aaw e aepesa meeta kkena esseog noan pwunn.

³⁵ Erhai aeremas gacch epwe oatowowuw mini gacch saengi gacchiun noan tipan, nge erhai aeremas aenneew epwe oatowowuw mini aenneew saengi aenneewaen noan tipan.

36 “Nge ipwe aengaenigaemi, pwe noan Raaenin Apwiung nge aeremas repwe aengaeni oanongaen kkepas kka esooar ipitan ikka re aepesa.

37 Pwe reen oamw kkepas minne Deus epwe apwiungiug reen, epwe pwaeritae aere een minne womwamwaai aere womonofit.”

Tingoaron Kkeman

(Mark 8.11-12; Luke 11.29-32)

38 Iwe aaemweoi sinsein anniug me rhoawe Pharisees ra aengaeni Jesus pwe, “Sinsei, aemaem aei mwerhaen weri oamw feori eew kkeman.”

39 Nge Jesus a aengaeniir pwe, “A ifa mwo aenneewan me aar se niugiuniug aeremesaen mweoi e igina! Oawwa tingoar ngaeniaei pwe ipwe feori eew kkeman? Nge esoapw yor eew kkeman epwe pwae ngaenigaemi me niugiunoan kkeman we aen profeta Jonah.

40 Epwe wunuunun rhag aen Jonah no aegini eoniuraen me eoniupwoong noan upwaen erhai iig faeregite we, ina minne Naiun Aeremas epwe no eoniuraen me eoniupwoong noan faeinaengiy.

41 Noan Raaenin Apwiung re Nineveh repwe iutae nge ra oamonofiti aeremesaen mweoi e igina, pwe iga iir re toagun saengi monofitiir oatowe rerongorong fenai kkewe aen Jonah; nge ipwe aengaenigaemi pwe erhai etaegias saengi Jonah eno igeei!

42 Noan Raaenin Apwiung nge Queen reen Sheba epwe iutae nge a oamonofiti aeremesaen mweoi e igina; pwe iiy a itto saengi faniuwaen taaw noa, pwe epwe itto aiussaening ngaeni aen *king* Solomon kkepesaen reepiy; nge ipwe aengaenigaemi, pwe erhai etaegias saengi Solomon eno igeei!

Sefaaeneton Aniu Aenneew

(Luke 11.24-26)

43 “Iginerhai aniu aenneew a toowow me wooan erhai aeremas, nge ina epwene faaeraeg fetaen wooan faniuw paenekka pwe egiut nenien aan aseoseo. Aere esooar eew neniyrhuungi,

44 nge ina epwene aengaeni oanongan pwe, ‘Ipwene sefaaen noa reen imwaei iwe isiusaengi.’ Iwe a sefaaen nge a noa rhuungi iimw we pwe a peo, nge a pwan nimegacch noa noan pwe oanongaen aegiaeg nge a wonopaeg noa nenien.

45 Iwe epwe noa nge a noa paeniir to fusiunan aniu aenneew kena reigin kkaein aar aenneew saengi, nge ra itto no pwiuneoi we. Iwe igiwe a moann oanongan noa, nge wunuunun aeremas we a faer igin aenneew saengi

mmwaen miniwe rhaepetaen. Ieei wunuunun minne epwe wen ngaeniir aeremas aenneewan mweoi e igina.”

Inaen Jesus me Pwiin

(Mark 3.31-35; Luke 8.19-21)

⁴⁶ Jesus erhiuwen kekkepas ngaeniir aeremas kkewe, nge miniwe inan me rhooawe pwiin ra war. Ra iu niugiun iimw we nge ra tingoar pwe repwe kkepas ngaeni.

⁴⁷ Iwe erhai aeremas kkewe a aengaeni Jesus pwe, “Pipiyy, inoamw me rhooawe pwiimw re iu niugiun nge re mwerhaen kkepas ngaeniug.”

⁴⁸ Jesus a paniuwaeni pwe, “Iyo inaei me iyo pwiyy?”

⁴⁹ Iwe a aetiiti ngaeniir rhoan kkayeo kkewe naiun nge a iura pwe, “Pipiyy! Ikkaan iir inaei me pwiyy!”

⁵⁰ Pwe iyo na a feori neetipaen Semaai wooai naaeng, iir pwiyy me mwengeaei me inaei.”

13

Fioangon Awewe Erhai Rhoan Aeperes Faiun Foat

(Mark 4.1-9; Luke 8.4-8)

¹ Iwe noan rhag raaenin we Jesus a siusaengi iimw we a noa reen meoneoiniun we, iwe a noa mooat tiw wenepeigin.

² Nge aeremas towunap kkewe ra itto reen, iwe a teeotae wooan efoarh pwoot a ittae mooat wooan. Nge rhooawe ra iu nee ppiy.

³ Jesus a fioang awewe ngaeniir towunepaen aegiaeg, iwe a aengaeniir pwe,

“Erhai mwaaen a noa pwe epwe noa aeperes faiun foat.

⁴ Igiwe e aeperes fetaen foat kkewe, nge aekkaefai ra ppiungiutiw wenepeigin aan we, nge man aeniaen ra itto anginoa.

⁵ Aekkaefai ra ppiungiutiw wooan kaenefai, igiwe ese manieon ppweon ee. Faiun kkewe ra mwetekkaein pwaechetae, pwe igiwe rese no ppweon ttonoa.

⁶ Nge igiwe aenet a ttinitae, nge a aeppwesa noa foat kkewe; pwe igiwe waeran foat kkewe ese nennoan noa, iwe a mwetekkaein mae noa.

⁷ Aekkaefai ra ppiungiutiw neeiin irae towfanfan. Iwe irae towfanfan kkewe ra menawtae nge ra fittitae woar iwe ra maenoa.

⁸ Nge aekkaefai ra ppiungiutiw noan ppweon mwamwaai, iwe ra uuwa: aekkaefai ra uwaeni epwiugiuw, aekkaefai woneig, nge aekkaefai eniig.”

⁹ Iwe Jesus a aengaeniir pwe, “Iyo eyor saeningan, epwe rongorong!”

*Faaen Aaen Jesus Kkepesaen Fioangon Awewe
(Mark 4.10-12; Luke 8.9-10)*

¹⁰ Iwe rhoan kkayeo kkewe ra itto reen Jesus nge ra aeineow pwe, “Meeta wokkepas noan fioangon awewe iga wokkepas ngaeniir reen?”

¹¹ Jesus a paniuwaeniir pwe, “Deus a fang ngaenigaemi pwe oawpwe giuneei kkepas mwoanomwoanon minna Mweoiu Naaeng, nge ikka aaemweoi ese ngaenneer.

¹² Pwe iyo a yor meeta aan nge repwe pwan fang ngaeni iwe epwene igin ssow noa aan, nge iyo ese yor meeta aan nge repwe pwigi saengi mwo nge iwe egius iwe eyor reen.

¹³ Faaen aaei kkepas ngaeniir noan fioangon awewe, pwe iga repipiiy noa nge rese weri, nge repwe aiussaening nge rese rongorong, nge rese pwan metaf reen.

¹⁴ Iwe a pwae pwe ennet minikkiwe mwaeniaen profeta Isaiah:

‘Oawpwe aiussaening me aiussaening nge oawsoapw metaf; oawpwe pipiiy me pipiiy nge oawsoapw weri.

¹⁵ Pwe aar niunniuwaen rhoakkeei nge a pwurh, nge ra pineyinoa saeningeer, nge ra ammaiur noa meseer.

Ngaere ese ieei wusuur, ina nge meseer epwe weriwer nge saeningeer epwe rongorong, epwe metaf noan pwunnoor,

iwe nge repwe toagun ngaeniaei, nge ngaang ipwe aemaemaewaar tae.’ Ieei minne mwaeniaen Deus.

¹⁶ “Nge aaemi oawwa wenepwu! Pwe mesaemi ra weriwer nge saeningaemi ra rongorong.

¹⁷ Ennetaen, ipwe aengenaemi, pwe towunap profeta me aeremas mwamwaai ra mwerhaen weri meeta kka aaemi oawwa weri, nge iir rese weri. Ra pwan mwerhaen rongorong meeta kka aaemi oawwa rongorong, nge iir rese rongorong.

*Jesus e Aemmetefa Fioangon Awewen Rhoan Foat we
(Mark 4.13-20; Luke 8.11-15)*

¹⁸ “Iwe oaw aiussaening, pwe oawpwe metaf reen fioangon awewen rhoan foat we.

¹⁹ Rhooa kkewe re rongorong kkepesaen Mweoiu Naaeng, nge rese metefaaegini, ra taepen rhag faiun foat kkewe reppiungiutiw wenepeigin aan we. Iwe Man Aenneew we a itto pwigi saengiir minne a toonong nee tipeer.

²⁰ Nge faiun kkewe reppiungiutiw wooan kaenefai, ra aeffitaeg ngaeni rhoawe re aetiwa miniwe kkepesaen Deus noan kker reen rhag oaton we ra rongorong.

21 Nge kkepas we ese waaraar me nee tipeer, iwe ese ssiu-naei wooar. Nge aere a yor fitigogo me waeraes faaen itaen miniwe kkepesaen Deus, ra mwetekkaein fangetae.

22 Nge faiun kkewe reppiungiutiw neeiin irae towfanfan, ra aeffitaeg ngaeniir rhoowe re rorongrong kkepesaen Deus, nge aiunaeng reen menaw e igina me mwecheniaen pisae-gin feoniufan ra oamoapwu miniwe kkepesaen Deus, pwe esoapw mmwenen uuwa.

23 Nge faiun kkewe reppiungiutiw wooan ppweon mwamwaai, ra aeffitaeg ngaeniir rhoowe re rorongrong miniwe kkepesaen Deus nge ra metaf reen: iwe, ra uuwa, aaemweoi ra uwaeni epwiugiuw, aaemweoi woneig, nge pwan aaemweoi eniig.”

Fioangon Awewen Fetin

24 Jesus a pwan fioangei ngaeniir pwan eew fioangon awewe: “Mweoiu Naaeng a aeffitaeg ngaeni minneen. Erhai mwaaen a aeperes faiun foat gacch noan aan menaai.

25 Noan eew pwongin, igiwe aeremas ra maiur, erhai man aenneew a itto aeperes pwuger mwaaen neeiin maat we, iwe, a noa.

26 Oatowe faiun foat kkewe ra menawtae nge ra uuwa, iwe nge a noa pwae noa pwuger mwaaen kkewe.

27 Mwaaen kkewe naiun rhoaan engaang ra itto reen nge ra aengaeni pwe, ‘Menap, saapw faiun foat gacch miniwe wofoat noan menaai we oamw?. Nge iya rhag pwuger mwaaen ra noa itto me ee?’

28 A paniuwaeniir pwe, ‘Erhai man aenneew a feori minnei.’ Iwe, rhoowe rhoaan engaang ra aeiineow pwe, ‘Wo mwerhaen aeipwe noa wiytae pwuger mwaaen kenaan?’

29 Iwe a paniuwaeniir pwe, ‘Aapw, pwe aere oawpwe wiytae pwuger mwaaen kenaan nge emmwen pwe faiun foat kkewe repwe pwan wisaegtae.

30 Oaw nigitiir pwe repwe menaw ppagtae toori oaton ee sipwene gin. Iwe nge ngaang ipwe naaen aengaeni rhoaan affeoriun repwe mmwaen wiytae pwuger mwaaen kkewe, ra geoni fengaenni nge ra figiir noa. Iwe ra ioni fengaenni faiun foat kkewe nge ra iseniir nong noan aaei imwaen soko.’”

Fioangon Awewen Faiun Mustard

(Mark 4.30-32; Luke 13.18-19)

31 Iwe, Jesus a fioangei ngaeniir pwan eew fioangon awewe: “Mweoiu Naaeng a aeffitaeg ngaeni minneen. Erhai mwaaen a pwigi efai faiun *mustard* a noa foatogi noan aan menaai.

32 Iiy minne oarosaen mwittigin me neeiir faiun irae, nge igine a menawtae nge iiy minne oarosaen temoag me neeiin

irae me noan menaai we. A ssiuwen ngaeni efoarh irae faeregít, pwe man aeniaen repwe itto ffeeor feseer wooan raaen.”

Fioangon Awewen Yeast
(Luke 13.20-21)

³³ Iwe, Jesus a fioangei ngaeniir pwan eew fioangon awewe: “Mweoiu Naaeng a aeffitaeg ngaeni minneen. Erhai rhoopwut a pwigi egius yeast nge a nofiti fengaenniy me enuw pwaecchin fenoawa emas toori aan pwo tae fenoawa we.”

Faaen Aaen Jesus Aeyae Fioangon Awewe
(Mark 4.33-34)

³⁴ Jesus a aeyae fioangon awewe aan epwe aepesa ngaeniir pwuwaen aeremas oanongaen minikkeei; esoapw aepesa mwo nge epat aegiaeg ngaeniir igine ese aeyae fioangon awewe.

³⁵ A feeori minneei pwe epwe pwaeritae pwe ennet miniwe profeta a aepesa pwe,

“Ngaang ipwe aeyae fioangon awewe iga ipwe kkepas ngaeniir.

Ngaang ipwe aepesa ngaeniir minikka rese giuneei saengi rhaepetaen feoniufan.”

Jesus a Aemmetefa Fioangon Awewen Fetin we

³⁶ Iwe igiwe Jesus a noa saengi pwuwaen aeremas kkewe nge a toonong noan eew iimw, rhoaan kkayeo kkewe naiun ra itto reen nge ra aengaeni pwe, “Wopwe aemmetefa ngaenigemaem meeta faaen fioangon awewen fetin we noan menaai we.”

³⁷ Jesus a paniuwaeniir pwe, “Mwaaen we aeperes faiun foat kkewe egacch nge ina iiy Naiun Aeremas;

³⁸ menaai we ina feoniufan; faiun foat kkewe regacch ina aeremesaen Mweoiu Naaeng; nge pwuger mwaaen kkewe, ina iir naiun Man Aenneew we;

³⁹ nge man aenneew we e foatogi pwuger mwaaen kkewe ina Saetan. Nge oaton gin nge ina nee soapwonoan feoniufan, nge rhoaan affeoriun gin we ina iir angkenus.

⁴⁰ Wunuunun pwuger mwaaen kkewe ra ioni fengaenniy nge ra figiir tae wooan aengaet, nge ina wunuunun minne epwe wen nee soapwonoan feoniufan.

⁴¹ Miniwe Naiun Aeremas epwene fangenoa naiun angkenus pwe repwe ioniiir iyo kkewe reno noan Mweoiun iwe repaeni ngaeniir monofit, pwan rhoawe refeeori wegitaeg aenneew,

⁴² nge repwe oatoranong noan nenien aengaet, iga repwe sessaeng nge akkaarengi me ee.

⁴³ Iwe rhooa mwamwaai repwene ttin taeppen aenet noan Mweoiun Semeer. Iyo eyor saeningan, epwe rongorong!

Fioangon Awewen Pisaeg Kooap

⁴⁴ “Mweoiu Naaeng a pwan weei minneen. Erhai mwaaen enoa rhuungi eew pisaeg kooap egin rhaeng me woan eew maat. A pwaniuw sefaen noa nge noan aan kker a noa ameow noa oanongaen minikken a pisaegin, nge a sefaen noa nge a noa meoni maat we.

Fioangon Awewen Faiun Usowus

⁴⁵ “Mweoiun Naaeng a pwan weei minneen. Erhai mwaaen rhoan chuwaai nge ekiukkiutta fetaen faiun usowus kka nning,

⁴⁶ nge igine a giuneei efai min igin yor ipitan, a noa ameow noa oanongaen pisaegin nge a meoni faiun usowus we.

Fioangon Awewen Wuug

⁴⁷ “Mweoiun Naaeng a pwan weei minneen. Aaemweoi rhoan fita ra aekkaerh wow aar wuug noan meoneoiniun we nge ra niyap mesemesaen iig.

⁴⁸ Oatowe wuug we a sseog reen iig, nge ra iuriunong neepiy, mwirin ra mooat tiw pwe repwe aemegena fesaengiy iig kkewe: iig gacch ra iseni nong noan rhiug, nge iig kkewe re aenneew ra oatoranoa.

⁴⁹ Epwe ieei wunuunun neesoapwonoan feoniufan. Angkenus repwene noa aeyimweoiuw fesaengiy aeremas aenneew saengiir aeremas mwamwaai.

⁵⁰ Repwe oatoranong aeremas aenneew noan nenien aen-gaet, iya repwe sessaeng nge akkaarengi me ee.”

Minne Effeo me Maerhiy

⁵¹ Jesus a aeineeor pwe, “Oaw metefaaegini oanongaen minikkaan?”

Ra paniuwaeni pwe, “Ooa.”

⁵² Iwe a aengaeniir pwe, “Ina nge faaen minnee in aonongeer sinsein anniug kka repwe no pwe rhoan kkayeo noan Mweoiun Naaeng ra taeppen rhag soaw iimw we e oatowowuw pisaeg mini ffeo me min maerhiy me noan soko we aan.”

Rhoan Nazareth Rese Aetiwa Jesus

(Mark 6.1-6; Luke 4.16-30)

⁵³ Igiwe Jesus a moann aan fioangei fioangon aweve kkewe, a noa saengi pwiuneoi we

⁵⁴ nge a noa nee pwugusan. A fenai noan wuttee Jews we, nge rhoawe re rongorong ngaeni ra riutae reen. Ra aeineo, “Iya woneei a pwigi me ee aan tipaecchem me kkeman kka aan?”

⁵⁵ Ifa wusun, soapw woneei miniwe naiun taikusang we? Saapw Maria miniwe inan? Me saapw James, Joseph, Simon me Judas nge pwiin?

⁵⁶ Soapw oanongeer mwengeyan nge reno igeei? Iya woneei a pwigi oanongaen minikkei me ee?"

⁵⁷ Iwe resa aetiwa no iiy.

Jesus a aengaeniir, "Erhai profeta eyor aesirowun me noan oanongaen pwiuneoi, nge ese yor aesirowun me noan sipegin taeninimwan aere noan imwan."

⁵⁸ Pwe iga esooar aar niugiuniug, ina minne Jesus ese feori towunepaen kkeman kkewe aan me igiwe reen.

14

Maenoan John Baptist

(Mark 6.14-29; Luke 9.7-9)

¹ Noan oatowe Erotos iwe soamwoonin Galilee a rongorong wunuunun Jesus.

² A aengaeniir rhoan engaang kkewe naiun pwe, "Ieei iiy John Baptist, nge a menaw sefaaen. Ina faaen minne eyor maemaewan pwe epwe feori kkeman kkeei reen."

³ Pwe mmwan nge Erotos a akkiuneo pwe repwe torofi John nge ra geoni iwe ra oatoranong noan kanepwus. Erotos a feori minnee faaen itaen Herodias iwe pwiuniuwaen Philip we pwiin.

⁴ Pwe John Baptist a fasiun aepini ngaeni Erotos pwe, "Ese fin ngaeniug oamw wopwe pwiuniuwaeni Herodias."

⁵ Erotos emwerhaen pwe epwe niy noa John, nge emesagiiur Jews pwe iga re iseni John pwe erhai profeta.

⁶ Nge raaenin gupwunon wupwutiwen Erotos, nge niewe naiun Herodias epwaai me weni mmweer rhoawe. Nge Erotos igin kker,

⁷ a ppwon ngaeni niewe pwe, "Iya aekkepan, pwe ngaang ipwe ngaenneog ese tiwegin meeta wo tingoar."

⁸ Miniwe inan a akkiuneow pwe epwe tingoareei Erotos pwe, "Igina rhag nge wopwe ngaenneaei rhimwen John Baptist noan eew saepiy!"

⁹ Iwe rhag nge e aenneew noa tipaen *king* we, nge pwonno igiwe a aekkepan weni mmweer waseona kkewe, a aepesa pwe mwerhaen we aaen rhoapwut we naiun epwe mmwen.

¹⁰ Iwe a akkiuneo pwe repwe noa gopiy noa iiuwaen John me noan kanepwus.

¹¹ Iwe, ra pwigito miniwe rhimwen John noan eew saepiy nge ra ngaenneei aeterhooapwut we, iwe niewe a pwigi noa reen niewe inan.

12 Rhooran kkayeo kkewe naiun John ra itto pwiigi miniwe oanongan nge ra noa paeia noa. Iwe nge ra noa aengaeni Jesus.

*Jesus e Oamwongoor Nimingeras Aeremas
(Mark 6.30-44; Luke 9.10-17; John 6.1-14)*

13 Igiwe Jesus a rongorong miniwe kkepessaen John, a tapweei efoarh pwoot saengi igiwe nge a noa ngaeni eew pwiuneoi ne iiy noa rhag. Nge igiwe aeremas ra rongorong miniwe, ra noa saengi aepinoamwoor nge ra tapweei noa mwirin me weni faniuw.

14 Jesus a teeotiw me wooan pwoot we, nge a giuneei pwuwaen aeremas kkewe, nge a igin faayeeor iwe a aecchipwaar tae rhoaawe re semwaai me neeiir.

15 Noan faefin we nge rhooran kkayeo kkewe naiun ra itto reen nge ra aengaeni pwe, "Eigin anniug noa igeei, nge a pwan pwoong. Aefengaar noa aeremas kaan nee aepinoamw pwe repwe noa sipegin chuwaai aeneer mwongo."

16 Nge Jesus a aengaeniir pwe, "Inamwo me rese noa, aemi oawpwe ngaenneer meeta repwe mwongo!"

17 Nge iir ra paniuwaeni pwe, "Minne eyor remaem nge niffai rhag fenoawa me riiurhai iig."

18 Iwe, Jesus a aengaeniir pwe, "Iwe oawpwigito reei."

19 Iwe nge a aepesa ngaeniir rhoaawe pwe repwe mooat tiw wooan fetin kkewe. Iwe a pwiigi fenoawa kkewe niffai me iig kkewe riiurhai, a fattae naaeng nge a fang aan maeipinen aerhigerhig Iwe a giniiy fenoawa kkewe nge a ngaenneer rhooran kkayeo kkewe naiun, nge iir ra inetiy ngaeniir aeremas kkewe.

20 Oanongeer nge ra maegin mwongo iwe ra faeyemwaai noa. Iwe rhooran kkayeo kkewe ra oawuta seig me ruwowu rhiug reen nuseg kkewe.

21 Iwe nepeer mwaaen kkewe re mwongo nge nimingeras, nge rese paaepae rhoapwut me wonigaet.

*Jesus e Faaeraeg Noa Weei Saaet
(Mark 6.45-52; John 6.15-21)*

22 Iwe rhag nge Jesus a aepekkaar rhooran kkayeo kkewe naiun pwe repwe teeotae wooan pwoot we, nge ra gommwonoa epeig meoneoiniun we, nge iiy a aefengaar noa aeremas kkewe.

23 Mwirin aan aefengaar noa aeremas kkewe, Jesus a ittae wooan rhug we nge iiy rhag, pwe epwe noa maeipin. Igiwe a pwongonoa, a iiy noa rhag igiwe.

24 Reen oateen nge pwoot we a taaw saengi faniuw, a nuponup pwoot we reen tettemoagon noa, nge igiwe repwan maeyi ngaeni aaeng.

²⁵ Enoa nepetaen enuuw me wonowu konook nee oatosor Jesus a itto reer rhoan kkayeo kkewe, enoa faaeraegto weei saet.

²⁶ Igiwe ra giuneei aan faaeraegto weei saet, ra igin mesag. Ra aekkepwas pwe, "Erhai aniu!"

²⁷ Noan rhag oaton een nge Jesus a kkepas ngaeniir pwe, "Oaw aemenetaegaemi! Ngaang minnee, oawte mesag!"

²⁸ Iwe Peter a aepesa pwe, "Soamwoon, aere een minna, aengaeniaei pwe ipwe faaeraeg wow reemw wooan saet."

²⁹ Jesus a paniuwaeni pwe, "Itto!" Iwe Peter a teotiw me wooan pwoot we nge a faaeraeg noa reen Jesus weei saet.

³⁰ Nge igiwe a weri maemaewaen aaeng we, a mesag nge a rhaepetae aan mwotupwutiw. Iwe, a aekkepwas pwe, "Aemenewaeyaei Soamwoon!"

³¹ Iwe rhag nge Jesus a aeiti noa paiun, a ammwarihu Peter nge a aengaeni pwe, "Me gaen mwittiginen oamw niugiuniug! Meeta wotip mwaramwar reen?"

³² Iwe ra teeotae wooan pwoot we, iwe nge aaeng we a maseoseotiw.

³³ Iwe rhoan kkayeo kkewe reno wooan pwoot we ra aesirowu Jesus nge ra aepesa pwe, "Ennetaen pwe een Naiun Deus!"

*Jesus a Aecchipwaar Rhooa Semwaai Noan Gennesaret
(Mark 6.53-56)*

³⁴ Iwe ra seraeg noa epeig meoneoiniun we nge ra noa itto noan me Gennesaret.

³⁵ Aeremesaen pwiuneoi we re aeginna Jesus iwe ra aepesa noa wooan oanongaen faniuw pwe Jesus a no. Iwe aeremas ra pwigiir to oanongeer rhoa semwaai reen Jesus.

³⁶ Ra tingoar ngaeni pwe aere uwen aar mwo man semwaai geotteopa soapwon mengaagiun. Iwe oanongeer iyo kkewe re geotteopa ra mamaaw noa.

15

*Aar Fenai Rhaepeto Kkewe
(Mark 7.1-13)*

¹ Iwe aaemweoi Pharisees me sinsein anniug ra itto reen Jesus saengi Jerusalem nge ra aeiineow pwe,

² "Meeta rhoan kkayeo kkomwu noawumw rese tapweei aar fenai rhaepeto kkewe aarh reen? Rese tapweei wunuunun toatoan pai mmwaen aar repwe mwongo!"

³ Jesus a paniuwaeniir pwe, "Iwe ina meeta oawse tapweei aaen Deus anniug reen pwe oawwa tapweei ina kkomi?"

⁴ Pwe Deus a aepesa pwe, 'Wopwe aesirowuur semoamw me inoamw' iwe me, 'Iyo e oari seman aere inan nge repwe niy noa.'

⁵ Nge aaemi oawwa aengaeniir aeremas pwe aere eyor minne erhai epwe tipaengi ngaeni seman aere inan, nge a iura pwe, 'Ieen aaen Deus,'

⁶ nge ese aenneew igine ese aesirowu no seman. Ieei minne oawwa oatoranoa aaen anniug Deus pwe aaemi oawpwe feori minna kkom.

⁷ Aaemi rhooa oatupwutupw! A gin weneeti minne we Isaiah e fenaiuw pwe wunuunumi!

⁸ 'Deus a aepesa pwe: Aeremas kkeei ra oassoamwooniaei rhag reen aar kkepas, nge nee tipeer a igin taaw saengiaei.

⁹ Esooar ipitaen aar aesirowuwaei, pwe re fenaiuw aar aeremas anniug, nge ra feori pwe aetae gaen aaei anniug!"

*Minikka e Aenimaenneewa Aeremas
(Mark 7.14-23)*

¹⁰ Iwe Jesus a faingiir to pwuwaen aeremas kkewe nge a aengaeniir pwe, "Oaw aiussaening pwe oawpwe metaf!

¹¹ Saapw meeta kka etonong noan ewaemi minne epwe aenimaenneewagaemi, pwe faer meeta kka etowow me noan minne a aenimaenneewagaemi."

¹² Iwe rhoan kkayeo kkewe ra itto reen Jesus nge ra aengaeni pwe, "Wa giuneei pwe ra soong Pharisees kkewe reen meeta we wo aepesa?"

¹³ Jesus a paniuwaeniir pwe, "Oanongan waniwan kka miniwe Semaiei noan naaeng ese foatogi epwe wiwiytae.

¹⁴ Oawsoapw niunniuaenner iir! Iir ikkomwu rhooa parh nge repaaepae rhooa parh. Ngaere erhai man parh epaeni pwan erhai man parh, nge iir me riiurhai repwe ppiungiunong nee niipw."

¹⁵ Peter a aengaeni pwe, "Wopwe aemmetefa ngaenige-maem meeta faaen kkepas eei."

¹⁶ Jesus a aengaeniir pwe, "Oawsaaen metaf noa mwo?"

¹⁷ Oawse metaf? Pwe meeta kka a toonong noan ewaemi pwan toonong noan upwaemi, mwirin a toowow me noan oanongaemi.

¹⁸ Nge meeta kka retowow saengi ewaemi rhaep saengi pwunnomi, nge ikkaan minikka e aenimaenneewagaemi.

¹⁹ Pwe saengi noan pwunnomi a toowow niunniuaen aenneew taeppen, nni menaw, maiur ngaeni pwiuniuwaen erhai, ffeor aenneew, mwoarho, oatupwutupw me aenneewa noa iteer aemweoi.

²⁰ Ikkaan minikka e aenimaenneewagaemi. Iwe nge erhai e mwongo nge ese tapweei wunuunun toatoan pai, minneen esoapw aenimaenneewagaemi."

Aaen Niugiuniug Erhai Rhoopwut
(Mark 7.24-30)

²¹ Jesus a noa saengi pwiuneoi we nge a noa noan faniuw kkewe oaron aepinoamwon Tyre me Sidon.

²² Erhai rhoopwuton Canaan e nonno pwiuneoi we a itto reen, nge a aepwesaegini pwe, “Soamwoon, Naiun David! Faayeowaei! Rhoopwut na naeyi a wartae aniu aenneew woan nge a igin cchoaw noa.”

²³ Nge Jesus ese aengaeni mwo eew petenaen kkepas. Rhoan kkayeo kkewe naiun ra itto reen nge ra tingoar gacch ngaeni pwe, “Aefenganoa nieei! Ettapw fetaen rhag me mwirih nge e igin soaw oacchorong!”

²⁴ Iwe Jesus a aepesa pwe, “Deus e aefengaeyaei to rhag pwe reer re Israel kkewe ra weer *sheep* kkewe re mwaenirh noa.”

²⁵ Iwe rhag nge rhoopwut we a itto foatotiw weni mmwan nge a iura pwe, “Soamwoon, tipaengiaei!”

²⁶ Jesus a paniuwaeni pwe, “Ese mwamwaai pwe sipwe pwigi aeneer wonigaet mwongo nge sa oatora ngaeniir gonaag.”

²⁷ Iwe niewe a paniuwaeni pwe, “Ennet minna, Soamwoon, nge gonaag mwo nge re angi peipeyin mwongo ppiungiutiw saengi aar maasta *table*.”

²⁸ Iwe Jesus a paniuwaeni niewe pwe, “Een erhai rhoopwut e igin faeregite oamw niugiuniug! Meeta na oamw mwerhaen nge epwe yo ngaeniug.” Iwe noan rhag oaton we nge rhoopwut we naiun a takketae.

Jesus e Aecchipwaar Rhooa Towunap Kkewe

²⁹ Jesus a noa saengi pwiuneoi we nge a noa faaeraeg ngaerhen meoneoiniuniun Galilee. A ittae woan eew rhug a ittae mooat tiw.

³⁰ Towunepaen aeremas kkewe ra itto reen, pwigito rhooawe repirhemae, rhooa parh, rhooa maemerhoar, rhooa se kkepas, me pwan towunepaen aeremas kka resemwaai ra itto iseniir tiw oaron pirheen Jesus; iwe a aecchipwaar tae oanongeer.

³¹ Aeremas ra mwaar reen meeta we ra weri pwe igiwe rhooawe rese kkepas ra kkepas, rhooawe re maemerhoar ra mamaaw noa, rhooawe repirhemae ra faaeraeg, pwan rhooawe reparh ra weri mmweer. Iwe, ra aepingepinga Deus we naiur re Israel.

Jesus e Oamwongoor Faangeras Aeremas
(Mark 8.1-10)

³² Jesus a faingiir to rhoan kkayeo kkewe naiun nge a aengaeniir pwe, “Ngaang iya faayeeor aeremas kaan, pwe ra no reei noan eoniuraen nge esooar meeta minne repwe angi.

Ngaang ise mwerhaen aefengaar noa noan aar pecchai, pwe repwe tongaeni niyoarorhrorh iga repwe faaeraeg ngaeni imweer.”

³³ Rhooan kkayeo kkewe ra aeiineow pwe, “Iya me noan pwiuneoi anniug noa eei minne sipwe weriwer mwongo me ee pwe epwe nap ngaeniir towuneppeer aeremas kaan?”

³⁴ Jesus a aeiineeor pwe, “Fitifai fenoawa eyor reemi?”

Ra paniuwaeni pwe, “Fiusiufai fenoawa me fitiman iig mwittig.”

³⁵ Iwe Jesus a aepesa ngaeniir aeremas kkewe pwe repwe mooat tiw weni ppweon.

³⁶ A pwigi fenoawa kkewe fusiufai me iig kkewe nge a fang ngaeni Deus aan aerhigerhig, a giniytiw nge a ngaenneer rhooan kkayeo kkewe, nge rhooan kkayeo ra ngaeniir aeremas kkewe.

³⁷ Oanongeer ra mwongo nge ra faeyemwaai. Rhooan kkayeo kkewe ra oawuta fisuuw rhiug reen nusegin mwongo kkewe.

³⁸ Nneogeoiiur mwaaen kkewe re mwongo nge faangeras, nge rese paaepaenong rhoopwut me wonigaet.

³⁹ Iwe Jesus a fangenoa aeremas kkewe, nge a teeotae woan pwoot we nge a saei ngaeni miniwe faniuwaen Magadan.

16

Tingoaron Kkeman

(Mark 8.11-13; Luke 12.54-56)

¹ Aaemweoi Pharisees me Sadducees ra itto reen Jesus pwe repwe aegina, iwe ra tingoareei pwe epwe feeri eew kkeman, pwe epwe pwae noa pwe Deus e tipieew ngaeni.

² Nge Jesus a paniuwaeniir pwe, “Iga aenet epwe tupwutiw oawwa aepesa, ‘Epwe igin gacch raaen naidu, pwe a ccha noa noan naaeng.’

³ Nge nee oatosor moawugowug oawwa aepesa pwe, ‘Epwe igin piung worhow raaeneei, pwe a ccha me roorh noa noan mann.’ Oawwa mmwenen aepesa wunuunun raaen mwaai me raaen aenneew reen aaemi weri noan mann, nge oawsoapw mmwenen aweweei minikka aeginnen mweoi kkeei!

⁴ A ifa mwo aenneewan me aar se niugiuniug aeremesaen mweoi e igma! Oawwa tingoar ngaeniaei pwe ipwe feeri eew kkeman. Nge esoapw yor eew kkeman epwe pwae ngaenigaemi me niugiunoan kkeman we kkemenaen profeta Jonah.”

Iwe nge Jesus a nigitiiir a noa taaw noa.

Aar Yeast Pharisees me Sadducees

(Mark 8.14-21)

⁵ Igiwe rhooran kkayeo kkewe ra noa epeig meoneoiniun we, ra maniuwégi noa pwe repwe pweipwog fenoawa.

⁶ Jesus a aengaeniir pwe, “Oaw atapeonneogiugaemi nge aefaennigaemi reen *yeast* we aar Pharisees me Sadducees.”

⁷ Iwe rhooran kkayeo kkewe ra rhaepetae reen kkepas fengaen nee fineer, “A aepesa kkepas eei pwe iga sise pweipwog fenoawa.”

⁸ Jesus a giuneei meeta we ra aepesa, iwe a aeineeor pwe, “Meeta oawwa fioangei nee finaemi aan esooar fenoawa reemi reen? Me gaen mwittiginen aaemi niugiuniug!

⁹ Meeta, oawsaaen metaf mwo? Oawse maengiy igiwe iginiy niffai fenoawa woar rhoowe nimingeras? Fitowu rhiug oawwa oawuta reen minikkewe nusegin mwongo?

¹⁰ Nge oatowe iginiy fenoawa kkewe fusiufai woar rhoowe faangeras, fitowu rhiug oawoawuta reen minikkewe nusegin mwongo?

¹¹ Ifa wusun imwu oawse metaf pwe ise kkepesaen fenoawa ngaenigaemi? Oawpwe aefaennigaemi reen aar *yeast* Pharisees me Sadducees!”

¹² Iwe rhooran kkayeo kkewe ra metefaaegini pwe Jesus ese kkepesaen pwe repwe afaenniir reen *yeast* we eno noan fenoawa, pwe saengi aar Pharisees me Sadducees fenai.

Peter e Iura pwe Jesus Ina Kristus

(Mark 8.27-30; Luke 9.18-21)

¹³ Jesus a noa ngaeni pwiuneoi we e arap ngaeni aepinoam-won Caesarea Philippi, igiwe a aeineeor rhooran kkayeo kkewe me ee pwe, “Iyo ee aeremas ra aepesa pwe iiy Naiun Aeremas?”

¹⁴ Ra paniuwaeni pwe, “Aaemweoi re iura pwe John Baptist, nge aaemweoi re iura pwe Elijah, nge aaemweoi re iura pwe Jeremiah aere aaemweoi profeta.”

¹⁵ Jesus a aeineeor pwe, “Nge aaemi, oawiura pwe ngaang iyo?”

¹⁶ Simon Peter a paniuwaeni pwe, “Een Kristus iwe Naiun Deus iwe e menaw.”

¹⁷ Jesus a paniuwaeni pwe, “Wenepwu ngaeniug, Simon naiun John! Pwe kkepas eei ese itto reemw me reer aeremas, pwe Semaeni noan naaeng minne epwaeri ngaeniug.

¹⁸ Iwe ipwe aengaeniug pwe een Peter: een efai faai.* Nge woan wungaen fai een ipwe aiuwtae aaei keneisia woan, nge maenoa mwo nge esoapw tongaeni oatoaropa.

¹⁹ Ngaang ipwe ngaenneog kkaen Mweoiun Naaeng; minne oawwa feoti me feoniufan epwe pwan feofeo me

* 16:18 Wewen *Peter* me noan kkepesaen Greek nge *faai*.

woan naaeng, nge minne oawwa saeneti me woan feonifan epwe pwan saenetaeg me woan naaeng.”

²⁰ Iwe Jesus a aetiwenig ngaeniir rhoan kkayeo kkewe pwe resoapw aengaeni mwo nge erhai pwe iiy miniwe Kristus.

Jesus a Aepesa Waeiraesin me Maenoan

(Mark 8.31–9.1; Luke 9.22-27)

²¹ Saengi rhag oatowe nge Jesus a rhaepetae aan aemmetefa ngaeniir rhoan kkayeo kkewe naiun pwe, “Ipwene noa Jerusalem, nge ipwene noa waeiraes me reer mwaaen kkewe aar, me soamwoonin patere kkewe me rhoawe sinsein anniug. Repwe niaei noa, nge mwirin enuuw raaen nge ipwe menaw sefaaen.”

²² Iwe Peter a wummwuw noa egius nge a noa soong ngaeni pwe, “Soamwoon, esoapw ina minna! Esoapw mmwenen wen ngaeniug minna!”

²³ Nge Jesus a toagun ngaeni Peter nge a aengaeni pwe, “Rhiuw me oaroi, Saetan, een rhoan pineyiaei. Pwe oamw niunniywaen ese itto me reen Deus, pwe eitto me reen aeremas.”

²⁴ Iwe Jesus a aengaeniir rhoan kkayeo kkewe naiun pwe, “Aere erhai a mwerhaen tapweaei, epwe aerheeli noa niunniywaennen woan oanongan, a aiufera aan kurus nge tapweeito mwiriy.

²⁵ Pwe iyo emwerhaen ammwarhiu menewan, epwe ppiung saengi; nge iyo eppiung saengi menewan pwonno ngaang, epwe giuneei menaw.

²⁶ Epwe meeta ipitan aaen yo faeinaengiy nniuw noa ngaeni erhai, nge ese yo ngaeni menewan? Esooar ngaere! Esoapw yor meeta erhai epwe tongaeni fangenoa pwe epwe pwigi sefaaeny menewan.

²⁷ Pwe Naiun Aeremas epwe war noan nningen minna Seman me angkenus kkewe naiun. Enoa oatonaan nge a aeseaaeni ngaeni erhai me erhai aeremas wunuunun aan feoffeoor.

²⁸ Ennetaen, ipwe aengaenigaemi pwe eyor aemweoi aeremas igei resoapw mae, toori oatona repwe weri Naiun Aeremas epwe wareto pwe *King*.”

17

Nniuwen Noan Wunuunun Jesus

(Mark 9.2-13; Luke 9.28-36)

¹ Iwe mwirin wonowu raaen, Jesus a paenitae Peter me mwaaen pwipwi kkewe riiurhai James me John nge a wummwuur tae woan eew rhug taegias, nge a iir noa rhag ee.

² Igiwe rerhiuwen oawruru Jesus, nge a ssiuwen noa wunuunun: wooan mesan a weei seremaen ttinen aenet, nge mengaagiun a igin pwerheraeg noa.

³ Iwe nge rhooran kkayeo kkewe eoniurhai ra weri Moses me Elijah pwe re kekkepas fengaen me Jesus.

⁴ Iwe, Peter a aengaeni Jesus pwe, “Soamwoon, a igin gacch pwe sino igeei. Aere wotipaeni, ipwe aiuwtae enuuw iimw tampwoning igeei, eew imwoamw, eew imwaen Moses, me eew imwaen Elijah.”

⁵ Igiwe Peter erhiuwen kekkepas, eew toapw seram a itto pwaniur noa, nge eew mangiungiu saengi toapw we a aepesa pwe, “Ieei Naeyi mwaaen aerhaengerhaeng, iye efin tipaei reen, oaw aiussaening ngaeni!”

⁶ Igiwe rhooran kkayeo kkewe ra rongorong kkepas kkewe, ra igin mesag, iwe ra tororhap tiw wooan ppweon.

⁷ Iwe Jesus a itto reer nge a geotteopaar nge a aengaeniir pwe, “Oawpwaetae, oawsoapw mesag!”

⁸ Iwe renoa fattae nge esooar ne rerhiuwen weri pwe a Jesus noa rhag.

⁹ Igiwe ra ittiw me wooan rhug we, Jesus a aetiwenig ngaeniir pwe, “Oawsoapw aengaeni mwo nge erhai meeta oawwa weri, toori aaen mwaaen we Naiun Aeremas epwe menaw sefaaen me reen maenoa.”

¹⁰ Iwe rhooran kkayeo kkewe ra aeiineow Jesus pwe, “Meeta sinsein anniug ra aepesa pwe Elijah epwe mmwaen itto reen?”

¹¹ Jesus a paniuwaeniir pwe, “Epwe fasiun gommwoto Elijah pwe epwe oamoannatae oanongaen aegiaeg.

¹² Nge ngaang ipwe aengaenigaemi, pwe Elijah a fasiun itto, nge aeremas rese aeginna, pwe refeeri ngaeni minne retipaeni. Epwan ina rhag aar aeppaeti mwaaen we Naiun Aeremas.”

¹³ Iwe rhooran kkayeo kkewe ra metaf pwe Jesus a kkepas ngaeniir reen wunuunun John Baptist.

Jesus eAecchipwa Erhai Aetemwaaen Eyor Aniu Aenneew Wooan
(Mark 9.14-29; Luke 9.37-43)

¹⁴ Igiwe ra sefaaen ngaeniir pwuwaen aeremas kkewe, erhai mwaaen a itto reen Jesus, a foato pwiugiuwtiw me mmwan

¹⁵ nge a aengaeni pwe, “Soamwoon, faayeow aetemwaaen enaeyi! Egaen ngong nge a igin waeiraes nge a faaen ssow aan ppiungiunong noan aengaet me ne rhaan.

¹⁶ Iya pwigito reer rhooran kkayeo kkewe noawumw, nge iir rese mmwenen aecchipwatae.”

¹⁷ Iwe Jesus a paniuwaeni pwe, “Ifa mwo aaemi se niugiu-niug me ruguppin faaen oateei! Epwe ifa ssiunaein aaei ipwe no reemi? Epwe ifa wusun aaei noaneenaei reemi? Oawpwigito aetena reei!”

¹⁸ Jesus a aerh ngaeni aniu aenneew we, iwe a toowow me reen aet we, nge noan rhag oatowe nge aet we a cchipw tae.

¹⁹ Iwe rhoan kkayeo kkewe ra itto reen Jesus igiwe a iir noa rhag nge ra aeineow pwe, “Meeta aemaem aeise mmwenen oatowowuw aniu aenneew we reen?”

²⁰ Jesus a paniuwaeniir pwe, “Pwonno iga emwittig aaemi niugiuniug. Ennetaen, ipwe aengaenigaemi, pwe aere aaemi niugiuniug eweei nepaen faiun *mustard* een, emmwen oawpwe aengaeni rhug een pwe, ‘Wopwe mwagiut saengi igeei nge wa noa iginaan!’ nge epwe mwagiut. Emmwen oawpwe feeori ese tiwegin meeta.”

²¹ [Nge maeipin me aecchigipin rhag minne emmwen epwe asiuw wow taepfen een; esooar pwan eew meeta ne emmwen.]*

Jesus a Pwan Aepesa Wunuunun Aan Maenaa

(*Mark 9.30-32; Luke 9.43-45*)

²² Oatowe rhoan kkayeo kkewe ra rhu fengaaen me noan Galilee, Jesus a aengaeniir pwe, “Mwaaen we Naiun Aeremas epwene yonong nee paiur aeremas,

²³ repwe niy noa, nge mwirin enuuw raaen epwe menaw sefaaen.”

A igin aenneew noa noan tipeer rhoan kkayeo kkewe.

Tax Reen Temple we

²⁴ Igiwe Jesus me rhoan kkayeo kkewe naiun ra toori Capernaum, rhoan iyoiyon *tax* reen *Temple* we ra itto reen Peter nge ra aeineow pwe, “Ifa wusun, sinsei mwu naimi esoapw fang *tax* reen *Temple* we?”

²⁵ Peter a paniuwaeniir pwe, “Ewaer, epwe fang.”

Oatowe Peter a toonong noan iimw we, Jesus a mmwaen kkepas, “Simon, meeta oamw niunniwaen? Iyo epwe pey aegini ngaeniir *kingaaen* faniuw *tax*? Naiur aeremas aere waseona?”

²⁶ Peter a paniuwaeni pwe, “Waseona.”

Iwe Jesus a aengaeni pwe, “Aere ina, nge aeremesaen faniuw resoapw fang aar *tax*.”

²⁷ Nge sise mwerhaen sipwe aenneewa nee tipeer aeremas kaan. Iwe wonoa noan meoneoiniun we wa noa aerhee nong oamw ooa noan. Iwe nge mmwaen iig na wopwe nipaeni, wopwe sugi noa ewan, nge wa pwigi faiun senaapiy ina eno

* **17:21** Petenan eei nge esoano noan aekkaew petenan kka efoatofaat noan kkepesaen Greek.

noan e nnaaf ngaeniaei *tax* reen *Temple* me oamw. Pwigi nge wa fang ngaeniir pwe aarh *tax*.”

18

Iyo e Oarosaen Taegias?

(Mark 9.33-37; Luke 9.46-48)

¹ Noan oatowe rhoan kkayeo kkewe ra itto reen Jesus nge ra aeiineow pwe, “Iyo e oarosaen taegias me noan minna Mweoiu Naaeng?”

² Iwe Jesus a faingito erhai wonigaet nge aiuwtae me weni mmweer.

³ Nge a aepesa pwe, “Ennetaen, ipwe aengaenigaemi, aere oawse ssiuwen pwe oawpwe weer rhag wonigaet, oawsoapw mmwenen toonong noan minna Mweoiu Naaeng.

⁴ Iyo na oarosaen taegias me noan minna Mweoiu Naaeng, nge iiy minne e oasossonaetiw pwe epwe aeffitaeg ngaeni wonigaet een.

⁵ Nge iyo e aetiwa erhai wonigaet faaen itaei, iiy epwan aetiwaeyaei.

Meeta Kka e Oamonofitiir Aeremas

(Mark 9.42-48; Luke 17.1-2)

⁶ “Aere erhai efeeori pwe erhai maan mwittig kaan epwe ppiung noa aan niugiuniug reei, nge efaer gacch pwe epwe geogeeotae efai fai temoag faaen iiuwan nge ra noa oamoapwu noa nee metaw.

⁷ Ifa mwo aenneewaen faeinaengiy iga eyor rhag minikka e affeori pwe epwe ppiung noa aar aeremas niugiuniug! Taeppen minikkaan nge repwe fasiun wen, nge ifa mwo aenneewan aeremas na erhaepiy tae minikkeei!

⁸ “Aere poawumw aere pirhemw re affeori pwe epwe ppiung noa oamw niugiuniug, wa gopiy noa wa oatoranoa! Egacch oamw wopwe toonong noan menaw na esooar iyaenin wooan oamw pai efoarh me pirhe efoarh, mmwaen oamw wopwe pai riiufoarh aere pirhe riiufoarh nge ra aerheog nong noan aengaet we esooar iaenin.

⁹ Me ngaere mesoamw a affeori pwe epwe ppiung noa oamw niugiuniug, wopwe oannusuwow wa oatoranoa! Efaer gacch oamw wopwe toonong noan menaw na esooar iyaenin reen oamw maseyefai, mmwaen oamw wopwe maseriuwai nge ra aerheog nong noan aengaetaen nifierno.

Fioangon Sheep we e Mwaenirh Noa

(Luke 15.3-7)

¹⁰ “Oaw aefaenniy pwe oawsoapw aeffaeioapwut mwo nge erhai me neeiir aet mwittig kaan. Pwe ipwe aengaenigaemi,

pwe angkenusuur aetekkaan repwe wewweri rhag mesaen minna Semaiei noan naaeng.

¹¹ [Pwe Naiun Aeremas a itto, pwe epwe aemenewaar rhoawe re mwaenirh noa.]*

¹² “Meeta aaemi niunniwaen? Aere erhai mwaaen eyor epwiugiuw naiun *sheep*, nge erhai neeiir a mwaenirh noa, iiy epwe nigititiw ikkiwe tiweig me tiweman wooan rhug we pwe epwe noa giutta iwe erhai e mwaenirh noa.

¹³ Ngaere a weri iwe erhai, ennetaen, ipwe aengaenigaemi, iiy epwe igin kker reen iwe erhai mmwaen ikkiwe tiweig me tiweman rese mwaenirh noa.

¹⁴ Eaeffitaeg ngaeni rhag iga Semaemi noan naaeng ese mwerhaen pwe erhai mwo me neeiir man mwittig kaan repwe mwaenirh noa.

Iga Erhai Epwe Monofit

¹⁵ “Aere pwiimw a monofit ngaeniug, wopwe noa reen pwe wopwe noa pwaeri ngaeni meeta na teren, nge noan mwoanomwoan nepetaemi rhag riiurhai. Ngaere e aiussaening ngaeniug, een wa pwini sefaaeniy pwiimw.

¹⁶ Ngaere ese aiussaening ngaeniug, wopwe paeni erhai aere riiurhai rhinoamw, ‘pwe oanongaen kkepas nge rhooa na riiurhai aere eoniurhai repwe aenneta aere ennet,’ taepen miniwe effoat noan Pwapwior we e Santus.

¹⁷ Iwe, aere ese mwerhaen aiussaening ngaeniir, wopwe pwaeri ngaeni rhoaan keneisia. Aere keneisia mwo nge ese aiussaening ngaeni, iwe ina nge wopwe feori ngaeni wunuunun minna wopwe feori ngaeni erhai mane ese niugiuw Deus aere erhai rhoaan iyoiyon *tax*.

Feoti me Saeneti

¹⁸ “Ennetaen, ipwe aengaenigaemi: minne oawwa feoti me feoniufan epwe pwan feofeo me wooan naaeng, nge minne oawwa saeneti me wooan feoniufan epwe pwan saenetaeg me wooan naaeng.

¹⁹ “Iwe, ipwe pwan aengaenigaemi pwe: aere riiurhai neemi wooan feoniufan ra tipieew fengaen wooan aekkaew minne repwe maepin wooan, epwe toorigaemi mmwenen me reen Semaiei woai naaeng.

²⁰ Pwe iga riiurhai aere eoniurhai ra rhu fengaen pwe faaen itaei, ngaang ipwan no reer.”

Rhoaan Engaang we Ese Faayeow

²¹ Iwe Peter a itto reen Jesus nge aeiineow pwe, “Soamwoon, aere pwiiy a gaen monofit ngaeniaei, faaen fitowu ngaang ipwe saeneti noa aan monofit? Epwe faaen fisuuw?”

* **18:11** Petenan eei nge esoano noan aekkaew petenan kka efoatfoat noan kkepessaen Greek.

²² Nge Jesus a paniuwaeni pwe, “Aapw, saapw faaen fisuuw rhag, pwe faaen fisiig me fisuuw.

²³ Ieei minne Mweoiu Naaeng a aeffitaeg ngaeni. Erhai *king* a mwerhaen pwe naiun rhoan engaang repwene itto aera monofitiir ngaeni.

²⁴ Oatowe ennaen rhaepetae ne feori iiy miniwe, nge ra pwigito erhai nge e monofitini fitasenn mwo senaapiy.

²⁵ Iwe iga rhoan engaang we ese mmwenen aera miniwe monofitin, iwe *king* we a aepesa pwe repwe ameow noa fengaen me pwiuniuwan me naiun me oanongaen meeta pisaegiir pwe epwe mmwenen aera minikkewe monofitin.

²⁶ Iwe rhoan engaang we a foato pwiugiuwtiw me mmwaen *king* we nge aeffaenipirhe ngaeni pwe, ‘Faayeowaei, pwe wopwe tipenaei ngaeniaei. Ngaang ipwe aera sefaaeny oanongaen monofitiy ngaeniug.’

²⁷ Iwe *king* we a igin faayeow rhoan engaang we, iwe a saeneti noa aan monofit nge a fang pwe epwene noa.

²⁸ “Mwirin rhoan engaang we a noa weri erhai rhinan rhoan engaang e monofit ngaeni fitowu rhag senaapiy. Iwe a torofi mwaaen we, a fiengi worongan nge a aengaeni pwe, ‘Wopwe aera sefaaen monofitimw ngaeniaei.’

²⁹ Iwe rhoan engaang we a aesirowu tiw nge tingoar maaw ngaeni, ‘Wose mwerhaen wopwe faayeow ngaeniaei, ngaang ipwapw pey monofitiy ngaeniug!’

³⁰ Nge mwaaen we ese mwerhaen. A aepesa pwe repwe oatoranong noan imwaen kanepwus toori aan epwe pey aegini monofitin.

³¹ Igiwe rhoan engaang kkewe rhinan ra giuneei meeta we a wen, ra igin soong iwe ra noa reen *king* we ra noa aengaeni oanongaen meeta we a wen.

³² Iwe *king* we a faingito rhoan engaang we nge a aengaeni pwe, ‘Een erhai rhoan engaang kkewe re aenneew! Ngaang iya saeneti noa oanongaen oamw monofit ngaeniaei faaen itaen oamw tingoar ngaeniaei.

³³ Meeta wose faayeow ngaeni rhinoamw rhoan engaang reen, taeppen rhag meeta ngaang iya feori ngaeniug?’

³⁴ Noan aaen *king* we igin soong, a fangenoa rhoan engaang we noan kanepwus toori aan epwe pey aegini oanongaen monofit kkewe aan ngaeni.

³⁵ “Epwe ieen taeppen minne Semaeni noan naaeng epwe feori ngaeni erhai me erhai neemi, aere oawsoapw saeneti noa monofitin pwiimi me noan tipaemi.”

*Jesus a Fenaiuw Wunuunun Mweoinoa
(Mark 10.1-12)*

¹ Igiwe Jesus a moann aan aepesa oanongaen minikkeei, nge a siusaengi Galilee pwe noa ngaeni faniuwaen Judea me wenepeiginoan pwupwu we Jordan.

² Pwuwaen aeremas kkewe rettapw noa mwirin, a aecchipwa tae me pwiuneoi we.

³ Aaemweoi Pharisees ra itto reen pwe repwe soatoni, nge ra aeiineow pwe, “Egacch me noan aarh anniug pwe erhai mwaaen epwe mweoi saengi pwiuniuwan reen minne rhag etipaeni?”

⁴ Jesus a paniuwaeniir pwe, “Oawse aeraegi miniwe effoat noan Pwapwior we eSantus, pwe saengi rhaepetaen nge Deus a feeoriir aeremas pwe mwaaen me rhoapwut?”

⁵ Nge Deus a aepesa pwe, ‘Ieei minne erhai mwaaen epwe nigiti seman me inan nge a noa rhuu ngaeni pwiuniuwan, pwe repwene eew rhag.’

⁶ Ina minne iir resoapw rhiuwen riiurhai no, pwe ra erhai rhag. Esooar erhai aeremas ne epwe mweoiti fesaenngiy meeta e Deus a oarhuw fengaenniy.”

⁷ Iwe, rhooawe Pharisees ra aeiineow pwe, “Meeta rhag Moses a feeori anniug we pwe erhai mwaaen epwe mmwennen ngaenneei pwiuniuwan pwapwioron mweoinoa reen?”

⁸ Jesus a paniuwaeniir pwe, “Moses a saeneti pwe aemi mwaaen oawpwe mweoi saengi pwiuniuwaemi faaen itaen aaemi se rongorong ngaeni aan fenai. Nge ese ina wusun saengi rhaepetaen igiwe Deus efeeori feoniufan.

⁹ Nge ngaang ipwe aengaenigaemi: aere erhai mwaaen a mweoi saengi pwiuniuwan faaen itaen aekkaew aegiaeg, nge soapw reen aen niewe maiur ngaeni pwiuniuwaen erhai, iiy mwaaen we epwan feeori monofit aere a pwiuniuwaeni pwan erhai rhoapwut.”

¹⁰ Iwe rhoaan kkayeo kkewe naiun ra aengaeni pwe, “Aere epwe ieei wusun nepetaen erhai mwaaen me pwiuniuwan, epwe faer gacch aarh sisoapw pwiuppwiuniuw.”

¹¹ Jesus a aengaeniir pwe, “Fenai eei nge ese noa ngaeniir oanongeer aeremas, pwe rhooawe rhag Deus a ngaenneer.

¹² Pwe e towunap faan minne mwaaen rese gaen pwiuppwiuniuw reen: aaemweoi rewupwutiw pwe epwe ina wusuur, aaemweoi nge aeremas minne refeeoriir pwe resoapw pwiuppwiuniuw, nge pwan aaemweoi rese mwerhaen pwiuppwiuniuw pwonno faaen itaen minna Mweoiu Naaeng. Iyo e metefaaegini fenai een ina epwe metaf reen.”

*Jesus a Maeipinaar Wonigaet
(Mark 10.13-16; Luke 18.15-17)*

13 Aaemweoi aeremas ra pwiigiir to wonigaet reen Jesus, pwe epwe iseni tae paiun woar nge a maecipinaar, nge rhoan kkayeo kkewe naiun ra soong ngaeniir.

14 Nge Jesus a iura pwe, “Fangeto aetekkena reei, nge oaw-soapw aiuggiur, pwe minna Mweoiu Naaeng ina aar aeremas kka reweer wonigaet.”

15 Iwe a iseni tae paiun woar, iwe a mwet saengiir.

Erhai Anian Naiwiis
(Mark 10.17-31; Luke 18.18-30)

16 Eew oaton nge erhai mwaaen a itto reen Jesus nge a aeineow pwe, “Sinsei, meeta min mwamwaaai ipwe feori pwe epwe yo ngaeniaei menaw na esooar iaenin?”

17 Jesus a paniuwaeni pwe, “Meeta wa faer aeineowaei minne e mwamwaaai reen? Erhai rhag minne e mwamwaaai. Aere womwerhaen weri menaw, tapweei oasoapwosoapw kkeei.”

18 A aeineo pwe, “Oasoapwosoapw kkefa?”

Jesus a paniuwaeni pwe, “Wosoapw nni aeremas, wosoapw ffeor manetemwaaai, wosoapw mwoarho, wosoapw oatupwutupw tae kkepas woan erhai.

19 Wopwe aesirowu semoamw me inoamw, wopwe aerhaengi rhoan wenioaromw taeppen rhag oamw sipegin aerhaengi oanongoamw.”

20 Iwe anian we a aengaeni pwe, “Ngaang iya fasiun tapweei oanongaen oasoapwosoapw kkeei. E rhiuwen pwan yor meeta isaaen feori mwo?”

21 Jesus a paniuwaeni pwe, “Aere wa mwerhaen wopwe oanongonniuwaen gin gacch, wa noa ameow noa oanongaen pisaegimw, nge wa fang senaapian ngaeniir rhoa affayeo, ina nge epwe yor wiinoamw me woai naaeng. Iwe nge wa itto tapweaei.”

22 Igiwe anian we a rongorong miniwe, a siunoa noan aan tip aenneew, pwe igiwe iiy erhai man naiwiis.

23 Iwe Jesus a aengaeniir rhoan kkayeo kkewe naiun pwe, “Ennetaen, ipwe aengaenigaemi: epwe waeiraes pwe aeremas kka repisaegisaeg repwe toonong noan minna Mweoiu Naaeng.

24 Ipwe aepini sefaaeniy ngaenigaemi, egin mererhaeg aen erhai *camel* epwe toonong noan ngetaen efoarh oaguwa, me mmwaen aen erhai mwaaen pisaegisaeg epwe toonong noan minna Mweoiun Deus.”

25 Igiwe rhoan kkayeo kkewe ra rongorong kkepas we, ra igin riutae reen nge ra aeineow pwe, “Iwe, iyo rhag epwe mmwenen menaw?”

²⁶ Nge Jesus a fan wenewen ngaeniir nge a paniuwaeniir pwe, “Minneei ese mmwen ngaeni aeremas, nge oanongaen meeta nge emmwen ngaeni Deus.”

²⁷ Iwe Peter a iura, “Pipiyy, aemaem aeiya siusaengi oanongaen aegiaeg nge aeiya itto tapweog. Iwe meeta aeipwe aeni?”

²⁸ Jesus a aengaeniir, “Ennetaen, ipwe aengaenigaemi, pwe oatona mwaaen we Naiun Aeremas epwe mooat wooan nenien mooat na aan ina enning noan mweoi ffeo eei, nge aemi rhoaniuwaei oawpwe pwan mooat wooan seig me ruwowu nenien mooat pwe oawpwe nemaeniir aeinang kkewe seig me ruwowu ikkiwe aaen Israel.

²⁹ Nge iyo e siusaengi imwan, aere pwiin, aere mwengeyan, aere seman, aere inan, aere naiun, aere faniuwan, faen itaei, epwe pwiigi meoniun epwe temoag saengi epwiugiuw, nge epwe pwan pwiigi menaw na esooar iaenin.

³⁰ Pwe towuneppeer rhooawe reamwirimwir repwene gommw, nge towuneppeer rhooawe regommw repwene amwirimwir.

20

Rhoaan Engaang Wooan Maetaen Grape

¹ “Minna Mweoiu Naaeng eweei minneen. Eno erhai mwaaen a wugusoronoa epwe noa giut rhoaan engaang pwe repwe engaang wooan aan maetaen *grape*.

² A tipieew ngaeniir rhoaan engaang kkewe pwe paniuweer nge epwe efai faiun *silver* noan eew raaen, iwe a fangenoa pwe repwe noa engaang wooan maetaen *grape* we aan.

³ Enoa tiwowu konook a sefaaen noa reen nenien chuwaai we nge a noa weriir aaemweoi mwaaen reiu fetaen, nge esooar meeta refeeri,

⁴ iwe a aengaeniir pwe, ‘Oawpwe pwan noa engaang noan maetaen *grape* na aaei, pwe ipwe ngaennegaemi paniuwaemi iye egacch.’

⁵ Iwe ra noa. Iwe nge enoa seig me ruwowu konook iwe pwan enuuw konook nge a pwan feeori taeppen rhag miniwe a feeori mmwan.

⁶ Enoa aerepa nimowu konook neeoanowas, a pwan noa noan nenien chuwaai we, nge a noa weriir aaemweoi mwaaen repwan iu fetaen igiwe. Iwe, a aeineeor pwe, ‘Meeta oawwa iu fetaen rhag igeei, nge oawse engaang?’

⁷ Ra paniuwaeni pwe, ‘Esooar erhai ne emwerhaen aengaengemaem.’ Iwe, a aengaeniir pwe, ‘Oawnoa engaang noan maetaen *grape* na aaei.’

⁸ “Nge igiwe a pwoong noa, nge mwaaen we aan maat we a aengaeni soamwooniir rhoaan engaang kkewe pwe, ‘Faingiir

to rhooan engaang kkewe nge wa pey aeginiir, rhaepetae me reer rhooawe re amwiritō toori rhooawe regommwoto.'

⁹ Mwaaen kkewe re rhaepetaen aar engaang reen nimowu konook, ra pey aeginiir reen efai *silver* nge paniuwaen erhai.

¹⁰ Iwe nge igiwe mwaaen kkewe regommw ra war pwe repwe pwiigi paniuweer, ra niuwaennei pwe epwe temoag paniuweer saengiir, nge repwan fang rhag efai *silver* ngaeni erhai me erhai iir.

¹¹ Igiwe ra pwiigi paniuweer nge ra rhaepetae aar ngiuni-ungiuniuw wonowe aan maat we.

¹² Ra aepesa pwe, 'Mwaaen kkewe re amwiritō, re engaang noan eew rhag awa, nge aemaem aeiya engaang waeiraes faaen aenet noan ffoarhon raeneei, nge wa pwan aeffitaegiy rhag paniuweer ngaeni paniuwaemmaem!'

¹³ Iwe wonowe aan maat we a aengaeni erhai neeiir, 'Maereyaerei, ngaang ise oatupwug. Een wotipieew ngaen-iaei pwe wopwe engaang noan eew raaen faaen itaen efai *silver*.

¹⁴ Igina pwiigi paniuwoamw nge wa noa reen imwoamw. Ngaang i tipaeni ipwe pey aegini mwaaen enaaen itto nepaen rhag miniwe ngaang i ngaenneog.

¹⁵ Meeta, esoar maemaewaei pwe ipwe feori meeta tipaei ngaeni naeyi senaapiy? Ngaere wopwai iga ngaang igin mmwoon?"

¹⁶ Iwe Jesus a soapwei noa nge a aepesa pwe, "Ina minne rhooawe re amwirimwir repwene gommw, nge rhooawe regommw repwene amwirimwir."

Aeinuwaen Aaen Jesus Aepesa Aan Maenōa
(Mark 10.32-34; Luke 18.31-34)

¹⁷ Igiwe Jesus a ittae Jerusalem, a paeniir rhooan kkayeo kkewe seig me riiurhai nge a kkepas ngaeniir igiwe a iir noa rhag reen aar faaeraeg.

¹⁸ Iwe a aengaeniir pwe, "Oawaiussaening. Sipwe ittae Jerusalem, nge aeremas repwene fangenoa miniwe Naiun Aeremas neepaiiur soamwoonin patere kkewe me sinsein anniug kkewe. Repwene apwiungiu pwe epwe maenōa,

¹⁹ nge ra fangenoa neepaiiur Gentiles, nge repwe aeni aegekkaei, repwe wirhiy nge rekurusuw noa; nge mwirin enuuw raaen epwe menaw sefaaen."

Aaen Erhai Iin Tingoar
(Mark 10.35-45)

²⁰ Iwe niewe pwiuniuwaen Zebedee me mwaaen riiurhai kkewe naiun ra itto reen Jesus, rhoopwut we a foatotiw me mmwan nge a aengaeni tingoar we aan.

²¹ Jesus a aeineow pwe, "Meeta wo tipaeni?"

Rhoopwut we a iura pwe, “Wopwe ppwon ngaeniaei, pwe mwaaen riiurhai kka naeyi repwe mooat peig mwaaenemw me peig rhoopwutomw, iga aere wopwene no pwe een *king*.”

²² Jesus a aengaeniir rhooawe riiurhai pwe, “Aaemi oawse giuneei minne oawwa tingoar. Oawmmwenen iun me reen kkepaen aewwaeiraes e ngaang ipwe iuniumi?”

Ra paniuwaeni pwe, “Ooa, emmwen ngaenigemaem.”

²³ Jesus a aengaeniir pwe, “Ooa, oawpwe mmwenen iun me noan kkap e aaei, nge soapw ngaang minne ipwe finitae iyo epwe mooat peig mwaaeneei me peig rhoopwutoi. Neniy kkeei nge nenieer rhoakkena minna Semaiei a fasiun feeori pwe nenieer.”

²⁴ Nge igiwe rhoaan kkayeo kkewe seig ra rongorong kkepas kkewe, ra igin soong wooar mwaaen pwipwi kkewe riiurhai.

²⁵ Iwe Jesus a faingiir oanongeer nge a aengaeniir pwe, “Aaemi oaw giuneei pwe rhoakka re nemaeniir re Gentiles ina eyor maemaeweer wooar, nge soamwoon kena aar minne re nemaeni ppaggiur noa.

²⁶ Nge esoapw ieei wunuunun neefinaemi. Pwe iyo a mwerhaen taegias me neeimi, iiy epwe no pwe naimi rhoaan engaang ngaenigaemi oanongaemi,

²⁷ nge iyo a mwerhaen epwe gommw me neeimi, iiy epwe *slave* ngaenigaemi.

²⁸ Epwe taeppen rhag Naiun Aeremas iye ese itto pwe aeremas repwe engaang ngaeni, pwe efaer itto pwe epwe engaang ngaeniir aeremas me fangenoa menewan faaen iteer towunepaen aeremas.”

*Jesus a Aeffetanao Meseer Riiurhai Mwaaen Parh
(Mark 10.46-52; Luke 18.35-43)*

²⁹ Igiwe Jesus me rhoaan kkayeo kkewe naiun ra mwet saengi Jericho, eew pwuwaen aeremas ra ttapw to mwiriir.

³⁰ Iwe nge riiurhai mwaaen parh remooat wenepeigin aan we ra rongorong pwe Jesus a faaeraeg wooan aan we, iwe ra rhaepetae reen aar iyaekkepwas, “Naiun David, faayeogemaem menap!”

³¹ Nge rhooa towunap we ra soong ngaeniir nge ra aengaeniir pwe repwe anniug noa. Nge iir ra faer egius mwo nge oatomoga noa aar iyaekkepwas, “Naiun David, faayeogemaem menap!”

³² Jesus a iug noa nge a faingiir to. A aeineeor pwe, “Meeta oawwa mwerhaen pwe ipwe feeori ngaenigaemi?”

³³ Ra paniuwaeni pwe, “Menap, aei mwerhaen pwe wopwe aeffetanao mesaemmaem!”

³⁴ Jesus a igin faayeeor iwe a geotteopa meseer; reen rhag oatowe nge a ffatenoa meseer, iwe ra tapweei noa mwirin Jesus.

21

Toonongon Jesus Noan Jerusalem

(Mark 11.1-11; Luke 19.28-40; John 12.12-19)

¹ Igiwe Jesus me rhooran kkayeo kkewe naiun ra arap ngaeni Jerusalem, ra itto reen Bethphage reen rhugun *Olives*. Iwe nge Jesus a fangenoa riiurhai rhooran kkayeo kkewe

² iwe a aengaeniir pwe, “Oawpwe noa noan pwugos mwu mmwaemi, nge oawpwe noa weri erhai *donkey* e feotaeg iginnaan fengaen me minna naiun eno oaron. Oawpwe pwaesiir nge oawwa wummwuur to reei.

³ Nge aere erhai epwe aepesa eew meeta ngaenigaemi, oawpwe aengaeni pwe, ‘Soamwoon e mwerhaen waawa’; ina rhag nge epwe fangenoa iir.”

⁴ A wen minneen pwe epwe pwaeri noa miniwe profeta e aepesa:

⁵ “Aengaeni aepinoamwon Zion pwe:

Emwaeri, a itto *king* we noawumw!

Etip sessoan nge e waawa erhai *donkey*, erhai *donkey* mwittig, naiun erhai *donkey*.”

⁶ Iwe rhooran kkayeo kkewe naiun ra noa feori meeta miniwe Jesus a aengaeniir.

⁷ Ra pwigito *donkey* we me miniwe naiun *donkey* we, ra iseni tae mengaagiur wooar, nge Jesus a teeotae wooan.

⁸ Iwe rhoora towunap we ra mmeraeg noa mengaagiur wooan aan we, nge aaemweoi ra gopogop tiw paeiniu pwe enenaen wooan aan we.

⁹ Towuneppeer aeremas kkewe regommw me mmwaen Jesus, pwan rhooawe retapweto mwirin ra aekkepwas pwe, “Sipwe aepingepinga Naiun David! Deus epwe aewenepwuwa aeremas na epwe itto faaen itaen Soamwoon! Aepingepinga Deus na oarosaen taegias!”

¹⁰ Igiwe Jesus a toonong noan Jerusalem, oanongaen aepinoamw we ra riu pwurhopwurh fetaen reen. Ra aeiineo pwe, “Iyo mwaaeneei?”

¹¹ Aaemweoi aeremas ra paniuwaeni pwe, “Iiy profeta we Jesus saengi Nazareth noan Galilee.”

Jesus a Noa Noan Temple we

(Mark 11.15-19; Luke 19.45-48; John 2.13-22)

¹² Igiwe Jesus a toonong noan *Temple* we, nge a asiur wow rhooawe re chuwaai me ameomeo pisaeg me igiwe. A

aerheppa noa *table* kkewe aar rhooran ssiuwen senaapiy me nenien mooat kkewe aar rhooran chuwaai *pigeons*,

¹³ nge a aengaeniir pwe, “Efoatofaat noan Pwapwior we e Santus pwe Deus a aepesa pwe, ‘*Temple* e aaei epwe ffai pwe imwaen maeipin,’ nge aaemi oawwa ssiuweniy ngaeni eew nenien wopoor rhoora mwoarho.”

¹⁴ Iwe rhoora kkewe re masparh me rhoora pirhemae ra itto reen Jesus noan *Temple* we, nge a aecchipwaar tae.

¹⁵ Nge soamwoonin patere kkewe me sinsein anniug kkewe ra igin soong reen min amwaraar kkewe Jesus a feeorin, me pwan aar wonigaet kkewe re iyaekkepwas me noan *Temple* we pwe, “Sipwe aepingepinga Naiun David!”

¹⁶ Iwe ra aeineow Jesus pwe, “Worongorong minikka wonigaet kaan ra aepesa?”

Jesus a paniuwaeniir pwe, “Ewaer, iya rongorong. Oawsaaen aeraegi mwo miniwe a foat noan Pwapwior we e Santus? ‘Aaemi oawwa oasuguunaar wonigaet me goagoa pwe repwe oassoara itoamw.’”

¹⁷ Iwe Jesus a nigitiir me Jerusalem, a noa ngaeni aepinoamwon Bethany. Iwe a noa no aegini epwoong igiwe.

Jesus a Soong Ngaeni Waniwan we Fig
(*Mark 11.12-14, 20-24*)

¹⁸ Igiwe a sefaaniti aepinoamw we noan soran we, nge Jesus a pecchai.

¹⁹ A weri waniwan we *fig* eno wenepeigin aan we iwe a faaeraeg ngaeni, nge a weri pwe esoar uwaan pwe rheon rhag. Iwe a aengaeni waniwan we pwe, “Esooar faaen eew ne wopwe rhiuwen uwa!” Noan rhag oaton we nge waniwan we a ppwass noa.

²⁰ Igiwe rhooran kkayeo kkewe ra weri miniwe nge ra riutae nge ra iura pwe, “Eifa wusun rhag nge a noa mwetekkaein ppwass noa waniwan *fig* een?”

²¹ Jesus a paniuwaeniir pwe, “Ennetaen, ipwe aengaeni-gaemi pwe aere oaw niugiuniug, nge oawse tip mwaramwar, oawpwe mmwenen feori meeta ngaang iya feori ngaeni waniwan we *fig*. Nge saapw minneen rhag, pwe oawpwe pwan mmwenen aengaeni rhug een pwe, ‘Mwagiut saengi igeei nge wa noa oatoranoa oanongoamw neemetaw,’ nge epwe mmwen.

²² Aere oawniugiuniug, nge oawpwe pwiigi oanongaen meeta oawtingoar noan aaemi maeipin.”

Kkepas Aeineon Nemaeniaen Jesus
(*Mark 11.27-33; Luke 20.1-8*)

²³ Igiwe Jesus a sefaan nong noan *Temple* we, nge a fenai, nge soamwooniir patere kkewe me mwaaen kkewe

aar ra itto reen nge ra aeiineow pwe, “Meeta nemaenioamw pwe wopwe feori minikkei? Iyo a ngaenneog oamw nemenem?”

²⁴ Jesus a paniuwaeniir, “Ngaang ipwe aeiineogaemi eew kkepas aeiineo, nge aere oawpaniuwaeni, ngaang ipwe pwan aengaenigaemi iya iga ipwigi aaei nemenem me ee pwe ipwe feori minikkei.

²⁵ Iya eitto aalen John nemenem pwe epwe paptismus fe-taen: saengi Deus aere saengi aeremas?”

Iwe, ra rhaepetae aar aengimaw fengaen wooar, “Meeta sipwe iura? Aere sipwe iura pwe, ‘Saengi Deus,’ nge iiy epwe aeiineogirh pwe, ‘Meeta rhag oawse niugiuniug ngaeni John reen?”

²⁶ Nge aere sipwe iura pwe, ‘Saengi aeremas,’ si mesagiir aeremas, pwe oanongeer re niugiuniug pwe John nge erhai profeta.”

²⁷ Iwe ra paniuwaeni Jesus pwe, “Aeise giuneei.”

Jesus a aengaeniir, “Iwe ngaang isoapw pwan aengaeni-gaemi iya iga ipwigi me ee nemaeniaei pwe ipwe feori minikkei.

Fioangoor Riiurhai Pwipwi

²⁸ “Igina meeta aaemi niunniywaen? Eno erhai mwaaen eyor riiurhai naiun mwaaen. A noa reen mwaaen we e tugufaeyi nge a aengaeni pwe, ‘Naeyi, wonoa engang noan maetaen *grape* igina.’

²⁹ Iwe nge iiy a paniuwaeni pwe, ‘Ngaang ise tipaeni ipwe noa.’ Nge mwirin a ssiuwen noa aan niunniywaen nge a noa.

³⁰ Iwe wonowe semeer a noa reen erhai naiun nge a noa aengaeni taeppen rhag iwe eaengaeni iwe erhai. Nge a paniuwaeni, ‘Ooa menap, ngaang ipwe noa,’ nge ese noa.

³¹ Iwe iyo neeiir rhooa ee riiurhai efeori miniwe semeer e tipaeni?”

Iwe, ra paniuwaeni, “Iwe e faeregitei.”

Iwe Jesus a aengaeniir, “Ennetaen, ipwe aengaenigaemi, pwe rhoowe rhooran iyoiyon *tax* me rhoopwutoi chuwaai kkewe nge repwe toonong noan Mweoiun Deus me mmwaemi.

³² Pwe John Baptist a itto reemi nge a pwaeri ngaenigaemi aan na emwamwaai, nge aaemi oawse niugiuniug reen. Nge rhoowe rhooran iyoiyon *tax* me rhoopwutoi chuwaai kkewe ra niugiuniug reen. Inamwo iga oawwa weri minneen, nge aaemi oawse ssiuweniy aaemi niunniywaen pwe oawpwe niugiuniug ngaeni.”

*Fioangon Awewen Rhooran Aemmwenen Maat we
(Mark 12.1-12; Luke 20.9-19)*

³³ Iwe Jesus a iura pwe, “Oaw aiussaening ngaeni pwan eew fioangan awewe. A yor erhai mwaaen efoatogi eew maetaen *grape*, a feori gurun niugiun, a genengi eew niipw pwe nenien wongowongin uwaen *grape* we nge a aiuwtae eew imwaen poos taegias me noan. Mwirin a ngaenneer aaemweoi rhooran maat pwe repwe aefaenny. Iwe rhag nge a saei taaw noa.

³⁴ Nge igiwe a toori oaton gin, a fangenoa naiun rhooran akkiuneo reer rhooran maat kkewe pwe repwe noa pwigito inetin me reen uwaen *grape* kkewe.

³⁵ Iwe nge rhooran maat kkewe ra torofi rhooran akkiuneo kkewe nge ra wirhiy erhai, ra niiy noa erhai nge ra tera iwe erhai.

³⁶ Mwirin nge mwaaen we a pwan fangenoa aaemweoi rhooran akkiuneo retowunap saengi rhooawe mmwan, nge rhooran maat kkewe ra pwan feori ngaeniir wunuunun meeta kkewe ra feori ngaeniir rhooawe regommw.

³⁷ Oarosan nge a fangenoa mwaaen we naiun reer, nge a iura pwe, ‘Iniugiuw nge repwe aesirowu mwaaen e naeyi.’

³⁸ Nge igiwe rhooran maat kkewe ra weri miniwe naiun, ra aepesa fengaenny nee fineer pwe, ‘Ieen mwaaen we naiun mwaaen we aan maat eei iwe epwe pwugusaeni minnee. Oawitto sipwe niiy noa, pwe sipwe pwiigi minne pwugusaen pwe pwugusarh!’

³⁹ Iwe ra torofi, ra oatorawow me niugiun maat we nge ra niiy noa.”

⁴⁰ Jesus a aeiineeor pwe, “Igina, ngaere mwaaen we aan maat we a war, meeta epwe feori ngaeniir rhooran maat kkewe?”

⁴¹ Ra paniuwaeni pwe, “Epwe niir noa rhooawe re aenneew nge a ngaenneer aaemweoi maat we iyo kka repwe mmwenen fang inetin uwaen *grape* kkewe oaton gin.”

⁴² Iwe, Jesus a aengaeniir, “Oawsaaen pwan aeraegi mwo meeta kkewe Pwapwior we e Santus e aepesa?

‘Fai we rhooran kaiu iimw re aerheei noa, nge faer ina fai we egin yor ipitan me mmwaen oanongan. Minneen nge feoriaen Soamwoon, a inamwo amwaraeran nningen!’

⁴³ “Iwe, ipwe aengaenigaemi, pwe minna Mweoiun Deus nge repwe pwiigi saengigaemi pwe repwe ngaenneer aere-mas kka epwe mmwen epwe feori uuwan.

⁴⁴ [Iyo a ppiungiutiw wooan faai een nge epwe mwetoarotoar noa, nge aere faai een epwe ppiungiutiw wooan erhai, epwe aepettatiw.]”*

* **21:44** Petenan eei nge esoano noan aekkaew petenan kka efoatofaat noan kkepessaen Greek.

⁴⁵ Igiwe soamwooniir patere kkewe me Pharisees ra rongorong fioangon awewe kkewe, nge regiuneei pwe eaepesaar,

⁴⁶ iwe ra aegina pwe repwe torofi. Nge remesagiu pwuwaen aeremas kkewe, pwe iir reiseni Jesus pwe erhai profeta.

22

Aeiineon Miniwe Gupwunon Appwiuniupai (Luke 14.15-24)

¹ Iwe, Jesus a pwan kkepas ngaeniir aeremas kkewe noan fioangon awewe.

² “Mweoiu Naaeng eweei minneen. Eno erhai *king* e oamoannatae aaen mwaaen we naiun gupwunon appwiuniupai.

³ A fangenoa naiun rhoan engaang pwe repwe noa faingiir to waseona kkewe repwe itto tapweei gupwun we, nge rese mwerhaen itto.

⁴ Mwirin a pwan fangenoa aaemweoi rhoan engaang pwe repwe noa aengaeniir aeremas pwe: ‘Igina, aaei gupwun a moannotae; naeyi wakke me man pwetaei kkewe naiur ra niir noa, iwe oanongan nge a moannotae. Oawitto tapweei gupwuneeen.’

⁵ Nge rhoawe re faingiir rese tepa, iwe ra siunoo: erhai a noa ngaeni aan menaai, nge erhai a noa ngaeni aan nenien chuwaai,

⁶ nge pwan aaemweoi ra torofiiir rhoan engaang kkewe, ra wirhiir nge ra niir noa.

⁷ Iwe *king* we a igin soong, iwe a fangenoa sonotaw kkewe pwe repwe noa niir noa rhoawe renni menaw iwe me figinoa aepinoamwoor.

⁸ Iwe a faingiir to rhoan engaang kkewe naiun nge a aengaeniir pwe, ‘Aaei gupwunon appwiuniupai a moannotae, nge waseona kkewe ifaingiir pwe repwe itto tapweei gupwuneeen nge ese fin pwe repwe itto.

⁹ Iwe oawnoa wooan ennap temoag kena pwe oawpwe faingiir to oanongeer aeremas kka oaw rhuungiir.’

¹⁰ Iwe rhoan engaang kkewe ra faaeraeg wow wooan ennap kkewe nge ra faingiir oanongeer aeremas kka rerhuungiir, ese tiwegin aere aeremas gacch aere aeremas aenneew, iwe a sseog noa imwaen gupwun we reer waseona.

¹¹ “Igiwe *king* we a toonong noan iimw we pwe epwe pipiiy rhoan gupwun kkewe, a weri erhai mwaaen ese memmen-gaag min mwamwaai to reen appwiuniupai we.

¹² Iwe *king* we a aeiineow pwe, ‘Maereyaerei, ifa wusun oamw toonong igeei, nge wose memmengaag min mwamwaai to reen appwiuniupai eei?’ Nge mwaaen we ese paniuwaeni.

¹³ Iwe *king* we a aengaeniir rhooran engaang kkewe pwe, ‘Oawgeoni paiun me pirheen nge oawwa oatorawow noan rorhappiung, iga epwe sessaeng nge akkaarengi me ee.’ ”

¹⁴ Nge Jesus a iura pwe, “Retowunap rhoowe re faingiir, nge fitiman rhag re finiir.”

Kkepas Aeiineon Tax

(*Mark 12.13-17; Luke 20.20-26*)

¹⁵ Pharisees kkewe ra noa nge ra pwiungiuw fengaenniy pwe repwe aettefaeti reen aar kkepas aeiineo.

¹⁶ Ra fangenoa aemweoi rhooran kkayeo kkewe naiiur reen Jesus me aemweoi rhinaen Erotos. Nge ra aengaeni pwe, “Sinsei, aemaem aei giuneei pwe een wo aepesa minikka ennet. Wa fenaiuw minikka ennet pwe wunuunun neetipaen Deus ngaeniir aeremas, nge wose niuwaennei minikka aeremas ra aeni niunniuwaen, nge wose niuwaennei wunuunun erhai me erhai.

¹⁷ Iwe, aengaenigemaem meeta oamw niunniuwaen. Emwamwaai aarh sipwe fang *tax* ngaeni Soamwoonin Rome, aere aapw?”

¹⁸ Nge Jesus egiuneei aar niunniuwaen aenneew, iwe a aengaeniir pwe, “Aaemi rhooa oatupwutupw! Meeta oaw mwerhaen pwe oawpwe soatoniaei reen?”

¹⁹ Oawpwaeri ngaeniaei senaapiy mwu oawpwe fang pwe *tax!*”

Iwe, ra pwigito reen efai senaapiy.

²⁰ Nge Jesus a aeiineeor pwe, “Mesaen iyo me itaen iyo een?”

²¹ Ra paniuwaeni pwe, “Soamwoonin Rome.”

Iwe Jesus a aengaeniir pwe, “Iwe, oawfang ngaeni Soamwoonin Rome meeta aaen Soamwoonin Rome, nge oawfang ngaeni Deus meeta aaen Deus.”

²² Oatowe re rongorong kkepas we, ra mwaar noa reen, iwe ra siusaengi.

Kkepas Aeiineon Menaw Sefaaen

(*Mark 12.18-27; Luke 20.27-40*)

²³ Noan raaenin we rhag nge aemweoi Sadducees ra itto reen Jesus ra iura pwe aeremas resoapw menaw sefaaen me reen mae.

²⁴ Iwe, ra aepesa pwe, “Sinsei, Moses a iura pwe ngaere erhai mwaaen a maenoa nge esooar naiun, ina nge mwaaen we pwiin epwe pwiuniuwaeni rhoapwut we pwe epwe yor naiun pwe epwe ffai pwe naiun mwaaen we a mae.

²⁵ Iwe, eyor fiusiuman pwiipwi re fasiun nonno igei. Iwe mwaaen we etugufaeyi a pwiuniuwaeni erhai rhoopwut, nge a maenoa nge esooar naiun, iwe a nigiti niewe ngaeni wonowe pwiin.

²⁶ Taepfen rhag meeta we ewen ngaeni iwe ariurhaiun me iwe aeiniurhaiun toori oanongeer noa rhooawe fiusiuman.

²⁷ Mwirin noan, nge rhoopwut we a maenoa.

²⁸ Iwe, noan raaenin na manimae repwene menaw sefaaen, iyo me neeiir rhooawe fiusiuman minne pwiuniuwaen rhoopwut we? Igiwe oanongeer nge repwiuniuwaeni niewe.”

²⁹ Nge Jesus a paniuwaeniir pwe, “Aaemi oawwa mwaerhei, pwe iga aaemi oawse giuneei oawton Pwapwior we eSantus ngaere minikkenaa maemaewaen Deus.

³⁰ Pwe oate rhooa mae repwe menaw sefaaen, repwene aeffitaeg ngaeniir rhag angkenusun naaeng nge resoapw pwiuppwiuniuw no.

³¹ Iwe nge reer manimae iga repwe menaw sefaaen tae: esaaen yor mwo aaemi aeraegi meeta we Deus e aengaenigaemi? Iwe e aepesa pwe,

³² ‘Ngaang aen Abraham Deus, aen Isaac Deus me aen Jacob Deus.’ Iiy aar Deus rhooakka re menaw, nge saapw aar Deus rhooakka remae.”

³³ Igiwe pwiuwaen aeremas kkewe ra rongorong kkepas kkewe, ra mwaar noa reen aan fenai.

Anniug we Oarosaen Taegias
(Mark 12.28-34; Luke 10.25-28)

³⁴ Oatowe Pharisees ra rongorong noa pwe Sadducees kkewe ra iugiu noa pwe resa giuneei no minne repwe paniuwaeni ngaeni Jesus, iir ra rhu fengaan,

³⁵ nge erhai me neeiir, erhai sinsein anniug, a aegina ne soatoni Jesus reen aan kkepas aeineo.

³⁶ A aeineow pwe, “Sinsei, ifa oasoapwosoapw e oarosaen taegias me neeiin oanongaen Anniug?”

³⁷ Jesus a paniuwaeni pwe, “Wopwe aerhaengi Soamwoon na oamw Deus reen oanongaen neetipoamw, reen oanongaen ngeoniumw pwan reen oanongaen oamw niuniuwaen.

³⁸ Ieei minne e oarosaen taegias me yor ipitan me neeiin oanongan oasoapwosoapw.

³⁹ Nge oaruwowaen oasoapwosoapw epwan taegias nge: ‘Wopwe aerhaengiir rhoaan wenioaromw taepfen rhag oamw sipegin aerhaengi oanongoamw.’

⁴⁰ Oanongaen aalen Moses Anniug me aar profeta kkewe pwapwior nge re oanongonong rhag wooan oasoapwosoapw kka ruwowu.”

*Kkepas Aeiineon Iyo na Kristus
(Mark 12.35-37; Luke 20.41-44)*

⁴¹ Igiwe aalemweoi Pharisees ra rhu fengalen, Jesus a aeiineeor pwe,

⁴² “Meeta oaw niuwaennei reen Kristus? Iiy teoteeon iyo?”

Ra paniuwaeni pwe, “Iiy teoteeon David.”

⁴³ Jesus a aeiineeor pwe, “Meeta rhag nge Espritu Santus a aemeyaefi ngaeni David aan epwe faingi pwe ‘Soamwoon’? Iwe David a aepesa,

⁴⁴ ‘Soamwoon a aengaeniaei Soamwoon pwe:

Mooat tiw peig mwaaeneei

toori aaei ipwe iseniir tiw rhoonan oapwutoag faaen pirhemw.’

⁴⁵ Iwe, ngaere David e faingi ngaeni pwe iiy ‘Soamwoon’, ifa wusun nge Kristus epwe no pwe teoteeon David?”

⁴⁶ Esooar erhai ne emmwenen paniuwaeni kkepas aeiyege kkewe aalen Jesus, iwe saengi rhag noan raaenin we nge esooar no ne erhiuwen mwerhaen pwe epwe aeiineow aekkaew kkepas aeiineo.

23

*Jesus a Atapeonneogiiur Reer Sinsein Anniug me Pharisees
Kkewe*

(Mark 12.38-39; Luke 11.43, 46; 20.45-46)

¹ Iwe Jesus a aengaeniir pwuwaen aeremas me rhoonan kkayege kkewe naiun pwe,

² “Sinsein anniug me Pharisees kkewe minne rhoonan awe-
weei Anniug kkewe aalen Moses.

³ Iwe oawpwe tapweei nge oawfeeri oanongaen meeta ra aengaenigaemi; nge oawsoapw appiuriu aar wegitaeg, pwe rese pomwoni meeta ra aeni fenai.

⁴ Regeonitae wooan sagiuriur aeremas minikka ecchoaw nge e waeiraes pwe repwe aiufera, nge rese mwerhaen mwo nge repwe saeregi egatt aiuttiun paiiur pwe repwe tipaengiir reen aiufar.

⁵ Refeeri oanongaen meeta pwe aeremas repwe weriir. Oawpipiiy minikkena eno wegisin Pwapwior we e Santus wooan ina ra geonitae wooan rhimweer me paiiur, nge e igin tettemoagon! Oawpipiiy enaeyin minikkena maetetteren weni ngaerhen mengaagiiur!

⁶ Re aerhaengi neniyy kkena egacch noa me noan gupwun me pwan neniyy kkena nenieer rhooa taegias me noan wut-teer Jews,

⁷ repwan aerhaengi aar aeremas repwe aewenimmwaar me aesirowuur me noan imwaen chuwaai, me aar aeremas repwe faingiiir pwe 'Sinsei'.

⁸ Nge aaemi oawsoapw ffai pwe 'Sinsei', pwe erhai rhag aaemi Sinsei, nge oanongaemi nge oaw pwipwi.

⁹ Oawsoapw faingi mwo nge erhai me wooan soanopeei pwe 'Saam', pwe iga erhai rhag Semaemi eno woai naaeng.

¹⁰ Oawsoapw pwan ffai pwe aaemi 'Rhooran a Wen', pwe iga pwan erhai rhag aaemi rhooran a wen imwu iiy Kristus.

¹¹ Iyo e egin taegias noa me neemi nge iiy epwe no pwe naimi rhooran akkiuneo.

¹² Pwe iyo na e aetaegiasa tae epwe sessoanotiw, nge iyo na epwe oasossonaetiw epwe taegias tae.

Jesus a Songetiir Rhooa Oatupwutupw

(Mark 12.40; Luke 11.39-42, 44, 52; 20.47)

¹³ "Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawttiyy noa aesemaen Mweoiu Naaeng saengiir aeremas. Nge aaemi oawse toonong noan, oawse pwan fang ngaeniir mwo nge rhooawe re tipaeni repwe toonong.

¹⁴ [Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawoapwurhaar rhoopwut kka a mae pwiuniuweer, nge oawwa pwigi saengiir imweer, nge oawwa oangonongon ngaeniir aeremas aaemi maepin enaei. Reen minnee minne Deus epwe fang ngaenigaemi aegaeregaer na oarosaen cchoaw.]*

¹⁵ "Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Aaemi oawwa seraeg fetaen nee metaw pwan wooan oanongaen faniuw pwe minni oawpwe wegiti tipaen erhai aeremas ngaeni aaemi namanam; nge aere iga emmwen minneen, aaemi oawwa feori pwe iiy epwe faer kkaein noa aen aegaeregaer me mmwaemi me noan nifierno.

¹⁶ "Ifa mwo aenneewan ngaenigaemi, aaemi rhooran afan parh! Oaw aepesa pwe, 'Aere erhai a aekkepan faen itaen Temple we, miniwe nge esooar ipitan. Nge aere a aekkepan faen itaen goon we noan Temple we, iiy epwene feori meeta we a aeni ppwon.'

¹⁷ Aaemi masepwurh masparh! Ifa minne e igin yor ipitan, goon aere Temple we efeori goon we pwe epwe pin?

* **23:14** Petenan eei nge esoano noan aekkaew petenan kka efoatofaat noan kkepessaen Greek.

¹⁸ Aaemi oawpwan aepesa pwe, 'Aere erhai a aekkepan faaen itaen antar we, miniwe nge esooar ipitan. Nge aere a aekkepan faaen itaen niffang kkewe wooan antar we, iiy epwene feeori meeta we a aeni ppwon.'

¹⁹ Masperhaemi! Meeta eigin yor ipitan, niffang we aere antar we efeeori niffang we pwe epwe pin?

²⁰ Iwe, ngaere erhai a aekkepan faaen itaen antar we, a aekkepan faaen itaen antar we me oanongaen niffang kena eno wooan.

²¹ Nge ngaere erhai a aekkepan faaen itaen *Temple*, a aekkepan faaen itaen *Temple* we nge a pwan aekkepan faaen itaen Deus iwe eno noan.

²² Nge ngaere erhai a aekkepan faaen itaen naaeng, ina a aekkepan faaen itaen nenien mooat we aaen Deus me pwan faaen itaen Deus iwe emooat wooan.

²³ "Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oaw ngaenneei Deus eew ginigin me noan seig reen *mint* me *dill* me *cumin*. Iwe nge oaw aerheei noa Anniug kkewe eyor ipitan me reen oasoapwosoapw, taeppen awewe mwamwaa me faayeow me ennet. Ikkeei anniug kka oawpwe pomwoni, nge oawsoapw nigiti noa ikkina aekkaew.

²⁴ Aaemi rhoan afan parh! Oaw tipwei wow erhai nnoang me noan minimwu iuniumaemi, nge oawwa faer woromi noa erhai *camel*!

²⁵ "Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oaw toafi gacchiuw niugiun aaemi kkap me saepiy, nge noan a sseog noa reen fitigogo me tipinap.

²⁶ Masperhaemi, aaemi Pharisees! Oawpwe mmwaen toafi gacchiuw noan kkap we pwe ina nge niugiun epwan nimegacch noa.

²⁷ "Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawweei rhag taeppen pwerheraegin paeyi kka enning niugiun, nge noan a sseog noa reen rhiun aeremas me pwotoron manimae.

²⁸ Epwan taeppen rhag aaemi: me niugiun oawning faaen meseer aeremas, nge noan nge a sseog noa reen oatupwutupw me monofit.

Jesus e Aepesa Aar Aegaeregaer
(Luke 11.47-51)

²⁹ "Ifa mwo aenneewan ngaenigaemi, aaemi sinsein anniug me Pharisees! Aaemi rhooa oatupwutupw! Oawfeeori paeyieer rhoawe profeta pwe epwe gacch, nge oawwa awweoniwa faiun paeyieer rhoawe rhoa mwamwaa.

³⁰ Oawwa aepesa pwe, 'Aere aemaem aeimenaw noan oaton we rhaepetomaem rerhiuwen menaw, aemaem aeisoapw tapweer reen niir noa profeta kkewe.'

³¹ Iwe oawwa sipegin pwaeritae pwe aaemi teoteeor rhoawe reniir noa profeta kkewe!

³² Iwe oawnoa pwan soapwei noa meeta minikkewe aaemi rhaepeto rerhaepiy tae!

³³ Aaemi sowufaeng me naiiur sowufaeng! Epwe ifa wusun aaemi kkewaeg saengi aaemi aegaeregaer noan nifierno?

³⁴ Ieei minne ipwe fang wow reemi profeta me soaw tipaecchem me sinsei; aaemi oawpwe niir noa aaemweoi, oawkurusuur noa aaemweoi, oawpwan wirhiy aaemweoi me noan wuttee Jews nge oaw fattapweer noa me reen eew me eew aepinoamw kkena.

³⁵ Ieei minne epwe ittiw woami eew aegaeregaer faaen iteer rhooa kkewe mwamwaai iwe oawniir noa, saengi nni menaw noan mwaaen mwamwaai we Abel toori Zechariah iwe naiun Berechiah, mwaaen we oawniir noa me nepetaen *Temple* we me antar we.

³⁶ Ennetaen, ipwe aengaenigaemi: aegaeregaerin oanongaen nni menaw kkewe nge epwe tooriir aeremesaen mweoi e igina.

Aaen Aerhaengerhaeng Jesus Ngaeni Jerusalem
(*Luke 13.34-35*)

³⁷ "Jerusalem, Jerusalem! Wa niir noa profeta kkewe nge woteraar rhoaan pweipwogin kkepas kkewe Deus efangeto reemw! A faaen fiteig aaei mwerhaen pwe ipwe ioni fengaenniy noawumw aeremas, taeppen maniug a ioni fengaenniy naiun faaen paiun, nge een wose mwerhaen pwe ipwe feori!

³⁸ Iwe *Temple* we aaemi ina aeremas repwe siusaengi iwe peonoa.

³⁹ Pwe ipwe aengaenigaemi, pwe saengi igina oawsoapw rhiuwen weriaei no toori oawpwe iura pwe, 'Deus epwe aewenepwuwa aeremas na epwe itto faaen itaen Soamwoon.'"

24

Jesus e Aepesa Toaroponoan Temple we
(*Mark 13.1-2; Luke 21.5-6*)

¹ Igiwe Jesus a siusaengi *Temple* we, rhoaan kkayeo kkewe naiun ra itto reen nge ra pwaeri ngaeni iimw kkewe noan *Temple* we.

² Nge Jesus a aengaeniir pwe, "Ooa, oawwa weri oanongan minikkaan. Ennetaen, ipwe aengaenigaemi: esoar efai faai

kaan ne epwe notiw nenien; oanongan noa nge repwene toaropotiwi.”

Affayeo me Aewwaeiraes
(Mark 13.3-13; Luke 21.7-19)

³Igiwe Jesus a mooat wooan miniwe rhugun *Olives*, rhooran kkiyeo kkiyeo naiun ra itto reen nge iir noa rhag. Ra aeiyege ngaeni pwe, “Aengaenigemaem ineeta minikkeei epwe wen, me meeta aegin epwe pwaeri noa oamw itto me soapwonoan feoniufan?”

⁴Jesus a paniuwaeniir pwe, “Oawaefaennigaemi, pwe esoapw yor erhai epwe oatupwugaemi.

⁵Towunepeer aeremas repwe itto faaen itaei nge re aepesa pwe, ‘Ngaang Kristus!’ Iwe, repwe oatupwuur noa pwuwaen aeremas.

⁶Oawpwe rongorong oacchorongon moawun arapeto me kkepasaen moawun taaw noa, nge oawsoapw mesag. Oatokkeei nge minikkeei nge repwe fasiun wen, nge saapw reen a arapeto ne soapwonoan.

⁷Faniuw me faniuw repwe fiow fengaen, nge mweoi me mweoi repwe pwan moawun fengaen. Epwe yor naengeta me fanemwar oanongaen pwiuneoi.

⁸Oanongaen minikkaan nge eweei pweoneotaen metaegin erhai rhoapwut iga epwe nainai.

⁹“Iwe repwe torofigaemi nge refang noa aemi repwe noa aewwaeiraesigaemi nge ra nigaemi noa. Oanongeer aeremas repwe oapwutaegaemi pwonno faaen itaei.

¹⁰Reen oatona nge towunepeer repwene fangetae aar niugiuniug; nge re afangmaei erhai nge rekkoapwut fengaen nee fineer.

¹¹Iwe towunepeer profeta oatupwutupw repwe itto nge ra oatupwuur noa pwuwaen aeremas.

¹²Pwonno iga a temoag noa feoffeoor aenneew, aerhaengerhaeng we nepetaen aeremas epwene mwright noa.

¹³Nge iyo e aetemaegin toori nee soapwonoan nge epwe menaw.

¹⁴Nge Kkepas Mwamwaai we reen Mweoiu Naaeng repwe noa fenaiuw wooan oanongaen faniuw, pwe epwe pwaen ngaeniir oanongaen aeremas, iwe mwirin epwapw itto nee soapwonoan.

Eew Min Aemmesagsag
(Mark 13.14-23; Luke 21.20-24)

¹⁵“Oawpwe weri eew Min Oarosaen Aemmesagsag, iwe profeta Daniel a kkepas faaen itan. Epwe no noan pwiuneoi we epin.” (Ngaeni rhooran aeraegraeg: metefaaegini minneen!)

¹⁶“Iwe rhoawe reno Judea repwe fattapwetae weei rhug.

17 Erhai ne eno wooan wungaen iimw, esoapw teotiw pweipwog pisaegin me nee iimw.

18 Nge erhai ne eno noan maat, esoapw sefaen ngaeni imwan pwe epwe pweipwog mengaagiun.

19 Epwe ifa mwo aar affayeo rhoopwut pwoopwo me ikka re nayigit noan oaton naan!

20 Oawpwe maeipin ngaeni Deus pwe aaemi siunoa esoapw itto noan oaton patapat aere noan raaenin Sabbath!

21 Pwe waeiraesin oatonaan ina epwe faer igin kkaein saengi oanongaen waeiraes kka enoa itto reen oatowe supwuton faniuw toorito igina. Nge esoapw rhiuwen yor taepen epwe rhiuwen itto.

22 Nge Deus a fasiun oamworhomworha nepaen raaen; ngaere ese feori, nge esoar ne epwe menaw. Nge pwonno faen iteer rhoowe a finiir tae, Deus a oamworhomworhanao nepaen raaen.

23 “Iwe, ngaere erhai e aepesa ngaenigaemi pwe, ‘Pipiiy, iei iiy Kristus!’ aere ‘Inaan iiy!’ oawsoapw niugiuniug ngaeni.

24 Pwe aaemweoi aeremas repwene oatupwutupw pwe iir Kristus, aere erhai profeta, nge repwene feori min amwaraar me manaman tettemoag, pwe repwe oatupwu rhoowe Deus a finiir tae aere repwe mmwenen feori.

25 Oawrongorong! Ngaang iya fasiun pwaeri ngaenigaemi oanongaen minikkei mmwaen aar repwe wen.

26 “Iwe aere erhai epwe aengaenigaemi pwe, ‘Pipiiy, a no noan *desert!*’, oawsoapw noa iginaan. Ngaere re aepesa, ‘Pipiiy, iiy ewop igeei!’, oawsoapw niugiuniug ngaeni.

27 Pwe mwaaen we Naiun Aeremas epwe itto taepen rhag weriwer iga effiunoa noan naaeng saengi rhag etiw toori netow.

28 “Ese tiwegin igine epwe yor erhai manimae ee, nge witiyas repwe mweoiuto reen.

*Itton Mwaaen we Naiun Aeremas
(Mark 13.24-27; Luke 21.25-28)*

29 “Mwirin rhag moanno noan aewwaeiraesin noan raaenin kkewe, aenet epwene rorhonoa, meram esoapw rhiuwen ttin, nge fiu repwene ppiungiutiw me noan naaeng, nge minikkiwe maemaewaen noan naaeng repwene mwagiut saengi nenieer.

30 Iwe nge miniwe aeginnen Naiun Aeremas epwe pwae noa me noan naaeng; nge oanongeer aeremesaen faniuw repwe sessaeng aar repwe giuneei miniwe Naiun Aeremas aan itto wooan toapw noan minna maemaewan me nningen ina e temoag.

³¹ Nge epwe fangenoa naiun angkenus reen nngiun ttigin rappwa we, nge repwene ioni fengaenniy rhooawe Deus a finiir saengi faawu pwaesiisin faeinaengiy, saengi esoapw naaeng toori esoapw.

Fenaiun Waniwan e Fig
(Mark 13.28-31; Luke 21.29-33)

³² “Oawpwe kapwiung saengi waniwan e *fig*. Oate minikkenaa raaen ra arawaraw me mehecchoar noa nge a pwiugiuw wow rheon, oawwa giuneei pwe a arapeto neraeg.

³³ Epwan taeppen rhag, igine oawweri minikkeei pwe a wen, oawpwene giuneei pwe oatowe ina a arapeto, oamoanatae pwe epwene rhaep.

³⁴ Ennetaen, ipwe aengaenigaemi pwe oanongaen minikkeei nge epwe wen wenimmwaen iga aeremesaen igina repwe maenoa.

³⁵ Naaeng me soanop repwe soapwonoa, nge aaei kkepas esoapw soapwonoa.

Esooar ne e Giuneei Raaenin Aere Awa
(Mark 13.32-37; Luke 17.26-30, 34-36)

³⁶ “Esooar erhai ne e giuneei raaenin aere awa aan epwe itto, angkenusun naaeng mwo nge resoapw giuneei, aere miniwe Naiun, pwe aaen Saam rhag.

³⁷ Pwe itton mwaaen we Naiun Aeremas epwe taeppen rhag meeta a wen noan oaton Noah.

³⁸ Noan raaenin kkewe mmwaen noataer we, aeremas remwommwongo nge kukkupwun, mwaaen me rhoopwut repwiuppwiuniuw toori noan raaenin we Noah a teeotae wooan pwoot we.

³⁹ Rese giuneei minne epwe wen toori aaen noataer we itto niir noa oanongeer. Ina wunuunun minne epwe wen oate Naiun Aeremas epwe war.

⁴⁰ Iwe nge riiurhai mwaaen re engaang wooan maat: erhai repwe pwiigi noa nge erhai epwe notiw.

⁴¹ Riiurhai rhoopwut repwe ammaat mwongo; erhai repwe pwiigi noa nge erhai epwe notiw.

⁴² Ieei minne oawpwe aefaennigaemi reen, pwe oawsoapw giuneei noan raaen fa minne aaemi Soamwoon epwe wareto.

⁴³ Nge oawpwe metaf pwe ngaere soaw iimw we e giuneei ineet rhooa mwoarho we epwe itto, pwe iiy epwe mmas noa rhag, nge esoapw fang ngaeni rhooa mwoarho we aan epwe fereeinong iimw we imwan.

⁴⁴ Ieei minne pwan aaemi, oawpwe moannotae, pwe mwaaen we Naiun Aeremas epwe noa itto reen eew oat ina aaemi oawse tapeonneog reen.

Rhoan Akkiuneo We e Wenewen me Iwe Ese Wenewen
(Luke 12.41-48)

⁴⁵ “Iwe, iyo rhag rhoan akkiuneo we ewenewen nge ereepiy? Iiy minne maasta we a fang ngaeni pwe epwe nemaeniir rhoan akkiuneo kkewe nge engaenneer mwongo noan oaton efin.

⁴⁶ Ifa mwo wenepwuwaen rhoan akkiuneo we, aere maasta we aan e itto giuneei aan feori minikkeei igiwe ewar.

⁴⁷ Ennetaen, ipwe aengaenigaemi, pwe maasta we epwe ngaenneei rhoan akkiuneo we pwe epwe nemaeni oanongaen minikkewe pisaegin.

⁴⁸ Nge aere rhoan akkiuneo we eaenneew, epwe niuwaennei nong noan tipan, ‘Maasta we aaei epwe mmwaei aan sefaaeneto,’

⁴⁹ nge epwene rhaepetae aan wirhiir rhoan akkiuneo kkewe rhinan, nge emwongo me gupwun fengaen me aaemweoi man pwunaas.

⁵⁰ Mwirin maasta we epwe sefaaeneto noan raaenin we rhoan akkiuneo we ese niuwaennei, me eew oaton esoapw giuneei.

⁵¹ Iwe maasta we epwene fena kititiw nge efang noa neeiir rhoawe rhoa oatupwutupw. Igiwe epwe sessaeng me akkaarengi me ee.

25

Fioangoor Seig Rhoopwut Anian

¹ “Reen oaton naan nge minna Mweoiu Naaeng epwe aeffi-taeg ngaeni minneen. Eno seig rhoopwut anian re pwiigi aar oappwun nge ra noa soawuni erhai *bridegroom*.

² Nimman me neeiir retipoarorh, nge nimman retipaecchem.

³ Rhoawe retipoarorh ra pwiigi aar oappwun, nge rese pwiigi oatoawun rhaniun oappwun kkewe aar,

⁴ nge ikkiwe re tipaecchem ra pwiigi aar oappwun fengaen me neon rhaniun oappwun kkewe aar.

⁵ Iwe igiwe *bridegroom* e mmwaei aan itto, iwe ra cchoaw iwe ra maiur noa.

⁶ “Igiwe a nugaenipwoong noa nge a yor eew aekkepwas, ‘Ieen iiy *bridegroom* we! Oaw itto oawpwe rhuungi!’

⁷ Iwe rhoopwut kkewe seig ra mmasetae nge ra oamoanatae oappwun kkewe aar.

⁸ Iwe, rhoawe retipoarorh ra aengaeni rhoawe re tipaecchem pwe, ‘Oawfang ngaenigemaem egius rhaniun oappwun, pwe oappwun kka aemaem nge repwene gunnoa.’

⁹ Nge rhoawe re tipaecchem ra paniuwaeniir pwe, ‘Ese mmwen, pwe iye esoapw nnaaf aaemi me pwan aemaem.

Oawnoa sitowa oawpwe noa chuwaai aaemi rhaniun oappwun.'

¹⁰ Iwe rhooawe retipoarorh ra noa pwe repwe noa chuwaai aar rhaniun oappwun. Nge igiwe ra noa, iwe nge *bridegroom* we a war. Iwe, rhooawe nimman rhoopwut remoannotae ra tapweei nong noan imwaen gupwun we, iwe mwirin iwe a titti noa asam we.

¹¹ "Mwirin nge rhoopwut kkewe aaemweoi ra pwan war. Iwe, ra iyaekkepwas, 'Soamwoon, soamwoon, sugi ngaenige-maem asam.'

¹² "Iwe nge *bridegroom* we a paniuwaeniir pwe, 'Ennetaen, ipwe aengaenigaemi, ise giunegaemi.'"

¹³ Iwe Jesus a soapwei noa nge a iura pwe, "Oawpwe atapeonneogiugaemi, pwe oawse giuneei raaenin me awaan.

Fioangoor Eoniurhai Rhooan Engaang
(Luke 19.11-27)

¹⁴ "Noan oaton naan nge Mweoiu Naaeng epwe aeffitaeg ngaeni minneen. Eno erhai mwaaen epwene noa waeii; a faingiir rhooan engaang kkewe naiun nge a aengaeniir pwe repwe nemaeni oanongaen minikkewe pwugusan.

¹⁵ A ngaenneei erhai me erhai iugiugiun minne epwe mmwen ngaeni: a ngaenneei erhai nimingeras faiun senaapiy, nge a ngaenneei pwan iwe erhai riiungeras, nge iwe erhai eew sengeras. Iwe a noa waeii noa.

¹⁶ Iwe rhag nge rhooan engaang we epwigi nimingeras faiun senaapiy a mwetekkaein noa aengaenga iwe reen, iwe a pwan pwigi sefaaeny pwan nimingeras menewan.

¹⁷ Epwan ina rhag wunuunun iwe epwigi riiungeras pwe a pwan pwigi sefaaeny pwan riiungeras menewan.

¹⁸ Nge rhooan engaang we epwigi sengeras faiun senaapiy, a noa genengi eew niipw nge a nipwaeni noa faiun senaapiy we naiun maasta we aan noan.

¹⁹ "A ssiunaei noa mwirin nge maasta we a sefaaen to nge a aeyegiir senaapiy kkewe naiun.

²⁰ Iwe rhooan engaang we epwigi nimingeras faiun senaapiy a itto nge a iseni tiw pwan nimingeras. A aepesa pwe, 'Maasta, een wo ngaenneaei nimingeras faiun senaapiy. Pipiiy, a pwan yo ngaeniaei nimingeras faiun senaapiy pwe menewan.'

²¹ Maasta we a aengaeni pwe, 'Egacch, een erhai rhooan engaang mwamwaai me wenewen. Een wo menaw wenewen reen oamw nemaeni minikka e mwittig, ina minne ipwe faer ngaenneog minikka e tettemoag pwe wopwe nemaeni. Itto tapweaei reen apwapwa e aaei.'

²² Iwe rhooan engaang we epwigi riiungeras faiun senaapiy a toonong nge aepesa pwe, 'Maasta, een wa

ngaenneaei riiungeras faiun senaapiy. Pipiiy, a pwan yo riiungeras faiun senaapiy pwe menewan.'

²³ Maasta we a aengaeni, 'Egacch, een erhai rhoan engaang mwamwaa'i me wenewen. Een wo menaw wenewen reen oamw nemaeni minikka e mwittig, ina minne ipwe faer ngaenneog minikka e tettemoag pwe wopwe nemaeni. Itto tapweaei reen apwapwa e aaei.'

²⁴ Iwe rhoan engaang we e pwigi sengeras faiun senaapiy a toonong nge aepesa pwe, 'Maasta, igiuneei pwe een erhai mwaaen sosoong. Woginiiy uwaen foat inamwo iga wose foat, wa ioni fengaenniy uwaen irae inamwo wose oamworomwor faiun.

²⁵ Iya mesag, ina minne iya noa nipwaeni noa senaapiy we noawumw faaen ppweon reen. Pipiiy, ieen senaapiy we noawumw.'

²⁶ Iwe maasta we a paniuwaeni pwe, 'Een erhai rhoan engaang aenneew me gagu! Wogiuneei pwe ngaang iya giniiy ikka ise foat, iya pwan ioni fengaenniy uwaan ikka ise oamworomwor faiun ee?

²⁷ Iwe, meeta wose faer iseni nong senaapiy mwu naeyi noan *bank* reen? Ina nge ipwe pwigi sefaaeniy fengaan me menewan igine iya sefaaen to.

²⁸ Igina, oawpwigi saengi senaapiy kkomwu reen nge oawwa ngaenneei inwu eyor seig sengeras faiun senaapiy reen.

²⁹ Pwe iyo a yor meeta aan nge repwe pwan fang ngaeni, iwe epwene igin ssow noa aan; nge iyo ese yor meeta aan nge repwe pwigi saengi mwo nge iwe egius iwe eyor reen.

³⁰ Nge reen rhoan engaang e esooar ipitan, oawoatorawow niugiun noan rorhappiung, iga epwe sessaeng nge akkaarengi me ee.'

Amwiucchiun Apwiung

³¹ "Ngaere igine mwaaen we Naiun Aeremas epwene war noan nningen pwe *king* nge oanongeer angkenus repwe tapweei, nge epwe mooat wooan minna nenien *king*,

³² iwe, nge oanongeer aeremesaen faeinaengiy nge repwe rhu fengaan me weniimmwan. Nge epwe aeyimweoiuw fesaenngiir noan ruwowu mwiirh, taepfen rhag erhai rhoan neginegin maan e aeyimweoiuw fesaenngiir *sheep* saengiir *goat*.

³³ Epwe iseniir nong *sheep* peig mwaaenen, nge *goat* peig rhoopwuton.

³⁴ Nge *king* we epwene aengaeniir rhoaawe reno peig mwaaenen, 'Oawitto, aemi rhooa wenepwu me reen Semaei! Oawpwe mweoiuni mweoi e oamoannatae faaen itaemi saengi rhaepetaen feoniufan.

35 Pwe ngaang iya pecchai nge aaemi oawwa oamwongowaei, iya moar nge aaemi oawwa aiuniuwaei, iya waseona nge aaemi oawwa aetiwaeyaei noan imwaemi.

36 Ise memmengaag nge aaemi oawwa fang mengaagiuy, iya semwaai nge aaemi oawwa aefaenniaei, iya no noan kanepwus nge aaemi oawwa itto rhuungiaei.'

37 Iwe rhooawe rhooa wenewen repwene paniuwaeni, 'Soamwoon, ineet aeiya giuneei pwe wa pecchai nge aeiya oamwongog, ineet wa moar, nge aeiya aiuniug?'

38 Ineet aeiya giuneei pwe wa waseona, nge aeiya aetiwoag nong noan imwaemmaem, aere ineet aeiya giuneei pwe esooar mengaagiumw, nge aeiya fang mengaagiumw?

39 Ineet aeiya giuneei pwe wosemwaai aere no noan kanepwus, nge aeiya itto rhuungiug?'

40 Iwe, *king* we epwene paniuwaeni pwe, 'Ennetaen, ipwe aengaenigaemi, ese tiwegin minne oawwa feeri ngaeni erhai neeiir rhoakka rewen pwiyy ikka reigin sessoan, nge oawpwan feeri ngaeniaei.'

41 "Iwe epwan aengaeniir rhooawe reno peig rhoopwuton, 'Oawpwe siu saengiaei, aaemi rhooawe Deus epwene fang aaemi aegaeregaer, oawpwe noa noan aengaet we esooar iaenin a faer oamoannatae faaen iteer Saetan me naiun angkenus!

42 Pwe iya pecchai, nge aaemi oawse oamwongowaei; iya moar, nge aaemi oawse ainiuwaei.

43 Iya waseona, nge aaemi oawse aetiwaeyaei noan imwaemi; ise memmengaag, nge aaemi oawse fang mengaagiuy; iya semwaai me no noan kanepwus, nge aaemi oawse aefaenniaei.'

44 Iwe repwene paniuwaeni pwe, 'Soamwoon, ineet aemaem aeiya giuneei pwe wa pecchai aere moar, aere waseona, aere wose memmengaag, aere semwaai, aere no noan kanepwus, nge aeise aefaenniug?'

45 Nge *king* we epwene paniuwaeniir pwe, 'Ennetaen, ipwe aengaenigaemi: ese tiwegin minne oawse feeri ngaeni erhai neeiir rhoakka re rewen pwiyy ikka reigin sessoan, oawse pwan feeri ngaeniaei.'

46 Iwe, rhoakkeei repwe noa ngaeni aegaeregaer we esooar iaenin, nge rhooawe rhooa wenewen repwe noa ngaeni menaw na esooar ssiaaenin."

26

Aar Rhiu Aenneewa Jesus
(Mark 14.1-2; Luke 22.1-2; John 11.45-53)

1 Oatowe Jesus a moann aan fenaiuw oanongaen minikkei, a aengaeniir rhoaan kkayeo kkewe naiun pwe,

² “Aaemi oawgiuneei pwe a faei riuraeen nge epwene gona miniwe gupwunon *Passover*, nge miniwe Naiun Aere-mas epwene toonong nee paiur aeremas pwe repwene noa kurusuw noa.”

³ Iwe soamwooniir patere me mwaaen kkewe aar ra mwi-irh fengaen noan imwaen Soamwoonin Patere we itan Ca-iaphas,

⁴ nge ra pwiungiuw wunuunun aar repwe torofi Jesus noan mwoanomwoan pwe repwe noa niiy noa.

⁵ Nge ra aepesa pwe, “Sisoapw feeri minneei oaton gup-wunon *Passover*, pwe aeremas rete aefitigogo tae.”

Rhooapwut We e Aepiti Jesus
(Mark 14.3-9; John 12.1-8)

⁶ Jesus a noa Bethany noan imwaen Simon, erhai mwaaen kaenepaai mwo igiwe.

⁷ Nge oaton we Jesus a mwongo, erhai rhooapwut a itto reen faaen eew neo effeoor saengi *alabaster* nge eoawut ngaeni neoningas eigin choaw paniuwan, a itto aeniatiw neo we wooan rhimwen Jesus.

⁸ Rhooan kkayeo kkewe ra giuneei miniwe, nge ra soong. Ra aepesa pwe, “Meeta mwo oasonopaen neoningas eei?”

⁹ Pwe neoningas een emmwun erhai epwe chuwaiuw ngaeni senaapiy temoag nge ra ngaenneer man affayeo!”

¹⁰ Jesus e giuneei meeta kkewe ra aepesa, iwe a aengaeniir pwe, “Meeta oawamwagiutiu nieen reen? Egin mwamwaa minne a feeri ngaeniaei.

¹¹ Pwe rhoa affayeo repwe fasiun yor reemi oanongaen oat, nge ngaang isoapw no rhag reemi oanongaen oat.

¹² Minne efeeri iga e aeniatae neoningas wooan oanon-gaei, nge a faer oamoannayaei tae ngaeniaei nipwaenipw.

¹³ Ennetaen, ipwe aengaenigaemi, pwe ese tiwegin iga repwe fenaiuw Kkepas Mwamwaa een me ee, nge minne nieei a feeri nge aeremas repwene fioangei pwe aemaengi-maengin faaen itan.”

Judas a Tipaeni Epwe Fangenoa Tinnimaen Jesus
(Mark 14.10-11; Luke 22.3-6)

¹⁴ Iwe erhai me neeiir rhoan kkayeo kkewe seig me ri-urhai, iwe itan Judas Iscariot, a noa reen soamwoonin patere kkewe

¹⁵ nge a aeineeor pwe, “Meeta oawpwe ngaenneaei aere ipwe fangenoa tinnimaen Jesus?” Ra paengioww eniig faiun senaapiy *silver* nge ra ngaenneei.

¹⁶ Saengi rhag oatowe nge Judas a giutta eew oaton ne egacch aan epwe fang ngaeniir Jesus.

*Jesus me Rhoowe Naiun ra Aeni Fengaenny Eew Mwon-
goon Passover*

(Mark 14.12-21; Luke 22.7-13, 21-23; John 13.21-30)

¹⁷ Noan aeyewaen raaenin Gupwunon Fenoawa we esooar *Yeast* reen, rhooran kkayeo kkewe ra itto reen Jesus nge ra aei-ineow pwe, “Iya iga wo mwerhaen pwe aeipwe oamoannatae mwongoon *Passover* me ee?”

¹⁸ Jesus a aengaeniir pwe, “Oawnoa noan aepinoamw na reen erhai mwaaen nge oawwa aengaeni, ‘Sinsei e iura pwe, A arapeto oatoi nge rhooran kkayeo kena naeyi me ngaang pwe feeri mwongoon *Passover* me noan imwoamw.’”

¹⁹ Iwe rhooran kkayeo kkewe ra feeri wunuunun meeta we Jesus a aengaeniir, nge ra oamoannatae mwongoon *Passover* we.

²⁰ Igiwe a nee oatofaaef noa, Jesus me rhooran kkayeo kkewe seig me riiurhai ra mooat tiw reen *table* we.

²¹ Iga ra mwongo, nge Jesus a aengaeniir pwe, “Ennetaen, ipwe aengaenigaemi, pwe erhai me neeimi epwene fangenoa tinnimaei.”

²² Rhooran kkayeo kkewe a igin aenneew noa neetipeer reen kkepas we nge ra rhaepetae ne kkepas aeyeg ngaeni, erhai me erhai ra aepesa pwe, “Soamwoon, saapw ngaang?”

²³ Jesus a panuwaeni pwe, “Erhai ne e tapweaei reen rhiriong anan fenoawa noan saepiy een, ina iiy epwe fangenoa tinnimaei.

²⁴ Minna Naiun Aeremas epwe maenoa taeppen rhag meeta we Pwapwior we e Santus e aepesa, nge epwe ifa mwo aenneewaen mwaaen na iiy eafangmaei noa mwaaen we Naiun Aeremas! Egacch rhag igine rese nainitiw mwaaen een!”

²⁵ Judas iwe eafangmaei noa Jesus a kepastae, “Sinsei, saapw ngaang?”

Jesus a panuwaeni pwe, “Een minimwu woepesa minna.”

Aaen Soamwoon Mwongoon Faaef

(Mark 14.22-26; Luke 22.14-20; 1 Cor 11.23-25)

²⁶ Igiwe ra mwongo, Jesus a pwiigi eew fenoawa, a fang aan maeipinen aerhigerhig, iwe a giniiy nge a ngaenneer rhooran kkayeo kkewe naiun nge a aepesa pwe, “Oawpwiigi pwe oawpwe angi, pwe ieen minne oanongaemi.”

²⁷ Mwirin a pwiigi eew kkap, a fang aan maeipinen aerhigerhig, iwe, a ngaenneer nge a aepesa pwe, “Oaw iuniumi minneen oanongaemi,

²⁸ pwe ieen minne cchaei iye epwene no pwe tiweginin ppwon we aaen Deus ngaenigaemi, nge minne cchaei epwene nipiwow pwe arhiuwerhiuwen aar monofit aeremas.

²⁹ Ipwe aengaenigaemi, pwe isoapw rhiuwen iuniumi *wine* een toori raaenin na ipwe iuniumi *wine* na effeo me noan minna Mweoiun Semaai.”

³⁰ Mwirin ra aeni erheo keoniun aerhigerhig, nge ra toowow ngaeni miniwe rhugun *Olives*.

Jesus e Aepesa Aaen Peter Iura pwe Ese Giuneei
(Mark 14.27-31; Luke 22.31-34; John 13.36-38)

³¹ Iwe Jesus a aengaeniir pwe, “Nee pwongiy nge oanongaemi oawpwe nigitiaei noa, pwe iwe Pwapwior we e Santus e aepesa pwe, ‘Deus epwe niy noa rhoon neginegin *sheep* we, nge *sheep* kkewe repwene toaropas fetaen.’

³² Nge mwirin aaei menaw sefaaen, ipwe gommwonoa Galilee me mmwaemi.”

³³ Iwe, Peter a paniuwaeni pwe, “Ngaang isoapw nigituug noa, inamwo me oanongeer nge re nigituug noa!”

³⁴ Jesus a aengaeni Peter pwe, “Ennetaen, ipwe aengaeniug pwe mmwaen aaen maniuug we epwe keokkeok nee pwongiy, nge epwe faaen enuuw oamw iura pwe wose giuneaei.”

³⁵ Peter a paniuwaeni pwe, “Esooar faaen eew ipwe aepesa minna, inamwo aere ipwe tapweog reen maenoa.”

A pwan ina rhag meeta reiura rhoon kkayeo kkewe aekkaerhai.

Jesus a Maeipin Noan Gethsemane
(Mark 14.32-42; Luke 22.39-46)

³⁶ Iwe Jesus me rhoon kkayeo kkewe naiun ra noa noan eew neni itan Gethsemane, iwe a aengaeniir pwe, “Oawmooat tiw igeei, pwe ngaang ipwe noa maeipin iginaan.”

³⁷ A paeninoa Peter me mwaaen riurhai kkewe naiun Zebedee. Waeiraes me nee tip choaw a tooto reen,

³⁸ iwe a aengaeniir pwe, “Waeiraesin noan minne neetipaei egin temoag, arapakkaan rhag epwe niaei noa. Oawno igeei oawpwe tapweaei reen metenaeg.”

³⁹ Jesus a mwet noa egius mmwan, a won rhappetiwee nge maeipin, “Semaai, aere emmwen, wopwe pwigi saengiaei kkepaen waeiraes een; nge saapw minne ngaang i tipaeni, pwe minne een wo tipaeni.”

⁴⁰ Iwe a sefaaeneto reer rhoon kkayeo kkewe eoniurhai we naiun, nge a giuneer pwe ra maiur. Iwe a aengaeni Peter pwe, “Ifa wusun, aaemi mwo nge ese mmwen oawpwe mmas ngaeniaei noan eew rhag awa?”

⁴¹ Oaw mmas nge oaw maeipin pwe oawte ppiungiunong noan sessoat. Ngeon a mwerhaen, nge oanong a apwangapwang.”

42 Jesus a pwan sefaaen noa maeipin, “Semaiei, aere wosoapw pwigi saengiaiei kkepaen waeiraes een pwe ipwe iuniumi, nge minna tipoamw minne epwe mmwen.”

43 Jesus epwan sefaaen nge a giuneer pwe ra pwan maiur, pwe ra igin cchoaw.

44 Iwe, Jesus a pwan mwet saengiir, a sefaaen noa maeipin reen aeinuwaen, nge epwan aeni rhag maeipin we e aeni me mmwan.

45 Iwe a sefaaeneto reer rhooran kkayeo kkewe nge a aen-gaeniir pwe, “Oaw rhiuwen maiur me aseoseo rhag? Pipiiy, a toori oaton repwene fangenoa Naiun Aeremas nee paiiur rhooa monofit.

46 Oaw rhimwitae, oaw sia noa. Pipiiy, ieei iiy mwaaen we e fangenoa menewaei!”

Aar Torofi Jesus

(Mark 14.43-50; Luke 22.47-53; John 18.3-12)

47 Oatowe Jesus erhuiwen kekkepas, Judas iwe erhai me neeiir rhooawe seig me riiurhai a war. Pwuwaen aeremas kkewe re tapweei faaen naiiur saeitan me soapwon irae, nge reitto faaen iteer soamwoonin patere me mwaaen kkewe aar.

48 Rhooran afangmaei noa we a fang aeginn ngaeniir pwuwa we: “Mwaaen na ipwe faeisongei ina mwaaen na oawtipaeni. Oawtorofi!”

49 Judas a faaeraeg wenewen ngaeni Jesus nge a aengaeni pwe, “Sirow woamw, Sinsei,” iwe a faeisongei.

50 Jesus a paniuwaeni pwe, “Pwiiy, feeori meeta woitto reen.”

Iwe ra mwet ngaeni, ra torofi Jesus nge ra ammwarihu.

51 Nge erhai me neeiir rhooawe rhoaniuwaen Jesus a waeitiwow naiun saeitan, nge a fena rhooran akkiuneo we naiun Soamwoonin Patere iwe gopiy noa eew saeningan.

52 Iwe, Jesus a aengaeni pwe, “Wopwe aesefaaeninong saeitan mwu noawumw noan nenien. Pwe rhoakkena re pweipwog saeitan repwe maenoa wooan saeitan.

53 Oawse giuneei, pwe ngaang ina emmwen ipwe tin-goar ngaeni Semaiei pwe epwe tipaengiaiei, pwe epwe mwetekkaein fang ngaeniaiei seig me ruwowu mwirhaen sonotawaen angkenus?

54 Nge ngaere epwe wen minnee, epwe ifa wusun nge epwe nnet miniwe e foatofeat noan Pwapwior we e Santus, iwe e iura pwe ieei meeta epwe fasiun wen?”

55 Iwe Jesus a aengaeniir aeremas towunap kkewe pwe, “Meeta oawnoa itto faaen naimi saeitan me soapwon irae pwe oawpwe torofiaei, pwe iga aetae ngaang erhai man

mwoarho? Raaen me raaen nge ngaang imooat reemi nge ifenai noan *Temple*, nge aaemi oawse torofiaei.

⁵⁶ Nge ina oanongaen minikkeei nge epwe wen pwe epwe nnet ngaeni minikkiwe profeta ra foatogitiw noan Pwapwior we e Santus.”

Iwe oanongeer rhoan kkayeo kkewe ra siusaengi Jesus nge ra fattapw noa.

Jesus me Weni Mmweer Soaw Kapwiung Kkewe

(Mark 14.53-65; Luke 22.54-55, 63-71; John 18.13-14, 19-24)

⁵⁷ Rhoawe retorofi Jesus ra paeninoa reen Soamwoonin Patere itan Caiaphas, iwe me sinsein anniug kkewe me mwaaen kkewe aar ra mwiirh fengaen ee.

⁵⁸ Nge Peter etettapw to mwirin Jesus me itaaw toorito niugiun imwaen Soamwoonin Patere we. A toonong noan wororaen iimw we nge a mooat tiw reer rhoan poos kkewe pwe epwe giuneei meeta epwe wen.

⁵⁹ Rhoawe soamwoonir patere me oanongeer rhoan *council* we ra giutta eew min oatupwutupw ne repwe tipi ngaeni Jesus pwe repwe niy noa,

⁶⁰ nge esoar meeta ne reweri, inamwo igiwe re towunap aeremas kka ra itto iutae nge re pwaeritae aar oatupwutupw reen. Mwirin riiurhai mwaaen ra iutae

⁶¹ nge ra aepesa pwe, “Mwaaen een aepesa pwe, ‘Ngaang immwenen fereetiwi aen Deus *Temple*, nge noan enuuw raaen ipwe aiusefaaeny tae.’”

⁶² Soamwoonin Patere a iutae nge a aengaeni Jesus pwe, “Esoar minne wopwe paniuwaeni ngaeni kkepas kka mwaaen kaan ra tipi ngaeniug?”

⁶³ Nge Jesus a anniug noa rhag. Iwe Soamwoonin Patere a pwan aepesa ngaeni Jesus pwe, “Wopwe ppwon faaen itaen Deus na e menaw nge wa aengaenigemaem aere een Kristus, Naiun Deus.”

⁶⁴ Jesus a paniuwaeni pwe, “Een minne wo iura. Nge ipwe aengaenigaemi: saengi igina oawpwene giuneei Naiun Aere-mas epwe mooat peig mwaaenen iwe e oarosaen Mamaaw, nge epwe ittiw me weei naaeng wooan toapw.”

⁶⁵ Iwe Soamwoonin Patere we a fereetiwi mengaagiun nge a iura pwe, “A aepesa aenneewa Deus! Meeta sirhiuwen pwigiir to rhoan oatuttur reen? Pipiiy, oawwa sipegin rongorong aan aepesa aenneewa Deus.

⁶⁶ Meeta aaemi niunniywaen?”

Ra paniuwaeni pwe, “Iiy e monofit nge epwe mae.”

⁶⁷ Mwirin ra oattuffa mesan nge rewirhiy, nge ikkiwe re peosepa

⁶⁸ ra aepesa pwe, “Aengaenigemaem, Kristus! Iyo we ewirhiug!”

*Peter a Aepesa pwe Ese Giuneei Jesus**(Mark 14.66-72; Luke 22.56-62; John 18.15-18, 25-27)*

⁶⁹ Igiwe Peter emooat noan wororaen iimw we imwaen Soamwoonin Patere, iwe erhai rhoopwut naiun rhoaan engaang a itto reen nge a aengaeni pwe, “Een pwan erhai rhoaniuwaen Jesus saengi Galilee.”

⁷⁰ Peter a paniuwaeni memmweer oanongeer, nge a iura pwe, “Ngaang ise giuneei meeta mwu wo aepesa,”

⁷¹ iwe a faaeraeg wow me noan asam we. Iwe erhai rhoopwut rhoaan engaangaen igiwe a giuneei Peter nge a aengaeniir mwaaen kkewe igiwe pwe, “Mwaaen een eno reen Jesus re Nazareth we.”

⁷² Iwe, Peter a pwan iura pwe ese giuneei nge a aepesa pwe, “Iya aekkepan pwe ise giuneei mwaaen naan!”

⁷³ Faeiyegius noa mwirin nge rhooawe reiu igiwe ra itto reen Peter nge ra aengaeni pwe, “Ennet, een pwan erhai rhoaniuwaen mwaaen naan, pwe aei giuneei rhag me reen ngingin oamw kkepas.”

⁷⁴ Iwe Peter a iura pwe, “Iya aekkepan pwe ngaang iaepesa minne ennet! Deus epwe apwiungiuwai aere i oatupwutupw! Ngaang ise giuneei mwaaen naan.”

Iwe rhag nge e keokkeok noa maniug we,

⁷⁵ iwe Peter a maengiy miniwe Jesus eaengaeni: “Weni mmwaen epwe keokkeok maniug, een wopwe aepesa faen enuw pwe wose giuneaei.” Iwe a toowow niugiun nge a igin noa saeng.

27*Ra Paeninoa Jesus Reen Pilate**(Mark 15.1; Luke 23.1-2; John 18.28-32)*

¹ Enoa nee oatosor moawugowug, oanongeer soamwoonin patere kkewe me mwaaen kkewe aar ra pwiungiuw wunuunun aar repwe niy noa Jesus.

² Ra geoni noa nge ra paeninoa reen Pilate, iwe iiy minne *governor*.

*Maenoan Judas**(Feof 1.18-19)*

³ Igiwe Judas, iwe efang noa menewaen Jesus, a giuneei pwe ra aettiweginiy pwe Jesus epwene mae, a ssiuwen aan niunniuwaen iwe a aesefaaeni ngaeniir soamwoonin patere me mwaaen kkewe aar faiun senaapiy we eniig.

⁴ Nge a aepesa pwe, “Ngaang iya monofit reen aaei fangenoa menewaen erhai mwaaen se monofit.”

Iwe, ra paniuwaeni pwe, “Meeta faan ngaenigemaem? Feeri pwe oamw engaang.”

⁵ Judas a oatoranong senaapiy kkewe noan *Temple* we nge a noa, iwe a noa nnoma noa iuwan.

⁶ Soamwoonin patere kkewe ra pwiigi faiun senaapiy kkewe nge ra aepesa pwe, “Senaapiaen meoniun ccha minneen, nge e aenneew ngaeni aarh anniug pwe sipwe oarhuw nong noan senaapiaen *Temple*.”

⁷ Ra tipieew fengaen wooan senaapiy we, iwe ra meoni eew faniuw itan *Potter’s Field*, pwe eew nenien paeyieer waseona.

⁸ Ina minne ra aeita ngaeni pwe “Faniuwaen Ccha” toorito igina.

⁹ Iwe a pwae noa pwe ennet meeta we profeta Jeremiah e aepesa: “Ra pwiigi eniig senaapiy *silver*, nepaen miniwe re Israel ra tipieew wooan pwe repwe pey aegini ngaeni mwaaen we,

¹⁰ nge ra naini senaapiy een ne meoni ngaeni *Potter’s Field*, taeppen miniwe Soamwoon e anniugiu ngaeniaei.”

Pilate e Kkepas Aeyeg Ngaeni Jesus
(*Mark 15.2-5; Luke 23.3-5; John 18.33-38*)

¹¹ Iwe Jesus a iu me mmwaen *governor* we nge a aeyegiy Jesus pwe, “Een minne aar *king* re Jews?”

Jesus a paniuwaeni pwe, “Een minimwu wo aepesa.”

¹² Iwe esa paniuwaeni no meeta kkewe soamwoonin patere me mwaaen kkewe aar ra aepesa pwe teren.

¹³ Iwe Pilate a aengaeni pwe, “Wose rongorong towunepaen kkepesaen oatuttur kkomwu ra oaturug rhag reen?”

¹⁴ Nge Jesus ese paniuwaeni mwo nge eew, iwe *governor* we a igin mwaar noa reen.

Ra Aettiweginiy Aaen Jesus Maenoa
(*Mark 15.6-15; Luke 23.13-25; John 18.39–19.16*)

¹⁵ Reen oanongaen oaton gupwunon *Passover*, nge *governor* egaen saeneti noa erhai rhooran kanepwus ina aeremas towunap re tingoar.

¹⁶ Nge noan oaton naan nge eno erhai rhooran kanepwus itan nge Barabbas, nge oanongeer aeremas nge re giuneei.

¹⁷ Iwe igiwe rhoora towunap kkewe ra maegin rhu fengaen, nge Pilate a aeiineeor pwe, “Iyo e oawtipaeni pwe ipwe saeneti ngaenigaemi, Barabbas aere Jesus we re faingi pwe Kristus?”

¹⁸ E fasiun giuneei pwe ra fang nong Jesus nee paiun faaen itaen aar noanowo ngaeni.

¹⁹ Iwe igiwe Pilate erhiuwen mooat wooan nenien moaaton apwiung we aan, nge niewe pwiuniuwan a fangenoa reen eew kkepas: “Esooar meeta wopwe feori ngaeni mwaaen

mwamwaai na, pwe noan aaei ttan neepwoong we nge iya igin waeiraes noa faaen itan.”

²⁰ Iwe soamwooniir patere kkewe me mwaaen kkewe aar ra igin aetemaeginiy ngaeniir aeremas pwe repwe tingoareei Pilate pwe epwe saeneti noa Barabbas, nge a niyy noa Jesus.

²¹ Nge *governor* we a aeineeor aeremas pwe, “Iyo neeiir rhoa riiurhai een oawtipaeni pwe ipwe saeneti ngaeni-gaemi?”

Ra paniuwaeni pwe, “Barabbas!”

²² Pilate a aeineeor pwe, “Nge meeta ipwe feori ngaeni Jesus, iwe itaen Kristus?”

Onongeer noa ra paniuwaeni pwe, “Kurusuw noa!”

²³ Nge Pilate a aeineeor pwe, “Meeta taeppen wegitaeg aenneew e a feori?”

Nge iir ra pwan oatomoga aar iyaekkepwas pwe, “Kurusuw noa!”

²⁴ Igiwe Pilate a giuneei pwe esooar ipitan aan epwe kkepas ngaeniir, pwe ina nge epwene rhaepetae eew fitigogo, a pwiigi rhaan nge a toafi paiun memmweer aeremas kkewe nge a aepesa pwe, “Esooar monofitiiy reen cchaan mwaaen een aan mae. Pwe faer aamei.”

²⁵ Aeremas towunap kkewe ra paniuwaeni pwe, “Cchaan epwe itto woamaem me woar naimaem!”

²⁶ Iwe Pilate a saeneti Barabbas ngaeniir, nge ra wirhiy Jesus nge a fangenoa pwe repwene noa kurusuw noa.

Sonotaw ra Aeni Aegekkaei Jesus

(Mark 15.16-20; John 19.2-3)

²⁷ Iwe sonotaw kkewe naiun Pilate ra paeni nong Jesus noan imwaen *governor*, nge ra faingiir oanongeer sonotaw kkewe nge ra itto roangei noa oaron.

²⁸ Ra pwiniti saengi mengaagiun nge ra aememmengaagiu ngaeni erheo mengaag ccha.

²⁹ Iwe ra fiti eew mwaer saengi irae towfanfan nge ra ngaet-tae wooan rhimwen, nge ra pwan iseni nong efoarh soapwon irae noan pai mwaaenen; nge ra foatotiw me mmwan nge ra aeni fetaeneei aegekkaei. Ra gaen aepesa pwe, “Sirow woamw, *Kingaen Jews.*”

³⁰ Ra oattuffa, ra pwiigi irae we saengi nge ra wirhiy ngaeni rhimwen.

³¹ Nge igiwe ra moann me aeni aegekkaei, ra pwiniti saengi mengaag ccha we nge ra aememmengaagiu sefaaeny ngaeni ikkiwe sipegin mengaagiun. Iwe ra paeninoa pwe repwene noa kurusuw noa.

Ra Kurusuw Noa Jesus

(Mark 15.21-32; Luke 23.26-43; John 19.17-27)

³² Igiwe ra nennoa, nge ra rhuungi erhai mwaaen itan Simon saengi Cyrene; nge sonotaw kkewe ra aengimaw ngaeni pwe epwe aiuferu kurus we aaen Jesus.

³³ Nge ra tooto reen eew pwiuneoi itan Golgotha, wewen nge “Nenien Peopeoi Rhimw”.

³⁴ Igaan iga ra itto aiuniu ngaeni Jesus *wine* min nofit me meras. Nge mwirin aan nnaeri, nge ese mwerhaen iuniumi.

³⁵ Mwirin aar kurusuw noa Jesus, nge ra itto aekkaerh *dice* pwe repwe inetiy minikkewe mengaagiun wooar.

³⁶ Iwe ra mooat tiw igiwe nge ra pipiiy.

³⁷ Wooan tae rhimwen ra aepperhatae aaemweoi foatofeat epwaeritae meeta we ra tipi ngaeni, eiura pwe: “Ieei Jesus, *Kingaen Jews.*”

³⁸ Iwe ra pwan kurusuur noa riiurhai rhooa mwoarho oaron Jesus, erhai me peig rhoopwuton, nge erhai me peig mwaaenen.

³⁹ Aeremas kkewe re faaeraeg noa me oaron Jesus ra gaen aepesa aenneewa, nge re iurhiugi rhimweer

⁴⁰ nge re aepesa pwe, “Een miniwe woiura pwe wopwe fereetiwi *Temple* we nge wa aiusefaaeniy tae noan enuuw raaen! Aemenewoag aere een Naiun Deus, nge wa teotiw me wooan kurus na!”

⁴¹ Epwan ina rhag wunuunun soamwoonin patere kkewe me sinsein anniug me mwaaen kkewe aar re aeni aegekkaei Jesus nge re iura pwe,

⁴² “A aemenewaar aaemweoi, nge ese mmwenen aemenewa oanongan! Saapw i miniwe *kingaen* Israel? Aere epwe teotiw saengi kurus naan igina, ina nge sipwe niugiuniug ngaeni.

⁴³ Eniugiuniug ngaeni Deus, nge eaepesa pwe iiy Naiun Deus. Iwe, sipwe pipiiy aere Deus epwe mwerhaen aemenewa igina!”

⁴⁴ Pwan rhooa mwoarho kkewe mwo re tapweei reen kurus nge repwan aessaewa reen aar kkepas ngaeni.

Maenoan Jesus

(Mark 15.33-41; Luke 23.44-49; John 19.28-30)

⁴⁵ Saengi nugunupaen oanowas a noa, a rorhappiung noa wooan oanongaen faniuw we noan enuuw konook.

⁴⁶ Enoa enuuw konook nge Jesus a aekkepwas temoag tae pwe, “*Eli, Eli, lama sabachthani?*” wewen, “Aaei Deus, aaei Deus, meeta wa nigitiaei noa reen?”

⁴⁷ Aaemweoi aeremas kkewe reiu igiwe ra rongorong miniwe nge ra iura pwe, “A faingi Elijah!”

⁴⁸ Erhai me neeiir a mwetekkaein fattapweto reen, a pwiigi eew faerewa nge a rhirinong noan eew *wine* emwaenn, a iseni tae nee soapwon efoarh irae nge a aiuniu ngaeni Jesus.

⁴⁹ Nge aaemweoi re iura pwe, “Weti sipwe pipiiy aere Elijah epwe itto aemenewa.”

⁵⁰ Nge Jesus a pwan aekkepwas temoag tae faaen eew, iwe a fangetae ngeoniun.

⁵¹ Iwe nge mengaag we etteoraeg noan *Temple* we mwo nge a taeringatiw faaen ruwowu, saengi wooan ittiw faan. A fanemwar faniuw, nge faai ra tiningaeg fesaeng,

⁵² nge paeyi ra sugaeg, nge towunap rhooa maenoa kkewe naiun Deus ra menaw sefaaen.

⁵³ Ra siusaengi paeyieer nge mwirin aaen Jesus menaw sefaaen nge ra noa noan aepinoamw we esantus, igiwe pwuwaen aeremas ra noa giuneer me ee.

⁵⁴ Igiwe soamwoonin sonotaw we me sonotaw kkewe repippiiiy Jesus ra giuneei fanemwar me oanongaen minikkiwe a wen, ra igin riutae iwe nge ra aepesa pwe, “Ennetaen pwe iiy Naiun Deus!”

⁵⁵ Epwan ssow rhoopwut ikkiwe re oawruruto me itaaw noa, ikkiwe retapweeito mwirin Jesus saengi Galilee pwe repwe tipaengi.

⁵⁶ Me neeiir rhoopwut kaan nge reno Maria Magdalene me Maria we ineer James me Joseph, me miniwe ineer mwaaen kkewe naiun Zebedee.

Paeyinoan Jesus

(Mark 15.42-47; Luke 23.50-56; John 19.38-42)

⁵⁷ Igiwe a nee oatofaaef noa, erhai mwaaen naiwiis saengi Arimathea a itto; itan nge Joseph, nge mwaaeneei nge pwan erhai rhoaan kkayeo kkewe naiun Jesus.

⁵⁸ A noa reen Pilate nge a noa tingoar miniwe oanongaen Jesus. Iwe, Pilate a aepesa pwe repwe ngaenneei oanong we.

⁵⁹ Iwe Joseph a pwiigi miniwe oanongan, a tiugiumi ngaeni eew mengaag pwerh ffeo,

⁶⁰ nge a iseni nong noan paeyi ffeo we aan, iwe ekken me neeiin faai. Iwe a oasoagopeniy to efai faai gin temoag reen aesimaen paeyi we, iwe a noa.

⁶¹ Maria Magdalene me pwan Maria we erhai ra mooat saep ngaeni paeyi we.

Rhoaan Poosun Paeyi we

⁶² Mmasetae noan raaenin we Sabbath, nge soamwoonin patere kkewe me Pharisees kkewe ra itto rhuungi Pilate

⁶³ nge ra iura pwe, “Menap, aemaem aeimaengiy rhag miniwe maan oatupwutupw naan igiwe erhiuwen menaw e aepesa pwe, ‘Ipwe menaw sefaaen mwirin enuuw raaen.’”

⁶⁴ Fang mwaenioamw pwe sonotaw repwe posuw gacchiuw paeyi naan toori miniwe aeinuwaen raaen, pwe minni rhoan kkayeo kkewe naiun resoapw mmwenen noa reen paeyi naan nge renoa mwoarhow noa minna oanongan, nge ra noa aengaeniir aeremas pwe a menaw sefaaen saengi maenoa. Kkepas oatupwutupw een nge eigin oaroson aenneew saengi iwe mmwan.”

⁶⁵ Pilate a aengaeniir pwe, “Oawpwigiir sonotaw repwe noa posuw gacchiuw paeyi naan.”

⁶⁶ Iwe ra noa nge ra noa ammwarihu gacchiuw noa fai we tittin paeyi we, nge ra siusaengi aaemweoi sonotaw pwe epwe posuw.

28

Aaen Jesus Menaw Sefaaen

(Mark 16.1-10; Luke 24.1-12; John 20.1-10)

¹ Mwirin Sabbath, nee oatosoron raaenin Sunday, Maria Magdalene me pwan Maria we erhai ra noa pwe repwe noa pipiiy paeyi we.

² Nge ese mmwaei mwo nge a fanemwar faniuw, pwe naiun Soamwoon angkenus a ittiw saengi naaeng, a ittiw peniy noa faai we saengi aesemaen paeyi we nge a moorat tiw wooan.

³ Wunuunun nge a weei rhag weriwer, nge mengaagiun a gin weei rhag pwerhepwerhen *snow*.

⁴ Iwe nge poos kkewe ra gin ngong reen aar mesag nge ra weer maani mae.

⁵ Iwe nge angkenus we a kkepas ngaeniir rhoapwut kkewe, nge a iura pwe, “Oawsoapw mesag. Igiuneei pwe oawgiutta Jesus iwe re kurusuw noa.

⁶ Esa nono igeei, a menaw sefaaen, taeppen rhag miniwe e aepesa. Oawitto iga, oawpwe weri igiwe ewon mwo ee.

⁷ Oawmwetekkaei noa, pwe oawpwe noa aengaeniir rhoan kkayeo kkewe naiun pwe, ‘A menaw sefaaen saengi maenoa, nge a gommw noa Galilee me mmwaemi, nge igi-naan minne oawpwene noa weri me ee.’ Oaw maengiy meeta e iaengaenigaemi.”

⁸ Iwe ra mwetekkaein siusaengi paeyi we, ra mesag nge a pwan igin kker, ra fattapw pwe repwe noa aengaeniir rhoan kkayeo kkewe naiun.

⁹ Ese mmwaei mwo nge Jesus a rhuungiir nge a aengaeniir pwe, “Sirow woami.” Iwe ra itto reen, ra ammwarihu pirheen nge ra aesirowu.

¹⁰ Jesus a aengaeniir pwe, “Oawsoapw mesag! Oawnoa aengaeniir rhoawe pwiyy pwe repwe noa Galilee, pwe repwe naaen noa weriaei me ee.”

Aar Poos Kkewe Fioang

¹¹ Igiwe rhoapwut kkewe ra feffaaeraeg noa, aaemweoi poosun paeyi we ra sefaaen noa noan aepinoamw we nge ra noa fioangei ngaeniir soamwoonin patere kkewe oanongaen meeta we a wen.

¹² Soamwooniir patere me mwaaen kkewe aar ra rhu fengaen nge ra pwiungiuw meeta repwe feeori; iwe ra ngaenneer poos kkewe towunepaen senaapiy,

¹³ nge ra aengaeniir pwe, “Oawpwe aengaeniir aeremas pwe, ‘Rhoan kkayeo kkewe naiun re itto nee pwoong we, nge ra itto mwoarhow noa miniwe oanongan oatowe aemaem aei maiur.’

¹⁴ Nge aere *governor* erongorong kkepas eei, aemaem aeipwe aeffeta ngaeni pwe soapw reen aaemi feoffeoor aenneew, nge aaemi esooar meeta minne oawpwe tip mwaramwar reen.”

¹⁵ Iwe poos kkewe ra pwiigi senaapiy we nge ra feeori meeta we re aengaeniir pwe repwe feeori. Iwe fioangei nge a rheei noa neeiir oanongeer Jews toorito igina.

Jesus a Pwae Ngaeniir Rhoan Kkayeo Kkewe Naiun

(Mark 16.14-18; Luke 24.36-49; John 20.19-23; Feof 1.6-8)

¹⁶ Mwirin rhoan kkayeo kkewe seig me erhai ra noa woan rhug we noan Galilee, igiwe Jesus e aengaeniir pwe repwe noa ee.

¹⁷ Igiwe ra weri, ra aesirowu, nge aaemweoi me neeiir retip mwaramwar.

¹⁸ Jesus a aerepaar to nge a iura pwe, “Sema ei a ngaenneaei oanongaen nemenem woainaaeng me feoniufan pwe nemaeniaei.

¹⁹ Iwe oawnoa ngaeniir aeremas noan oanongaen pwiuneoi, oawpwe noa feeoriir pwe naeyi rhoan kkayeo, nge oawwa paptismusaar faaen itaen Saam, me Naiun me Espritu Santus.

²⁰ Nge oawwa oasuguunaar pwe repwe tapweei oanongaen minne iya aepesa ngaenigaemi oawpwe feeori. Nge ngaang ipwe nonno reemi toori nee soapwonoan feoniufan.”

Fangkenio We Foatogiaen Mark

Aaen John Baptist Fenai

(Mat 3.1-12; Luke 3.1-18; John 1.19-28)

¹ Ieei iiy Kkepas Mwamwaai we iwe kkepesaen Jesus Kristus iwe Naiun Deus.

² Erhaepetae reen miniwe profeta Isaiah a foatogitiw pwe, “Deus a kkepas, ‘Ngaang ipwene fang tiw naeyi rhoan pweipwogin kkepas me wenimmwoamw pwe epwe noa maeneti ennepoamw.’”

³ Erhai a iyaekkepwas me noan *desert* we pwe, ‘Oawpwe oamoannatae ennepaen Soamwoon, oawpwe awenecchera eew aan epwe faaeraeg wooan.’”

⁴ John a no noan *desert* we, a paptismus me epwan fenai. A aengaeniir aeremas kkewe pwe, “Oawpwe toagun saengi monofitimi nge oawwa paptismus. Ina nge, Deus epwe saeneti noa aaemi monofit.”

⁵ Rhoanap we re itto saengi faniuwaen Judea me taenin-imwen Jerusalem ra noa reen John. Ra pwuwafayiuw noa aar monofit, nge John a paptismusaar noan pwupwu we Jordan.

⁶ John ememmengaag mengaag effeoor saengi iunaen *camel*, nge pwaanto na aan effeoor saengi ginin maan, nge anan mwongo ina manni neeiin waniwan ina nirhiugiun-pweon me *honey*.

⁷ Iwe, a aengaeniir aeremas pwe, “Mwaaen ee epwe wareto me mwiriy ina etaegias saengiaei, ngaang mwo nge ese fin ipwe ppwoarotiw pwe ipwe pwaesi geogeeon nokkaan.

⁸ Ngaang i paptismus aeginigaemi reen rhaan, nge iiy epwe paptismus aeginigaemi reen Espritu Santus.”

Aan Paptismus me Aan Sessaot Jesus

(Mat 3.13–4.11; Luke 3.21-22; 4.1-13)

⁹ Ese pwongiy noa mwo nge Jesus a itto me Nazareth noan Galilee pwe epwe paptismus reen John noan rhan pwupwu we Jordan.

¹⁰ Igiwe rhag Jesus a teeotae me noan rhan we, a weri pwe a susu noa naaeng, iwe nge Espritu santus a ittiw wooan nge eweei rhag erhai *dove*.

¹¹ Iwe nge eew mangiungiu a ittiw me naaeng a aepesa pwe, “Een naeyi mwaaen aerhaengerhaeng, iye efin tipaei reen.”

¹² Iwe rhag nge Espritu Santus a fangenoa Jesus noan *desert* we.

13 A no igiwe noan iugiugiun faaeig raaen nge Saetan a aegina aan soatoni. Iwe a no neeiir maan mwoarho, iwe nge angkenus ra itto tipaengi.

*Jesus a Faingiir Faaman Rhoan Fita
(Mat 4.12-22; Luke 4.14-15; 5.1-11)*

14 Mwirin aeen John toonong noan kanepwus, Jesus a noa Galilee a noa fenaiuw Kkepas Mwamwaai we eitto me reen Deus.

15 A aepesa pwe, “A itto oatowe, Mweoiun Deus a arapeto. Oawpwe toagun saengi aaemi monofit nge oawwa niugiuiw Kkepas Mwamwaai een.”

16 Igiwe Jesus a faaeraeg oaroi meoneoiniuniun Galilee nge a weriir riurhai pwipwi, Simon me Andrew, iir rhoan fita, rewuug fetaen noan meoneoiniun we.

17 Iwe, Jesus a aengaeniir pwe, “Oawitto tapweaei pwe ipwe kapwiung ngaenigaemi wunuunun aaemi oawpwe fita aeremas.”

18 Iwe rhag nge ra siusaengi wuug kkewe aar nge ra tapweei noa mwirin Jesus.

19 Ese pwan taaw noa aan faaeraeg nge a pwan weriir riurhai pwipwi, James me John, ikkiwe naiun Zebedee. Reno woan pwoot we waar nge refeeori naiiur wuug.

20 Nge igiwe rhag Jesus a giuneer, a faingiir. Ra siusaengi Zebedee we semeer woan pwoot we waar me rhoan engang kkewe nge ra tapweei noa mwirin Jesus.

*Erhai Mwaaen Ewartae Aniu Aenneew Wooan
(Luke 4.31-37)*

21 Jesus me rhoan kkayeo kkewe naiun ra toori taenin-imwen Capernaum. Nge igiwe a toori raaenin Sabbath, Jesus a toonong noan eew wuttee Jews nge a rhaepetae aan fenai.

22 Iir aeremas kkewe re rongorong ra riutae reen aan fenai, pwe aan fenai ese weei taeppen aar fenai sinsein anniug kkewe, pwe a taeppen erhai eyor maemaewan.

23 Reen rhag oatowe erhai mwaaen a yor erhai aniu aenneew woan a toonong noan wuttee Jews we nge a itinong aekkepwas,

24 “Meeta oamw mwerhaen ngaenigemaem, Jesus re Nazareth? Wa itto pwe wopwe oatoaropagemaem? Ngaang igiuneei een iyo: een mwaaenessoar we rhoan pweipwogin kkepas we aeen Deus!”

25 Iwe, Jesus a anniugiu ngaeni aniuwe pwe, “Wopwe anniug noa nge wa siunoa me woan mwaaen na.”

26 Iwe nge iiy aniu aenneew we a feeori mwaaen we pwe epwe ngoong fetaen, nge a aekkepwas nge a tiwtiw me woan.

27 Iwe aeremas towunap ra riutae nge ra rhaepetae aar kkepas nee fineer, “Meeta eei? Pwan eew taeppen fenai ffeo minnee? Mwaaen een eyor maemaewan pwe eiura rhag eew nge aniu aenneew re tapweei.”

28 Iwe miniwe kkepessaen Jesus a rheoi mwetekkaei noa woan Galilee.

*Jesus a Aecchipwa Towunepaen Aeremas
(Mat 8.14-17; Luke 4.38-41)*

29 Mwirin, Jesus me James me John me rhoan kkayeo kkewe ra noa saengi wutteer Jews we nge ra noa noan imwaen Simon me Andrew.

30 Iwe niewe inaan pwiuniuwaen Simon e wonon semwaai reen pwerhikeraen ginin. Etonong rhag Jesus nge ra aengaeni wunuunun niewe.

31 Iwe, Jesus a toonong reen, a ammwarihu paiun nge a tipaengitae. Iwe, a saer noa pwerhin niewe iwe a ittae engaang ngaeniir.

32 Mwirin tupwunoan aenet pwe a neeoatofaaef noa, aeremas ra pweipwog to rhoa semwaai reen Jesus, pwan rhoawe eyor aniu aenneew woar.

33 Iwe oanongeer rhoan aepinoamw we ra itto mweoiu noa mesaen iimw we.

34 Iwe Jesus a aecchipwaar tae towunepaar rhoa semwaai kkewe saengi mesemesaen aar semwaai. A asiur noa towunepaen aniu aenneew, nge ese fang ngaeniir mwo nge epat pwe repwe aepesa, pwe ra fasiun giuneei iiy iyo.

*Jesus a Fenai Noan Galilee
(Luke 4.42-44)*

35 Weni mmwaei raaenin we eraaen, igiwe aenet esaaen teotae, Jesus a mmasetae nge a toowow me reen iimw we. A noa eew pwiuneoi ne iiy noa rhag nge a noa maeipin e.

36 Nge Simon me rhoawe rhinan ra noa giutta Jesus.

37 Oatowe ra weri, ra aengaeni pwe, “Oanongeer aeremas ra giuttoag.”

38 Nge Jesus a aengaeniir pwe, “Oaw sipwe pwan noa noan aekkaew soapw, pwe ipwe noa fenai e, pwe ina faan aaei itto.”

39 Iwe a noa noan oanongaen Galilee, a noa fenai noan wutteer Jews we nge a asiur wow aniu aenneew.

*Jesus a Aecchipwa Erhai Mwaaen Maemerhoar
(Mat 8.1-4; Luke 5.12-16)*

40 Iwe, erhai mwaaen kaenepaai a itto reen Jesus, a foatotiw me mmwan nge a aeffaenipirhe ngaeni pwe epwe tipaengi. A aepesa pwe, “Aere womwerhaen, wa aecchipwanoa aaei semwaai.”

41 Iwe Jesus a igin faayeow, e angenoa nge a geotteopa mwaaen we, nge a paniuwaeni pwe, “Ngaang imwerhaen, wone cchipw noa!”

42 Reen rhag oatowe nge kaenepaai we a rhiuw saengi mwaaen we, iwe a nimegacch noa.

43 Mwirin, Jesus a igin feneow mwaaen we nge a mwetekkaein aefenganoa,

44 moannon aan aengaeni pwe, “Pipiiy, wosoapw aengaeni mwo nge erhai minneei, nge wa faaeraeg uwen noa reen patere pwe epwe weriug. Iwe nge a feeori oasoar we Moses eakkiuneo, pwe epwe pwaeri ngaeniir aeremas pwe wa nimegacch noa.”

45 Nge mwaaen we a noa nge a noa aepesa faaeraegiy wunuunun miniwe a wen ngaeni. Ina faaen Jesus esa mmwennen noa no fenai noan taeninimw kkewe reen. Nge a noa rhag no noan pwiuneoi ne iiy noa rhag. Iwe, aeremas saengi oanongaen pwiuneoi ra itto reen.

2

Jesus a Aecchipwa Erhai Mwaaen Maemerhoar (Mat 9.1-8; Luke 5.17-26)

1 Fitowu noa raaen me mwirin nge Jesus a sefaaeniti Capernaum, iwe nge kkepas we a rheeoi noa pwe a no nee iimw.

2 Iwe a igin towunap aeremas maegeto, iwe esa rhiuwen yor no neny. Pwan paen asam we mwo nge epwan sseog noa. Iwe nge Jesus a fenai ngaeniir.

3 Faaman mwaaen ra pwigito reen, erhai mwaaen e maemerhoar. 4 Nge pwonno igiwe ra igin towunap aeremas esa mmwen no pwe repwe pwigito mwaaen we reen Jesus. Iwe ra ngetaeni wooan oason iimw we wenewenen igiwe Jesus eno ee. Iwe ra atairaeti waaen maemerhoar we ewon noan giegiy.

5 Igiwe Jesus a weri nepaen aar niugiuniug, a aengaeni mwaaen we emaemerhoar pwe, “Naeyi, monofitimw a mwusunoa.”

6 Nge aaemweoi sinsein anniug kkewe remooat igiwe ra niuwaennei nong nee tipeer pwe,

7 “Meeta mwaeneei a ieei wunuunun aan kkepas reen? Pwe ina nge a aepesa aenneewa Deus. Deus rhag minne emmwen epwe oamwusa noa monofit!”

8 Reen rhag oatowe nge Jesus a giuneei niunniywaen kkewe aar, iwe a aengaeniir pwe, “Meeta oawniuwaennei minikken a aenneew reen?”

9 Ifa minna emererhaeg, aaei ipwe aengaeni mwaaen ee emaemerhoar pwe, ‘Monofitimw a mwusunoa,’ aere aaei

ipwe aengaeni pwe, ‘Wopwe iutae, pwigi giemw nge wa faaeraeg noa?’

¹⁰ Ngaang ipwe pwaeri ngaenigaemi, pwe mwaaen we Naiun Aeremas eyor maemaewan wooan soanop pwe epwe oamwusa noa monofit.” Iwe a aengaeni mwaaen maemerhoar pwe,

¹¹ “Ipwe aengaeniug, iutae, pwigi giemw nge wa noa noan imwoamw.”

¹² Igiwe oanongeer nge re maegin emwaamw, mwaaen we a iutae, a pwigi gien iwe a noa. Iwe ra igin riutae reen feoffeoor we, nge ra aepingepinga Deus, nge ra aepesa pwe, “Esaen yor mwo aemaem giuneei taeppen minnee.”

Jesus a Faingi Levi

(Mat 9.9-13; Luke 5.27-32)

¹³ Iwe Jesus a sefaaeniti miniwe meoneoiniuniun Galilee. Iwe aeremas towunap ra maegeto reen, iwe, a rhaepetae aan fenai ngaeniir.

¹⁴ Nge igiwe a feffaaeraeg noa, a weri Levi iwe naiun Alphaeus, erhai rhoon iyoiyon *tax*, emooat noan aan *office*. Jesus a aengaeni pwe, “Itto tapweaei.” Iwe Levi a iutae nge a tapweei noa mwirin.

¹⁵ Mwirin noa nge Jesus a noa mwongo noan imwaen Levi. Towunepaen rhoon iyoiyon *tax* me rhoa monofit ra ttapw noa mwirin Jesus. Iwe towunepaer ra mwongo reen Jesus me rhoon kkayeo kkewe naiun reen *table* we.

¹⁶ Iwe aaemweoi sinsein anniug, iwe iir pwan Pharisees, ra giuneei pwe Jesus me rhoa monofit kkewe me rhoon iyoiyon *tax* ra mwongo fengaen, iwe ra aeiineeor rhoon kkayeo kkewe naiun pwe, “Meeta faan naimi sinsei a mwongo ngaeniir rhoon iyoiyon *tax* me rhoa monofit kena reen?”

¹⁷ Jesus a rongorong aar kkepas nge a aengaeniir pwe, “Rhoakka rese semwaai rese noa reer toagota, pwe rhoakka refaer semwaai. Ngaang ise itto pwe ipwe faingiir rhoa mwamwaai, pwe faer rhoa monofit.”

Kkepas Aeiineon Aecchigipin

(Mat 9.14-17; Luke 5.33-39)

¹⁸ Reen eew oat nge rhoan kkayeo kkewe naiun John Baptist me Pharisees kkewe ra aecchigipin. Iwe, aaemweoi aeremas ra itto reen Jesus ra aeiineow pwe, “Meeta naiun John rhoan kkayeo me naiur Pharisees rhoan kkayeo ra aecchigipin, nge rhoan kkayeo kkomwu noawumw rese aecchigipin reen?”

¹⁹ Jesus a paniuwaeniir pwe, “Oaw niuwaennei pwe rhoa itto ngaeni gupwunon appwiuniupai eei repwe aecchigipin?”

Aapw, pwe iga *bridegroom* een eno reer nge resoapw aecchigipin.

²⁰ Nge epwe itto raaenin na repwe pwiigi saengiir *bridegroom* we, nge ina oatona repwene aecchigipin noa.

²¹ “Esooar erhai epwe aeyae mengaag ffeo aan epwe pinisa tae wooan erheo mengaag maerhiy, nge aere epwe feeri taeppen eei, iwe mengaag ffeo we epwe fereei noa mengaag maerhiy we, nge miniwe taeringen epwene faer gin temoag noa.

²² Esooar erhai epwe aenianong *wine* ffeo noan nenien *wine* maerhiy, pwe *wine* ffeo we epwe taeringatiw nenien *wine* maerhiy we, iwe *wine* we epwe niytiw ne ppweon. Ina minne *wine* ffeo epwe pwan aekikki nong rhag noan nenien *wine* ffeo.”

Kkepas Aeiineon Sabbath

(*Mat 12.1-8; Luke 6.1-5*)

²³ Jesus e feffaaeraeg noa noan aekkaew maetaen *wheat* wooan raaenin Sabbath. Nge rhoon kkayeo kkewe naiun ra rhaepetae ne ferhiy iuwoapwon *wheat* kkewe.

²⁴ Iwe Pharisees kkewe ra aengaeni Jesus pwe, “Pipiyy, ese gacch ngaeni aarh anniug pwe rhoon kkayeo kkomwu noawumw repwe feeri minna wooan raaenin Sabbath!”

²⁵ Jesus a paniuwaeniir pwe, “Oawsaaen aeraegi meeta we David efeeri noan oaton we e tipaeni epwe mwongo? Iiy me rhoawe rhoaniuwan ra igin pecchai,

²⁶ iwe a toonong noan imwaen Deus a itinong angi fenoawa kkewe ra aeni oasoar ngaeni Deus. Minneen ewen reen oatowe Abiathar minne Soamwoonin Patere. Noan aarh anniug nge rhoawe patere rhag minne repwe mmwenen angi –nge David e angi nge a pwan ngaenneer mwaaen kkewe rhoaniuwan.”

²⁷ Iwe Jesus a soapwei noa pwe, “Sabbath effeoor pwe faan ngaeniir aeremas, nge aeremas rese ffeoor pwe faan ngaeni Sabbath.

²⁸ Iwe mwaaen we Naiun Aeremas ina pwan iiy Soamwoonin Sabbath.”

3

Erhai Mwaaen e Maemerhoar Paiun

(*Mat 12.9-14; Luke 6.6-11*)

¹ Iwe Jesus a sefaaeniti wutteer Jews we, eno erhai mwaaen e maemerhoar paiun ee.

² Iwe nge aaemweoi aeremas ra pwan no igiwe, pwe regiutta aekkaew rhaepin minikka repwe oaturu Jesus wooan; ina faan ra pipiyy gacchiuw Jesus aere epwe aecchipwa mwaaen we wooan raaenin Sabbath we.

³ Iwe, Jesus a aengaeni mwaaen we e maemerhoar paiun pwe, “Itto weni mmweer aeremas kaan.”

⁴ Iwe a aeineeor aeremas kkewe pwe, “Meeta aarh aniuug e aengaenigirh sipwe mmwenen feeori noan raaenin Sabbath? Sipwe tipaengiir, aere sipwe oawoasuur? Sipwe aemenewa erhai, aere sipwe niy noa?”

Nge iir ra anniug noa rhag.

⁵ Jesus a igin soong igiwe ewegitaeg fetaen wooar, nge pwan reen oatowe rhag nge a pwan igin faayeeor, pwe igiwe ecchemaw neetipeer nge ese pwiung reer. Iwe a aengaeni mwaaen we pwe, “Aetiwow poawumw.” Iwe a aetiwow paiun, iwe a mamaaw sefaaen.

⁶ Iwe Pharisees kkewe ra siusaengi wutteer Jews we nge ra noa rhu fengaen me aemweoi rhinaen Eroles, iwe ra noa pwiungiuw wunuunun aar repwe niy noa Jesus.

Eew Pwuwa me Oaroi Meoneoiniun we

⁷ Jesus me rhoan kkayeo kkewe ra noa ppaai meoneoiniuniun Galilee, nge eew pwuwaen aeremas a ttapw noa mwiriir. Ra itto saengi Galilee me Judea,

⁸ me Jerusalem, me Idumea, me eew faniuwaen eotiw Jordan me ikkiwe faniuwaen oaron taeninimwen Tyre me Sidon. Oanongeer aeremas kaan nge ra itto reen Jesus, pwe rerongorong meeta kkewe efeori.

⁹ Reen aan igin towunap aeremas, iwe Jesus a aengaeniir rhoan kkayeo kkewe naiun pwe repwe oamoanatae efoarh pwoot faaen itan, pwe aeremas kkewe rete aepettanoa.

¹⁰ A aecchipwaar tae pwuwaen aeremas, nge rhoaawe resemwaai ra pwan aetietiy rhag pwe repwe geotteopa.

¹¹ Nge igiwe aeremas kkewe eyor aniu aenneew wooar ra weri Jesus, nge ra gaen ppiungtiw me mmwan nge ra aepwesaegini pwe, “Een Naiun Deus!”

¹² Nge Jesus a kkepas sseor ngaeniir aniu aenneew kkewe pwe resoapw pwaeri ngaeni mwo nge erhai aere iiy iyo.

Jesus a Finiir Seig me Riiurhai Oapostonus

(Mat 10.1-4; Luke 6.12-16)

¹³ Iwe Jesus a faaeraeg tae wooan eew rhug nge a faingiir to mwaaen kkewe iiy e tipaeniir. Iwe ra itto reen,

¹⁴ nge a finiir seig me riiurhai, ikkiwe a pwan aeita ngaeniir pwe oapostonus. A aengaeniir pwe, “Iya finigaemi pwe oawpwe no reei, ipwene aefengaegaemi noa pwe oawpwe noa fenai,

¹⁵ nge epwe pwan yor maemaewaemi pwe oawpwe asiur wow aniu aenneew.”

¹⁶ Ikkaan iir rhooawe seig me riiurhai a finiir tae: Simon, (Jesus a aeita ngaeni pwe Peter,)

¹⁷ James me John iwe re pwipwi, iir naiun Zebedee, (Jesus a aeita ngaeniir “Boanerges” wewen nge “Mwaaenin Pacch”),

¹⁸ Andrew, Philip, Bartholomew, Matthew, Thomas, James naiun Alphaeus, Thaddaeus, Simon, iwe erhai man menat,*

¹⁹ me Judas Iscariot, iwe e fangenoa tinnimaen Jesus.

Jesus me Beelzebul

(*Mat 12.22-32; Luke 11.14-23; 12.10*)

²⁰ Iwe Jesus a sefaaen noa nee iimw. Iwe pwuwaen aere-mas kkewe repwan sefaaeneto, nge ra igin aetietiy aere-mas iwe Jesus me rhoaan kkayeo kkewe naiun resa taween mwongo no.

²¹ Igiwe rhooawe aere-mesan ra rongorong miniwe, ra noa pwe repwe noa aemmwen, pwe aere-mas ra aepesa pwe, “A pwurhunoa!”

²² Iwe aaemweoi sinsein anniug reitto saengi Jerusalem ra aepesa pwe, “A wartae aniuwe Beelzebul woan. Soam-woonin aniu aenneew minne efang maemaewan pwe epwe asiur noa aniu aenneew.”

²³ Iwe Jesus a faingiir to reen nge a fioang ngaeniir noan fioangon awewe: “Ifa wusun Saetan epwe pwan asiuw noa Saetan?”

²⁴ Aere eew faniuw a ginigin fesaeng nge ra fiow fengaen, faniuw een epwe toarop noa.

²⁵ Aere eew famini e ginigin fesaeng nge regaen fiow fengaen, famini een epwe toarop noa.

²⁶ Iwe aere mweoiun Saetan a ginigin fesaeng, esoapw tongaeni ssiunaei noa, nge epwe ffeir noa aere rhiuw noa.

²⁷ “Esooar erhai epwe tongaeni toonong noan imwaen erhai mwaaen mamaaw pwe epwe pwigi noa pisaegin; aere epwe mmwaen geoni noa mwo mwaaen we, ina nge epwapw mmwenen piraf me noan iimw we.

²⁸ “Ennetaen, ipwe aengaenigaemi, pwe oanongaen monofitiir aere-mas epwe mmwenen mwusunoa, pwan kkepas aenneew kkewe re aepesa.

²⁹ Nge aere erhai eaepesa aenneewa Espritu Santus, esoapw tongaeni mwusunoa, pwe a feori eew monofit kkewe esooar iaenin.”

³⁰ (Jesus a aepesa taepen kkepas kkeei pwe iga aaemweoi aere-mas ra aepesa pwe, “Erhai aniu aenneew a no woan.”)

Inaen Jesus me Rhooawe Pwiin

(*Mat 12.46-50; Luke 8.19-21*)

* **3:18** man menat: erhai mwaaen e fiow ngaeniir sonotawaen Rome faaen itaen faniuw.

³¹ Iwe rhooawe inaeen Jesus me pwiin ra wareto. Ra iu niugiun iimw we nge ra tengaeg nong pwe epwe itiwow.

³² Iwe rhooanap we oaron Jesus ra aengaeni pwe, "Pipiyy, inoamw me rhooawe pwiimw me rhooapwutomw ra no niugiun, nge ra mwerhaen rhuungiug."

³³ Jesus a paniuwaeniir pwe, "Iyo inaei me iyo pwiyy?"

³⁴ A wegitaeg ngaeniir aeremas kkewe remooat oaron nge a aengaeniir pwe, "Oaw wonoa, ikkaan iir inaei me pwiyy!"

³⁵ Pwe iyo na a feori neetipaen Deus, nge iyy pwiyy, me mwengeaei me inaei."

4

Fioangon Awewen Erhai Rhooran Aeperes Faiun Foat (Mat 13.1-9; Luke 8.4-8)

¹ Iwe Jesus a rhaepiy sefaaeniy aan fenai oaron meoneoini-unium Galilee. Iwe nge pwuwaen aeremas ra itto roangei noa oaron, nge iyy a teotae wooan efoarh pwoot a ittae mooat wooan. Iwe pwoot we a no noan nooamw we, nge rhooa towunap we ra no ngaerhei nooamw we.

² A fioang awewe ngaeniir towunepaen aegiaeg, iwe a aengaeniir pwe:

³ "Oaw aiussaening! Erhai mwaaen a noa pwe epwe noa aeperes faiun foat.

⁴ Igiwe eaeperes fetaen foat kkewe, nge aekkaefai faiun foat ra ppiungiutiw wenepeigin aan we, nge man aeniaen ra itto anginoa.

⁵ Aekkaefai ra ppiungiutiw wooan kaenefai, igiwe ese manieon ppweon ee. Aekkaemweoi ra mwetekkaein pwaechetae, pwe igiwe rese no ppweon ttonoa.

⁶ Nge enoa ttinitae aenet nge a aeppwesa noa foat kkewe, pwe igiwe ese ttonoa waeran neeppweon, iwe a mwetekkaein mae noa.

⁷ Aekkaefai ra ppiungiutiw neeiin irae towfanfan. Iwe irae towfanfan kkewe ra menawtae nge ra fittitae woar iwe resa mmwenen uuwa no.

⁸ Nge aekkaefai ra ppiungiutiw noan ppweon mwamwaa we, iwe ra pwaechetae nge ra uuwa. Aekkaefai neeiir ra uwaeni eniig, aekkaefai woneig, nge aekkaefai epwiugiuw."

⁹ Iwe Jesus a aepeesa pwe, "Iyo eyor saeningan, epwe rongorong!"

Faaen Aaen Jesus Kkepesaen Fioangon Awewe (Mat 13.10-17; Luke 8.9-10)

¹⁰ Igiwe Jesus a iyy noa rhag, rhooawe retapweei me rhooawe seig me riiurhai ra itto reen nge ra tingoar ngaeni, pwe epwe awewe ngaeniir faaen fioang kkewe.

¹¹ Jesus a aengaeniir pwe, “Deus a fang ngaenigaemi pwe oawpwe giuneei kkepas mwoanomwoanon minna Mweoiun Deus. Nge aaemweoi me niugiunoan repwe rongorong rhag oanongan noan fioangon awewe,
¹² pwe minni, ‘repwe pipiiy me pipiiy nge resoapw weri; repwe aiussaening me aiussaening nge resoapw metaf. Pwe ngaere re metaf, nge repwe toagun ngaeni Deus, pwe iiy epwe oamwusaar noa.”

*Jesus e Aemmetefa Fioangon Awewen Rhooan Foat we
 (Mat 13.18-23; Luke 8.11-15)*

¹³ Iwe Jesus a aeiineeor pwe, “Oawse metefaaegini fioangon awewe een? Aere oawse metefaaegini ieei, nge epwe ifa wusun aaemi oawpwe metefaaegini fioangon awewe kka aekkaew?

¹⁴ Rhooan foat we a aeperessa kkepessaen Deus.

¹⁵ Aaemweoi aeremas ra aeffitaeg ngaeni faiun kkewe reppiungiutiw wenepengin aan; oate ra rongorong kkepessaen Deus, Saetan a mwetekkaein itto pwigi saengiir.

¹⁶ Aaemweoi re aeffitaeg ngaeni faiun kkewe reppiungiutiw wooan kaenefai. Iga ra rongorong miniwe kkepessaen Deus, ra aetiwa noan aar kker.

¹⁷ Nge kkepas we ese waaraar me neetipeer, iwe ese ssiunaei woar. Pwe nipwaen a yor fitigogo me waeiraes faaen itaen miniwe kkepessaen Deus, ra mwetekkaein fangetae.

¹⁸ Aaemweoi aeremas ra aeffitaeg ngaeni faiun kkewe reppiungiutiw neeiin irae towfanfan kkewe. Ikkaan iir rhoa kkewe re rongorong miniwe kkepessaen Deus,

¹⁹ nge aiunaeng reen menaw e igina me mwecheniaen senaapiy me mesemesaen aegiaeg ra toonong noan neetipeer ra oamoapwu miniwe kkepessaen Deus, pwe esoapw mmwenen uuwa.

²⁰ Nge aaemweoi aeremas re aeffitaeg ngaeni faiun kkewe reppiungiutiw wooan ppweon mwamwaai. Re rongorong miniwe kkepessaen Deus, ra aetiwa iwe a uuwa. Aaemweoi ra uwaeni eniig, aaemweoi woneig, nge aaemweoi epwiugiuw.”

*Eew Oappwun me Faei Saepiy
 (Luke 8.16-18)*

²¹ Iwe, Jesus a soapwei noa aan fenai, “Meeta, eyor erhai ne epwe pwigito eew oappwun nge a iseni nong faaen eew saepiy aere faaen eew pooa? Nge saapw wooan nenien foaton?

²² Oanongaen meeta ewop noa epwene pwae noa, nge oanongaen meeta epwanipwan nge epwe pwae noa noan seram.

²³ Iyo eyor saeningan, epwe rongorong.”

²⁴ Jesus a pwan aengaeniir pwe, “Oaw aiussaening gacch minne oawwa rongorong! Meeta rhag oawapwiungiur aaemweoi wooan, epwan ina rhag meeta Deus epwe aeyae ngaenigaemi, nge epwe faer cchoaw noa egius.

²⁵ Pwe iyo a yor meeta aan nge repwe pwan fang ngaeni, nge iyo ese yor meeta aan nge repwe pwigi saengi mwo nge iwe egius iwe eyor reen.”

Fioangon Foat we e Menaw

²⁶ Jesus a soapwei noa aan kkepas ngaeniir, “E ieen wunuunun minne Mweoiun Deus. Erhai mwaaen e aeperes faiun foat wooan aan menaai.

²⁷ A maiur neepwoong nge emmas neeraaen, nge faiun foat we ina ememmenaw tae rhag. Nge iiy esoapw metefaaegini ifa wunuununun aaen faiun foat we memmenaw tae.

²⁸ Ppweon we minne esipegin feori meeta irae we epwe menawtae me uuwa reen, mmwan a sumwunutae, mwirin a yor aetin, nge oaroson a yor uwaan.

²⁹ Nge igiwe minikkewe faiun ra maaw, iwe ra gopin, pwe a toori oaton gin.”

Fioangon Awewen Faiun Mustard (Mat 13.31-32, 34; Luke 13.18-19)

³⁰ Jesus a pwan aepesa pwe, “Meeta sipwe mmwenen awewe ngaeni miniwe Mweoiun Deus? Aere ifa taepfen fioangon awewe sipwe aeyae pwe sipwe mmwenen aemmetefa?”

³¹ A aweweei ngaeni efai faiun *mustard*, iwe e oarosaen mwittig saengi pwiginnin oanongaen irae. Erhai mwaaen a pwigi faiun *mustard* we a noa foatogitiw ne ppweon.

³² Mwirin a menawtae faiun *mustard* we iwe a ssiuwen ngaeni efoarh irae efaeregit saengi oanongaen irae kkewe noan menaai we. A gin raerae noa, nge man aeniaen ra itto ffeor feseer noan nniuriun irae we.”

³³ Jesus a fenaiuw ngaeniir aeremas kkepessaen Deus nge e aeyae taepfen fioangon awewe kkeei. A kkepas ngaeniir reen nepaen minne repwe mmwenen metefaaegini.

³⁴ Aan kkepas ngaeniir, nge ekkepas rhag noan fioangon awewe. Nge nipwaen a iiy noa rhag reer rhoon kkayeo kkewe naiun, a aemmetefa ngaeniir wewen iiy kkepas kkewe.

Jesus a Oapoassaetiw Eew Aaeng Cchoaw (Mat 8.23-27; Luke 8.22-25)

³⁵ Noan faefin we rhag nge Jesus a aengaeniir rhoon kkayeo kkewe naiun pwe, “Oaw sipwe noa epeig meoneoiniun eei.”

³⁶ Iwe ra siusaengi mwirhaen aeremas kkewe, iwe nge rhoan kkayeo kkewe ra teeotae wooan pwoot we Jesus eno wooan, iwe ra pwiigi noa. Epwan yor aekkaew pwoot igiwe.

³⁷ Iwe rhag nge eew aaeng choaw a itto nge noa a nni-unong noan pwoot we, iwe a arapakkaan epwene mweoiu-siutiw.

³⁸ Jesus eno mwirin pwoot we pwe emaiur ewonotae rhimwen wooan eew iuniun. Iwe rhoan kkayeo kkewe ra faingitae ra aengaeni pwe, "Sinsei, wose aetenaegiy aarh sipwene mae?"

³⁹ Iwe Jesus a iutae nge a kkepas sseor ngaeni aaeng we, "Anniug noa!" A pwan aengaeni noa, "Maniuweniuw tiw." Iwe aaeng a seotiw, nge a pwan rhoaraeg noa weei saaet.

⁴⁰ Iwe Jesus a aengaeniir rhoan kkayeo kkewe naiun pwe, "Meeta oawwa mesag reen? Esaan yor rhag aemi niugiuniug?"

⁴¹ Iwe ra piungiun mesag nge ra aeiineo wooar pwe, "Iyo mwaaen een? Aaeng mwo me noa nge retapweei mwae-nian!"

5

Jesus a Aecchipwa Erhai Mwaaen Eyor Aniu Aenneew Wooan

(Mat 8.28-34; Luke 8.26-39)

¹ Jesus me rhoan kkayeo kkewe naiun ra toori noa epeig meoneoiniuniun Galilee noan faniuwaen Gerasa.

² Eteeotiw rhag Jesus me wooan pwoot we, nge erhai mwaaen a itto reen nge etowow me noan paeyi kkewe. Mwaaen een eno erhai aniu aenneew wooan,

³ nge e nonno rhag weni niipw. Esooar erhai ne emmwenen feoti ngaeni ccheen;

⁴ faaen fitowu mwo aar geoni paiun me pirheen, nge esoow fefferee noa rhag, iwe me egaen ripiy parang we ammwarihiun ngaeni pirheen. Mwaaen een eigin mamaaw iwe esooar erhai ne epwe mmwenen ammwarihiu.

⁵ Nee pwoong me nee raaen aan mwetefetaen rhag neeiin paeyi kkewe me weei rhug, aan gaen iyaekkepwas me wunei oanongan ngaeni faai.

⁶ Erhiuwen taaw noa nge a weri Jesus, nge a fattapw ngaeni, nge a foat pwiugiuwtiw me weni mmwan,

⁷ nge a aekkepwas temoag tae, "Jesus, Naiun Deus iwe eoarosaen Taegias! Meeta minne wotipaeni me reei? Iya tingoar ngaeniug mmwaen mesaen Deus pwe wosoapw aewwaeiraesiaei."

⁸ (Eiura kkepas een pwe igiwe Jesus a faer kkepas ngaeni pwe, "Aniu aenneew, toowow me reen mwaaen na!")

⁹ Iwe, Jesus a aeineow pwe, “Meeta itoamw?”

Mwaaen we a panuwaeni pwe, “Itaei nge Cchon, pwe aemaem aeigin towunap!”

¹⁰ Nge aniu aenneew we e tingoar maaw ngaeni rhag Jesus pwe esoapw asiur wow me noan faniuw we.

¹¹ Eyor eew cchon sino arapeto pwiuneoi we remwongo wooan rhoangorhoang we.

¹² Iwe aniu aenneew kkewe ra aeffaenipirhe ngaeni Jesus pwe, “Fangenoa aemaem neeiir sino kenaan, wa fang ngaenigemaem pwe aeipwe wartae wooar.”

¹³ Jesus a fangenoa iir, nge aniu aenneew kkewe ra toowow saengi mwaaen we nge ra noa wartae wooar sino kkewe. Oanongaen cchon sino kkewe, iwe re aerepa riiungeras ra fattapw tiw me wenepeigin rhug we ittiw noan meoneoiniun we nge remoapw noa.

¹⁴ Mwaaen kkewe rhoan ffoanon sino ra fattapw noa nge ra noa oaronga fetaneei miniwe ewen noan aepinoamw we me menaai kkewe. Aeremas ra noa ngaeni neniw we pwe repwe noa pipiiy miniwe a wen,

¹⁵ nge igiwe ra itto reen Jesus, ra giuneei mwaaen we eyor cchon aniu aenneew wooan. A mooat igiwe nge e memmengaag, nge iiy man reepiy, iwe oanongeer ra maegin mesag.

¹⁶ Iwe rhoawe reweri meeta we ewen ra fioangei ngaeniir aeremas meeta we a wen ngaeni mwaaen we eyor aniu aenneew wooan me sino kkewe.

¹⁷ Iwe ra tingoar ngaeni Jesus pwe epwe siusaengi miniwe faniuweer.

¹⁸ Nge igiwe Jesus a teeotae wooan pwoot we, mwaaen we eyor aniu aenneew wooan a tingoar ngaeni pwe, “Emmwen pwe ipwe tapweog?”

¹⁹ Nge Jesus ese mwerhaen. A aengaeni pwe, “Sefaaen noa noan imwoamw reen oamw famini nge wa fioangei ngaeniir minikka Soamwoon a feeori ngaeniug, iwe me aan igin gacch ngaeniug.”

²⁰ Iwe mwaaen we a siusaengi, a noa noan oanongaen miniwe Seig Aepinoamw, a noa aepesa miniwe Jesus a feeori ngaeni. Oanongeer rhoa kkewe rerongorong nge ra igin riutae.

Naiun Jairus Rhoapwut me Rhoapwut we e Geotteopa Mengaagiun Jesus

(Mat 9.18-26; Luke 8.40-56)

²¹ Jesus a sefaaen noa epeig nooamw we. Reen ngaerhen meoneoiniun we nge regin towunap aeremas kka ra mwirhito reen.

22 Jairus, erhai soamwoonin noan wutteer Jews we a itto, nge igiwe a weri Jesus, a aesirowu tiw me oaron pirheen

23 nge a tingoar aeffaenipirhe ngaeni pwe, “Aeterhooapwut mwittig na naeyi a igin choaw aan semwaai. Faaen pirhemw itto wopwe iseni tae poawumw wooan pwe epwe takketae me epwe menaw!”

24 Iwe Jesus a tapweei noa mwaaen we. Reigin towunap aeremas kka ra tapweei noa Jesus ra aetietiy ngaeni oanongaen wenepeigin.

25 Eno erhai rhoopwut neeiir eseiug aan peitaeg noa noan seig me ruwowu raeg,

26 inamwo igiwe a sefaaen me reer towunapeer toagota. A pwan naini oanongaen naiun senaapiy, nge faer egius mwo nge efaer kkaein noa.

27 Oatowe rhoopwut we a rongorong wunuunun kkepe-saen Jesus, a itto me niugiusagiuriun neeiin pinowun aeremas kkewe,

28 nge a maengiy noan tipan pwe, “Aere i geotteopa rhag mengaagiun, nge ipwe mamaaw tae.”

29 Reen rhag oatowe e geotteopa mengaagiun, nge semwaai we aan a iug noa, nge a meyaefi wooan oanongan pwe a rhigar saengi waeiraes we aan.

30 Iwe rhag nge Jesus a meyaefi pwe eew kkeman a toowow saengi, iwe a toagun ngaeniir aeremas kkewe nge a aeineeor pwe, “Iyo we a geotteopa mengaagiuy?”

31 Rhoan kkayeo kkewe naiun ra paniuwaeni pwe, “Wow-eriir aeremas kka re aetietiy ngaeniug rhag, nge meeta wa aeineo iyo we a geotteopag reen?”

32 Nge Jesus a fanefetaen pwe epwe giuneei iyo we a feori miniwe.

33 Nge igiwe rhoopwut we a giuneei meeta we a wen ngaeni, a ngongotae reen aan mesag, iwe a itto foatotiw me oaron pirheen iwe a pwaeri ngaeni wenecheran meeta we a wen ngaeni.

34 Iwe Jesus a aengaeni pwe, “Naeyi, oamw niugiuniug minne a aecchipwoag tae. Wonoa noan oapoas pwe wa rhigar saengi oamw waeiraes.”

35 Nge igiwe Jesus e rhiuwen kekkepas, aemweoi rhoan pweipwogin kkepas ra itto me reen imwaen Jairus ra aengaeni pwe, “A mae noa rhoopwut we noawumw. Erhiuwen meeta ipitaen oamw itiwow angiurhiu no ngaeni sinsei na?”

36 Nge Jesus ese aefaenniy meeta we re aepesa, nge a aengaeni Jairus pwe, “Wote mesag, niugiuniug rhag.”

37 Jesus esa tipaeni no nge erhai epwe tapweei, pwe aen Peter rhag me James me John iwe pwiin.

³⁸ Igiwe ra tooto reen imwaen Jairus, Jesus a giuneei aar pwurhopwurh fetaen me rongorong aar oacchorong me ngiuraegin aar saeng.

³⁹ Iwe a toonong noan iimw we a aengaeniir pwe, “Meeta oawwa pwurhopwurh fetaen reen? Meeta oawwa saeng reen? Aeteen nge ese mae, pwe aan rhag maiur.”

⁴⁰ Iwe ra kekkaei aegini, iwe a asiur wow oanongeer me noan iimw we, nge a paeniir seman me inaen aeterhooapwut we, me eoniurhai naiun rhoon kkayeo, iwe a paeniir nong noan sengkin we aeterhooapwut we ewon ee.

⁴¹ A ammmwarhiu tae paiun nge a aengaeni pwe, “Talitha koum!” faaen minneen nge, “Aeterhooapwut, iaengaeniug wopwe rhimwitae!”

⁴² E iutae rhag nge a faaeraeg fetaen. (Iya seig me ruwowu raegin.) Nge igiwe a wen miniwe oanongaen aeremas kkewe ra igin riutae.

⁴³ Nge Jesus a aetiwenigiy ngaeniir pwe resoapw aengaeni mwo nge erhai, nge a pwan aengaeniir pwe, “Oaw ngaenneei meeta epwe angi”.

6

Rhoon Nazareth Rese Aetiwa Jesus (Mat 13.53-58; Luke 4.16-30)

¹ Jesus a siusaengi pwiuneoi we nge a sefaaen ngaeni pwugusan, nge rhoon kkayeo kkewe naiun ra pwan tapweei noa.

² Wooan raaenin Sabbath nge a rhaepiy tae aan fenai noan wutteeer Jews we. Re towunap aeremas igiwe nge igiwe rhoon rongorong aan fenai ra igin mwaar reen. Ra aeiineo pwe, “Iya minne epwigi minikkeei me ee? Meeta taeppen reepiy e refang ngaeni? Ifa wusun nge a mmwen ngaeni aan feori kkeman kaan?”

³ Saapw ieen taikusang we naiun Maria, iwe pwiin James, Joseph, Judas me Simon? Me saapw mwengeyan rhoopwut kka reno igeei?” Iwe resa aetiwa no.

⁴ Jesus a aengaeniir pwe, “Profeta eyor aesirowuur me noan oanongaen pwiuneoi, nge ese yor aesirowuur me noan sipegin pwuguseer, me reer aeremeseer me aar famini.”

⁵ Ese mmwen epwe feori kkeman me igiwe, pwe efaer aetekkaar tae rhag aaemweoi rhoon semwaai reen aan iseni tae paiun woar.

⁶ A gin ssef tae neetipan reer aeremas kkewe esoar aar niugiuniug.

Jesus a Fangenoa Seig me Riiurhai Rhoon Kkayeo (Mat 10.5-15; Luke 9.1-6)

Iwe Jesus a noa noan pwugos kkewe e arapeto, nge a fenai ngaeniir oanongeer aeremas.

⁷ A faingi fengaenniir rhoowe seig me riiurhai rhoan kkayeo nge a aefengaar noa riiurhai me riiurhai. A fang ngaeniir maemaeweer pwe repwe asiur aniu aenneew me woar aeremas,

⁸ nge a pwan anneogiu ngaeniir pwe, “Oawsoapw pwigi mwo nge eew meeta woan aaemi saei pwe eew rhag yoyo, esoapw yor aenaemi, aaemi pwetoaw, esoapw yor senaapiy noan pwoarsaemi.

⁹ Oaw nokka, nge oawsoapw pwigi mwo epeo ssiuwenin mengaagiumi.”

¹⁰ A pwan aengaeniir pwe, “Ese tiwegin iya re aetiwaegaemi me ee, oawno noan iimw naan toori aaemi oawpwe siu me reen aepinoamw naan.

¹¹ Ngaere oaw toori eew taeninimw, nge rese aetiwaegaemi aere aiussaening ngaenigaemi, oaw siusaengi pwiuneoi we nge oawwa iurhiugi noa ppweoniun pwiuneoi we me woan pirhemi. Minna ina epwene no pwe eew atapeonneog ngaeniir.”

¹² Iwe ra noa fenaiuw ngaeniir aeremas pwe repwe toagun saengi aar monofit.

¹³ Ra asiur noa towunepaen aniu aenneew me woar aeremas, nge ra aepiti ngaeniir tiikka towunepaen rhooa semwaai kkewe iwe ra aecchipwaar tae.

Maenoan John Baptist

(Mat 14.1-12; Luke 9.7-9)

¹⁴ Igiwe *king* Eroles a rongorong wunuunun kkepessaen Jesus, pwe itan a rheoi noa woan oanongaen pwiuneoi. Aaemweoi aeremas ra aepesa pwe “John Baptist a menaw sefaaen saengi mae noa! Ina faaen minne eyor maemaewan pwe epwe feeori kkeman kkeei reen.”

¹⁵ Aaemweoi re aepesa pwe, “Iiy Elijah.”

Nge aaemweoi re aepesa pwe, “Iiy erhai profeta, taeppeer profeta kkewe mweoiwe.”

¹⁶ Igiwe Eroles a rongorong miniwe, a aepesa pwe, “Iiy John Baptist we igopyi noa iiuwan nge imwu a menaw sefaaen!”

¹⁷ Eroles miniwe eakkiuneo pwe repwe torofi John nge ra geoni iwe ra oatoranong noan kanepwus. Eroles a feeori minnee faaen itaen Herodias iwe a pwiuniuwaeni, nge rhoopwut een nge pwan pwiuniuwaen Philip iwe pwiin.

¹⁸ John Baptist a aepini ngaeni Eroles pwe, “Ese fin pwe wopwe pwiuniuwaeni rhoopwut mwu pwiuniuwaen pwiimw!”

19 Iwe Herodias a gin soong wooan John nge a gin mwerhaen pwe epwe niyy noa, nge ese mmwen ngaeni pwe reen Eroles.

20 Eroles emesagiu John, pwe a giuneei pwe iyy erhai mwaaen mwamwaai nge essoar, iwe e aemmwna fetaeneei rhag. Eroles e aerhaengi aan epwe rongorong ngaeni aen John fenai, inamwo aere egaen kkaein noa aenneewaen tipan iga egaen rongorong ngaeni.

21 Oarosan nge Herodias a yo ngaeni niunniuwaen we aan. Wooan raenin wupwutiwen Eroles, igiwe efeori eew gupwunnap faaen iteer naiun naiwiis, naiun soamwoonin sonotaw me aeremas kkewe re taegias me noan Galilee.

22 Oatowe rhoopwut we naiun Herodias a toonong nge a itinong pwaai, Eroles me rhooawe rhoaniuwan ra gin kker reen. Iwe *king* we a aengaeni aeterhooapwut we pwe, “Meeta wo tipaeni wopwe aeni? Ngaang ipwe ngaenneog ese tiwegin minne wo tipaeni.”

23 A pwan ppwon ngaeni pwe, “Ngaang ipwe ngaenneog ese tiwegin meeta wotingoar, inamwo esoapw me reen minne nemaeniaei!”

24 Iwe aeterhooapwut we a noa aeineow miniwe inan pwe, “Meeta ngaang ipwe tingoar?”

Rhooapwut we inan a paniuwaeni pwe, “Minna rhimwen John Baptist.”

25 Iwe aeterhooapwut we a mwetekkain sefaaen noa reen *king* we nge a tingoar ngaeni pwe, “Imwerhaen pwe igina rhag nge wopwe ngaenneaei rhimwen John Baptist noan eew saepiy.”

26 Minneen nge a gin aenneewa noa nee tipan *king* we, nge ese mmwen pwe epwe aeseaaeni pwe reen ppwon kkewe a feori faaen meseer rhooa towunap kkewe.

27 Iwe a fangenoa rhag erhai sonotaw nge a aengaeni pwe epwe pwigito rhimwen John. Iwe sonotaw we a noa, a noa reen noan kanepwus we, a noa gopiy noa iuuwaen John;

28 iwe a pwigito rhimw we noan eew saepiy a itto ngaenneei aeterhooapwut we, nge iya ngaenneei miniwe inan.

29 Nge igiwe rhooawe naiun John rhoaan kkayeo ra rongorong, ra itto pwigiti miniwe oanongan nge ra noa paeia noa.

Jesus e Oamwongoor Nimingeras Aeremas
(Mat 14.13-21; Luke 9.10-17; John 6.1-14)

30 Oapostonus kkewe ra sefaaeneto reen Jesus nge ra aengaeni oanongaen meeta ra feori, pwan minikka ra aeni fenai.

31 Igiwe a gin towunap aeremas kka remaeto me maegenoa, Jesus me rhoaan kkayeo kkewe naiun esa

mmwen no repwe mwongo. Iwe a aengaeniir pwe, “Oawsa noa oaw giirh rhag eew pwiuneoi taaw noa, pwe oawpwe egius mmwenen aseoseo.”

³² Iwe iir noa rhag ra noa wooan efoarh pwoot nge ra noa ngaeni eew pwiuneoi esoar aeremesan.

³³ Nge towuneppeer aeremas kka reweriir aar siunoa nge regiuneer pwe iir iyo, iwe ra siusaengi aepinoamwoor, ra fattapw noa me wenifaniuw nge ra toori pwiuneoi we memmweer Jesus me rhooran kkayeo kkewe naiun.

³⁴ Nge igiwe Jesus a teeotiw me wooan pwoot we, a giuneei pwuwaen aeremas kkewe, iwe nge a igin faayeeor, pwe ra aeffitaeg ngaeniir *sheep* kkewe esoar rhooran neginegiir. Iwe a rhaepiy tae aan fenaiuw ngaeniir towunepaen aegiaeg.

³⁵ Noan faefin we, rhooran kkayeo kkewe naiun ra itto reen nge ra aengaeni pwe, “Eigin anniug noa igeei, nge a pwan pwoong.

³⁶ Wone fangenoa aeremas kena noan maat me pwegos kkomwu earapeto pwe repwe noa chuwaai aeneer mwongo.”

³⁷ Nge Jesus a aengaeniir pwe, “Aaemi oawpwe ngaenneer meeta repwe mwongo.”

Iwe ra aeiineow pwe, “Wo mwerhaen aeipwe noa chuwaai fenoawa ngaeni riiuwapwiugiuiw faiun *silver*, pwe repwe mwongo?”

³⁸ Iwe Jesus a aeiineeor pwe, “Fitifai fenoawa eyor reemi? Oawnoa pipiiy.”

Nge igiwe ra giuneei, ra aengaeni Jesus pwe, “A yor niffai fenoawa me riiurhai iig.”

³⁹ Jesus aepesa ngaeniir rhooran kkayeo kkewe naiun pwe, “Oaw aengaeniir aeremas kena pwe repwe mooat tiw wooan fetin nge epwe imweoi noa aaemweoi me aaemweoi.”

⁴⁰ Iwe rhooranap we ra mooat tettaen noa, nge aaemweoiut aepwiugiuiw, nge aaemweoiut aenimeig.

⁴¹ Iwe Jesus a pwigi fenoawa we niffai me iig kkewe riiurhai, a fattae naaeng nge a fang ngaeni Deus aan aerhigerhig. A giniiy fenoawa kkewe a ngaenneer rhooran kkayeo kkewe naiun pwe repwe inetiy ngaeniir aeremas kkewe. A pwan giniiy iig kkewe riiurhai pwe epwe toaw wooar aeremas kkewe.

⁴² Oanongeer nge ra maegin mwongo iwe ra faeyemwaai noa.

⁴³ Iwe rhooran kkayeo kkewe ra ioni fengaenniy iwe ra oawuta seig me ruwowu rhiug reen nusegin fenoawa me iig kkewe.

⁴⁴ Iwe nepeer mwaaen kkewe re mwongo nge nimmingeras.

Jesus e Faaeraeg Noa Weei Saaet
(Mat 14.22-33; John 6.15-21)

⁴⁵ Iwe noan rhag oatowe nge Jesus a aepekkaar rhoan kkayeo kkewe naiun pwe repwe teeotae wooan pwoot we, nge ra gommwonoa Bethsaida iwe epeig meoneoiniun we, nge iiy a aefengaar noa aeremas kkewe pwe repwe sefaaen ngaeni nenieer.

⁴⁶ Mwirin aan koapwong ngaeniir aeremas kkewe, a faaeraeg tae wooan eew rhug pwe epwe noa maecipin.

⁴⁷ Oatowe a pwongonoa, pwoot we a toori nugunupaen meoneoiniun we, nge Jesus a iiy noa rhag weni faniuw.

⁴⁸ Iwe a giuneei pwe rhoan kkayeo kkewe naiun ra aerhigaen fatiun, pwe iga re fatiun ngaeni aaeng; nge nepetaen enuuw me wonowu konook nee oatosor raaen nge a itto reer, nge e faaeraeg to weei saaet. Nge aetae epwene oanuuw saengiir,

⁴⁹ nge ra weri pwe a faaeraeg weei saaet. Ra maengiy pwe erhai aniu, nge ra aekkepwestae.

⁵⁰ Ra maegin mesag tae igiwe ra weri.

Reen rhag oateen nge Jesus a kkepas ngaeniir pwe, "Oawaemenetaegaemi! Ngaang minnee. Oawsoapw mesag!"

⁵¹ Iwe Jesus a teeotae reer wooan pwoot we, nge aaeng we a maseoseotiw. Rhoan kkayeo kkewe ra mwaar,

⁵² pwe rese metefaaegini meeta faaen miniwe Jesus enoa mmwenen oamwongoor rhoawe nimingeras reen, iwe rese iit faan.

Jesus a Aecchipwaar Rhooa Semwaai me Wooan Gennesaret
(Mat 14.34-36)

⁵³ Iwe ra seraeg noa epeig meoneoiniun we iwe ra itto noan Gennesaret, nge ra noa feotaegini waa we waar me ee.

⁵⁴ Retiwenong rhag me wooan pwoot we waar, nge aeremas ra aeginna Jesus.

⁵⁵ Iwe ra peres fetaen wooan oanongaen faniuw, pwe ese tiwegin iga re rongorong pwe eno e, nge ra pwigiir to rhooa semwaai kka rewon noan gieer.

⁵⁶ Iwe nge oanongaen pwiuneoi e Jesus enoa ee, noan pwugos, aere noan aepinoamw aere noan maat, nge aeremas repwe pweipwog to mane semwaai noan nenien chuwaai nge ra itto tingoar ngaeni Jesus pwe aere uwen aar mwo man semwaai geotteopa soapwon mengaagiun. Iwe oanongeer iyo kkewe re geotteopa ra mamaaw noa.

7

Aar Fenai Rhaepeto Kkewe
(Mat 15.1-9)

¹ Aaemweoi Pharisees me sinsein anniug kkewe re itto me Jerusalem ra mwirhito reen Jesus.

² Ra giuneei pwe aaemweoi me neeiir naiun Jesus rhoan kkayeo kkewe ra mwongo wooan paiiur nge e nimaenneew, pwe rese toafi paiiur taeppen minna Pharisees re aengaeniir aeremas pwe repwe feori.

³ (Pwe Pharisees me oanongeer Jews, retapweei rhag miniwe rhaepeto kkewe aar ra aeni fenai ngaeniir: Re fasiun gaen toafi paiiur taeppen wunuunun toatoan pai na iir re fasiun feoffeori weni mmwaen aar repwe mwongo;

⁴ nge rese pwan mwongo minikka e itto me noan imwaen chuwaai igine rese nniuwun mwo. Iwe nge repwan tapweei rhag ssowun anniug kkewe re fasiun aengaeniir, wunuunun aar toafi kkap, raaw, saepiy me gieer.)

⁵ Iwe Pharisees me sinsein anniug kkewe ra aeiineow Jesus pwe, “Meeta rhoan kkayeo kkomwu noawumw rese tapweei aar fenai rhaepeto kkewe aarh reen, nge ra faer mwongo wooan paiiur min nimaenneew?”

⁶ Jesus a paniuwaeniir pwe, “A gin weneeti meeta we Isaiah a faer fenaiuw pwe wunuunumi. Aaemi rhoa oatupwutpw, taeppen rhag aan foatogi:

‘Deus a aepesa pwe: Aeremas kkeei ra oassoamwooniaei rhag reen aar kkepas, nge nee tipeer a igin taaw saengiaei.

⁷ Esooar ipitaen aar aesirowuwaai, pwe re fenaiuw aar aeremas anniug, nge ra feori pwe aetae gaen aaei anniug.’

⁸ “Aaemi oawwa oatoranoa aen Deus anniug, nge oawwa tapweei feoriaen aeremas.”

⁹ Nge Jesus a soapwei noa pwe, “Oawigin angmwamwaai reen aaemi oawpwe arhiuwa noa anniug kkewe aen Deus minni aaemi oawpwe aemaemaewa kkomi.

¹⁰ Pwe Moses a aepesa pwe, ‘Wopwe aesirowu semoamw me inoamw,’ iwe me, ‘Iyo a oari seman aere inan, nge repwe niy noa.’

¹¹ Nge aaemi oawwa aepesa pwe aere erhai a yor reen aekkaew meeta epwe tipaengi ngaeni seman aere inan, nge a aepesa pwe, ‘Minneen nge Corban,’ (faaen minneen nge aen Deus),

¹² iwe a yor pweniun pwe esoapw tipaengi seman aere inan.

13 Reen taeppen fenai e oawwa aengaeniir aeremas nge eoamoai noa mwaeniaen Deus. Nge etowunap aegiaeg oawfeeori ikka e ieei wusun.”

*Minikka e Aenimaenneewa Aeremas
(Mat 15.10-20)*

14 Iwe Jesus a faingiir to pwuwaen aeremas kkewe nge a aengaeniir pwe, “Oaw aiussaening ngaeniaei oanongaemi, pwe oawpwe metaf.

15 Esooar meeta minne epwe toonong nee rhiumi nge epwe aenimaenneewagaemi noa. Pwe faer minne etowow me nee rhiumi minne epwe aenimaenneewagaemi.

16 [Iyo a yor saening, epwe rongorong.]*”

17 Igiwe a mwet saengi aeremas kkewe a noa toonong nee iimw, iwe rhoan kkayeo kkewe naiun ra tingoar ngaeni pwe epwe aemmetefa ngaeniir faaen kkepas kkewe.

18 Jesus a aengaeniir pwe, “Iwe aemi mwo nge oawse metaf pwan taeppen rhag ikkina aemweoi? Oawse metaf? Esooar minne epwe toonong nee rhiumi nge epwe aenimaenneewagaemi,

19 pwe ese toonong noan pwunnomi pwe etonong noan upwaemi, mwirin a toowow saengi oanongaemi.” (Reen kkepas een nge Jesus a pwaeritae pwe oanongaen mwongo nge egacch pwe aeremas repwe mwongo.)

20 Nge a soapwei noa nge aepesa pwe, “Meeta a toowow saengi nee rhiumi minne e aenimaenneewagaemi.

21 Pwe saengi nee rhiumi me pwunnomi, a toowow niunniuwaen aenneew, feoffeoor aenneew fetaen, mwoarho, nni menaw,

22 maiur ngaeni pwiuniuwaen erhai, rhegoaw me towunepaen min aenneew, oatupwutupw, mwechenia, noanowo, kkepas aenneew, oangonongon me tipoarorh.

23 Oanongan feoffeoor kkeei nge etowow saengi nee rhiumi a itiwow aenimaenneewagaemi.”

*Aaen Erhai Rhoapwut Niugiuniug
(Mat 15.21-28)*

24 Iwe Jesus a noa saengi igiwe a noa eew pwiuneoi e arap ngaeni aepinoamwon Tyre. A toonong noan eew iimw nge ese tipaeni pwe erhai epwe giuneei pwe a no igiwe, nge ese mmwenen wop ssiunaei igiwe.

25 Iwe nge erhai rhoapwut eyor naiun aeterhoapwut ewartae aniu aenneew woan, a rongorong wunuunun Jesus nge a itto reen nge a itto foatotiw oaron pirheen.

* 7:16 Petenan eei nge esoano noan aekkaew petenan kka efoatfoat noan kkepesaen Greek.

²⁶ Rhoopwut een nge erhai rhoopwuton Gentile, a wup-wutiw noan faniuwaen Phoenicia iwe noan Syria. A tingoar aeffaenipirhe ngaeni Jesus pwe epwe asiuw wow aniu aenneew we me reen aeterhooapwut we naiun.

²⁷ Nge Jesus a paniuwaeni pwe, “Sipwe mmwaen oamwongoor wonigaet. Ese mwamwaai pwe sipwe pwiggi aeneer wonigaet mwongo nge sa oatora ngaeniir gonaag.”

²⁸ Rhoopwut we a paniuwaeni pwe, “Menap, gonaag mwo nge re mwongo peipeyin aeneer wonigaet me faaen *table*.”

²⁹ Iwe Jesus a aengaeni pwe, “Pwonno reen minimwu mwaenioamw, wone sefaaen noa nee iimw, pwe e aniu aenneew we a toowow me reen aeterhooapwut we noawumw.”

³⁰ Iwe rhoopwut we a noa nee iimw nge a noa weri aetewe naiun pwe ewon noan gien, nge ennetaen pwe aniu aenneew we a siunoa me wooan.

Jesus a Aecchipwa Erhai Niparh Ewan me Saeningan

³¹ Jesus a noa saengi faniuwaen Tyre a noa ngaeni Sidon toori meoneoiniuniun Galilee, nge a mwet nong noan faniuwaen Decapolis.

³² Aemweoi aeremas ra noa pwigito reen Jesus erhai mwaaen esaeningapiung nge egin waeiraes epwe kkepas, nge ra aeffaenipirhe ngaeni Jesus pwe epwe iseni tae paiun wooan.

³³ Iwe Jesus a paeninoa mwaaen we saengiir aeremas kkewe, a tugunong noan saeningaen mwaaen we, nge a oattuffa, nge a geotteopa rheoniwan.

³⁴ Mwirin Jesus a fattae naaeng, a nngas faeregite noa, nge a aengaeni mwaaen we pwe, “Ephphatha!” faaen nge “Sugaeg tae!”

³⁵ Iwe rhag nge mwaaen we a mmwen epwene rongorong, a saenetaeg noa rheon ngaerhen, nge a rhaepetae aan kkepas.

³⁶ Iwe Jesus a anniugiu ngaeniir aeremas kkewe pwe re-soapw fioangei ngaeni mwo nge erhai; nge nepaen aan anniugiu ngaeniir, nge nepaen aar noa aepesa fetaeneei.

³⁷ Oanongeer rhooawe rerongorong kkepas we ra gin mwaar. Ra aepesa pwe, “A igin mwamwaai oanongaen minikka a feeori. Epwan feeori mwo nge rhooa piung repwene rongorong, me rhooa parh eweri repwene kkepas.”

8

Jesus e Oamwongoor Faangeras Aeremas (Mat 15.32-39)

¹ Ese pwongiy mwo me mwirin nge pwuwaen aeremas ra itto rhu fengaen. Oatowe a rosonoa aeneer mwongo,

nge Jesus a faingiir to rhoan kkayeo kkewe naiun nge a aengaeniir pwe,

² “Iya faayeeor rhooa eei, pwe iga ra no reei noan eoniuraen, nge iye igina a rosonoa aeneer mwongo.

³ Aere ipwe aeseafaeniir noa neepwuguseer nge ise oamwongoor, nge repwe niyoarorhrorh, pwe aaemweoi e gitaaw nenieer.”

⁴ Iwe, rhoan kkayeo kkewe naiun ra aeiineow pwe, “Iya me noan pwiuneoi anniug noa eei iye sipwe rhurhu mwongo me ee nge epwe nap woar rhooa eei?”

⁵ Jesus a aeiineeor pwe, “Fitifai fenoawa eyor reemi?”

Ra paniuwaeni pwe “Fiusiufai.”

⁶ A anniugiu ngaeniir rhoanap we pwe repwe mooat tiw weni ppweon. Iwe a pwigi fusiufai fenoawa nge a aengaeni Deus aan aerhigerhig, a giniytiw nge a ngaenneer rhoan kkayeo kkewe pwe repwe inetiy ngaeniir rhoanap we, iwe ra feeori.

⁷ Epwan yor reer fitiman iig paechig. Jesus a pwan fang aan aerhigerhig, iwe a ngaenneer rhoan kkayeo kkewe naiun pwe repwe inetiy ngaeniir rhoanap we.

⁸⁻⁹ Oanongeer remwongo nge ra faeyemwaai. Nnepeer aeremas kkewe nge epwe sooaw faangeras. Iwe rhoan kkayeo kkewe ra oawuta fisuuw rhiug reen nusegin mwongo kkewe. Iwe Jesus a aefengaar noa aeremas kkewe neepwuguseer,

¹⁰ Nge Jesus me rhoan kkayeo kkewe naiun ra teeotae woan efoarh pwoot, ra saei ngaeni faniuwaen Dalmanutha.

Pharisees Kkewe ra Tingoar Eew Kkeman

(Mat 16.1-4)

¹¹ Aaemweoi Pharisees ra itto reen Jesus nge ra rhaepeta aar appaniuwaeni. Remwerhaen repwe aegina, iwe ra tingoar ngaeni pwe epwe feeori eew kkeman, pwe epwe pwae pwe Deus e tipieew ngaeni.

¹² Nge Jesus a nngas faeregiti noa nge aepesa pwe, “Meeta minne aeremesaen mweoi e igina ra tingoar eew kkeman reen? Ennetaen, ipwe aengaenigaemi pwe esoapw yor eew kkeman epwe pwae ngaeniir aeremas kkeei.”

¹³ A nigitiir, a teeotae woan pwoot we a noa peig we epeig me reen meoneoiniun we.

Aar Yeast Pharisees me Eroles

(Mat 16.5-12)

¹⁴ Rhoan kkayeo kkewe re maniuwegi noa repwe oayora pwigieer fenoawa, iwe efoarh rhag fenoawa minne eno reer woan pwoot we.

¹⁵ Iwe Jesus a atapeonneogiiur pwe, “Oawpwe aefaenni-gaemi reen yeast we aar Pharisees me Eroles.”

16 Iwe ra rhaepetae aar fioang wooar pwe, “A aepesa minneen pwe iga esooar fenoawa reerh.”

17 Jesus efasiun giuneei meeta we reaepesa, iwe a aeineeor pwe, “Meeta faan aaemi aepesa aan esooar fenoawa reen? Oawsaaen giuneei aere oawsaaen metaf mwo? Erhiuwen roorh noan rhimwemi?”

18 Eyor mesaemi, oawse weriwer? Eyor saeningaemi, oawse rongorong? Oawse maengiy

19 oatowe iginiy niffai fenoawa wooar rhoawe nimingeras? Fitowu rhiug oawwa oawuta reen nusegin mwongo?” Iwe, ra paniuwaeni pwe, “Seig me riuwarhiug.”

20 Jesus a aeineeor pwe, “Nge oatowe iginiy fusiufai fenoawa wooar rhoawe faangeras, nge fitowu rhiug esseog reen minikkewe nusegin mwongo?” Iwe ra paniuwaeni pwe, “Fisuuw rhiug.”

21 “Oawsaaen metaf mwo?” aalen Jesus aeineeo.

Jesus a Aeffetanao Mesaen Erhai Mwaaen me Wooan Bethsaida

22 Ra itto Bethsaida, nge aaemweoi aeremas ra pwigito reen Jesus erhai mwaaen parh nge ra aeffaenipirheei pwe epwe geotteopa.

23 Jesus a ammwarhiu paiun mwaaen we a paeni wow me niugiun pwugos we. Mwirin aan oattuffa mesaen mwaaen we, nge a iseni tae paiun wooan, nge a aeineow pwe, “Yor minne wa weri?”

24 Mwaaen we a mmas noa nge a iura pwe, “Ooa, iya weriir aeremas, nge nigiti pwe reweei waniwan kka refaeraeg fetaen.”

25 Jesus a pwan iseni sefaaen tae paiun wooan mesaen mwaaen we. Reen oateen nge mwaaen we a fan wenewen noa, pwe a ffat sefaaen minikkiwe mesan pwe a weri oanongaen aegiaeg.

26 Jesus a fangenoa mwaaen we neepwugusan nge a ammwir ngaeni pwe, “Wosoapw rhiuwen sefaaen noa reen oasoaso na.”

*Peter e Iura pwe Jesus Ina Kristus
(Mat 16.13-20; Luke 9.18-21)*

27 Iwe nge Jesus me rhoaan kkayeo kkewe naiun ra noa noan aepinoamw kkewe ngaerhen Caesarea Philippi. Noan aar feffaeraeg noa, nge a aeineeor pwe, “Oaw aengaeniaei, aeremas reiura pwe ngaang iyo?”

28 Iwe nge ra aengaeni pwe, “Aaemweoi reiura pwe een John Baptist, aaemweoi reiura pwe een Elijah, nge pwan aaemweoi reiura pwe een erhai profeta kkewe.”

29 Jesus a aeineeor pwe, “Nge aaemi, oaw iura pwe ngaang iyo?” Peter a paniuwaeni pwe, “Een Kristus.”

³⁰ Iwe nge Jesus a oasoapwosoapw ngaeniir pwe, “Esooar ne oawpwe aengaeni wunuunun mmwenei.”

Jesus a Aepesa Waeiraesin me Maenoan
(Mat 16.21-28; Luke 9.22-27)

³¹ Iwe Jesus a rhaepiy aan fenaiiur rhooran kkayeo kkewe naiun nge eiura pwe, “Minna Naiun Aeremas ina epwe kkaein aan affayeo nge epwe serhoawun me reer mwaaen kkewe aar, soamwooniir patere kkewe me sinsein anniug kkewe. Repwe niy noa, nge mwirin eoniuraen nge epwe menaw sefaaen.”

³² Eigin aeffeta ngaeniir wunuunun minnee. Iwe Peter a wummwuw noa egius a noa soong ngaeni.

³³ Nge Jesus a toagun ngaeniir rhooran kkayeo kkewe naiun nge a soong ngaeni Peter. Eiura pwe, “Rhiuw me oaroi, Saetan, pwe oamw niunniywaen ese itto me reen Deus, pwe eitto me reen aeremas.”

³⁴ Iwe Jesus a faingi pwuwa we me rhooran kkayeo kkewe naiun. Iwe a aengaeniir pwe, “Erhai ne emwerhaen tapweaei, epwe aerheei noa niunniywaennen wooan oanongan, a aiufera aan kurus nge a tapweeito mwiriy.

³⁵ Pwe iyo emwerhaen ammwarhiu menewan epwe ppiung saengi, nge iyo eppiung saengi menewan faaen itaei pwan faaen itaen Kkepas Mwamwaai we nge epwe menaw.

³⁶ Epwe meeta ipitan aaen yo faeinaengiy nniuw noa ngaeni erhai, nge ese yo ngaeni menewan? Esooar ngaere!

³⁷ Esoapw yor meeta erhai epwe tongaeni fangenoa pwe epwe pwigi sefaaeniy menewan.

³⁸ Aere wosaew aeginiaei me fenai kena aaei faaen mweoi e SSEGIUN monofit, ina nge mwaaen we Naiun Aeremas epwe pwan saew aeginiug oatona epwe itto noan nningen minna Seman fengaen me angkenus kena ressoar.”

9

¹ Iwe a pwan aepesa pwe, “Ennetaen, ipwe aengaenigaemi, pwe eyor aaemweoi aeremas igei resoapw mae, toori oatona repwe weri itton minna Mweoiun Deus epwe itto noan mamaaw.”

Nniuwen Noan Wunuunun Jesus
(Mat 17.1-13; Luke 9.28-36)

² Mwirin wonowu raaen nge Jesus a paeniir tae Peter, James me John wooan eew rhug taegias, nge a iir noa rhag ee. Igiwe re rhiuwen oawruru Jesus, nge a nniuwen noa wunuunun,

³ mengaagiun a moanuponup reen aan pwerheraeg noa, pwerheraeg saengi mwo nge wupwuwaen erhai mengaag me noan faeinaengiy.

⁴ Iwe nge rhoan kkayeo kkewe eoniurhai ra weri Elijah me Moses aar kkepas ngaeni Jesus.

⁵ Iwe Peter a aengaeni Jesus pwe, “Sinsei, a igin gacch pwe sino igeei. Aaipwe aiuwtae enuw iimw tampwoning, eew imwoamw, eew imwaen Moses, me eew imwaen Elijah.”

⁶ Iiy me rhoa kkewe rhoaniuwan ra igin mesag, iwe Peter esa giuneei no meeta epwe rhiuwen aepesa.

⁷ Iwe eew toapw a itto pwaniur noa, nge ra rongorong eew mangiungiu e itto me noan toapw we, “Ieei Naeyi mwaaen aerhaengerhaeng, oaw aiussaening ngaeni!”

⁸ Ra mwetekkaein wegitaeg fetaen nge esooar ne reweri, pwe aeen Jesus rhag minne eno reer.

⁹ Igiwe ra ittiw me wooan rhug we, Jesus a igin ammwir ngaeniir pwe, “Oawsoapw aengaeni mwo nge erhai meeta oawwa weri, toori aeen mwaaen we Naiun Aeremas epwe menaw sefaaen me reen maenoa.”

¹⁰ Ra tapweei meeta we e Jesus e ammwir ngaeniir, nge a rhaepetae aar kkepas aeiweg fengaen wooar, “Meeta faan minne menaw sefaaen saengi mae noa?”

¹¹ Iwe ra aeiineow Jesus, “Meeta sinsein anniug ra aepesa, pwe Elijah epwe gommwoto reen?”

¹² A paniuwaeniir pwe, “Epwe fasiun gommwoto Elijah pwe epwe itto oamoannatae oanongaen aegiaeg. Nge meeta rhag a foatofaat noan Pwapwior we eSantus pwe Naiun Aeremas epwe toonong noan waeiraes faeregite me aar oasoarhoawuna?”

¹³ Ipwe aengaenigaemi pwe Elijah a fasiun itto, nge aeremas ra feori ngaeni meeta aar mwerhaen, taeppen rhag meeta we Pwapwior we eSantus e aepesa.”

Jesus eAecchipwa Erhai Aetemwaaen Eyor Aniu Aenneew Wooan

(Mat 17.14-21; Luke 9.37-43a)

¹⁴ Igiwe ra rhu fengaen me rhoan kkayeo kkewe aaemweoi, ra giuneei pwwaen aeremas kkewe repwaeniaeniir me aaemweoi sinsein anniug reaengiingi ngaeniir.

¹⁵ Igiwe aeremas kkewe ra giuneei Jesus, ra riutae, ra fattapw noa reen ra noa aewenimmwa.

¹⁶ Jesus a aeiineeor rhoan kkayeo kkewe naiun pwe, “Meeta mwu oaw aengiingi fengaen wooan?”

¹⁷ Erhai mwaaen me neeiir rhoa towunap we a paniuwaeni pwe, “Sinsei, iya pwigito aete naeyi reemw, pwe eyor aniu aenneew wooan nge ese mmwenen kkepas.

¹⁸ Oate aniu aenneew een epwe wartae wooan, a oatoratiw ne ppweon, nge a pwwuropwur wow me noan ewan, e iin

noa ngiin iwe me e cchemaw noa oanongaen. Iya aeiyegeer rhoon kkayeo kka noawumw pwe repwe oatowowuw aniu een me wooan, nge ese mmwen ngaeniir.”

¹⁹ Jesus a aengaeniir pwe, “Ifa mwo aaemi se niugiuniug faaen oateei! Epwe ifa ssiunaein aaei ipwe no reemi? Epwe ifa wusun aaei noaneenaei reemi? Oaw pwigito aetena reei!”

²⁰ Ra pwigito aet we reen Jesus.

Igiwe rhag aniu aenneew we eweri Jesus, a ngong noa aetewe, iwe a ppiungiutiw ne ppweon a ittiw soagopenipen fetaen nge a pwuropwur wow me noan ewan.

²¹ Jesus a aeineow mwaaen we semaan aetewe pwe, “A ifa pwongiaen aan ieei wusun?”

Mwaaen we semaan aetewe a paniuwaeni pwe, “Saengi rhag ne wonigaeten.

²² A faei towunap aaen aniu aenneew een menaen epwe niiw noa reen aan aerheei nong noan aengaet me ne rhaan. Faayeogemaem me tipaengi gimaem, aere emmwen ngaeniug!”

²³ Jesus a paniuwaeni pwe, “Ooa, aere een emmwen ngaeniug! Oanongaen aegiaeg nge emmwen ngaeni erhai ne eyor aan niugiuniug.”

²⁴ Mwaaen we semaan aetewe a aekkepwas temoag tae pwe, “Ngaang iniugiuniug nge egius rhag, tipaengiaei epwe temoag noa aaei niugiuniug.”

²⁵ Jesus a giuneei pwe aeremas towunap kkewe ra arapeto reer, iwe a asiuw aniu aenneew we. “Aniun oawparh me saeningapiung, iaengaeniug pwe wopwe toowow me reen aetena, nge wosoapw rhiuwen sefaaeniti no!”

²⁶ Aniu aenneew we a aekkepwas tae, nge a ngong noa aetewe nge a tiw noa me wooan. A weei rhag erhai manimae kkewe, nge rhooa towunap kkewe ra aepesa pwe, “A maenoa!”

²⁷ Nge Jesus a ammmwarhiu paiun aet we nge a tipaengitae, iwe aetewe a iutae.

²⁸ Mwirin aaen Jesus toonong neeiimw, rhoon kkayeo kkewe naiun ra aeineow igiwe a iir noa rhag pwe, “Meeta aemaem aise mmwennen oatowowuw aniu aenneew we reen?”

²⁹ Jesus a paniuwaeniir pwe, “Aeggaen maeipin rhag minne emmwen epwe oatowowuur aniu kaan, esooar pwan eew me niugiunoan.”

*Jesus a Pwan Aepesa Wunuunun Aan Maenoa
(Mat 17.22-23; Luke 9.43b-45)*

³⁰ Jesus me rhoon kkayeo kkewe naiun ra noa saengi pwiuneoi we nge ra mwetenoa wooan Galilee. Jesus ese mwerhaen pwe aeremas repwe giuneei iga eno e,

³¹ pwe iga efenaiiur rhooran kkayeo kkewe naiun pwe: “Mwaaen we Naiun Aeremas epwene yonong neepaiiur aeremas kena repwe niy noa. Nge mwirin enuuw raaen epwe menaw sefaaen.”

³² Nge rese metefaaegini faaen miniwe e aeni fenai, nge remesag aar repwe aeineow.

Iyo e oarosaen Taegias?

(Mat 18.1-5; Luke 9.46-48)

³³ Igiwe ra itto Capernaum, nge ra toonong nee iimw, Jesus a aeineeor rhooran kkayeo kkewe naiun pwe, “Meeta we oaw aengiingi fengaen wooan me wooan ennap?”

³⁴ Nge iir resa paniuwaeni no, pwe iga re aengiingi me wooan ennap aere iyo e oarosaen taegias me neeiir.

³⁵ Iwe Jesus a mooat tiw, a faingiir rhooran kkayeo kkewe seig me riiurhai nge a aengaeniir pwe, “Aere erhai ne emwerhaen pwe epwe gommw, nge iiy epwe oarosaen noa aeremas nge epwe pwan engaang ngaeniir oanongeer aeremas.”

³⁶ A pwigi erhai wonigaet a aiuwtae me weni mmweer. A ammarhiu aetewe nge a aengaeniir pwe,

³⁷ “Iyo eaetiwa erhai wonigaet kaan faaen itaei eaetiwaeyaei, nge iyo eaetiwaeyaei ese aetiwaeyaei rhag pwe epwan aetiwa iyo we efangeto ngaang.”

Iyo Ese Appaniuwaenigirh Iiy Rhoaniuwarh

(Luke 9.49-50)

³⁸ John a aengaeni pwe, “Sinsei, aeiweri erhai mwaaen a oatowuw aniu aenneew faaen itoamw, nge aeiya aengaeni pwe epwe iug noa, pwe iiy saapw rhoaniuwarh.”

³⁹ Jesus a aengaeniir pwe, “Oawsoapw aiugiu noa mwaaen na, pwe esoar erhai ne epwe feeori eew manaman faaen itaei, nge epwe sor sefaaen nge aepesa eew min aenneew faaen itaei.

⁴⁰ Pwe iyo ese appaniuwaenigirh nge iiy rhoaniuwarh.

⁴¹ Ennetaen, ipwe aengaenigaemi pwe iyo e aiuniu gaemi rhaan pwe iga aaemi naeyi, iiy epwe yo ngaeni minna paniuwaenin.”

Sessoaton Monofit

(Mat 18.6-9; Luke 17.1-2)

⁴² “Aere erhai efeeori pwe erhai maan mwittig kaan epwe maniuwegini noa aan niugiuniug reei, nge efaer gacch pwe epwe geegeeotae efai faai faaen iiuwan nge a noa aekkaerh noa nee metaw. ⁴³ Aere poawumw efeeori pwe epwe ppiung noa oamw niugiuniug, gopiy noa! Efaer gacch oamw wopwe pai efoarh nge wotonong noan menaw na esoar iyaenin,

mmwaen oamw wopwe pai riiufoarh nge wonoa noan ni-fierno, noan aengaet we ese mmwenen gunnoa.

⁴⁴ [Igiwe mwussoa kkewe egaen worheer nge rese mmwenen maenao, nge aengaet na egaen figiir ese mmwenen gunnoa.]*

⁴⁵ Aere pirhemw efeeri pwe epwe ppiung noa oamw niugiuniug, gopiy noa. Efaer gacch oamw wopwe pirhe efoarh nge wotonong noan menaw na esooar iyaenin, mmwaen oamw wopwe pirhe riiufoarh nge ra aerheog nong noan nifierno.

⁴⁶ [Igiwe mwussoa kkewe egaen worheer nge rese mmwenen maenao, nge aengaet na egaen figiir ese mmwenen gunnoa.]

⁴⁷ Aere mesoamw efeeri pwe epwe ppiung noa oamw niugiuniug, oannusuwow! Efaer gacch oamw wopwe toonong noan minna Mweoiun Deus reen oamw maseyefai, mmwaen oamw wopwe maseriufai nge ra aerheog nong noan nifierno.

⁴⁸ Igiwe mwussoa kkewe egaen worheer nge rese mmwenen maenao, nge aengaet na egaen figiir ese mmwenen gunnoa.

⁴⁹ “Aeremas towunap repwene nimegacch noa reen aengaet, taeppen eew oasoar e nimegacch noa reen aesiig.

⁵⁰ “Aesiig egacch; nge igine epwe rhiuw noa saetiin, nge epwe mmwen sipwe aesaeti sefaaeniy?

“Oayora aesigaen aerhaengerhaeng nee finaemi, nge oawno rhag noan oapoas ngaeni erhai me erhai aaemi.”

10

Jesus e Fenaiuw Mweoimweoyiun Appwiuniupai (Mat 19.1-12; Luke 16.18)

¹ Iwe Jesus a siusaengi igiwe nge a noa noan faniuwaen Judea iwe nge a saei noa wooan rhan pwupwu we Jordan. Aeremas towunap ra pwan mweoiuto reen, nge iya fenaiiur taeppen rhag minna e fasiun gaen feeri.

² Aemweoi Pharisees ra itto reen pwe repwe soatoni, nge ra aeineow pwe, “Aengaenigemaem, egacch me noan aarh anniug pwe erhai mwaaen epwe mweoi saengi pwiuniuwan?”

³ Nge Jesus a paniuwaeniir ngaeni pwan eew aeyeg pwe, “Meeta taeppen anniug Moses a ngaennegaemi?”

⁴ Ra paniuwaeni pwe, “Moses esaeneti ngaeni erhai mwaaen pwe epwe foatogi pwapwioron mweoinoa, iwe a nigiti noa pwiuniuwan.”

* **9:44** Petenan eei nge esoano noan aekkaew petenan kka efoatofaat noan kkepessaen Greek.

⁵ Jesus a aengaeniir pwe, “Moses e foatogi anniug een faaen itaen aaemi se rongorong ngaeni aan fenai.

⁶ Pwe saengi rhag rhaepetaen feoriun feoniufan, ‘Deus a feoriir mwaaen me rhoopwut,’ taeppen rhag miniwe Pwapwior we e Santus e iura.

⁷ Ieei minne erhai mwaaen epwe nigitiir noa seman me inan nge a noa rhuu ngaeni pwiuniuwan,

⁸ nge iir me riiurhai repwene eew rhag. Ina minne iir resoapw rhiuwen riiurhai no, pwe ra erhai rhag.

⁹ Esooar erhai aeremas ne epwe mweoiti fesaenngiy meeta e Deus a oarhuw fengaenniy.”

¹⁰ Igiwe ra teeo sefaaen nong noan iimw we, rhoaan kkayeo kkewe ra aeiineow Jesus faaen kkepas kkewe.

¹¹ Iwe a aengaeniir pwe, “Erhai mwaaen e mweoi saengi pwiuniuwan, nge a noa pwiuniuwaeni pwan erhai rhoopwut, iya monofit ngaeni pwiuniuwan.

¹² Epwan aeffitaeg rhag aere erhai rhoopwut e mweoiti aan appwiuniupai nge a noa pwan pwiuniuwaeni pwan erhai mwaaen, iya monofit ngaeni mwaaen we pwiuniuwan.”

Jesus a Maeipinaar Wonigaet
(Mat 19.13-15; Luke 18.15-17)

¹³ Aaemweoi aeremas ra pwigito naiiur wonigaet reen Jesus pwe epwe iseni tae paiun woar, nge rhoaan kkayeo kkewe ra soong ngaeniir.

¹⁴ Igiwe Jesus a weri meeta we ra feori, a igin soong iwe a aengaeniir pwe, “Fangeto aetekkena reei, nge oawsoapw aiugiur, pwe minna Mweoiun Deus ina aar aeremas kka reweer wonigaet.

¹⁵ Ennetaen, ipwe aengaenigaemi, pwe iyo na ese aetiwa Mweoiun Deus taeppen erhai wonigaet, nge esoapw mmwennen toonong noan.”

¹⁶ Iwe a roamito aetekewe noan paiun, a iseni tae paiun woan erhai me erhai iir, nge a maeipinaar.

Erhai Mwaaen Naiwiis
(Mat 19.16-30; Luke 18.18-30)

¹⁷ Igiwe Jesus a pwan rhaepiy aan faaeraeg, erhai mwaaen a fattapweto reen, a foatotiwi me mmwan nge a tingoareei pwe, “Sinsei mwamwaai, meeta ipwe feori nge epwe yo ngaeniaei menaw na esooar iaenin?”

¹⁸ Jesus a aengaeni pwe, “Meeta wo iura pwe i mwamwaai reen? Esooar erhai ne e mwamwaai pwe aeggaen Deus rhag.

¹⁹ Wogiuneei anniug kkewe: ‘Wosoapw nni aeremas, wosoapw ffeor manetemwaai, wosoapw mwoarho, wosoapw oatupwutupw tae kkepas woan erhai, wosoapw riugiuriug, wopwe aesirowuur semoamw me inoamw.”’

²⁰ Mwaaen we a iura pwe, “Sinsei, saengi rhag nee nipwaen wonigaetei nge ngaang i tapweei oanongaen anniug kkeei.”

²¹ Jesus a aenneta wenewenei noan aerhaengerhaeng nge a aengaeni pwe, “Eew rhag minne wopwe feeri. Wonoa ameow noa oanongaen meeta oamw nge wa fang senaapian ngaeniir rhooa affayeo, nge epwe yor wiinoamw me wooan naaeng. Iwe nge wa itto tapweaei.”

²² Igiwe mwaaen we erongorong kkepas kkewe, a mas affayeo noa, iwe a siunoa noan aan tip aenneew, pwe igiwe iiy erhai man naiwiis.

²³ Jesus a wegitaeg fetaen neeiir rhoan kkayeo kkewe naiun nge a aengaeniir pwe, “Epwe ifa mwo waeiraesin aar rhoakka re pisaegisaeg repwe toonong noan Mweoiun Deus.”

²⁴ Rhoan kkayeo kkewe ra riutae reen kkepas kkewe, nge Jesus a soapwei noa aan iura pwe, “Aaemi naeyi, epwe ifa mwo waeiraesin toonongon noan Mweoiun Deus!

²⁵ Egin mererhaeg aen erhai *camel* epwe toonong noan ngetaen efoarh oaguwa, me mmwaen aen erhai mwaaen pisaegisaeg epwe toonong noan minna Mweoiun Deus.”

²⁶ Reen minneen nge rhoan kkayeo kkewe ra igin riutae reen iwe ra aeiineo fengaen wooar pwe, “Iwe, iyo rhag epwe mmwenen menaw?”

²⁷ Jesus a fan wenewen ngaeniir nge a paniuwaeniir pwe, “Minneen nge ese mmwen ngaeniir aeremas nge emmwen ngaeni Deus; pwe oanongaen meeta nge emmwen ngaeni.”

²⁸ Peter a kkepas tae pwe, “Pipiiy, aemaem aeiya siusaengi oanongaen aegiaeg nge aeiya itto tapweog.”

²⁹ Jesus a aengaeniir pwe, “Ennetaen, ipwe aengaenigaemi pwe iyo esiusaengi imwan, aere pwiin, aere mwengeyan, aere inan, aere seman, aere naiun, aere faniuwana faaen itaei me Kkepas Mwamwaai we,

³⁰ nge epwe pwiigi faeregitiin reen oate igina. Epwe pwiigi meoniun epwe temoag saengi epwiugiun imwan, pwiin, mwengeyan, inan, naiun me faniuwana, pwan niniy aenneewa; nge noan oatona epwe itto epwe pwan pwiigi menaw na esooar iaenin.

³¹ Pwe towuneppeer rhoawe re amwirimwir repwene gommw, nge towuneppeer rhoawe regommw repwene amwirimwir.”

Aeinuwaen Aaen Jesus Aepesa Aan Maenoa
(*Mat 20.17-19; Luke 18.31-34*)

³² Jesus me rhoan kkayeo kkewe naiun ra faaeraeg wooan aan we enoa ngaeni Jerusalem. Jesus a gommwonoa memmweer rhoan kkayeo kkewe, iwe nge iir ra riutae; nge ikkiwe re tapweto mwirin nge ra mesag. Jesus a pwan paeniir

rhoawe seig me riiurhai rhoaan kkayeo nge a aengaeniir wunuunun meeta kka epwene wen ngaeni.

³³ A aengaeniir pwe, “Oaw aiussaening, sipwene faaeraeg tae Jerusalem nge mwaaen we Naiun Aeremas epwene noa yonong neepaiiur soamwoonin patere kkewe me sinsein anniug kkewe. Repwene apwiungiu pwe epwe maenoa, nge ra fangenoa nee paiiur Gentiles,

³⁴ nge repwene aeni aegekkaei nge reoattuffa, repwe wirhiy nge reniiy noa; nge mwirin enuuw raaen nge epwe menaw sefaaen tae.”

*Aar James me John Tingoar
(Mat 20.20-28)*

³⁵ Iwe James me John, naiun Zebedee, ra itto reen Jesus. Ra aengaeni pwe, “Sinsei, eyor meeta aei mwerhaen wopwe feori ngaenigemaem.”

³⁶ Jesus a aeiineeor pwe, “Meeta naan?”

³⁷ Ra paniuwaeni pwe, “Oate wa mooat wooan chia na oamw noan minna Mweoiumw, aetipaeni pwe wopwe oamooatagamaem oaromw, erhai peig mwaaenemw, nge erhai peig rhoapwutomw.”

³⁸ Nge Jesus a aengaeniir pwe, “Aaemi oawse giuneei meeta mwu oawwa tingoar. Oawmmwenen iun me reen kkepaen aewwaeiraes e ngaang ipwe iuniumi? Emmwen oawpwe paptismus noan taeppen paptismus e ngaang ipwe aeni?”

³⁹ Iir ra paniuwaeni pwe, “Ooa, emmwen ngaenigemaem.”

Jesus a aengaeniir pwe, “Oawmmwenen iun me reen kkap e ngaang ipwe iuniumi, me oawpwan mmwenen paptismus taeppen aaei paptismus.

⁴⁰ Nge saapw ngaang minne ipwe finitae iyo epwe mooat peig mwaaeneei me peig rhoapwutoi. Nenyi kkeei nge nenieer rhoakkena minna Semaei a fasiun feori pwe nenieer.”

⁴¹ Igiwe rhoaan kkayeo kkewe seig ra rongorong kkepas kkewe, ra igin soong wooar James me John.

⁴² Iwe Jesus a faingi fengaenniir nge a aengaeniir pwe, “Oaw giuneei pwe rhoakka refeeoriir pwe re nemaeniir re Gentiles ina eyor maemaeweer wooar aeremas, iwe nge iir soamwoon kaan ina re nemaeniir noa oanongeer aeremas.

⁴³ Nge esoapw ieei wunuunun nee finaemi. Pwe iyo a mwerhaen taegias me neeimi, iiy epwe no pwe rhoaan engaang ngaenigaemi oanongaemi;

⁴⁴ nge iyo a mwerhaen pwe epwe gommw me neeimi, iiy epwe *slave* ngaenigaemi oanongaemi.

⁴⁵ Pwe miniwe Naiun Aeremas mwo nge ese itto pwe aeremas repwe engaang ngaeni, pwe efaer itto pwe epwe

engaang ngaeniir aeremas me fangenoa menewan faaen iteer towunepaen aeremas.”

Jesus e Aeffeta Noa Mesaen Bartimaeus
(*Mat 20.29-34; Luke 18.35-43*)

⁴⁶ Ra toori Jericho, nge Jesus me rhoan kkayeo kkewe naiun me mwirhaen aeremas kkewe ra mwet saengi igiwe, nge erhai mwaaen parh mesan itan Bartimaeus naiun Timaeus, emooat wenepeigin aan pwe etingoar noa rhag aemmwenen.

⁴⁷ Igiwe a rongorong pwe Jesus re Nazareth we a itto, a rhaepetae ne iyaekkepwas, “Jesus, Naiun David, faaye-owaei!”

⁴⁸ Towunepaer aeremas kkewe ra soong ngaeni nge ra aengaeni pwe epwe anniug noa. Nge egius mwo nge oatomoga noa aan iyaekkepwas, “Naiun David, faayeowaei!”

⁴⁹ Jesus a iug noa nge a iura pwe, “Oaw faingito.”

Iwe ra faingi mwaaen we eparh nge ra aengaeni pwe, “Aemenetoag! Iutae pwe Jesus a faingiug.”

⁵⁰ Iwe a pwinititiw mengaagiun niugiun we, a nnustae nge enoa reen Jesus.

⁵¹ Iwe Jesus a aengaeni pwe, “Meeta wo tipaeni ipwe feori ngaeniug?”

Iwe mwaaen we eparh a paniuwaeni pwe, “Sinsei, ngaang i tipaeni ipwe weriwer sefaaen.”

⁵² Jesus a aengaeni pwe, “Wonoa, pwe oamw niugiuniug a aecchipwoag.”

Iwe rhag nge mwaaen we a ffatenoa mesan nge a tapweei noa mwirin Jesus woan aan we.

11

Toonongon Jesus Noan Jerusalem
(*Mat 21.1-11; Luke 19.28-40; John 12.12-19*)

¹ Igiwe ra aerepato Jerusalem, oaron aepinoamw kkewe Bethphage me Bethany, reen rhugun *Olives*. Jesus a fangenoa riurhai rhoan kkayeo kkewe naiun,

² nge a aengaeniir pwe, “Oawnoa noan pwugos mwu mmwaemi. Nge igine oawpwe toonong, nge oawpwe weri erhai *donkey* mwittig e feotaeg ina esaaen yor mwo erhai ne ewaawa. Oawpwaehisi oawwa pwigito igeei.

³ Nge aere eyor ne eaieyegigaemi aere meeta oawfeori minna reen, oaw aengaeni pwe Soamwoon emwerhaen waawa mwo nge ennaen aesefaenito.”

⁴ Iwe ra noa nge ra noa weri erhai *donkey* mwittig eiu woan ennap, nge efeotaeg ngaeni iuraen aesemaen eew iimw. Nge igiwe re pwepwaeisi,

⁵ nge aaemweoi aeremas kkewe reno igiwe ra aeiineeor pwe, “Meeta mwu oawfeeri imwu oawwa pwaeisi noa *donkey* na?”

⁶ Iir ra paniuwaeniir taeppen rhag ititin kkepas kkewe Jesus e aengaeniir, iwe aeremas kkewe ra nigitiir noa.

⁷ Ra pwigito *donkey* we reen Jesus nge ra iseni tae mengaagiur wooan, nge Jesus a teeotae wooan.

⁸ Aeremas towunap kkewe ra mmeraeg tiw mengaagiur wooan aan we, nge aaemweoi ra gopogop tiw paeiniu me wooan aar maat pwe enenaen wooan aan we.

⁹ Aeremas kkewe regommw me rhooawe retapweto mwirin ra aekkepwas, “Aepingepinga Deus! Deus epwe aewenepwuwa aeremas na epwe itto faaen itaen Soamwoon!”

¹⁰ Deus epwe aewenepwuwa minna mweoiun *king* David, na semarh ina epwene itto. Aepingepinga Deus na oarosaen taegias!”

¹¹ Igiwe Jesus a toorito Jerusalem nge a toonong noan *Temple* we, nge a fanefetaen reen oanongaen meeta. Nge pwonno igiwe a mwirin oanowas iwe a noa Bethany iiy me rhooan kkewe seig me riiurhai.

Jesus a Soong Ngaeni Fig we
(*Mat 21.18-19*)

¹² Mmasetaen raaenin we eew, igiwe ra sefaaen to me Bethany, nge Jesus a pecchai.

¹³ A wori noa me itaaw efoarh waniwan we *fig* pwe a pwanipwan noa faaen rheon, iwe a faaeraeg ngaeni pwe epwe pipiiy aere e uwa. Nge igiwe a toori *fig* we, a weri pwe rheon rhag, pwe esaaen toori mwo oaton aan epwe uwa.

¹⁴ Jesus a kkepas ngaeni *fig* we pwe, “Esooar erhai ne epwe rhiuwen mwongo uwoamw.”

Nge rhooan kkayeo kkewe naiun re rongorong minikkewe mwaenian.

Jesus a Noa Reen Temple we
(*Mat 21.12-17; Luke 19.45-48; John 2.13-22*)

¹⁵ Igiwe ra toorito Jerusalem, Jesus a toonong noan *Temple* we nge a rhaepetae aan asiiur wow rhooawe re chuwaai me ameomeo pisaeg me igiwe. A aerheppa noa *table* kkewe aar rhooan ssiuwen senaapiy me nenien mooat kkewe aar rhooan chuwaai *pigeons*,

¹⁶ ese fang ngaeni mwo nge erhai epwe pweipwog fetaen aegiaeg noan *Temple* we.

¹⁷ Iwe a fenaiiur aeremas kkewe pwe: “Efoatfoat noan Pwapwior we e Santus pwe Deus e aepesa pwe, ‘*Temple* e aaei nge epwe ffai pwe imwaen maeipin faaen iteer oanongeer

aeremesaen faniuw.’ Nge asemi oawwa ssiuweniy ngaeni eew nenien wopoor rhooa mwoarho.”

¹⁸ Igiwe soamwoonin patere kkewe me sinsein anniug kkewe ra rongorong kkepas kkewe, a rhaepetae aar giutta meeta repwe niy noa Jesus reen. Nge iir remesagiu, pwe igiwe pwuwaen aeremas kkewe remwaar reen aan fenai.

¹⁹ Igiwe a nee oatofaaef noa, Jesus me rhooran kkayeo kkewe naiun ra siusaengi aepinoamw we.

Fenaiun Aemmetefaen Fig we
(Mat 21.20-22)

²⁰ Nee oatosoraen raaenin we eraaen, igiwe ra faaeraeg noa woan aan we, ra weri *fig* we. A ppwass noa oanongaen waniwan we tooritiw minikkewe waeran.

²¹ Peter a maengiy miniwe a wen iwe a aengaeni Jesus pwe, “Sinsei, pipiiy, *fig* we wosoong ngaeni ina a ppwass noa.”

²² Jesus a paniuwaeniir pwe, “Oawpwe niugiuniug ngaeni Deus.

²³ Ennetaen, ipwe aengaenigaemi pwe aere erhai epwe aengaeni rhug een pwe, ‘Wopwe mwagiut wa noa oatoranoa oanongoamw nee metaw,’ nge ese tip mwaramwar noan pwunnon, pwe eniugiuniug pwe meeta rhag e aepesa pwe epwe wen, ina nge epwe mmwen ngaeni.

²⁴ Ina faan minne ipwe aengaenigaemi pwe: Ngaere oawmaeipin nge oawwa tingoar eew meeta, oawniugiuw pwe oawwa pwigi, ina nge epwe toorigaemi ese tiwegin meeta oawtingoar.

²⁵ Ngaere oawiun maeipin, oawsaeneti oanongaen soong kena asemi woan erhai, pwe ina nge Semaemi woainaaeng epwe pwan saeneti noa oanongaen meeta mini aenneew kka asemi oawpwan feeri.

²⁶ [Ngaere oawse saenetiir noa aemweoi, Semaemi woainaaeng esoapw pwan saeneti noa mini aenneew kena oawpwan feeri.]”*

Kkepas Aeiineon Nemaeniaen Jesus
(Mat 21.23-27; Luke 20.1-8)

²⁷ Iwe ra pwan sefaaen to Jerusalem. Nge igiwe Jesus a faaeraeg fetaen noan *Temple* we, nge soamwoonin patere me sinsein anniug me mwaaen kkewe aar ra itto reen

²⁸ nge ra aeiineow pwe, “Meeta nemaenioamw pwe wopwe feeri minikkei? Iyo a ngaenneog oamw nemenem?”

* **11:26** Petenan eei nge esoano noan aekkaew petenan kka efoatofaat noan kkepessaen Greek.

²⁹ Jesus a aengaeniir pwe, “Ngaang ipwe aeiineogaemi eew kkepas aeiineo, nge aere oawpwe aengaeniaei paniuwaen, ngaang ipwe pwan aengaenigaemi iya iga i pwiigi aaei nemenem me ee pwe ipwe feeri minikkei.

³⁰ Oawaengaeniaei iya eitto aen John nemenem pwe epwe paptismus fetaen: saengi Deus aere saengi aeremas?”

³¹ Ra rhaepetae aar aengimaw fengaen wooar: “Meeta sipwe iura? Aere sipwe iura pwe, ‘Saengi Deus,’ nge iiy epwe aeiineogirh pwe, ‘Nge meeta rhag oawse niugiuniug ngaeni John reen?’

³² Nge aere sipwe iura pwe, ‘Saengi aeremas...’” (Re mesagiiur aeremas, pwe igiwe oanongeer nge re niugiuw pwe John nge ennetaen erhai profeta.)

³³ Iwe ra paniuwaeni Jesus pwe, “Aeise giuneei.”

Jesus a aengaeniir pwe, “Iwe ngaang isoapw pwan aengaenigaemi iya iga i pwiigi me ee nemaeniaei pwe ipwe feeri minikkei.”

12

Fioangon Awewen Rhoan Aemmwenen Maat we (Mat 21.33-46; Luke 20.9-19)

¹ Iwe Jesus a kkepas ngaeniir noan fioangon awewe: “Eno erhai mwaaen a foatogi eew maetaen *grape*, a feeri gurun niugiun, a genengi eew niipw pwe nenien wongowongin uwaen *grape*, iwe a aiuwtae eew imwaen poos taegias me noan. Mwirin a ngaenneer aaemweoi rhoan maat pwe repwe aefaenniy. Iwe rhag nge a saei taaw noa.

² Nge igiwe a toori oaton gin, a fangenoa erhai rhoan akkiuneo reer rhoan maat kkewe, pwe epwe noa pwiigi wiwiin me reen uwaen maat we.

³ Iwe rhoan maat ra torofi rhoan akkiuneo we, ra wirhiy nge ra aefengafeta noa, esooar meeta epwiigi.

⁴ Mwirin wonowe aan maat we a fangenoa pwan erhai naiun rhoan akkiuneo; iwe rhoan maat kkewe ra wirhiy rhimwen nge ra feeri ngaeni aekkaew wegitaeg aessaew.

⁵ Iwe wonowe a pwan fangenoa erhai rhoan akkiuneo, nge iir ra niiy noa. Nge pwan ina rhag minne refeeori ngaeniir rhoa kkewe aaemweoi, aaemweoi ra wirhiir, aaemweoi ra niir noa.

⁶ Iwe nge a noa notiw erhai, iwe sipegin naiun mwaaen aecchaeng. Oarosan nge a fangenoa mwaaen we sipegin naiun, nge a iura pwe, ‘Iniugiuw, nge repwe aesirowu mwaaen enaeyi.’

⁷ Nge rhoan maat kkewe ra iura fengaenniy wooar pwe, ‘Tei mwaaen we naiun mwaaen we aan maat eei iwe epwe

pwugusaeni minneei. Oawitto sipwe niyy noa, pwe sipwe pwigi minne pwugusaen pwe pwugusarh!.'

⁸ Iwe ra torofi mwaaen we naiun, ra niyy noa nge ra oatorawow niugiun maat we."

⁹ Iwe Jesus a aeineeor pwe, "Meeta mwaaen we aan maat we epwene feori? Epwene itto nge a niir noa rhoowe, nge a ngaenneer aaemweoi maat we.

¹⁰ Oawsaaen aeraegi mwo kkepas e noan Pwapwior we eSantus?

'Fai we rhoaan kiau iimw re aerheei noa, nge faer ina fai we egin yor ipitan me mmwaen oanongan.

¹¹ Minneen nge feoriaen Soamwoon, a inamwo amwaraeran nningen!"

¹² Iwe, rhoowe soamwooniir Jews aetae repwe torofi Jesus, pwe igiwe re giuneei pwe fioangoor miniwe a aengaeniir. Nge ra mesag reer rhooa towunap we iwe ra nigiti Jesus iwe ra noa.

Kkepas Aeiineon Tax

(Mat 22.15-22; Luke 20.20-26)

¹³ Iwe ra fangenoa aaemweoi Pharisees me aaemweoi rhi-naen Erotas, pwe repwe oatupwu Jesus noan aan kkepas.

¹⁴ Iwe, ra itto reen Jesus nge ra aengaeni pwe, "Sinsei, aemaem aei giuneei pwe e wenenen oamw kkepas, nge wose niuwaennei minikka aeremas ra aeni niunniwaen. Wose aefaennyi wunuunun erhai me erhai, nge wa fenaiuw wenenen neetipaen Deus ngaeniir aeremas. Aengaenigemaem, emwamwaa i aarh sipwe fang *tax* ngaeni Soamwoonin Rome, aere aapw? Ifa wusun, sipwe fang *tax* aere aapw?"

¹⁵ Nge Jesus a giuneei wunuunun aar niunniwaen iwe a paniuwaeniir pwe, "Meeta menaen oawpwe soatoniaei reen? Oawpwigito efai senaapiy *silver*, pwe ipwe pipiyy."

¹⁶ Iwe ra pwigito efai senaapiy reen nge a aeineeor pwe, "Mesaen iyo me itaen iyo een?"

Iir ra paniuwaeni pwe, "Soamwoonin Rome."

¹⁷ Iwe Jesus a aengaeniir pwe, "Iwe nge oawngaenneei Soamwoonin Rome meeta aen Soamwoonin Rome, nge oawngaenneei Deus meeta aen Deus."

Iwe ra igin mwaar noa reen.

Kkepas Aeiineon Menaw Sefaaen

(Mat 22.23-33; Luke 20.27-40)

¹⁸ Aaemweoi Sadducees kkewe, iwe re aepesa pwe esoar menaw sefaaen me reen mae, ra itto reen Jesus nge ra aengaeni pwe,

19 “Sinsei, Moses minne e foatogi anniug eei pwe aemaem: ‘Aere erhai mwaaen a mae nge esooar naiun wooan rhoopwut we pwiuniuwan, ina nge mwaaen we pwiin epwe pwiuniuwaeni rhoopwut we pwe epwe yor naiun pwe epwe ffaai pwe naiun mwaaen we a mae.’

20 Reno fusiومان pwipwi. Iwe mwaaen we e tugufaeyi a pwiuniuwaeni erhai rhoopwut, nge a maenoa nge esaen yor naiun.

21 Mwirin iwe ariurhaiun a pwiuniuwaeni rhoopwut we, iwe a pwan maenoa nge ese pwan yor naiun. Ieei rhag taepfen minne epwan wen ngaeni iwe aeiniurhaiun,

22 pwan ina rhag miniwe ewen ngaeniir oanongeer noa: Rhoawe fusiومان re pwiuniuwaeni rhoopwut we nge ra pwan maenoa oanongeer nge esooar naiur wooan niewe. Mwirin noan, nge rhoopwut we a maenoa.

23 Igina, noan raaenin na manimae repwene menaw sefaen, iyo me neeiir epwe pwiuniuwaeni rhoopwut we? Pwe igiwe rhoawe fusiومان nge re pwiuniuwaeni niewe.”

24 Jesus a paniuwaeniir pwe, “Aaemi oaw mwaerhei me igeei! Nge oaw giuneei faaen? Pwe iga oawse giuneei Pwapwior we e Santus aere aaen Deus mamaaw.

25 Pwe oate rhooa mae repwe menaw sefaen, nge repwene aeffitaeg ngaeniir rhag angkenusun naaeng, pwe resoapw pwiuppwiuniuw no.

26 Igina, reen manimae aar repwe menaw sefaen: oawsaaen aeraegi mwo me noan Pwapwior kkewe foatogiaen Moses wunuunun waniwan we eppwunuwow aengaet me noan? Iginaan minne e foatogi me ee aaen Deus aengaeni Moses pwe, ‘Ngaang aaen Abraham Deus, aaen Isaac Deus me aaen Jacob Deus.’

27 Iiy aar Deus rhoawe re menaw, nge saapw aar rhoawe ra maenoa. Aaemi oawwa igin mwaerhei me igeei.”

Anniug we Oarosaen Taegias
(Mat 22.34-40; Luke 10.25-28)

28 Erhai sinsein anniug eno igiwe nge erongorong meeta kkewe reiyaekkespa. Egiuneei pwe egacch paniuwaen kkepas aeineo we aar me reen Jesus, iwe a itto reen pwe epwe aeineow: “Ifa anniug eoarosaen taegias meneiin oanongaen?”

29 Jesus a paniuwaeni pwe, “Ieen minne oarosaen taegias me neeiin, ‘Wopwe aiussaening Israel! Soamwoon na aarh Deus ina iiy rhag minne aarh Soamwoon.

30 Wopwe aerhaengi Soamwoon na oamw Deus reen oanongaen neetipoamw, reen oanongaen ngeoniumw, reen

oanongaen oamw niunniwaen pwan reen oanongaen mae-maewoamw.’

³¹ Nge oaruwowaen anniug epwan igin taegias nge, ‘Wopwe aerhaengiir rhoan wenioaromw taeppen rhag oamw sipegin aerhaengi oanongoamw.’ Esooar eew anniug e e taegias saengi ikka ruwowu.”

³² Sinsein anniug we a aengaeni Jesus pwe, “Emwamwaai, sinsei! Egin nnet meeta mww wa faer aepesa, pwe Soamwoon rhag minne Deus, nge esooar erhai Deus me peig noan.

³³ Nge een wopwe aerhaengi Deus reen oanongaen neetipoamw, reen oanongaen oamw niunniwaennen me oanongaen maemaewoamw, me wopwe pwan aerhaengi rhoan wenioaromw taeppen rhag oamw sipegin aerhaengi oanongoamw. E igin yor ipitan aaen erhai epwe aiussaening firhiy anniug kka ruwowu, mmwaen aan epwe aeni oasoar maan woan antar me mesemesaen oasoar ngaeni Deus.”

³⁴ Jesus emeyaefi gacchiun paniuwaenin kkepas kkewe aan, iwe a aengaeni pwe, “Een wose taaw saengi miniwe Mweoiun Deus.”

Mwirin nge ra mesag repwe rhiuwen kkepas aeiineo ngaeni Jesus.

Kkepas Aeiineon Iyo na Kristus

(Mat 22.41-46; Luke 20.41-44)

³⁵ Igiwe Jesus e fenai noan *Temple* we, a aeiineo eew kkepas, “Epwe ifa wusun nge sinsein anniug kkewe repwe aepesa pwe Kristus nge iiy teoteeon David?”

³⁶ Espritu Santus minne eameyaefi ngaeni David pwe epwe aepesa:

‘Soamwoon a aengaeniaei Soamwoon:

Mooat tiw peig mwaaeneei

toori aaei ipwe iseniir tiw rhoan oapwutoag faaen pirhemw.’

³⁷ David woan oanongan esipegin faingi Kristus pwe iiy ‘Soamwoon’, iwe epwe ifa wusun nge Kristus epwe no pwe teoteeon David?”

Jesus a Atapeonneoggiur Reer Sinsein Anniug Kkewe

(Mat 23.1-36; Luke 20.45-47)

Ekker tipeer aeremas towunap kkewe reaiussaening ngaeni aaen Jesus fenai.

³⁸ Igiwe e fenaiuw ngaeniir pwe, “Oawpwe aefaennigaemi reer sinsein anniug kkewe reaerhaengi aar faaeraeg fe-taen faaen mengaaggiur min enaenaai, nge re aerhaengi aar aeremas repwe aewenimmwaar me aesirowuur me noan imwaen chuwaai,

³⁹ nge re fini rhag neny kkena nenieer rhooa taegias me noan wutteer Jews me pwiuneoi mwamwaai me noan gupwun.

⁴⁰ Re oapwurhaar rhoopwut kka ra mae pwiuniuweer nge ra pirifa saengiir pwuguseer, nge re oangona ngaeni aeremas aar maeipin enaei. Iwe nge aegaeregaeriir ina epwene igin waeiraes!”

Aaen Erhai Rhoopwut Maenigaech
(Luke 21.1-4)

⁴¹ Igiwe Jesus emooat oaron nenien maenigaech we me noan *Temple* we, a pippipiir aeremas kkewe re iseis nong aar maenigaech. Towunepeer aeremas kkewe re naiwiis re iseis nong towunepaen naiiur senaapiy;

⁴² nge erhai rhoopwut mwaenene pwe a mae pwiuniuwan a itto iseis nong riiufai manfaifai, ina epwe aeffitaeg ngaeni oawton efai checcha.

⁴³ Jesus a faingiir rhooran kkayeo kkewe naiun nge a aengaeniir pwe, “Ennetaen, ipwe aengaenigaemi pwe miniwe rhoopwut mwaenene we efang nge etemoag saengi aar oanongeer aeremas towunap kkewe.

⁴⁴ Pwe oanongeer nge reiseni nong nusegin wiineer, nge rhoopwut een inamwo iga eigin affayeo nge a fangenoa oanongaen meeta eno reen—a fangenoa oanongaen minikka epwe menaw wooan.”

13

Jesus e Aepesa Toaroponoan Temple we
(Mat 24.1-2; Luke 21.5-6)

¹ Igiwe Jesus a siusaengi *Temple* we, erhai me neeiir rhooran kkayeo kkewe naiun a iura pwe, “Sinsei, pipiiy nningen faai me iimw kaan!”

² Jesus a paniuwaeni pwe, “Woweri iimw faeregit kaan? Esooar efai faai kaan ne epwe notiw nenien; oanongan noa nge repwene toaropotiiv.”

Affayeo me Aewwaeiraes
(Mat 24.3-14; Luke 21.7-19)

³ Jesus emooat wooan miniwe rhugun *Olives* peiginoan *Temple* we, igiwe Peter, James, John me Andrew renoa reen nge iir noa rhag.

⁴ Ra aeineow pwe, “Aengaenigemaem ineeta minikkeei epwe wen, me aengaenigemaem meeta minne epwe pwaeri noa pwe oaton minikkeei nge epwene wen.”

⁵ Jesus a aengaeniir pwe, “Oawaefaennigaemi, pwe esoapw yor erhai epwe oatupwugaemi.

⁶ Towuneppeer aeremas repwene itto faaen itaei nge repwe aepesa pwe, 'Ngaang iiy!' Iwe nge pwuwaen aeremas repwe tupw noa reer.

⁷ Oawsoapw mesag igine oawrongorong oacchorongon moawun arapeto aere kkepessaen moawun taaw noa. Oanongaen minikkeei nge repwe mmwaen wen, nge saapw reen a arapeto ne soapwonoan.

⁸ Faniuw me faniuw repwe fiow fengaen nge mweoi me mweoi repwe pwan moawun fengaen. Epwe yor fanemwar oanongaen pwiuneoi me naengeta. Minikkaan nge eweei pweoneotaen metaegin erhai rhoopwut iga epwe nainai.

⁹ "Aaemi wooan oanongaemi oawpwe sipegin aefaenni-gaemi. Repwe torofigaemi nge repwigigaemi nong noan nenien apwiung. Repwe wirhigaemi me noan wutteer Jews; oawpwe iutae mmweer soamwoonin anniug me *king* kkewe faaen itaei, pwe oawpwe aengaeniir Kkepas Mwamwaai we.

¹⁰ Nge weni mmwaen epwe tooto minna nee soapwonoan, nge Kkepas Mwamwaai een epwe gommwaen fenai ngaeniir oanongeer aeremesaen feoniufan wunus.

¹¹ Aere ra torofigaemi nge re isenigaemi nong noan nenien apwiung, oawsoapw pireiir reen meeta oawpwe aepesa; pwe oatona epwe noa toori oatonaan, nge oawpwe aepesa meeta na eno reemw. Pwe petenaen kkepas kena oaw aepesa nge saapw mwaeniaemi, pwe eitto me reen Espritu Santus.

¹² Aeremas repwene afangmaei noa pwiir ngaeni maenoa, nge saam repwe pwan feeori taeppen minneen ngaeni nai-iur. Nge naiiur repwene pwan appaniuwaeni semeer me ineer nge re fangenoa iir repwe noa niir noa.

¹³ Oanongeer aeremas nge repwene oapwutaegaemi faaen itaei. Nge iyo e aetemaegin toori nee soapwonoan nge epwe menaw.

Eew Min Aemmesagsag

(Mat 24.15-28; Luke 21.20-24)

¹⁴ "Aaemi oawpwe weri eew Min Oarosaen Aemmesagsag epwe iu eew pwiuneoi saapw fasiun nenien. (Ngaeni rhoaan aeraegraeg: metefaaegini minneen!) Iwe rhoawe reno Judea repwe fattapwetae weei rhug.

¹⁵ Erhai ne eno wooan wungaen iimw, esoapw teotiw noan imwan pwe epwe ittiw pweipwog meeta me ee.

¹⁶ Nge erhai ne eno noan maat, esoapw sefaan ngaeni imwan pwe epwe pweipwog mengaagiun.

¹⁷ Epwe ifa mwo aar affayeo rhoopwut pwoopwo me ikka re nayigit noan oaton naan!

¹⁸ Oawpwe maepin ngaeni Deus pwe minikkeei nge esoapw wen noan oaton patapat.

19 Pwe waeiraesin noan raaenin kkewe epwe faer igin waeiraes saengi me mmwaen ikkiwe rhaepetaen igiwe Deus a feori feoniufan toorito igina. Nge esoapw rhiuwen yor taepfen epwe rhiuwen itto.

20 Pwe Soamwoon a oamworhomworha nepaen raaen; ngaere ese feori, nge esooar ne epwe menaw. Nge pwonno faen iteer rhoowe a finiir tae a oamworhomworhanao nepaen raaen.

21 “Iwe ngaere erhai e aepesa ngaenigaemi pwe, ‘Pipiiy, ieei iiy Kristus!’ aere ‘Pipiiy, inaan iiy!’ oawsoapw niugiuniug ngaeni.

22 Pwe aaemweoi aeremas repwene oatupwutupw pwe iir Kristus, aere erhai profeta, nge repwene feori min amwaraar me manaman, pwe repwe oatupwu rhoowe Deus a finiir tae aere repwe mmwenen feori.

23 Oawpwe aefaennigaemi! Ngaang iya pwaeri ngaenigaemi minikkei mmwaen aar repwe wen.

*Itton Mwaaen we Naiun Aeremas
(Mat 24.29-31; Luke 21.25-28)*

24 “Noan raaenin kkewe mwirin oaton waeiraes, aenet epwene rorhonoa, meram esoapw rhiuwen ttin,

25 nge fiu repwene ppiungiutiw me noan naaeng, nge minikkiwe maemaewaen noan naaeng repwene mwagiut saengi nenieer.

26 Iwe nge miniwe Naiun Aeremas epwene pwaeto me neeiin toapw reen maemaewan me nningen.

27 Epwene fangenoa angkenus reen oanongaen pwaeisiisin faenaengiy pwe repwe ioni fengaenny rhoowe Deus a finiir me reen esoapw feoniufan toori esoapw.

*Fenaiun Waniwan e Fig
(Mat 24.32-35; Luke 21.29-33)*

28 “Oawkapwiung saengi waniwan e *fig*. Oate minikkenaaen ra arawaraw me mehecchoar noa nge a pwiugiuw wow rheon, oawwa giuneei pwe a arapeto neraeg.

29 Epwan taepfen rhag, igine oawweri minikkei pwe a wen, oawpwene giuneei pwe oatowe ina a arapeto, oamoanatae pwe epwene rhaep.

30 Ennetaen, ipwe aengaenigaemi pwe oanongaen minikkei nge epwe wen wenimmwaen iga aeremesaen igina repwe maenoa.

31 Naaeng me soanop repwe soapwonoa, nge aaei kkepas esoapw soapwonoa.

*Esooar Erhai e Giuneei Raaenin Aere Awa
(Mat 24.36-44)*

³² “Esooar erhai egiuneei raaenin aere awa na epwe wen minikkeei reen, angkenusun naaeng mwo nge resoapw giuneei, aere miniwe Naiun, pwe aaen Saam rhag.

³³ Oaw mmas nge atapeonneogiugaemi, pwe oawse giuneei ineet oatona epwe itto noan.

³⁴ Epwe taeppen rhag aaen erhai mwaaen saei saengi pwugusan nge a siusaengi naiun rhoon engaang pwe repwe nemaeni oanongaen, mwirin a fang ngaeni erhai me erhai aan engaang, nge a anneogiu ngaeni poosun asam we pwe epwe pippipiir.

³⁵ Iwe ina minne oawpwe atapeonneogiugaemi reen, pwe oawse giuneei ineet mwaaen we imwan epwe war, aere epwe war nee oatofaaef, aere nugaenipwoong, aere weni mmwaei raaen, aere nee oatosor.

³⁶ Aere epwe mwetekkaein itto, ese gacch aan epwe werigaemi pwe oaw maiur.

³⁷ Meeta iya aengaenigaemi, iya pwan aengaeniir oanongeer: Oaw atapeonneogiugaemi.”

14

Aar Rhiu Aenneewa Jesus

(*Mat 26.1-5; Luke 22.1-2; John 11.45-53*)

¹ Igina nge a no rhag ruwowu raaen mmwaaen miniwe gupwunon *Passover* me gupwunon fenoawa we esooar *yeast* reen. Nge soamwooniir patere me sinsein anniug kkewe ra pwiungiuw noan mwoanomwoan wunuunun aar repwe torofi Jesus, pwe repwe noa niy noa.

² Ra iura pwe, “Sisoapw feeri minneei oaton gupwunon *Passover* pwe aeremas rete aefitigoo tae.”

Rhooapwut we eAepiti Jesus

(*Mat 26.6-13; John 12.1-8*)

³ Jesus eno noan Bethany noan imwaaen Simon, erhai mwaaen kaenepaai mwo igiwe. Oaton we Jesus a mwongo, erhai rhooapwut a toonong faaen eew neo effeoor saengi *alabaster* nge e oawut ngaeni neoningas eigin cchoaw paniuwan effeoor saengi eew irae itan *nard*. Rhooapwut we a ripiy neo we iwe a aeniatiw wooan rhimwen Jesus.

⁴ Aaemweoi aeremas kkewe reer ra soong iwe ra kkepas fengaen nee fineer, “Meeta ipitan aan oasonopa noa neoningas naan?”

⁵ Aere efaer chuwaiuw noa nge epwe nigiti eniupwiugiuw senaapiy we *silver* nge ra ngaenneer man affayeol!” Iwe iir ra igin aepesa aenneewa rhooapwut we.

⁶ Nge Jesus a aengaeniir pwe, “Oawsiusaengi rhoopwut na! Meeta oawamwagiutiu reen? Egin mwamwaai minne a feeori ngaeniaei.

⁷ Pwe rhooa affayeo repwe fasiun yor reemi oanongaen oat, nge oatona rhag oawtipaeni oawpwe tipaengiir iwe oawwa feeori. Nge ngaang isoapw no rhag reemi oanongaen oat.

⁸ A feeori iugiugiun meeta a mmwen ngaeni; a aeniatiw neo we wooan oanongaeni pwe epwe oamoann ngaeni oaton aaei nipwaenipw.

⁹ Ennetaen, ipwe aengaenigaemi pwe ese tiwegin iga repwe fenaiuw Kkepas Mwamwaai een me ee, nge minne nieei a feeori nge aeremas repwene fioangei pwe aemaengi-maengin faaen itan.”

Judas a Tipaeni Epwe Fangenoa Tinnimaen Jesus
(Mat 26.14-16; Luke 22.3-6)

¹⁰ Iwe Judas Iscariot, erhai me neeiir rhoaan kkayeo kkewe seig me riiurhai, a noa reer soamwoonin patere kkewe faaen itaen aan epwene fangenoa tinnimaen Jesus.

¹¹ Ra igin kker reen meeta we a aengaeniir, nge ra ppwon ngaeni pwe repwe ngaenneei naiun senaapiy. Iwe Judas a gutta eew oaton ne egacch pwe epwe fang ngaeniir Jesus.

Jesus eMwongo Mwongoon Passover we me Rhoaan Kkayeo Kkewe Naiun
(Mat 26.17-25; Luke 22.7-14, 21-23; John 13.21-30)

¹² Noan aeyewaen raaenin gupwunon fenoawa we esoar *Yeast* reen, noan raaenin we ra niir noa *lamb*s kkewe pwe mwongoon *Passover* we, rhoaan kkayeo kkewe naiun ra aeineow pwe, “Iya iga wo mwerhaen pwe aeipwe noa oamoannatae mwongoon *Passover* me ee?”

¹³ Iwe Jesus a fangenoa riiurhai me neeiir rhoaan kkayeo kkewe naiun nge a aengaeniir pwe, “Oawpwe noa noan aepinoamw na, nge oawpwe rhuungi erhai mwaaen epwigi eew ruumen rhaan. Oawwa tapweei noa

¹⁴ noan iimw na epwe noa toonong noan, nge oawwa aengaeni mwaaen na imwan iimw naan pwe: ‘Sinsei eiura pwe: Ifa sengkin na rhoaan kkayeo kena naeyi me ngaang aeipwe mwongoon *Passover* me ee?’

¹⁵ Ina epwene pwaeri ngaenigaemi eew sengkin faeregiti ina wooan tae, ina a fasiun moannotae noan, nge ina igina oawpwene noa oamoannatae me ee.”

¹⁶ Iwe rhoaan kkayeo kkewe ra noa noan aepinoamw we, ra noa weri oanongaen meeta we Jesus e aengaeniir; iwe ra oamoannatae mwongoon *Passover* we.

17 Igiwe a pwoongtiw, Jesus me rhooran kkayeo kkewe seig me riiurhai ra itto. 18 Igiwe remooat reen *table* we pwe remwongo, Jesus a iura pwe, “Ennetaen, ipwe aengaenigaemi, erhai me neeimi epwene fangenoa tinnimaei, mwaaen naan nge etapweaei reen mwongo igina.”

19 Rhooran kkayeo kkewe a aenneew noa neetipeer reen kkepas kkewe, nge erhai me erhai a rhaepetae aan aeineo ngaeni Jesus, “Saapw ngaang?”

20 Jesus a paniuwaeniir pwe, “Epwe erhai me neeimi rhoamwu seig me riiurhai, iiy etapweaei reen rhirinong anan fenoawa noan saepiy een.

21 Minna Naiun Aeremas epwe maenoa taeppen rhag meeta we Pwapwior we e Santus e aepesa; nge epwe ifa mwo aenneewaen mwaaen na iiy eafangmaei noa mwaaen we Naiun Aeremas! Egacch rhag igine rese nainitiw mwaaen een!”

Aaen Soamwoon Mwongoon Faaef

(*Mat 26.26-30; Luke 22.14-20; 1 Cor 11.23-25*)

22 Igiwe re rhiuwen mwongo, Jesus a pwigi fenoawa we, a fang aan maeipinen aerhigerhig, iwe a giniiy nge a ngaenneer rhooran kkayeo kkewe naiun nge a iura pwe, “Oaw pwigi, pwe ieen minne oanongaei.”

23 Mwirin a pwigi eew kkap, a fang aan maeipinen aerhigerhig, nge a fang ngaeniir; iwe oanongeer ra iun me reen.

24 Jesus a aepesa pwe, “Ieen minne cchaei epwe nipinoa pwe faaen iteer towuneppeer aeremas, minne cchaei epwene no pwe tiweginin ppwon we aaen Deus ngaenigaemi.

25 Ennetaen, ipwe aengaenigaemi, pwe isoapw rhiuwen iuniumi *wine* een toori raaenin na ipwe iuniumi *wine* na effeo me noan minna Mweoiun Deus.”

26 Mwirin ra aeni erheo keoniun aerhigerhig, nge ra toowow ngaeni miniwe rhugun *Olives*.

Jesus e Aepesa Aaen Peter Iura pwe Ese Giuneei

(*Mat 26.31-35; Luke 22.31-34; John 13.36-38*)

27 Jesus a aengaeniir pwe, “Oanongaemi nge oawpwe nigitiaei noa, pwe Pwapwior we e Santus e aepesa pwe, ‘Deus epwe niy noa rhooran neginegin *sheep* we, nge *sheep* kkewe repwene toaropas fetaen.’

28 Nge mwirin aaei menaw sefaaen, ipwe gommwonoa Galilee me mmwaemi.”

29 Peter a paniuwaeni pwe, “Ngaang isoapw nigitiug noa, inamwo me oanongeer nge re nigitiug noa!”

30 Jesus a aengaeni Peter pwe, “Ennetaen, ipwe aengaeniug, pwe nee pwongiy mmwaen aaen maniug we epwe keokkeok

faaen ruwowu, nge epwe faaen enuuw oamw iura pwe wose giuneaei.”

³¹ Peter a egius mwo nge e aengimaaw ngaeni, “Esooar faaen eew ipwe aepesa minna, inamwo aere ipwe tapweog reen maenoal!”

Nge oanongeer a pwan ina rhag meeta re iura.

Jesus e Maeipin Noan Gethsemane

(*Mat 26.36-46; Luke 22.39-46*)

³² Iwe ra itto reen eew pwiuneoi itan Gethsemane, nge Jesus a aengaeniir rhoan kkayeo kkewe naiun pwe, “Oawmooat igei iga ngaang ipwe maeipin.”

³³ A paeniir noa Peter, James me John. Waeiraes me nee tip choaw a itto reen,

³⁴ nge a aengaeniir pwe, “Waeiraesin noan minne neetipaei egin temoag, arapakkaan rhag epwe niaei noa. Oawno igei nge oawwa mmas.”

³⁵ A sooar mwet saengiir egius, a oatoratiw nee ppweon nge a maeipin, aere emmwen pwe esoapw toonong noan oaton waeiraes.

³⁶ Iwe a maeipin, “Saam, Semaai! Oanongaen meeta nge emmwen ngaeniug. Pwigi saengiaei kkepaen waeiraes een. Nge soapw minna ngaang itipaeni, pwe minna een wotipaeni.”

³⁷ Iwe a sefaaen nge a rhuungiir rhoawe eoniurhai pwe ra maiur. Iwe a aengaeni Peter pwe, “Simon, wa maiur? Ese mmwen mwo nge wopwe mmas noan eew rhag awa?”

³⁸ Oawmmas nge oawwa maeipin pwe oawte ppiungiunong noan sessoat. Ngeon a mwerhaen, nge oanong a apwangapwang.”

³⁹ A pwan sefaaen noa maeipin nge epwan aeni rhag taepen kkepas kkewe e aeni mmwan.

⁴⁰ Iwe a sefaaeniir rhoan kkayeo kkewe nge a pwan giuneer pwe ra pwan maiur; pwe ra igin choaw. Nge rese giuneei meeta repwe aengaeni.

⁴¹ Enoa aeinuwaen aan sefaaeneto, a aengaeniir pwe, “Oawrhiuwen maiur me aseoseo? A gacch nepan! Awa we ina a tooto! Pipiiy, miniwe Naiun Aeremas ina repwene fangenoa nee paiiur rhoa monofit.

⁴² Oawrhimwitae, oaw sia noa. Pipiiy, ieei iiy mwaaen we e fangenoa menewaei!”

Aar Torofi Jesus

(*Mat 26.47-56; Luke 22.47-53; John 18.3-12*)

⁴³ Jesus erhiuwen kekkepas, nge Judas iwe erhai me neeiir rhoawe seig me riiurhai a war. Pwuwaen aeremas kkewe retapweei faaen naiiur saeitani me soapwon irae. Nge

re itto faaen iteer soamwoonin patere me sinsein anniug me mwaaen kkewe aar.

⁴⁴ Rhooan afangmaei noa we a fang aeginn ngaeniir pwuwa we: “Mwaaen na ipwe faeisongei ina mwaaen na oawtipaeni. Oawtorofi nge oawwa paeninoa nge oawwa posuw.”

⁴⁵ Igiwe rhag Judas a tooto, a faaeraeg wenewen ngaeni Jesus nge a aengaeni pwe, “Sinsei!”, nge a faeisongei.

⁴⁶ Iwe ra torofi Jesus nge ra ammwarihu neogiuw.

⁴⁷ Nge erhai me neeiir rhoowe reiu a waeitiwow naiun saeitan, nge a fena rhoan akkiuneo we naiun Soamwoonin Patere iwe gopiy noa eew saeningan.

⁴⁸ Jesus a kkepas tae nge a aengaeniir pwe, “Meeta oawnoa itto faaen naimi saeitan me soapwon irae pwe oawpwe torofiaei, pwe iga aetae ngaang erhai man mwoarho?”

⁴⁹ Raaen me raaen nge ngaang ino reemi i fenai noan *Temple* we, nge aaemi oawse torofiaei. Nge ina nigiti pwe meeta we e foatofaat noan Pwapwior we e Santus epwe nnet noa.”

⁵⁰ Iwe rhag nge oanongeer rhoan kkayeo kkewe naiun ra siusaengi nge ra fattapw noa.

⁵¹ Erhai anian e memmengaag eew mini mmis, e tettaapw noa mwirin Jesus. Igiwe ra menaen pwe repwe torofi,

⁵² a fattapw noa woan aan esooar mengaagiun, pwe a siusaengi tiw.

Jesus me Weni Mmweer Soaw Kapwiung Kkewe

(Mat 26.57-68; Luke 22.54-55, 63-71; John 18.13-14, 19-24)

⁵³ Iwe ra paeninoa Jesus noan imwaen Soamwoonin Patere we. Iwe soamwoonin patere kkewe, me mwaaen kkewe aar me sinsein anniug ra mwiirh fengaen.

⁵⁴ Peter etapweei noa mwirin Jesus me taaw noa nge a noa toonong noan wororaen iimw we imwaen Soamwoonin Patere we. A mooat tiw reer rhoan poos kkewe nge a raengi reen aengaet we.

⁵⁵ Soamwooniir patere me oanongeer rhoan council kkewe re giutta meeta eew teren Jesus, pwe repwe niy noa, nge esooar meeta ne reweri.

⁵⁶ Towunap rhoa oatupwutupw tae kkepas woan Jesus, nge aar kkepessaen oatupwutupw nge ese aeffitaeg fengaen.

⁵⁷ Aaemweoi mwaaen ra iutae nge ra oatupwutupw tae kkepas woan Jesus, nge ra iura pwe,

⁵⁸ “Aemaem aeya rongorong aan aepesa pwe, ‘Ngaang ipwe feree *Temple* eei feorieer aeremas, nge mwirin enuuw raaen ipwe aiusefaaeny tae pwan eew nge soapw feorieer aeremas.”

⁵⁹ Pwan iir mwo nge ese aeffitaeg fengaen mwaenieer.

⁶⁰ Soamwoonin Patere we a iutae memmweer oanongeer nge aeineow Jesus, “Esooar minne wopwe paniuwaeni ngaeni kkepas kka mwaaen kaan ra tipi ngaeniug?”

⁶¹ Nge Jesus a anniug noa rhag nge esooar no eew kkepas ne e iura. Iwe Soamwoonin Patere we a pwan aeineo sefaaeny, “Een minne Kristus, Naiun Deus na Esooar?”

⁶² Jesus a paniuwaeni pwe, “Ooa ngaang. Aaemi oawpwene giuneei Naiun Aeremas epwene mooat mwaaenen firhin iwe e oarosaen Mamaaw nge epwe ittiw me weei naaeng woan toapw.”

⁶³ Iwe Soamwoonin Patere we a fereetiwiw mengaagiun nge a iura pwe, “Meeta sirhiuwen pwigiir to rhoan oatuttur reen?”

⁶⁴ Oawwa sipegin rongorong aan aepesa aenneewa Deus. Meeta aaemi mwerhaen?”

Oanongeer nge ra pwiungiuw pwe: iiy e monofit nge epwe mae noa.

⁶⁵ Aaemweoi me neeiir a rhaepetae aar oattuffa, nge repwaniuw noa mesan nge repeosepa. “Iura iyo epeosepoag!” aar aepesa. Nge poos kkewe ra noa peosepa.

Peter e Aepesa pwe Ese Giuneei Jesus

(Mat 26.69-75; Luke 22.56-62; John 18.15-18, 25-27)

⁶⁶ Peter eno rhag noan wororaen iimw we nge erhai rhoapwut naiun Soamwoonin Patere we rhoan engaang a itto reen.

⁶⁷ Igiwe a weri Peter pwe a raengiy oanongan, a fan wewen ngaeni nge a iura pwe, “Een pwan rhoaniuwaen Jesus rhoan Nazareth we.”

⁶⁸ Nge iiy a iura pwe, “Aapw, ise giuneei aere metefaaegini meeta mwu wo aepesa,” iwe a toowow niugiun. Iwe rhag nge e keokkeok noa maniug we.

⁶⁹ Rhoapwut we rhoan engaang a pwan weri sefaaeny Peter me igiwe nge a pwan aepini ngaeniir rhoawe oaron pwe, “Iiy erhai rhoaniuwaar!”

⁷⁰ Nge Peter a pwan aepesa pwe ese nnet.

Ese ssiunaei noa mwo nge rhoawe oaron ra pwan aengaeni Peter pwe, “Ennet, een pwan erhai rhoaniuwaen mwaaen naan, pwe een pwan erhai re Galilee.”

⁷¹ Nge Peter a iura pwe, “Iya aekkepan pwe ngaang iaepesa minne ennet! Deus epwe apwiungiuwaei aere i oatupwutupw! Ise giuneei mwaaen mwu oawiyaepepa.”

⁷² Iwe rhag nge a keokkeok maniug we oaruwowwan, nge Peter a maengiy meeta we Jesus e aengaeni, “Weni mmwaen epwe keokkeok maniug, nge een wopwe aepesa faaen enuw pwe wose giuneei.” Eppwoar tiw rhag nge esaeng.

15

Jesus me Weni Mmwaen Pilate

(*Mat 27.1-2, 11-14; Luke 23.1-5; John 18.28-38*)

¹ Nee oatosor moawugowug nge soamwooniir patere me mwaaen kkewe aar ra mwiiirh fengaen me sinsein anniug me iir ikkiwe aaemweoi oawuton *Council* we repwiungiuw meeta repwene feeori. Ra geoni Jesus nge ra noa fangenoa reen Pilate.

² Iwe Pilate a aeiineow pwe, “Een minne aar *king* re Jews?” Jesus a paniuwaeni pwe, “Een minimwu wo aepesa.”

³ Soamwooniir patere kkewe ra tipitae woan Jesus towunepaen aegiaeg,

⁴ iwe Pilate a pwan aeiyeigy sefaaeny pwe, “Wosoapw paniuwaeni? Wo rongorong oanongaen kkepessaen oatuttur kka ra tipi ngaeniug!”

⁵ Jesus esa paniuwaeni no, nge Pilate a mwaar noa.

Ra Aettiweginiy Aaen Jesus Mae Noa

(*Mat 27.15-26; Luke 23.13-25; John 18.39–19.16*)

⁶ Oanongaen raeg reen gupwunon *Passover*, Pilate egaen saeneti noa erhai rhoan kanepwus, iyo we aeremas retingoar.

⁷ Noan oaton naan nge eno erhai mwaaen noan kanepwus itan Barabbas, eno neeiir aaemweoi rhoa aenneew iwe resooaw nni aeremas faei oaton moawun.

⁸ Igiwe aeremas towunap ra rhu fengaen, ra tingoar ngaeni Pilate pwe epwe feeori wunuunun minne a fasiun feoffeori,

⁹ iwe Pilate a aeiineeor pwe, “Oawmwerhaen pwe ipwe saeneti ngaenigaemi *kingaen* Jews een?”

¹⁰ Pilate e giuneei pwe soamwooniir patere kkewe minne re fangenoa Jesus reen pwe epwe noa apwiung faaen itaen aar noanowo ngaeni.

¹¹ Nge soamwooniir patere kkewe ra aetemaeginiy ngaeniir aeremas kkewe pwe repwe tingoareei Pilate, pwe epwe saeneti ngaeniir Barabbas.

¹² Iwe Pilate a pwan aeiineo sefaaen ngaeniir pwe, “Nge meeta ipwe feeori ngaeni aeremas e oaw faingi pwe *kingaen* Jews?”

¹³ Ra iyaekkepwas temoag tae, “Kurusuw noa!”

¹⁴ Pilate a pwan aeiineeor pwe, “Meeta taeppen wegitaeg aenneew e a feeori?” Nge iir ra pwan oatomoga aar iyaekkepwas pwe, “Kurusuw noa!”

¹⁵ Pilate etipaeni pwe epwe amwamwaaiuw neetipeer aeremas kkewe, iwe a saeneti ngaeniir Barabbas, nge ra wirhiy Jesus nge a fangenoa pwe repwe noa kurusuw noa.

Sonotaw Kkewe ra Aeni Aegekkaei Jesus
(*Mat 27.27-31; John 19.2-3*)

¹⁶ Sonotaw kkewe ra paeninoa Jesus noan wororaen iimw we imwaen *governor* nge ra faingiir to oanongeer sonotaw kkewe rhoaniuwaar.

¹⁷ Ra aememmengaagiu ngaeni erheo mengaag siungiurhoan, nge ra pwan fiti eew mwaer saengi irae towfanfan iwe ra ngaettae wooan rhimwen.

¹⁸ Iwe ra rhaepetae ne aesirowu: “Sirow woamw, Kingaen Jews!”

¹⁹ Ra wirhiy rhimwen ngaeni efoarh irae, nge ra oattuffa, nge ra foatotiw nge ra aesirowu ngaeni.

²⁰ Igiwe ra moann reen aar aeni aegekkaei, ra pwiniti saengi mengaag siungiurhoan we, nge ra aememmengaagiu ngaeni ikkiwe sipegin mengaagiun. Iwe ra paeninoa pwe repwene noa kurusuw noa.

Ra Kurusuw Noa Jesus

(*Mat 27.32-44; Luke 23.26-43; John 19.17-27*)

²¹ Igiwe re faaeraeg noa wooan aan we, nge ra noa rhuungi erhai mwaaen itan Simon saengi Cyrene, eitto saengi eew soapw pwe epwe toonong noan taeninimw we, nge sonotaw kkewe ra aengimaw ngaeni pwe epwe aiuferu kurus we aen Jesus. (Simon semaen Alexander me Rufus.)

²² Ra paeninoa Jesus reen eew pwiuneoi itan Golgotha, wewen nge “Nenien Peopeoi Rhimw.”

²³ Igaan iga ra itto aiuniu ngaeni Jesus eew *wine* enofit fengaen me aekkaew saefei itan *myrrh*, nge ese mwerhaen iuniumi.

²⁴ Ra kurusuw noa Jesus, nge ra inetiy mengaag kkewe wooar, nge re aekkaerh *dice* wooar ngaere iyo epwe pwiigi ifa.

²⁵ A kiung tiwowu nee oatosor iga re kurusuw noa.

²⁶ Foatofaaton minne ra tipi ngaeni eiura pwe: “Ieei Kingaen Jews.”

²⁷ Repwan kurusuw noa riiurhai rhooa mwoarho oaron Jesus, erhai peig mwaaenen, nge erhai peig rhoopwuton.

²⁸ [Ieei wunuunun pwe epwe pwaenoan miniwe Pwapwior we eSantus eiura pwe, “Refeeori pwe iiy erhai aeremas aenneew.”]*

²⁹ Aeremas kkewe refaeraeg noa me oaron Jesus reiurhiugi rhimweer nge reaepesa aenneewa Jesus, “Aa! Een miniwe wo iura pwe wopwe fereetiwi *Temple* we nge wa aiusefaaeniy tae noan enuuw raaen!

* **15:28** Petenan eei nge esoano noan aekkaew petenan kka efoatofaat noan kkepessaen Greek.

30 Iwe teotiw me wooan kurus na pwe wopwe aemenewoag!”

31 Epwan ina rhag wunuunun soamwoonin patere me sinsein anniuug kkewe re aeni aegekkaei Jesus reen aar aepesa pwe, “A aemenewaar aaemweoi, nge ese mmwenen aemenewa oanongan!”

32 Oawsa pipiiy Kristus een, iwe Kingaen Israel, aan epwe teotiw saengi kurusuna igina, ina nge sipwe niugiuniug ngaeni!”

Nge pwan rhooa kkewe retapweei reen kurus repwan aessaewa Jesus.

Maenoan Jesus

(*Mat 27.45-56; Luke 23.44-49; John 19.28-30*)

33 Saengi nugunupaen oanowas nge oanongaen faniuw we a rorhapiung noa noan enuuw konook.

34 Igiwe a enuuw konook nge Jesus a iyaekkepwas temoag tae pwe, “Eloi, Eloi, lama sabachthani?” faan nge, “Aaei Deus, aaei Deus, meeta wa nigitiaei noa reen?”

35 Aaemweoi aeremas kkewe reiu oaron ra rongorong kkepas kkewe, ra iura pwe, “Oaw rongorong, a faingi Elijah!”

36 Erhai me neeiir a fattapweto reen faaen eew faerewa, a rhirinong noan *wine* emwaenn, nge a iseni tae nee soapwon efoarh irae. A aetitae irae we ngaeni ewaen Jesus nge a iura pwe, “Weti sipwe pipiiy aere Elijah epwe itto ateeotiwei me wooan kurus na!”

37 E apwas temoag noa rhag faaen eew, nge a nurh noa aan ngasangas.

38 Mengaag we etteoraeg noan *Temple* we mwo nge e taeringatiw faaen ruwowu, saengi wooan ittiw faan.

39 Erhai soamwoonin sonotaw eiu mmwaen kurus we eweri wunuunun aaen Jesus maenoa, a iura pwe, “Ennetaen pwe mwaaen een nge Naiun Deus!”

40 Aaemweoi rhoopwut reno igiwe, reoawruruto me itaaw. Neeiir rhoopwut kkewe nge Maria Magdalene, Maria we inaan James me Joseph iwe me pwan Salome.

41 Retapweei Jesus me noan Galilee reen aar tittipaengi. Towuneppeer rhoopwut kkewe retapweeito Jesus me Jerusalem repwan no igiwe.

Paeyinoan Jesus

(*Mat 27.57-61; Luke 23.50-56; John 19.38-42*)

42-43 A faaeraeg ngaeni nee oatofaaef nge Joseph re Arimathea we a tooto. Iiy erhai e regin oawoai me noan *Council* we, iwe ewewweti itton minna Mweoiun Deus. A raaenin Aenimowu miniwe (eew raaen mmwaen raaenin Sabbath),

noan maemaewaen nee tipaen Joseph a itto reen Pilate a itto tingoar miniwe oanongaen Jesus.

⁴⁴ Nge Pilate a riutae igiwe e rongorong pwe Jesus a fasiun maenoa. A tengaeg soamwoonin sonotaw we nge a aeiineow aere a ssiunaei aaen Jesus maenoa.

⁴⁵ Mwirin aan rongorong meeta we sonotaw we e iura reen mmwenen Jesus, Pilate a aengaeni Joseph pwe epwe noa pwigi mini oanongaen Jesus.

⁴⁶ Joseph meoni erheo mengaag pwerh ffeo, a iseni tiw miniwe oanongan Jesus me wooan kurus we nge a tiugiumi ngaeni mengaag we, a oawnanong noan paeyi we ekken wow me neeiin faai. Iwe a oasoagopeniy to efai faai gin temoag reen aesemaen paeyi we.

⁴⁷ Maria Magdalene me Maria we inaen Joseph re pipiiy nge ra giuneei iya re paeiaeni miniwe oanongaen Jesus ee.

16

Aaen Jesus Menaw Sefaaen

(Mat 28.1-8; Luke 24.1-12; John 20.1-10)

¹ Mwirin raaenin Sabbath, nge Maria Magdalene, Maria we inaen James iwe me Salome ra chuwaai neoningas, pwe repwe noa aepiti miniwe oanongaen Jesus.

² Wenimmwaei raaenin Sunday, oatowe aenet epwene teotae, ra noa reen paeyi we.

³⁻⁴ Wooan aar faaeraeg noa, ra kkepas fengaen nee fineer, “Iyo epwe peniy ngaenigirh fai we mesaen paeyi we?” (Egin faeregiti fai we.) Nge renoa fannoi paeyi we, ra giuneei pwe fai we a faer mwagiut saengi aesemaen paeyi we. ⁵ Igiwe ra toonong noan paeyi we, ra weri erhai mwaaen anian emooot peig mwaaenen paeyi we, e memmengaag min pwerhepw-erh, nge ra mesag reen.

⁶ A aengaeniir pwe, “Oawsoapw mesag. Igiuneei pwe oawgiutta Jesus re Nazareth we rekurusuw noa. Esa nono igeei, a menaw sefaaen! Oawpipiiy, igaan igiwe re oawnatiw ee.

⁷ Iwe oawnoa aengaeniir rhoan kkayeo kkewe naiun me pwan Peter: ‘Iiy ina epwene gommw noa Galilee me mmwaemi; iginaan minne oawpwene noa weri me ee, taepen rhag meeta we e aengaenigaemi.’ ”

⁸ Iwe ra toowow nge ra fattapw saengi paeyi we, noan aar mesag me riu. Nge rese aepesa ngaeni mwo nge erhai, pwe ra igin mesag.

Eew Soapwonoan Kkepas Mwamwaai we

Jesus a Pwae Ngaeni Maria Magdalene

(Mat 28.9-10; John 20.11-18)

⁹ [Mwirin aen Jesus menaw sefaaen neeoatosoron raaenin Sunday we, egommwaen pwae ngaeni Maria Magdalene, iwe eotowowuw fusiومان aniu aenneew me reen.

¹⁰ Niewe a noa iwe a noa aengaeniir rhooawe rhinaan. Rhooawe re sessaeng reen aenneewaen nee tipeer;

¹¹ nge igiwe ra rongorong pwe Jesus a menaw sefaaen pwe iui a weri, nge rese niugiuniug ngaeni.

Jesus a Pwae Ngaeniir Riiurhai Rhoaniuwan
(Luke 24.13-35)

¹² Mwirin minnee nge Jesus a pwaenoan pwan eew taepen wegitaeg ngaeniir riiurhai rhooan kkayeo kkewe igiwe re faaeraeg ngaeni aepinoamw we.

¹³ Ra sefaaen nge ra aengaeniir ikkiwe aaemweoi, nge iir rese niugiuniug reer.

Jesus a Pwae Ngaeniir Rhooawe Seig me Erhai
(Mat 28.16-20; Luke 24.36-49; John 20.19-23; Feof 1.6-8)

¹⁴ Oarosan noa nge Jesus a pwae ngaeniir rhooawe seig me erhai igiwe iir remwongo. A songetiir, pwe esooar aar niugiuniug, ra pwan tipoarorh, pwe rese niugiur rhooawe ra weri pwe Jesus a menaw sefaaen.

¹⁵ Iwe a aengaeniir pwe, “Oawnoa wooan oanongaen faniuw oawpwe noa fenaiuw Kkepas Mwamwaai een ngaeniir oanongeer aeremas.

¹⁶ Iyo e niugiuniug nge a paptismus nge epwe menaw, nge iyo ese niugiuniug nge epwe aegaeregaer.

¹⁷ Rhoopakka re niugiuniug repwe fang maemaeweer pwe repwe feeri manaman: repwe asiiur aniu aenneew faaen itaei; nge repwe kkepessaen noa eew me eew faniuw,

¹⁸ ngaere repwe pweipwog sowufaeng aere iun pwoisiun, nge resoapw woas; nge repwe iseni tae paiiur woar rhooa semwaai nge repwe cchipw tae.”

Jesus a Ittae Naaeng
(Luke 24.50-53; Feof 1.9-11)

¹⁹ Mwirin aen Soamwoon Jesus kkepas ngaeniir, a ittae naaeng a ittae mooat peig mwaaenen Deus.

²⁰ Rhooan kkayeo kkewe ra noa fenai wooan oanongaen pwiuneoi, nge Soamwoon e engaang neeiir nge epwaeri noa aar fenai pwe ennet reen oanongaen manaman kkewe ra feeri.]*

Pwan Eew Aigiugiun Kkepas Mwamwaai we

* **16:20** Petenan eei nge esoano noan aekkaew petenan kka efoatofoat noan kkepessaen Greek.

(9a) [Rhoopwut kkewe ra noa reen Peter me rhoawe rhinan ra noa fioangei ngaeniir oanongaen meeta kkewe rerongorong. ^(10a) Mwirin minneei nge Jesus wooan oanongan a fang wow rhoan kkayeo kkewe naiun pwe repwe noa fenai fetaeneei saengi eotiw toori netow kkepas mwamwaai we kkepesaen menaw na esooar ssiaaenin.]†

† **16:10a** Petenaen eei nge esoano noan aekkaew petenan kka efoatofaat noan kkepesaen Greek

Fangkenio We Foatogiaen Luke

Fangkenio we Foatogiaen Luke

¹ Aerhaengerhaeng Theophilus:

Aeremas towunap re oarhorho pwe repwe foatogi kkepesaen meeta kka a wewwen me neeimaem.

² Iir ra foatogi meeta kka e itto ngaeniir me reer rhoakka ra fasiun weri minikkeei me nee rhaepetaen nge ra aepesa iiy kkepas mwamwaai we.

³ Iwe een pwonno iga iya wori firhiy oanongaen minikkeei saengi pweoneotaen, iya niuwaennei pwe epwe mwamwaai pwe ipwe foatogi wunuunun aetettaeniin ngaeniug.

⁴ Iya feeori minneeii pwe een wopwe giuneei gacchiuw minna wenewenen oanongaen meeta kkewe ra kapwiung ngaeniug.

Kkepesaen Wupwutiwen John Baptist

⁵ Noan oatowe Erotos eno pwe *kingaaen* Judea, eno erhai patere itan Zechariah, iiy e tapweei tettaenin patereen Abijah. Itaan rhoopwut na rhoaan ngaenneyan nge Elizabeth; nge iiy epwan itto saengi eew faminiin patere.

⁶ Iir me riirhai nge eigin mwamwaai noan meneweer faaen mesaen Deus nge retapweei gacchiuw oanongaen aeen Soamwoon anniug me akkiuneo.

⁷ Iir esooar naiiur pwe Elizabeth ese mmwennen nainai, nge igina mwo nge ra igin tugufaeyi.

⁸ Eraaen nge Zechariah a itinong feeori aan engang noan *Temple* we, pwe a toori oaton ginigin we aan epwe engang noan raaenin we.

⁹ Noan peigin aeen engang patere, nge iiy minne ra fini pwe epwe fifi oappwongesaen wooan antar. Iwe a toonong noan *Temple* we aeen Soamwoon,

¹⁰ nge rhooa towunap kkewe reno niugiun pwe re maeipin reen oatowe iiy e fifi oappwongas kkewe.

¹¹ Angkenus we naiun Soamwoon a pwae ngaeni, nge eiu peig mwaaenen antar we igiwe oappwongas we eno ee.

¹² Oatowe Zechariah a weri mwaaen we, a riu nge a mesag ta.

¹³ Angkenus we a aengaeni pwe, “Wosoapw mesag, Zechariah! Deus a rongorong oamw maeipin, iwe Elizabeth we reemw epwene naini erhai aetemwaaen. Wopwe aetae ngaeni pwe John.

¹⁴ Epwene ifa mwo oamw wenepwu me pwapwa, iwe me aar aemweoi wenepwu reen aan supwutiw.

¹⁵ John epwene igin taegias me faaen mesaen Deus. Esoapw iun *wine* me aerhi. Saengi rhag aan wupwutiw epwene sseog reen Espritu Santus,

¹⁶ nge iiy epwene pwigiir towuneppeer re Israel ngaeni Soamwoon we aar Deus.

¹⁷ Iiy epwe gommw me weni mmwaei Soamwoon, pwe emamaaw pwe taepfen rhag profeta we Elijah. Epwe aefaaeni fengaenniir saam me naai pwe repwe eew rhag; iiy epwe wegiti sefaaeniir rhooa serong feon ngaeni niunniuwaen mwamwaei; nge epwe oamoannaar tae aeremas weni mmwaei Soamwoon.”

¹⁸ Zechariah a aengaeni angkenus we pwe, “Epwe ifa wusun nge iya giuneei pwe ennet minnee? Ngaang iya tugufaeyi, nge manna pwiuniuwaei nge a pwan tugufaeyi.”

¹⁹ “Ngaang Gabriel,” mwaeniaen angkenus we. “Ngaang iyiu weni mmwaen Deus, iwe iiy minne efang ngaang pwe ipwe pwigito kkepas mwamwaei een reemw.

²⁰ Nge een wose niugiuniug ngaeni mwaeniaei, nge minnee epwe noa pwaetae minna wenewenen noan oaton naan. Iwe nge iga wose niugiuniug, een wsoapw mmwenen kkepas no; wopwene anniug noa rhag toori aan itto iiy raaenin na iya fasiun ppwoneei ngaeniug.”

²¹ Noan oateei nge aeremas re wewweti Zechariah nge ra niunniuwaennei aere meeta a igin itinong pwongiy noan *Temple* we reen.

²² Enoa toowow, nge esa mmwenen kkepas ngaeniir no, nge ra giuneei pwe eyor minne a itinong weri me noan *Temple* we. Igiwe esa mmwenen kkepas no, iwe a taenepom ngaeniir rhag.

²³ Oatowe a moanno noa engaang we aan noan *Temple* we, Zechariah a sefaaen noa nee iimw.

²⁴ Enoa eew oaton nge Elizabeth a pwoopwo nge a no rhag nee iimw noan nimowu meram.

²⁵ “Ennaen igina minne Deus a tipaengiaei,” mwaeniaen niewe. “A arhiuwa saengiaei aessaewaei me neeiir rhoonanap!”

Kkepesaen Wupwutiwen Jesus

²⁶ Noan oawonowuwaen meremaen Elizabeth Deus a fangetiw angkenus we Gabriel noan eew aepinoamwon Galilee itan Nazareth.

²⁷ Eyor eew aan kkepesaen oarong ngaeni erhai rhoopwut a kkefoat ngaeni mwaaen we itan Joseph, iwe itto saengi teo we aan *king* David. Itan nge Maria.

²⁸ Angkenus we a itto reen niewe nge a iura pwe, “Oapoas epwe no reemw! Soamwoon eno reemw nge a aewenepwuwoag.”

²⁹ Maria a gin riutae reen miniwe mwaeniaen angkenus we, nge a niuwaennei meeta faan iiy kkepas kkewe.

³⁰ Angkenus we a aengaeni niewe pwe, “Wosoapw mesag, Maria; pwe Deus minne eigin mwamwaai ngaeniug.

³¹ Wopwene pwoopwo nge wa nainitiw erhai aetemwaaen, nge wa aetae ngaeni pwe Jesus.

³² Epwe igin taegias nge epwe ffai pwe iiy naiun Deus na oarosaen taegias. Soamwoon Deus epwene feeori pwe iiy *king* taeppen rhag David we aan rhaepeto,

³³ nge epwe no pwe *king* reen teo we aaen Jacob oanongaen oat; minna mweoiun ina esooar aigiugiun!”

³⁴ Maria a aengaeni angkenus we pwe, “Ngaang erhai piirgo. Epwe ifa wusun rhag nge a mmwen minnee?”

³⁵ Angkenus we a iura pwe, “Espritu Santus epwene ittiw woamw, nge minna kkaeinen Deus ina oarosaen taegias a no woamw. Nge faaen minnee nge aetena esooar epwene ffai pwe Naiun Deus.

³⁶ Wo maengiy rhag Elizabeth we re pwugusoamw? Iwe reiura pwe esoapw mmwenen nainai no, nge igina nge a wonowu mereman, inamwo iga a igin tugufaeyi.

³⁷ Pwe esooar eew meeta ne Deus esoapw mmwenen feeori.”

³⁸ “Ngaang erhai naiun Soamwoon rhoaan akkiuneo,” aaen Maria iura. “Nigiti pwe epwe wen ngaeniaei petenaen kkepas mwu wa iura.” Iwe angkenus we a siusaengi niewe.

Maria a Noa Emwaeri Elizabeth

³⁹ Ese mmwaei mwo me weni mwirin nge Maria a oamoanatae epwe mwekkaei noa reen eew aepinoamw eno neeiin rhugun Judea.

⁴⁰ A noa reen imwaen Zechariah pwe epwe noa koapwong ngaeni Elizabeth.

⁴¹ Igiwe Elizabeth a rongorong aaen Maria koapwong nge aetewe naiun a mwagiut me noan upwan. Elizabeth a sseog reen Espritu Santus

⁴² iwe a aekkepwas faeregit tae nge a iura pwe, “Een minne wa oarosaen wenepwu me neeiir rhoopwut, nge epwan wenepwu aetena wopwe naini!

⁴³ Meeta ppweoniun aaen min mwamwaai eei aan epwe itto wen ngaeniaei, iye nie inaen soamwoon a itto sengaeriaei?

⁴⁴ Pwe igiwe rhag irongorong oamw koapwong, iwe nge aete noan upwaei a mwagiut reen aaen kker.

⁴⁵ Ifa mwo oamw kker pwe wa niugiuw pwe kkepas we aaen Soamwoon ngaeniug nge epwe nnet noa!”

Aaen Maria Keoniun Aepingeping

46 Maria a iura pwe,
 “Nee tipaei a aepingepinginga Soamwoon;
 47 ngeoniuy apwapwa pwe aegin Deus iiy aaei Rhoan Aeme-
 naw,
 48 pwe iya maengiaei ngaang naiun rhoan akkiuneo man
 sessoan!
 Saengi igina oanongeer aeremas nge repwene faingiaei pwe
 ngaang wenepwu,
 49 pwe reen min mwamwaai kka Deus na oarosaen kkeman a
 feori ngaeniaei.
 Minna itan ina essoar;
 50 saengi eew me eew saer epwaeri aan ffayeo ngaeniir
 rhoan oassoara.
 51 A aeiti noa paiun na ekkeman
 nge e oamwotoraar noa rhoana re namanam taegias noan
 aar niunniuwaen.
 52 A oatoraar tiw *king* kka re mamaaw me wooan nenien
 mooatoor,
 nge e saeregiir tae ikka re sessoan.
 53 A oamwongoor rhoa pecchai ngaeni min mwamwaai,
 nge a aefengaar noa rhoa pisaegisaeg nge esooar oawton
 paiur.
 54-55 Iiy eammwarhiuto rhag ppwon we aan ngaeniir
 rhoawe rhaepetorh,
 nge a itto pwe epwe fang tipaengieer rhoawe re Israel iwe
 naiun rhoan akkiuneo.
 Iiy e maengiy rhag pwe epwe pwaeri ffaayeo we aan ngaeni
 Abraham
 me oanongeer rhoan teowe aan iwe esooar iaenin!”
 56 Epwe enuuw meram aeen Maria no aegini reen Eliza-
 beth nge a sefaaeniti pwugusan.

Wupwutiwen John Baptist

57 Enoa tooto oatowe Elizabeth epwene nainai, nge a time-
 newaegini erhai aetemwaaen.
 58 Rhoan wenioaron me rhoa kkewe repwugusan ra
 rongorong ifa mwo aeen soamwoon mwamwaai ngaeni, iwe
 iir ra maegin tapweei reen aan pwapwa.
 59 Igiwe aetewe a eew *week* aan no, ra itto repwe *circumcise*
 aegini, nge repwene aeitae ngaeni pwe Zechariah, aeiteitaen
 mwaaen we seman.
 60 Nge rhoapwut we inan a iura pwe, “Aapw! Epwe itaeni
 John.”
 61 Nge ra aengaeni niewe pwe, “Aetae esooar re pwugu-
 soamw ne e ina itan!”
 62 Nge iir ra taenepom ngaeni mwaaen we seman, meeta
 e mwerhaen pwe aetewe epwe itaeni.

⁶³ Zechariah a tingoar eew pwapwior nge a foatogitiw pwe, "Itan nge John." Ifa mwo aar riutae rhoowawe!

⁶⁴ Reen oatonaan rhag nge Zechariah a mmwenen kkepas, a rhaepetae aan aepingepinga Deus.

⁶⁵ Rhooan no oaroor ra igin mesag, nge kkepesaen minikkeei a rheeoi noa wooan rhugun aepinoamwon Judea.

⁶⁶ Rhooan rongorong kkepas we ra gaen niunniywaennei nge ra aeiweg pwe, "Meeta aeteei epwene no pwe iiy?" Pwe igiwe epwae noa pwe maemaewaen Soamwoon eno wooan.

Aaen Zechariah Woowo

⁶⁷ Zechariah we semaan John a sseog noa reen Espritu Santus, nge a aepesa wow kkepesaen oarongorong we aaen Deus:

⁶⁸ "Sipwe aepingepinga Soamwoon iwe aaen Israel Deus!

A itto epwe fang tipaengiaen naiun aeremas nge aessaenetaegiir noa.

⁶⁹ A fang ngaenigirh naiurh rhooran aemenaw e igin kkeman, rhooran teowe aaen David iwe naiun rhooran akkiuneo.

⁷⁰ A ppwon ngaeniir profeta kkewe mweoiwe

⁷¹ pwe iiy epwe aemenewaegirh saengiir rhooran kkoapwut ngaenigirh,

saengi maemaeweer rhoakkena reaeni giirh aeffaeioapwut.

⁷² Eiura pwe epwe pwaeri ngaeniir rhoakkena rhaepetorh ffaiyeo

iwe me e maengiy ppwon ssoar we aan.

⁷³⁻⁷⁴ Noan aan aekkepan ngaeni Abraham we rhaepetorh

iyy eppwon pwe epwe aemenewaegirh saengiir rhooran oapwutaegirh,

iwe nge enigiti ngaenigirh pwe sisoapw mesag noan aarh engang ngaeni,

⁷⁵ pwonno giirh sipwe ssoar nge simwamwaa me weni mmwan

noan oanongaen raaenin aarh menaw.

⁷⁶ "Een naeyi, wopwene ffai pwe profeta we naiun Deus na oarosaen taegias.

Een wopwene mmweei Soamwoon wopwene oamoannatae ennepan,

⁷⁷ wopwe aengaeniir naiun aeremas repwene menaw igrine emwus noa monofitiir.

⁷⁸ Naiurh Deus ina e SSEOGIUN FFAYEO nge etip mererhaeg.

Epwe feeori pwe seremaen menaw epwe ttinitiw wooarh

⁷⁹ nge seremaen wooan naaeng epwe ttin noa wooar rhooa no noan rorhappiungiun maenoa,

pwe epwe aetiiti mesaen gupworh noan ennepaen oapoas."

⁸⁰ Iwe a temoag tae aetewe iwe a mamaaw noa oanongan me ngeoniun. Iwe a no noan *desert* we e toori noan raaenin we a pwae ngaeniir re Israel.

2

Wupwutiwen Jesus (*Mat 1.18-25*)

¹ Noan oatonaan nge Soamwoonin Rome we Augustus a akkiuneo pwe epwe yor paaepaen fainaaw noan oanongaen faniuw kka nemaeniaen Rome.

² Reen igiwe aeyewaen paaepae a rhaepetae nge Quirinius minne eno pwe *governor* reen Syria.

³ Erhai me erhai nge enoa foatogi itan reen aan taeninimw.

⁴ Joseph a noa saengi Nazareth noan Galilee a noa ngaeni Bethlehem noan Judea, igiwe esiupwutiw *king* David me ee. Joseph a noa igiwe pwe igiwe iiy teoteeon David.

⁵ A noa pwe enoa foatogi iteer me Maria, rhoopwut we a no pwe kkefoaton. Niewe a pwoopwo,

⁶ oatowe reno Bethlehem, a toori oaton aan supw aetewe naiun.

⁷ Niewe a timenewaegini aetemwaaen we mesaemmwaei naiun, nge a tiugiumi nong noan mengaag nge e oana nong noan miniwe nenien anan maan, pwe igiwe esooar no nenier me noan imwaen waseona we.

Rhoan Neginegin Sheep me Angkenus Kkewe

⁸ Eyor aekkaerhai rhoan neginegin *sheep* reno woan menaai nee pwoong re aefaenniir naiiur maan. ⁹ Erhai naiun Soamwoon angkenus a pwae ngaeniir, nge nningen Soamwoon a ttinitiw woar. Ra igin mesag,

¹⁰ nge angkenus we a aengaeniir pwe, “Oawsoapw mesag! Ngaang iya pwigito eew kkepas mwamwaa reemi, kkepas een epwe pwigito eew kker temoag ngaeniir oanongeer aemas.

¹¹ Raaenin eei noan aepinoamw we aepinoamwon David rhoan aemenaw we aaemi a supw—Kristus we Soamwoon!

¹² Ieen minne epwe aniugiuniugiuw ngaenigaemi: oawpwe noa rhuungi erhai wonigaet e tiugiutiug noan mengaag nge ewon noan nenien anan maan.”

¹³ Ese mmwaei mwo nge eew mwirhaen angkenus a pwae noa me oaron angkenus we erhai, ra aepingepinga Deus noan aar keon:

¹⁴ “Sia fang ssoar ngaeni Deus na eno woai naaeng, nge oapoas enoa ngaeniir rhoakkena emwamwaa nee tipan woar!”

¹⁵ Oatowe angkenus kkewe ra nigitiiir ra sefaaen noa naaeng, rhoan neginegin *sheep* kkewe ra kkepas fengaen

nee fineer pwe, “Sa noa Bethlehem sipwe noa weri meeta minne a wen, minne Soamwoon a aengaenigirh.”

¹⁶ Iwe ra siu mwetekkaei noa me igiwe, nge ra noa weri Maria me Joseph iwe nge reweri wonigaet we ewon noan nenien anan maan.

¹⁷ Oatowe ra weri aetewe, nge ra aengaeniir rhooawe meeta we angkenus e iura reen aetewe.

¹⁸ Oanongeer iyo kkewe rerongorong miniwe nge ra mwaar reen miniwe mwaenieer rhooawe rhoaan neginegin *sheep* kkewe.

¹⁹ Maria a maeng ngaeni oanongaen minikkeei nge a niuwaennei nong rhag nee tipan.

²⁰ Rhooan neginegin *sheep* ra sefaaen, nge ra aepingepinga Deus reen igiwe meeta kkewe ra rongorong nge ra weri; nge taeppen rhag miniwe angkenus we a aengaeniir.

Ra Aeita Jesus

²¹ Enoa eew *week* weni mwirin, reen oatowe aetewe epwene *circumcise*, ra aeita ngaeni pwe Jesus, itiwe angkenus a fasiun ngaenneer weni mmwaen aan supw.

Ra Pwigi Noa Jesus Noan Temple we

²² A toori oatowe Joseph me Maria repwe feori eew pwaengepwaengin aenimenim, pwe ina miniwe oasoapwosoapw we aaen Moses e aepesa. Iwe ra pwigi noa aetewe Jerusalem pwe repwe noa pwaeri ngaeni Soamwoon,

²³ pwe ina miniwe effoat noan oasoapwosoapw we aaen Soamwoon pwe, “Oanongaen mesaemmwaiei naiiur aetemwaaen nge repwe aeyimweoiiur ngaeni Soamwoon.”

²⁴ Ra pwai noa pwe repwe noa aeni maenigaech riiurhai *dove* aere riiurhai aeppaen *pigeons*, pwe ina miniwe e fasiun no noan oasoapwosoapw we aaen Soamwoon.

²⁵ Noan oatonaan nge eno erhai mwaaen itan Simeon eno noan Jerusalem. Iiy erhai mwaaen reepiy nge e mwamwaaen noan menewan nge ewewweti oatona epwe cchipw Israel. Espritu Santus a teotiw wooan

²⁶ nge a aniugiuniugiuw ngaeni pwe iiy esoapw mae weni mmwaen epwe weri Kristus we Soamwoon e ppwoneei.

²⁷ Espritu Santus a paeni Simeon a itinong noan *Temple* we. Oatowe rhooawe inan me seman ra pwigito goagoa we noan *Temple* we pwe repwe feori ngaeni meeta we oasoapwosoapw e iura,

²⁸ Simeon a ammwarhiu aetewe noan paiun nge a fang aerhigerhig ngaeni Deus:

²⁹ “Igina Soamwoon, een wa iseni ppwon we oamw, nge wa mwiuti ngaeni noawumw rhoaan akkiuneo pwe epwe noa noan oapoas.

30 Iya weri ngaeni mesaei oamw engaengaen menaw,
 31 iwe een wa oamoannatae me weni mmweer oanongeer
 aeremas:
 32 eew seram epwe pwaeri ngaeniir re Gentiles mwerhaen na
 oamw
 iwe me pwigito nning ngaeniir noawumw re Israel.”

33 Rhoawe inan me seman aetewe ra mwaar reen meeta
 kkewe Simeon eiura reen aetewe.

34 Simeon a aepiniir nge a aengaeni Maria, iwe inaen
 aetewe, “Aeteei a ffin tae me reen Deus pwe epwe oataropa
 nge e aemenewaer towunepaen re Israel. Iiy epwe no pwe
 eew aeginn me reen Deus pwe towunepaen aeremas repwe
 appaniywaeni noan aar kkepas,

35 iwe a pwaeritae noan niunniywaen mwoanomwoan
 kena aar. Nge niemaam eweei kaengin saetan, epwe fereei
 pwunnomw.”

36-37 Eno erhai profeta tugufaeyi itan Anna nge a mae noa
 pwiuniuwan. Nge iiy naiun Phanuel saengi aeinang we aaen
 Asher. Fisuw raeg aan pwiuppwiuniuw nge emae noa
 pwiuniuwan. Nge igina a waniig me faawu raegin. Iiy ese
 nigiti *Temple* we; pwoong me raaen nge e aesirowu noa rhag
 Deus, e aecchigipin nge e memmaeipin.

38 Noan rhag awa we e tooto nge a fang aerhigerhig ngaeni
 Deus nge a fioangei mmwenen aetewe ngaeniir oanongeer
 rhoa kkewe re iya wetiwet ngaeni Deus pwe epwe saeneti
 noa Jerusalem.

Ra Sefaaen Ngaeni Nazareth

39 Igiwe Joseph me Maria ra moannon feori minikkewe
 eno noan anniug we aaen Soamwoon, nge ra sefaaen ngaeni
 miniwe aepinoamwoor iwe Nazareth me noan Galilee.

40 A tootae aetewe nge amamaaw noa, nge a sseog noan
 reepiy nge Deus a no woan.

Aet we Jesus me Noan Temple we

41 Oanongaen raeg nge rhoawe inaen me seman Jesus ra
 noa Jerusalem pwe repwe noa tapweei gupwunon *Passover*
 we.

42 Oatowe a seig me ruwowu raegin Jesus nge ra noa
 tapweei gupwun we taepfen rhag miniwe regaen feoffeeri.

43 Enoa moanno noa gupwun we, rhoawe ra sefaaen noa
 nee pwuguseer, nge Jesus a notiw noan Jerusalem. Rhoawe
 inan me seman rese giuneei minnee;

44 iir re niuwaennei pwe eno reer rhoanap we, iwe eraen
 nniuw aar nennoa nge a rhaepetae aar kiukkiutta fetaeneei
 aetewe me neeiir aei oaroor me maereyaereer.

45 Nge iir rese weri, iwe ra sefaaen noa giutta me Jerusalem.

⁴⁶ Wooan ayeoniuraenin aar giut nge ra noa weri me noan *Temple* we, emooat neeiir sinsein Jews kkewe, e aiussaening ngaeniir nge e kekkepas aeiineo ngaeniir.

⁴⁷ Oanongeer rhooa kkewe rerongorong mwaenian nge remwaar noa reen aesefaaenin kkepas aeiweg kkewe aan.

⁴⁸ Rhoowe inan me seman reriutae reen igiwe ra noa weri, iwe nge rhoopwut we inan a aengaeni pwe, “Naeyi, meeta wa feeri ngaenigemaem minnee reen? Pwe ngaang me mwaaen e semoamw aeiya gin noanineeng reen aemaem giutta fetaeneog.”

⁴⁹ Nge iya paniuwaeniir nge a iura pwe, “Meeta aemi oawnoa giutta fetaeneaei reen? Oawse giuneei pwe ngaang ipwe no noan imwaen minna Semaei?”

⁵⁰ Nge iir rese metaf reen miniwe e iura.

⁵¹ Iwe Jesus a tapweei sefaaeniir noa Nazareth, nge a noa aiussaening ngaeniir. Miniwe inaan a iseni nong rhag oanongan nee tipan.

⁵² Jesus a temoag tae wooan oanongan me aan reepiy me temoagon rhaengiin me reen Deus me aeremas.

3

Aaen John Baptist Fenai

(Mat 3.1-12; Mark 1.1-8; John 1.19-28)

¹ Noan miniwe seig me nimowu raeg aan Soamwoonin Rome we Tiberius nemenem, nge Pontius Pilate minne *governor* reen Judea, nge Erotos minne soamwoonin Galilee, iwe nge Philip we pwiin minne soamwoonin faniuwaen Iturea me Trachonitis; iwe nge Lysanias minne soamwoonin Abilene,

² iwe nge Annas me Caiaphas minikka Patere taegias—noan oatonaan nge Deus a fang to kkepas reen John iwe naiun Zechariah me noan *desert* we.

³ Iwe John a noa fenai fetaen noan faniuwaen rhan pwupwu na Jordan, “Toagun saengi monofitimi nge oawpwe paptismus, ina nge Deus epwe saeneti noa monofitimi.”

⁴ Miniwe effoat noan pwapwior we aaen profeta Isaiiah pwe:

“Erhai aeremas e iyaekkepwas me noan *desert* we nge e iura pwe:

‘Oawpwe oamoannatae ennepaen Soamwoon;

oawpwe awenecchera eew aan pwe epwe faeraeg wooan!

⁵ Oanongaen mwoattotiw nepetaen rhug nge sipwe oawutaeni tae,

oanongaen taeiit me rhug nge epwe soan eew noa rhag.

Oanongaen aan pwoar nge epwe aewwen noa,

oanongaen aan toarumwrumw nge epwe arhannenoa.

6 Oanongeer aeremas nge repwe weri menaw na Deus epwene fangetiw!”

7 Aeremas towunap ra maeg wow reen John pwe epwe noa paptismus aeginiir. Nge a aengaeniir pwe, “Aemi sowufaeng! Iyo eaengaenigaemi pwe oawpwe mmwenen kkewaeg saengi aen Deus aegaeregaer iga epwe aefengato?”

8 Oaw ssiuweniy wegitaegimi pwe epwe pwaeri noa pwe oawwa toagun saengi monofitimi. Oawsoapw niunniuwaennei pwe oawwa taaw saengi aen Deus aegaeregaer reen aemi aepesa pwe Abraham minne rhaepetomi. Ngaang ipwe aengaenigaemi, pwe Deus emmwenen feori faai kaan pwe tettaenin Abraham!

9 Eew soapaen a oamoannatae pwe epwe gopiy tiw waniwan saengi waeran. Oanongaen waniwan kka ese gacch uwaan nge epwe gopogop tiw nge eaekkaerh nong noan aengaet.”

10 Aeremas ra aeiineow pwe, “Meeta minne aeipwe feori?”

11 A paniuwaeniir pwe, “Iyo na riiuwapeo mengaagiun nge epwe fangenoa epeo pwe mengaagiun manna esooar mengaagiun, iwe nge iyo na eyor mwongo reen nge epwe fang ngaeniir aemweoi.”

12 Aaemweoi rhoan iyoiyon *tax* reitto pwe repwe paptismus, iwe nge ra aeiineow pwe, “Sinsei, meeta aemaem aeipwe feori?”

13 Nge iiy a aengaeniir pwe, “Oawsoapw iyoiy *tax* temoag saengi minna eno noan oasoapwosoapw.”

14 Aaemweoi sonotaw ra pwan aeiineow pwe, “Iwe nge aemaem? Meeta aemaem aeipwe feori?”

Nge a aengaeniir pwe, “Oawsoapw pweipwog senaapiy saengiir aeremas noan amamaaw ngaere oatupwutupw tae kkepas wooan erhai. Oawsoapw tipinap saengi minikkenaniuwaemi noan engaang.”

15 Aar aepiniugiuniug aeremas a tettemoag noa reen miniwe mwaenian, iwe nge a rhaepetae aar niunniuwaennei ngaere teorh maeni pwe John minne Kristus.

16 John a aengaeniir oanongeer noa pwe, “Ngaang iya paptismusaegaemi reen rhaan, iwe nge erhai ina epwe itto nge etaegias me mmwaei. Ngaang mwo nge ese fin ipwe pwaeisi geogeeon nokkaan. Iiy epwe paptismusaegaemi ngaeni Espritu Santus me aengaet.

17 A kkemwarh aan sepwin pwe epwe aeyimweoiuw fe-saenngiy faiun saengi peeon. Iwe, epwe ioni fengaenniy faiun nge a iseni nong noan aan imwaen iseis, nge peeon epwe oatoranong noan aengaet we ese mmwenen gunnoa.”

18 Etowunap mesemesaen aaen John fenaiuw Kkepas Mwamwaai we ngaeniir aeremas nge eaemaemaewa ngaeniir pwe repwe ssiuweniy meneweer.

19 Iwe nge John a soong ngaeni *Governor* Eroles, pwe igiwe e rhoan ngaenne aeni Herodias, iwe rhoan ngaenneyaen mwaaen we pwiin, iwe me igiwe etowunap min aenneew kkewe efeori.

20 Iwe egius mwo nge Eroles a faer gin feori aenneewa noa pwe a iseni nong John noan kanepwus.

Aaen Jesus Paptismus

(Mat 3.13-17; Mark 1.9-11)

21 Mwirin aar oanongeer aeremas paptismus, Jesus a pwan paptismus. Nugunupaen aan maeipin nge a susu noa naaeng,

22 iwe nge Espritu Santus a ittiw wooan eweei rhag erhai *dove*. Iwe nge eew mangiungiu a ittiw me noan naaeng nge a aepesa pwe, "Een naeyi mwaaen aerhaengerhaeng. Iye efin tipaei reen."

Rhaepeto Kkewe Aaen Jesus

(Mat 1.1-17)

23 Oatowe Jesus a rhaepetae aan engaang, nge a eniig raegin. Aeremas re niuwaennei pwe iiy naiun Joseph, iwe naiun Heli,

24 iwe naiun Matthat, iwe naiun Levi, iwe naiun Melchi, iwe naiun Jannai, iwe naiun Joseph,

25 Iwe naiun Mattathias, iwe naiun Amos, iwe naiun Nahum, iwe naiun Esli, iwe naiun Naggai,

26 iwe naiun Maath, iwe naiun Mattathias, iwe naiun Se-mein, iwe naiun Josech, iwe naiun Joda,

27 iwe naiun Joanan, iwe naiun Rhesa, iwe naiun Zerubba-bel, iwe naiun Shealtiel, iwe naiun Neri,

28 iwe naiun Melchi, iwe naiun Addi, iwe naiun Cosam, iwe naiun Elmadam, iwe naiun Er,

29 iwe naiun Joshua, iwe naiun Eliezer, iwe naiun Jorim, iwe naiun Matthat, iwe naiun Levi,

30 iwe naiun Simeon, iwe naiun Judah, iwe naiun Joseph, iwe naiun Jonam, iwe naiun Eliakim,

31 iwe naiun Melea, iwe naiun Menna, iwe naiun Mattatha, iwe naiun Nathan, iwe naiun David,

32 iwe naiun Jesse, iwe naiun Obed, iwe naiun Boaz, iwe naiun Salmon, iwe naiun Nahshon,

33 iwe naiun Amminadab, iwe naiun Admin, iwe naiun Arni, iwe naiun Hezron, iwe naiun Perez, iwe naiun Judah,

34 iwe naiun Jacob, iwe naiun Isaac, iwe naiun Abraham, iwe naiun Terah, iwe naiun Nahor,

35 iwe naiun Serug, iwe naiun Reu, iwe naiun Peleg, iwe naiun Eber, iwe naiun Shelah,

³⁶ iwe naiun Cainan, iwe naiun Arphaxad, iwe naiun Shem,
iwe naiun Noah, iwe naiun Lamech,
³⁷ iwe naiun Methuselah, iwe naiun Enoch, iwe naiun
Jared, iwe naiun Mahalaleel, iwe naiun Kenan,
³⁸ iwe naiun Enosh, iwe naiun Seth, iwe naiun Adam, iwe
naiun Deus.

4

Sessoaton Jesus

(Mat 4.1-11; Mark 1.12-13)

¹ Enoa sefaaeneto Jesus me reen pwupwu we Jordan nge
a sseog noa reen Espritu Santus iwe nge Espritu Santus a
paeninoa noan *desert*,

² nge Saetan a noa soatoni me ee noan faaeig raaen. Noan
oanongaen raaenin kkewe nge ese mwongo, ina miniwe a
meyaefti pecchai reen.

³ Saetan a aengaeni pwe, “Ngaere een Naiun Deus, wopwe
aengaeniir faai kaan pwe repwe ssiuwen ngaeni fenoawa.”

⁴ Jesus a paniuwaeni pwe, “Pwapwior we e Santus e aepesa
pwe, ‘Saapw fenoawa rhag minne aeremas repwe menaw
reen.’”

⁵ Iwe Saetan a pwigitae weeinnaeng nge a noa pwaeri
ngaeni reen rhag eew oat oanongaen mweoi me noan
faeinaengiy.

⁶ Saetan a aengaeni pwe, “Ipwe ngaenneog oanongaen
mamaaw kkeei me oanongaen mmwen kkeei. Oanongaen
nge nemaeniaei, nge ipwe fang ngaeni iyo iye tipaei ipwe
ngaenneei.

⁷ Oanongaen minikkeei nge epwe no pwe oamw igine
wopwe oassotupw ngaeniaei.”

⁸ Jesus a paniuwaeni pwe, “Pwapwior we e Santus e aepesa
pwe, ‘Wopwe oassotupw ngaeni Deus na oamw Soamwoon
nge iiy rhag wopwe engang ngaeni.’”

⁹ Iwe Saetan a pwigi noa Jerusalem nge a noa iseni tae
pwiuneoi we oarosaen taegias me reen *Temple* we, nge a
aengaeni pwe, “Ngaere een Naiun Deus nge wa oatoroagotiw
me igeei.

¹⁰ Pwe iwe Pwapwior we e Santus e aepesa pwe, ‘Deus epwe
akkiuneeor naiun angkenus repwe aemmwenoag.’

¹¹ Nge epwan aepesa pwe, ‘Repwe ammwarhiug tae noan
paiiur pwe pirhemw mwo nge ete woas ngaeni faai.’”

¹² Iwe nge Jesus a paniuwaeni pwe, “Pwapwior we e Santus
e aepesa pwe, ‘Wosoapw soatoni Deus na oamw Soamwoon.’”

¹³ Weni mwirin aeen Saetan soatoni Jesus, iwe nge a nigiti
noa mwo.

*Jesus a Rhaepeta Aan Engaang me Noan Galilee
(Mat 4.12-17; Mark 1.14-15)*

¹⁴ Iwe Jesus a sefaaen ngaeni Galilee, iwe nge miniwe maemaewaen Espritu Santus eno reen. Miniwe fioangon a rheei fetaen wooan oanongan noa faniuw we.

¹⁵ A fenai fetaen noan wutteer Jews nge oanongaen aere-mas ra mwaar reen.

*Rhooan Nazareth Rese Aetiwa Jesus
(Mat 13.53-58; Mark 6.1-6)*

¹⁶ Jesus a noa Nazareth, igiwe effoan me ee, nge wooan Sabbath a noa noan wutteer Jews we taeppen rhag miniwe egaen feeri. A iutae pwe epwene aeraegi Pwapwior we eSantus,

¹⁷ nge ra ngaenneei pwapwior we aaen profeta Isaiiah. A suginoa pwapwior we nge a weri pwiuneoi we effoat me ee,
¹⁸ “Kkemenaen Soamwoon a no wooai pwe iya ffin tae ipwe pwigito Kkepas Mwamwaai eei reer rhooa affayeo.

Iya fangenoa ngaang ipwe oaronga ngaeniir rhooan kanep-wus pwe iir ra saenetaeg

nge i aecchipwaar rhooa parh pwe repwe ffat noa, me pwan aengesaar noa rhooa waeiraes

¹⁹ iwe me ipwe oaronga ngaeniir aeremas pwe a toori oatowe Soamwoon epwe aemenewaar naiun aeremas.”

²⁰ Jesus a oawunnu noa pwapwior we, a ateow sefaeeniy ngaeni aeremas we e tipaengi, iwe nge a mooat tiw. Oanongeer aeremas kkewe noan wutteer Jews we nge a meseer ngaeni rhag,

²¹ Iwe nge a aengaeniir pwe, “Soapwon kkepas e noan Pwapwior we eSantus iye igina nge a pwae noa pwe ennet, iye oawwa rongorong ngaeni.”

²² Ra piungiun mwaar reen nge ra maengi noannei nong mwamwaaiun ititin aan kkepas. Ra iura pwe, “Saapw iij mwaaen we naiun Joseph?”

²³ A aengaeniir pwe, “Igiuneei firhiy pwe oawpwe aengaeni sefaaeniaei kkepas een, ‘Toagota, aecchipwa oanongoamw.’ Oawpwe akkiuneowaei pwe ipwe feeri me nee pwugusaei minikkewe oaw rongorong pwe i fasiun gaen feeri me noan Capernaum.”

²⁴ Jesus a iura pwe, “Ennetaen, ipwe aengaenigaemi, pwe profeta nge ese gacch aar aewenimmwaar me noan pwuguseer.

²⁵ Aiussaening ngaeniaei: regin towunap rhoapwut kka ra mae rhooan ngaenneyeer me wooan Israel noan oatowe oaton Elijah, oatowe esoar worhow noan ennuw me esoapw

raeg iwe a itto eew naengeta gin oarosaen temoag wooan oanongaen faniuw we.

²⁶ Inamwo nge esooar erhai ne refangenoa Elijah reen me wooan Israel, pwe aeggaen erhai rhag rhoopwut a mae rhooran ngaenneyan eno wooan Zarephath me wooan faniuw na Sidon.

²⁷ Iwe nge ra gin ssow rhooa affayeo reen kaenepaai kka reno wooan Israel reen oatowe oaton Elisha; nge inamwo nge erhai mwo me neeiir nge ese cchipw, pwe aeggaen Naaman we erhai re Syria.”

²⁸ Igiwe aeremas kkewe reno noan wutteer Jews we ra rongorong miniwe nge a gin teo ngaeniir aar soong.

²⁹ Ra iutae rhag, iuriutepa wow Jesus me noan aepinoamw we, nge ra pwigitae wooan wungaen rhug we eno miniwe aepinoamwoor wooan. Re menaen pwe repwe aerheei noa me wooan rhug we,

³⁰ iwe nge iiy etowow rhag me nugunupaen pwuwa we nge a faaeraeg noa.

*Mwaaen we Eyor Aniu Aenneew Wooan
(Mark 1.21-28)*

³¹ Iwe Jesus a noa wooan Capernaum, eew aepinoamwon Galilee, a noa fenai ngaeniir aeremas wooan Sabbath.

³² Ra mwaar reen aan fenai, pwe igiwe eyor kkemenaen aan fenai.

³³ Noan wutteer Jews we nge eyor erhai mwaaen eyor aniu aenneew wooan; a gin aekkepwas temoag tae,

³⁴ “Ah! Meeta oamw mwerhaen ngaenigemaem, Jesus re Nazareth? Wa itto igeei pwe wopwe oatoaropagemaem? Ngaang igiuneei een iyo: een mwaaenessoar we rhooran pweipwogin kkepas we aaen Deus!”

³⁵ Jesus a anniugiu ngaeni aniuwe pwe, “Wopwe anniug noa nge wa siunoa me wooan mwaaen na!” Iwe nge aniu aenneew we a aerheei tiw mwaaen we wenimmweer rhoowe nge a teowow me wooan, nge esooar minne eoawoasu ngaeni.

³⁶ Aeremas ra piungiun mwaar nge ra kkepas fengaen woar pwe, “Meeta taepfen kkepas kkeei? Eyor kkemenaen me maemaewaen aaen mwaaen een kkepas ngaeniir aniu aenneew nge ra siu!”

³⁷ Iwe miniwe fioangon Jesus a rheei fetaen wooan faniuw we.

*Jesus a Aecchipwa Towunepaen Aeremas
(Mat 8.14-17; Mark 1.29-34)*

³⁸ Jesus a siusaengi wutteer Jews we iwe a noa reen miniwe pwugusaen Simon. Niewe inaen pwiuniuwaen Simon esemwaai pwe egin pwerhikkar ginin, iwe ra kkepas ngaeni Jesus reen mmwenen.

³⁹ A noa iwe a noa iu oaron niewe iwe nge a aengaeni pwerhikkar we pwe epwe siusaengi niewe. Iwe rhag nge esaer noa miniwe pwerhin niewe, iwe niewe a rhimwitae pwe a ittae feor fetaen minne epwe tipaengi ngaeniir.

⁴⁰ Enoa mwirin tupwunoan aenet nge oanongeer rhoawe eyor rhoa semwaai reer nge ra pwigiir to reen Jesus. Eiseni tae paiun wooar oanongeer nge a aecchippwaar tae.

⁴¹ Mwuniaan mwo nge repiungiun teeowow me wooar rhoa towunap we nge ra itiwow aekkepwas pwe, “Een mwaaen we Naiun Deus!”

Jesus a kkepas sseor ngaeniir aniu aenneew kkewe pwe re-soapw kkepas, pwe igiwe re giuneei pwe iiy miniwe Kristus.

*Jesus e Fenai Noan Wutteer Jews Kkewe
(Mark 1.35-39)*

⁴² Wenimmwaei raaen Jesus a nigiti aepinoamw we iwe a noa eew pwiuneoi ne iiy noa rhag. Aeremas a rhaepetae aar giutta fetaeneei, iwe nge renoa weri, nge ra aegina aar ammwarihu tiw pwe ete rhiuwen siunoa.

⁴³ Iwe nge iya aengaeniir pwe, “Ngaang ipwan noa fenaiuw Kkepas Mwamwaai we reen Mweoiun Deus me noan aepinoamw kena aekkaew, pwe ina minne Deus efang ngaang pwe ipwe noa feori.”

⁴⁴ Iwe a noa fenaiuw noan oanongan noa wutteer Jews me wooan faniuw we.

5

*Jesus a Faingiir Rhoawe Mesaemmwaen Rhooan Kkayeo
(Mat 4.18-22; Mark 1.16-20)*

¹ Eraaen nge Jesus eiu reen meoneoiniun we Gennesaret nipwaen aar aeremas aekkaetemaegin to pwe repwe itto rongorong miniwe kkepesaen Deus.

² A weri riiufoarh pwoot pwe ra iuriiur tae wenippiy: nge rhoan fita kkewe ra nigiti pwe ra noa wupwuuw noa wuug kkewe naiiur. ³ Jesus a toonong noan efoarh pwoot kkewe –pwoot we waen Simon –nge a tingoareei ngaere epwe mmwenen amman saengi egius mwoarhoisaet. Jesus a moaat noan pwoot we nge a fenai ngaeniir rhoa towunap we.

⁴ Enoa moann aan mwaenieniy, nge a aengaeni Simon pwe, “Ammaan ffoarh wow igina e nennoan ee, nge een me rhoa kkomwu rhinoamw oawwa aerheei tiw wuug mwu naimi pwe oawpwe fita.”

⁵ Simon a paniuwaeni pwe, “Soamwoon, efoarh ngaeni nee pwoong we aemaem fita nge esooar iig e aei nipaeni. Iwe ngaere ina minimwu wo iura, ina nge iya iseni tiw wuug kka naimaem.”

⁶ Ra iseni tiw wuug kkewe nge ra igin niyap iig nge aetae epwene ffeir wuug kkewe.

⁷ Iwe nge ra taenepom ngaeniir rhooa kkewe rhoaniuwaar woan pwoot we efoarh pwe repwe itto tipaengiir. Re itto iwe ra itto oawuta pwoot kkewe waar esseogtae reen iig aetae pwoot kkewe repwene mweoius.

⁸ Oatowe Simon Peter a weri miniwe a wen, a foatotiw weni mmwaen Jesus nge a iura pwe, “Siu saengiaei Soamwoon! Ngaang erhai mwaaen monofit!”

⁹ Iiy me rhooa kkewe ra riutae reen towunepaen iig kkewe ra nipaeni.

¹⁰ Pwan ina rhag miniwe ewen ngaeniir James me John, mwaaen kkewe naiun Zebedee. Jesus a aengaeni Simon pwe, “Wosoapw mesag: saengi igina a noa een wopwene niyap aeremas.”

¹¹ Ra iuriutae pwoot kkewe waar wenippiy, nigititiw oanongaen aegiaeg, nge ra tapweei noa Jesus.

*Jesus a Aecchipwa Erhai Mwaaen
(Mat 8.1-4; Mark 1.40-45)*

¹² Eew oat nge Jesus eno noan eew aepinoamw igiwe erhai mwaaen eweri eew kaenepaai eno ee. Igiwe eweri Jesus, a foatotiw woan ppweon nge a aeffaenipirhe ngaeni pwe, “Menap, aere womwerhaen, wa aecchipwanoa aaei semwaai!”

¹³ Jesus eangenoa nge a geotteopa mwaaen we, nge a paniuwaeni pwe, “Ngaang imwerhaen, wone cchipw noa!” Reen rhag oatowe nge kaenepaai we a rhiuw saengi mwaaen we.

¹⁴ Jesus a ammwir ngaeni pwe, “Esooar ne wopwe aengaeni minnee, nge faaeraeg uwen noa reen patere pwe epwe weriug. Iwe nge a feeri oasoar we Moses eakkiuneo, pwe epwe pwaeri ngaeniir aeremas pwe wa nimegacch noa.”

¹⁵ Miniwe kkepessaen Jesus a rheei fetaen, iwe pwuwaen aeremas ra maeto repwe itto aiussaening ngaeni nge e aecchipwa aar semwaai.

¹⁶ Iwe nge egaen noa pwiuneoi e esooar aeremas ee, nge a noa maepin ee.

*Jesus a Aecchipwa Erhai Mwaaen Maemerhoar
(Mat 9.1-8; Mark 2.1-12)*

¹⁷ Eraaen nge Jesus e fenai, nge aaemweoi Pharisees me sinsein anniug remooat igiwe, nge re itto me wooan aepinoamwon Galilee me Judea me Jerusalem. Kkeman we aaen Soamwoon eno wooan Jesus pwe epwe mmwennen aecchipwaar rhooa semwaai.

¹⁸ Aaemweoi mwaaen repwigito erhai mwaaen e maemerhoar wooan eew giegiy, re aegina pwe repwe pwigi nong noan iimw we nge ra oawnatiw weni mmwaen Jesus.

¹⁹ Pwonno reen pwuwaen aeremas we, iwe rese mmwennen repwe toori Jesus. Iwe ra teeotae wooan iimw we, ra feingi noa aekkaew oason iimw we, nge re atairatiw mwaaen we noan giegiy we nugunupaen pwuwa we me weni mmwaen Jesus.

²⁰ Igiwe Jesus a weri nepaen aar niugiuniug rhooawe, a aengaeni mwaaen we pwe, "Naeyi, monofitimw a mwusunoa."

²¹ Sinsein anniug kkewe me Pharisees kkewe a rhaepetae aar niuwaennei fengaen wooar pwe, "Iyo mwaaen e aepesa aenneewa Deus! Deus rhag minne emmwen epwe oamwusa noa monofit!"

²² Jesus e giuneei niunniuwaen kkewe aar nge a aengaeniir pwe, "Meeta oaw niuwaennei minikkena e aenneew reen?"

²³ Emererhaeg pwe sipwe aepesa pwe, 'Monofitimw a mwusunoa,' aere sipwe aepesa pwe, 'Iutae wa faaeraeg noa?'

²⁴ Ipwe pwaeri ngaenigaemi pwe mwaaen we Naiun Aeremas eyor maemaewan wooan soanop pwe epwe oamwusa noa monofit." Iwe a aengaeni mwaaen maemerhoar we pwe, "Ipwe aengaeniug, iutae, pwigi giemw wa noa noan imwoamw!"

²⁵ Iwe rhag mwaaen we a iutae me weni mmweer rhooawe, a pwigi miniwe gien iwe ewon wooan, a noa neepwugusan, a noa aepingepinga Deus.

²⁶ Oanongeer rhooawe ra gin riutae reen aar mesag, nge ra aepingepinga Deus nge ra iura pwe, "A inamwo aemwaer-aeran minikka sa weri noan raaneei!"

Jesus a Faingi Levi

(Mat 9.9-13; Mark 2.13-17)

²⁷ Mwirin minneei, Jesus a noa weri erhai rhoaan iyoiyon *tax* itan Levi, emooat noan aan *office*. Jesus a aengaeni pwe, "Itto tapweaei."

²⁸ Iwe Levi a iutae nigiti oanongaen aegiaeg nge a tapweei noa mwirin.

²⁹ Oatona nge Levi a feeri eew gupwun gin temoag me reen iimw na imwan pwe aaen Jesus, iwe nge neeiir rhoaan itto tapweei gupwun we nge regin ssow rhoaan iyoiyon *tax* me pwan aaemweoi aeremas.

³⁰ Aaemweoi Pharisees me sinsein anniug re appaniuwaen ngaeniir rhoan kkayeo kkewe naiun Jesus reiura pwe, “Meeta oawiuun nge oawmwongo ngaeniir rhoan iyoiyon *tax* me rhoa aenneew wegitaegiir kkomwun reen?”

³¹ Jesus a paniuwaeniir a iura pwe, “Rhoakka rese semwaai rese noa reer toagota, pwe rhoakka refaer semwaai.

³² Ngaang ise itto pwe ipwe faingiir rhoa mwamwaai, pwe faer rhoa monofit pwe repwe toagun saengi monofitiir.”

Kkepas Aeiineon Aecchigipin
(*Mat 9.14-17; Mark 2.18-22*)

³³ Aekkaaemweoi aeremas re aengaeni Jesus pwe, “Rhoan kkayeo kkewe naiun John regaen aecchigipin ffoarh noa rhag nge re maeipin ffoarh, pwan ina rhag rhoan akkiuneo kka naiur Pharisees; nge rhoan kkayeo kkomwu noawumw re mwongo noa rhag me re iun noa rhag.”

³⁴ Jesus a paniuwaeniir pwe, “Oaw niuwaennei pwe epwe mmwen oawsoapw oawwongoor aeremas kkewe re itto reen gupwunon appwiuniupai igiwe *bridegroom* we e rhiuwen no reer? Aapw!

³⁵ Nge epwe itto raaenin na repwe pwigi saengiir *bridegroom* we, nge ina oatona repwene aecchigipin noa.”

³⁶ Jesus a pwan aengaeniir fioangon awewe een: “Oawsoapw taeringa eew mengaag ffeo pwe oawpwe pinisa ngaeni eew mengaag maerhiy. Esooar ipitan oawpwe feeri. Iwe ngaere epwe ina, oawwa taeringa mwaenenei noa mengaag ffeo we pwe ikka mengaag ffeo we ese aeffitaeg ngaeni mengaag maerhiy we.

³⁷ Oawsoapw pwan aenianong *wine* ffeo noan nenien *wine* maerhiy, pwonno *wine* ffeo we epwe taeringatiw nenien *wine* maerhiy we, iwe a nipi noa *wine* we nge nenien *wine* we a ffeir noa.

³⁸ *Wine* ffeo ina oawpwan ngoannong rhag noan nenien *wine* ffeo!

³⁹ Nge esooar erhai ne epwe iun *wine* maerhiy nge epwe pwan rhiuwen iun *wine* ffeo. Pwe eiura pwe, ‘*Wine* kka essiunaei minne enneo.’”

6

Kkepas Aeiineon Sabbath
(*Mat 12.1-8; Mark 2.23-28*)

¹ Jesus a feffaeraeg noa neeiin maetaen *wheat* woan raaenin Sabbath. Rhoan kkayeo kkewe naiun ra ginigin iuwoapwon *wheat* kkewe, ra mwunuti fetaeneei noan paiur, nge re angi minikkewe faiun.

² Aekkaerhai Pharisee kkewe ra aeineow pwe, “Meeta oawwa feori miniwe oasoapwosoapw we aarh eiura pwe oawsoapw feori wooan Sabbath reen?”

³ Jesus a paniuwaeniir pwe, “Oawse aeraegi mwo miniwe David efeori noan oaton we iiy me rhooa kkewe naiun ra pecchai?”

⁴ Iwe etonong noan imwaen Deus, nge a pwiigi fenoawa kkewe re aeni oasoar ngaeni Deus, nge a angi nge a pwan ngaenneer mwaaen kkewe rhoaniuwan. Miniwe nge e aenneew ngaeni aarh oasoapwosoapw pwe aeremas repwe angi pwe aeggaen patere rhag.”

⁵ Iwe nge Jesus a soapwei noa pwe, “Minna Naiun Aeremas minne Soamwoonin Sabbath.”

*Erhai Mwaaen Mae Paiun
(Mat 12.9-14; Mark 3.1-6)*

⁶ Wooan eew noa raaenin Sabbath nge Jesus a noa noan wutteer Jews a noa fenai. Erhai mwaaen eno ee nge emaemerhoar pai mwaaenen.

⁷ Aaemweoi sinsein anniug me aaemweoi Pharisees regiutta aekkaew rhaepin minikka repwe oaturu Jesus wooan, iwe ina faan ra pipiiy gacchiuw Jesus aere epwe aecchipwaar aeremas wooan Sabbath.

⁸ Nge Jesus egiuneei niunniuwaen kkewe aar nge a aengaeni mwaaen we pwe, “Iutae nge wa itto iu weni mmwan.” Mwaaen we a iutae nge a itto iu igiwe.

⁹ Iwe nge Jesus a aengaeniir pwe, “Ipwe aeineogaemi: meeta aarh anniug e aengaenigirh sipwe mmwenen feori noan raaenin Sabbath? Meeta aarh anniug e aengaenigirh sipwe mmwenen feori noan raaenin Sabbath? Sipwe tipaengi aeremas ngaere sipwe oawoasuur? Sipwe aemewaar, aere sipwe niir noa?”

¹⁰ A fan fetaen neeiir oanongeer, iwe nge a aengaeni mwaaen we pwe, “Aetiwow poawumw.” Iwe mwaaen we a aetiwow paiun, iwe a mamaaw sefaan.

¹¹ A gin teoteeo aar soong rhooa kkewe iwe ra pwiungiuwwoar meeta e repwene feori ngaeni Jesus.

*Jesus a Finiir Seig me Riiurhai Oapostonus
(Mat 10.1-4; Mark 3.13-19)*

¹² Oatonaan nge Jesus a ittae wooan eew taeiit epwe ittae maeipin, iwe a ittae no aegini noa epwoong reen aan ittae maeipin ngaeni Deus.

¹³ Enoa raaen tae, a faingiir rhoaan kkayeo kkewe nge a finiir seig me riiurhai me neeiir, nge a aeita ngaeniir pwe oapostonus:

¹⁴ Simon (iwe a aeita ngaeni pwe Peter) iwe nge Andrew we pwiin; James me John, Philip me Bartholomew,

¹⁵ Matthew me Thomas, James we naiun Alphaeus, iwe me Simon (iwe regaen iura pwe man menat),*

¹⁶ Judas we naiun James, iwe me Judas Iscariot, iwe e fangenoa tinnimaen Jesus.

Jesus e Fenai Nge e Aecchipwaar Aeremas

(Mat 4.23-25)

¹⁷ Igiwe Jesus enoa ittiw me wooan taeiit we iiy me oapostonus kkewe, a ittiw iunoa nefenapi reen eew mweoiuyaen rhoan kkayeo kkewe naiun. Eew pwuwaen aeremas temoag a no ee, nge re maegeto me Judea me Jerusalem me aepinoamw kkewe wenepeigin faniuwaen Tyre me Sidon;

¹⁸ re maegeto repwe itto aiussaening ngaeni me repwe itto aecchipwa aar semwaai. Oanongeer rhoakka eteetoe mwuniaaen wooar nge re maegeto nge a aecchipwaar.

¹⁹ Oanongeer aeremas nge re aetemaegin repwe geotteopa, pwe miniwe kkemenan e itiwow me wooan nge a aecchipwaar noa oanongeer.

Kker me Niemaam

(Mat 5.1-12)

²⁰ Jesus a toagun ngaeniir rhoan kkayeo kkewe naiun nge a iura pwe,

“Oaw wenepwu aaemi rhoa mwaenene;

pwe minna Mweoiun Deus a no pwe aaemi!

²¹ Oaw wenepwu aaemi rhoa pecchai igina;

pwe aaemi oawpwene faeyemwaai!

Oaw wenepwu aaemi rhoa nee tip choaw;

pwe aaemi oawpwene kekkaei!

²² “Oaw wenepwu aaemi igine re aeserhoawuna gaemi, asiugaemi, aessaewa gaemi, aepesa gaemi pwe oawaenneew, pwe faaen ngaeni mwaaen we Naiun Aeremas!

²³ Oawkker igine a wen minna ngaenigaemi nge oawittae maan fetaen reen aaemi mesaeig, pwe a yor paniuwaemi ina e igin faereggit me naaeng. Pwe rhoa kkewe rhaepetoor repwan feori taeppen minnee ngaeniir profeta kkewe.

²⁴ Nge ifa mwo aenneewan ngaenigaemi aaemi rhoamwu oawwiin igina;

oawwa gaen aemmererhaeg rhag igina!

²⁵ Ifa mwo aenneewan ngaenigaemi rhoamwu oawwa igin

faeyemwaai igina;

oawpwene pecchai!

* **6:15** *man menat*: erhai mwaaen e fiow ngaeniir sonotawaen Rome faaen itaen faniuwan.

Ifa mwo aenneewan ngaenigaemi rhooramwu
oaw aemweireyiir fetaen igina;
oawpwene nee tip cchoaw me saeng!

²⁶ “Ifa mwo aenneewan ngaenigaemi igine oanongeer aeremas repwe aepesa gacchiumi; pwe rhoowe rhaepetoor ina rhag miniwe repwan aepesa reer profeta oatupwutupw kkewe.

Aerhaengiir Rhooran Kkoapwut
(Mat 5.38-48; 7.12a)

²⁷ “Nge ipwe aengaenigaemi aaemi rhooran aiussaening ngaeniaei: aerhaengiir rhooa oapwutaegaemi, ffeeor mwamwaai ngaeniir rhooa aeserhoawuna gaemi,

²⁸ oaw aewenepwuwaar rhooran soong ngaenigaemi, nge oaw maeipinaar rhooa feoffeoor aenneew ngaenigaemi.

²⁹ Ngaere erhai e pigiri epeig ne oawusupoamw, wa wegeti ngaeni peig na epeig pwe epwe pwan pigiri; ngaere erhai epwigi noa mengaagiumw, wa pwan ngaenneei pwan epeo.

³⁰ Ngaenneer iyo kena rhooran tingoareog aegiaeg, me ngaere erhai epwigi pisaegimw nge wosoapw rhiuwen tingoar sefaaen no.

³¹ Oawpwe feori ngaeniir aeremas taeppen meeta na aaemi oaw mwerhaen pwe repwe feori ngaenigaemi.

³² “Aere oaw aerhaengiir rhag rhooa na re aerhaengigaemi, meeta faaen aaemi oawpwe pwigi eew wenepwu? Rhooa kkewe mwo rhooa monofit nge repwan aerhaengiir rhooa kkewe re aerhaengiir!

³³ Ngaere igine oawffeoor mwamwaai ngaeniir rhag rhoakkena reffeoor mwamwaai ngaenigaemi, meeta faaen aaemi oawpwe pwigi eew wenepwu? Rhooa monofit kkewe mwo nge repwan feori taeppen rhag!

³⁴ Ngaere oawfang pisaegimi ngaeniir rhag rhoakkena oawniunniywaennei pwe repwe aesefaaeni niuwenin, meeta faaen aaemi oawpwe pwigi eew wenepwu? Rhooa monofit mwo nge repwan mmwoon ngaeniir rhag rhooa monofit, pwe repwe pwan pwigi rhag nepaen miniwe refang!

³⁵ Aapw! Aerhaengiir rhooran oapwutaegaemi me ffeoor mwamwaai ngaeniir; oawfang ngaeniir pisaegimi nge oawsoapw niunniywaennen repwe aesefaaenin. Ina nge minna wenepwuwaemi epwe temoag noa, nge oawpwe no pwe aaemi naiun Deus na oarosaen taegias. Pwe iiy nge emwamwaai ngaeniir rhooa kkewe resonap me aeremas aenneew.

³⁶ Oawpwe faayeow taeppen rhag aen Semaemi faayeow ngaenigaemi.

Kapwiungiiur Aaemweoi
(Mat 7.1-5)

37 “Oawsoapw apwiungiu aeremas, nge ina nge Deus esoapw pwan apwiungiugaemi; oawsoapw oamonofitiir aaemweoi, nge ina nge Deus esoapw pwan oamonofitigaemi; oaw oamwusaar noa aaemweoi, nge ina nge Deus epwe pwan oamwusagaemi.

38 Oawpwe fang ngaeniir aaemweoi, pwe ina nge Deus epwe pwan fang ngaenigaemi. Ewaer, pwe ammwenemi ina epwene igin towunap, ina esoapw faer noan paimi iga oawpwe ammwarhiu fengaennyi. Nepaen minna oaw aeyae ngaeniir aaemweoi, nge ina nepaen minne Deus epwe pwan aeyae ngaenigaemi.”

39 Iwe Jesus a aengaeniir eew floangon awewe: “Erhai mwaaen parh mesan esoapw mmwenen wummwuw erhai ne epwan parh. Ngaere ewummwuw, nge repwe ppiung nong ne niipw iir me riiurhai.

40 Esooar erhai aetei suguun epwe taegias saengi aan sinsei; pwe oanongeer aetei suguun nge epwe noa moann ngaeniir aar suguun nge repwe naaen aeffitaeg ngaeniir aar sinsei.

41 “Meeta wa weri peipei na noan mesaen pwiimw, nge wose weri soapwon irae mwu noan mesoamw?”

42 Epwe ifa wusun oamw aengaeni pwiimw, ‘Moawwerh pwiimw, itto ipwe tipwei wow peipei mwu noan mesoamw,’ nge wose weri soapwon irae mwu noan mesoamw een? Een erhai man oatupwutupw! Mmwaen tipwei wow soapwon irae mwu noan mesoamw, nge wopwe naaen weri gacchiuw oamw tipwei wow peipei na noan mesaen ina pwiimw.

Efoarh Waniwan me Uwaan
(Mat 7.16-20; 12.33-35)

43 “Efoarh waniwan mwamwaaei esoapw uwa aenneew, nge efoarh waniwan aenneew esoapw uwa mwamwaaei.

44 Oanongaen mesemesaen waniwan nge sigiuneei reen minikken a uwaan; wosoapw mmwenen gin *fig* me reen irae towfanfan ngaere gin *grape* saengi fetin towfanfan.

45 Erhai aeremas gacch epwe oatowowuw mini gacch saengi gacchiun noan tipan, nge erhai aeremas aenneew epwe oatowowuw mini aenneew saengi aenneewaen noan tipan. Pwe iga aaw aepesa meeta kena esseog noan pwunn.

Riiurhai Rhooan Kaiu Iimw
(Mat 7.24-27)

46 “Meeta faan oawfaingi ngaeniaei pwe, ‘Soamwoon, Soamwoon,’ nge oawse feori minne i aengaeniugaemi reen?”

⁴⁷ Erhai ne e itto reei nge e aiussaening minikka mwaeniaei nge e tapweei – ngaang ipwe pwaeri ngaenigaemi meeta na iiy eweei.

⁴⁸ Iiy eweei erhai mwaaen e aiuwtae imwan, e genengitiw nipwan taeyifan iimw we imwan nge enoa ssaenitae me woan porow. Iwe enoa itto pwur we itto parengi iimw we nge ese ffeir iimw we, pwe igiwe egin mamaaw kaiun.

⁴⁹ Nge erhai ne erongorong mwaeniaei nge ese tapweei, ina nge iiy epwe weei rhag mwaaen we e aiuwtae imwan nge ese ffeeor taeyifan; iwe enoa itto pwur we itto parengi iimw we iwe toarop noa, ifa mwo nepaen aan ffeir noa!”

7

Jesus a Aecchipwa Rhooan Engaang we Naiun Soamwoonin Sonotawaen Rome
(Mat 8.5-13)

¹ Oatowe Jesus a moannon aepesa oanongaen minikkeei ngaeniir aeremas kkewe, nge a noa Capernaum.

² Erhai soamwoonin sonotawaen Rome eno erhai naiun rhooan engaang ne egin aerhaengi; nge rhooan engaang we naiun a gin semwaai nge epwene oaropaen mae.

³ Oatowe soamwoonin sonotaw we a rongorong wunuunun Jesus, a aefengaar noa mwaaen kkewe aar re Jews repwe noa faingito Jesus pwe epwe itto aecchipwa tae rhooan engaang we naiun.

⁴ Ra noa reen Jesus nge ra noa aeffaenipirhe ngaeni, “Mwaaen een nge yor ipitan wopwe tipaengi.

⁵ Egin ffayeo ngaeniir aeremesarh nge iiy woan oanongan a aiuwtae eew wutteer Jews pwe aarh.”

⁶ Iwe Jesus a tapweer noa rhoawe. Ese taaw saengi iimw we igiwe soamwoonin sonotaw we a aefengaar noa rhoawe maereyaeren pwe repwe noa aengaeni pwe, “Soamwoon, wosoapw aewwaeiraesiug. Pwe saapw ngaang erhai aeremas yor ipitan reen oamw wopwe itto toonong reei noan imwaei,

⁷ nge saapw ngaang erhai aeremas yor ipitan reen aaei ipwe itto ngaeniug. Wopwe aepesa rhag epat kkepas nge rhooan engaang e naeyi epwe mamaaw tae.

⁸ Ngaang mwo nge pwan ngaang erhai mwaaen ino faen nemaeniaen erhai e soamwoon saengiaei, nge epwan yor sonotaw kka reno faen nemaeniaei. Ipwe aengaeni inaan pwe, ‘Wopwe noa!’ iwe a noa; iya aengaeni inaan pwe, ‘Wopwe itto!’ iwe a itto; iwe iya aengaeni rhooan akkiuneo, ‘Feeori minneen!’ iwe a feeori.”

⁹ Jesus a mwaar oatowe erongorong minneen; a saep sefaaen ngaeniir mwirhaen aeremas we rettapw to mwirin

nge a aengaeniir pwe, “Ipwe aengaenigaemi pwe, noan mwo Israel nge isaaen weri mwo taeppen niugiuniug een me ee!”

¹⁰ Iwe rhooawe maereyaeren soamwoonin sonotaw we ra sefaaen noa reen miniwe imwan nge ra noa weri pwe rhooan engaang we naiun a mamaaw noa.

Jesus a Aemenewa Sefaaen Tae Mwaaen we Naiun Rhoopwut we a Mae Pwiuniuwan

¹¹ Weni mwirin rhag oatowe nge Jesus a noa reen eew aepinoamw itan Nain, nge rhooan kkayeo kkewe naiun me eew pwuwaen aeremas re tapweto mwirin.

¹² Iwe oatowe a tooto reen wororaen aepinoamw we, nge ra pwigiwow erhai manimae. Mwaaen we emae i rhag naiun erhai rhoopwut iwe a mae pwiuniuwan, towunepaen aeremesaen aepinoamw we re tapweei niewe.

¹³ Igiwe Soamwoon Jesus a weri niewe, iwe a gin faayeow, nge a aengaeni pwe, “Wosoapw saeng.”

¹⁴ Iwe a faaeraeg noa a noa geotteopa kakoonaen manimae we, iwe mwaaen kkewe re pwigi ra iug noa. Jesus a iura pwe, “Anian een! Rhimwitae!”

¹⁵ Iwe manimae we a mooat tae iwe a ittae kkepas fetaen, iwe Jesus a fang sefaaen ngaeni niewe inan.

¹⁶ Iwe oanongeer noa ra igin mesag nge ra aepingepinga Deus. Iwe ra iura pwe, “Erhai profeta taegias iye a pwae me neeirh igina! Deus a itto epwe aemenewa naiun aeremas!”

¹⁷ Iwe miniwe kkepesaen Jesus a rheeoi fetaen noan oanongaen Judea me pwiuneoi kkewe oaron.

*Rhooa Kkewe John Baptist Efang Noa
(Mat 11.2-19)*

¹⁸ Iwe rhooan kkayeo kkewe naiun John Baptist ra itto reen John nge ra aengaeni oanongaen minikkewe, iwe e faingiir riiurhai me neeiir

¹⁹ nge a aefengaar noa reen Soamwoon pwe repwe noa aeiyeigi pwe, “Een miniwe reiura pwe epwe itto, aere aeipwe wewweti erhai?”

²⁰ Oatowe ra itto reen Jesus, nge ra iura pwe, “John Baptist e aefengagamaem to reemw pwe aeipwe itto aeiyeigiug aere een miniwe re iura epwe itto, aere aeipwe wewweti erhai?”

²¹ Faer oatowe rhag Jesus a aecchipwaar towunepaen aeremas saengi mesemesaen aar semwaai, nge epwan oatowowuur aniu aenneew me wooar, nge eaeffetaar noa rhooa masparh.

²² A paniuwaeniir pwe, “Oaw sefaaen noa oawwa aengaeni John meeta kka oawwa weri me rongorong: rhooa masparh ra ffatenoa, rhooa pirhemae ra faaeraeg, rhooa kaenepaai ra gacch noa, rhooa saeningapiung ra rongorong, rhooa mae

ra menawtae, nge Kkepas Mwamwaai we a fenai ngaeniir rhooa affayeo.

²³ Ifa mwo wenepwuweer rhooa se tip mwaramwar reei!”

²⁴ Weni mwirin aar rhoaan pweipwogin kkepas kkewe naiun John ra noa, Jesus a kkepas ngaeniir aeremas kkewe reen wunuunun John: “Igin oawwa noa reen John noan *desert* we, meeta minne oawniwaennei pwe oawpwe noa weri? Efoarh fetin e mwoaroro reen aaeng?”

²⁵ Meeta minne oawnoa pwe oawpwe weri? Erhai mwaaen kka e memmengaag tae mengaag nning? Rhooa kkomwu rememmengaag tae taeppen minikken a imwu reno rhag noan imwaen *king*!

²⁶ Aengaeniaei, meeta oawnoa pwe oawpwe weri? Erhai profeta? Ooa, ennetaen, oawwa weri erhai etaegias saengi erhai profeta.

²⁷ Pwe John miniwe Pwapwior we eSantus eiura pwe, ‘Deus a kkepas, ngaang ipwene fangetiw naeyi rhoaan pweipwogin kkepas me weni mmwoamw pwe epwe noa maeneti ennepoamw.’

²⁸ Ipwe aengaenigaemi pwe John ina etaegias saengi aeremas towunap kka reno wooan soanop. Iwe nge manna oarosaen git me noan minna Mweoiun Deus ina etaegias saengi John.”

²⁹ Oanongeer aeremas nge rerongorong miniwe; iir me rhoaan iyoiyon *tax* kkewe rerongorong minikka mwaeniaen Deus nge ewenewen, iwe oanongeer noa ra noa paptismus reen John.

³⁰ Iwe nge Pharisees me sinsein anniug kkewe rese tipaeni aen Deus oatoat ngaeniir, iwe ina minne rese tipaeni no repwe paptismus reen John reen.

³¹ Jesus a pwan iura pwe, “Iwe, meeta ipwe aweweei ngaeniir aeremesaen mweoi e igina? E ifa wunuunuur?”

³² Ra aeffitaeg ngaeniir rhag wonigaet kkewe remooat noan nenien chuwaai. Eew mwiirh nge reiyaekkepwas ngaeniir aaemweoi, ‘Aemaem aeiya pwai kker ngaenigaemi nge aaemi oawse maan! Aemaem aeiya arhiuwerhiuw, nge aaemi oawse saeng!’

³³ John Baptist a itto, e aecchigipin nge ese pwan iun *wine*, nge aaemi oawiura pwe, ‘Iiy eyor aniu aenneew wooan!’

³⁴ A itto Naiun Aeremas, emwommwongo nge eiun nge oawiura pwe, ‘Oawpipiiy mwaaen een! Iiy erhai mwaaen mwongonap me iun *wine*, nge maereyaereer rhoaan iyoiyon *tax* me rhooa monofit!’

³⁵ Iwe nge minna repiaen Deus a pwae noa pwe ennet reer aeremas kka re tapweei.”

Jesus me Reen Imwaen Pharisee we Simon

³⁶ Erhai Pharisee etengaeg Jesus epwe noa mwongoon faaef reen, iwe Jesus a noa reen iimw we imwan a noa mooat tiw pwe repwene mwongo.

³⁷ Noan aepinoamw we eno erhai rhoopwut monofit ee. Niewe erongorong pwe Jesus emwongo reen iimw we imwaen Pharisee we, iwe a pwigito eew neoningas,

³⁸ iwe a noa iu mwirin Jesus oaron pirheen nge a saeng nge e oasopwutiw rhaniun mesan woan pirheen Jesus. Iwe a aepaena ngaeni aennirhimwen nge a faeisongei miniwe pirheen Jesus, iwe a aepiti ngaeni neoningas.

³⁹ Igiwe Pharisee we a weri miniwe nge a kkepastiw rhag woan nge a iura pwe, “Ngaere igine ennet pwe erhai profeta, mwaaeneei nge epwe pwae ngaeni iyo rhoopwut een me meeta taeppen aeremas iye e itto geotteopa; pwe rhoopwut een iye erhai maan monofit!”

⁴⁰ Jesus a kkepas nge a iura pwe, “Simon, eyor minne ipwe aengaeniug mwo.”

Simon a iura pwe, “Ooa wo sinsei, aengaeniaei?”

⁴¹ Jesus a rhaepetae aan fioang, “Riurhai mwaaen remonofit senaapiy me reen erhai rhooan fang senaapiy. Erhai emonofiti nimapwiugiuw faifayiun senaapiy *silver*, nge iwe erhai nimeig.

⁴² Esooar erhai rhoawe e erhiuwen mmwenen aera minikkiwe monofitiir, iwe mwaaen we a oamoaw noa minikkewe monofitiir. Iwe ifa erhai neeiir ne epwe temoag aan aerhaengi mwaaen we?”

⁴³ Simon a paniuwaeni pwe, “Imaengi nge epwe mwaaen na e temoag minna e aar me reen monofitin.”

Jesus a iura pwe, “Ennet reemw.”

⁴⁴ Iwe a toagun ngaeni rhoopwut we nge a mwaenieniy ngaeni Simon, “Woweri rhoopwut een? Ngaang itto noan minne imwoamw, nge esooar rhaan e wongatto pwe toa-toan pirheei, nge iya faer toafi pirheei reen rhaniun mesan nge e aepaena ngaeni aennirhimwen.

⁴⁵ Wose faeisongei aei reen oamw aewenimmwaeyaei, nge iiy iye esaaen iug noa mwo reen aan faeisongei pirheei saengi rhag oatowe itoto.

⁴⁶ Esooar tiikka e wofang pwe aepitaen rhimwei, nge iiy a faer aepiti ngaeni pirheei neoningas.

⁴⁷ Iwe ina minne ipwe aengaeniug pwe, aerhaengerhaeng temoag e a pwaeri noa, ina a tiwegin pwe oanongaen minikkiwe monofitin nge a saenetaeg noa. Iwe nge iyo na e egius rhag monofit na e aessaenetaegiy nge ina e egius rhag aan aerhaengerhaeng.”

⁴⁸ Iwe Jesus a aengaeni rhoopwut pwe, “A saenetaeg noa monofitimw.”

⁴⁹ Rhooa kkewe aaemweoi iwe remooat reen *table* we ra iura fengaenni pwe, “Iyo minne epwan gaen aessaenetaegiy aar aeremas monofit?”

⁵⁰ Nge Jesus a aengaeni rhoopwut we pwe, “Wa menaw reen oamw niugiuniug; wone noa noan oapoas.”

8

Rhoopwut Kkewe re Tapweei Jesus

¹ Enoa faeiyegeius noa Jesus a noa fetaen noan aepinoamw me pwugos kkewe, reen aan fenaiuw fetaeneei Kkepas Mwamwaai we reen Mweoiun Deus. Rhooran kkayeo kkewe seig me riiurhai re tapweei,

² iwe me pwan aekkaerhai rhoopwut kkewe ra cchipw saengi aniu aenneew me mesemesaen semwaai: Maria (we pwan itan Magdalene), niewe Jesus e oatowowuw fusiومان aniu aenneew me wooan;

³ Joanna we rhooran ngaenneyaen Chuza we enemaeni minikkiwe pisaegin Erotos; me Susanna, me pwan towuneppeer rhoopwut kkewe regaen pwan tipaengi fetaeneei Jesus me rhooran kkayeo kkewe naiun.

Fioangon Awewe Erhai Rhooran Aeperes Faiun Foat (Mat 13.1-9; Mark 4.1-9)

⁴ Aeremas ra maeto reen Jesus saengi eew me eew aepinoamw; iwe enoa mweoiuto eew pwuwa temoag nge Jesus a fioangei ngaeniir eew fioangon awewe:

⁵ “Eno erhai mwaaen a noa pwe epwe noa aeperes faiun foat. Igiwe e aeperes fetaen foat kkewe, aekkaefai faiun ra ppiungiutiw wenepigin aan we, nge repwuriir noa, nge man aeniaen epwan anginoa.

⁶ Aekkaefai ra ppiungiutiw wooan kaenefai, renoa pwaech tae nge reppwass noa pwe ese patapat ppweoniun.

⁷ Aekkaefai ra ppiungiutiw neeiin irae towfanfan. Iwe irae towfanfan kkewe ra menawtae nge ra fittitae woar iwe ra maenoa.

⁸ Nge aekkaefai ra ppiungiutiw wooan ppweon mwamwaai, iwe ra menaw tae nge ra uwa, nge efoarh nge epwe epwiugiuiw uwaan.”

Iwe Jesus a soapwei noa, “Iyo eyor saeningan, epwe rongorong!”

Faen Aaen Jesus Kkepesaen Fioangon Awewe (Mat 13.10-17; Mark 4.10-12)

⁹ Rhooran kkayeo kkewe ra aeiineow Jesus meeta faen fioang we.

¹⁰ Iwe a paniuwaeniir pwe, “Deus a fang ngaenigaemi pwe oawpwe giuneei kkepas mwoanomwoanon minna Mweoiun Deus, nge iga aaemweoi ina epwe toowow noan fioangon awewe, pwe ina repwene pipiiy nge resoapw weri, nge ina repwene aiussaening nge resoapw metaf reen.

*Jesus e Aemmetefa Fioangon Awewen Rhooan Foat we
(Mat 13.18-23; Mark 4.13-20)*

¹¹ “Teen faaen fioang we: faiun foat we ina kkepesaen Deus.

¹² Faiun kkewe reppiungiutiw wenepeigin aan, ra aeffitaeg ngaeni rhooawe re rongorong kkepesaen Deus, nge e itto rhag Saetan nge e itto pwigi noa miniwe kkepesaen Deus me reer, pwe rese niugiuniug iwe ra menaw.

¹³ Nge faiun kkewe reppiungiutiw wooan kaenefai, ra aeffitaeg ngaeni rhooawe re rongorong kkepas we nge ra kker aegini. Nge ina rhag ese itinong nee tipeer; pwe egiufet rhag aar niugiuniug, pwe eitto rhag oaton sessoat nge ra mwetekkaein fangetae.

¹⁴ Nge faiun kkewe reppiungiutiw neeiin irae towfanfan, ra aeffitaeg ngaeni rhooawe re rongorong; nge aiunaeng me naiwiis me aemmesaeigaen wooan feoniufan a fittiir noa iwe ese mmarh minikkewe uwaan.

¹⁵ Nge faiun kkewe reppiungiutiw noan ppweon mwamwaai, ra aeffitaeg ngaeni rhooa kkewe re rongorong minna kkepesaen Deus; nge ra aeiseisa nong noan ennetin me mwamwaaiun pwunnoor, nge ra aetemaegin rhag toori aar uwa.

*Eew Oappwun Eno Faaen Saepiy
(Mark 4.21-25)*

¹⁶ “Esooar ne egaen fifi oappwun nge a iseni nong faaen saepiy ngaere ngoanoa faaen pooa. Pwe refaer pwigi ngaetae wooan nenien oappwun pwe aeremas repwe seram igine ra toonong.

¹⁷ “Oanongaen meeta ewop noa epwene pwae noa, nge oanongaen meeta epwanipwan nge epwe pwae noa noan seram.

¹⁸ “Oawpwe afaennigaemi reen wunuunun aaemi aiussaening; pwe iyo a yor meeta aan nge repwe pwan fang ngaeni, nge iyo kena esooar nge refaer pwigi saengiir mwo nge giufetin minikkena re maengiy pwe eno reer.”

*Rhoopwut we Inaen Jesus me Mwaaen Kkewe Pwiin
(Mat 12.46-50; Mark 3.31-35)*

¹⁹ Rhoopwut we inaen Jesus me mwaaen kkewe pwiin reitto reen, nge rese mmwenen rhungaeni pwonno rhooanap we.

²⁰ Nge erhai a aengaeni Jesus pwe, “Niewe inoamw me mwaaen kkewe pwiimw ikka reno niugiun, nge remwerhaen repwe rhuungiug.”

²¹ Jesus a aengaeniir oanongeer pwe, “Maan na inaei me mwaaen kena pwiyy ina rhoakka re rongorong kkepessaen Deus nge re tapweei.”

Jesus a Oapoassaetiw Eew Aaeng Choaw
(*Mat 8.23-27; Mark 4.35-41*)

²² Eraaen Jesus a teotae wooan efoarh pwoot Iiy me rhoaan kkayeo kkewe naiun nge a aengaeniir pwe, “Oaw sipwe noa epeig meoneoiniun eei.” Iwe ra noa.

²³ Igiwe ra sesseraeg noa nge Jesus a maiur noa. Ese mmwaei mwo nge a noa itto eew aaeng choaw noan meoneoiniun we, iwe pwoot we a mweomweoyius nge rhooa kkewe ra no noan oawoas.

²⁴ Rhoaan kkayeo kkewe ra noa reen Jesus ra noa faingitae, ra iura pwe, “Soamwoon, Soamwoon! Sipwene mae!”

Jesus a mmasetae a kkepasa seor ngaeni aaeng we me noa we pwe repwe poas noa; iwe ra iug noa, nge a igin rhoaraeg noa.

²⁵ Iwe a aengaeniir rhoaan kkayeo kkewe pwe, “Eno iya aaemi niugiuniug?”

Rhoawe ra riutae nge ra mesag, nge ra iura fengaenni woar pwe, “Iyo mwaaeneei? Emwaenieniy ngaeni aaeng me noa, nge re tapweei mwaenian!”

Jesus a Aecchipwa Erhai Mwaaen Eyor Aniu Aenneew Wooan
(*Mat 8.28-34; Mark 5.1-20*)

²⁶ Jesus me rhoaan kkayeo kkewe naiun ra saei saengi Galilee nge ra noa Gerasa, iwe eno peigin meoneoiniun we me eotiw.

²⁷ Igiwe Jesus a tiwegitae ppiy, nge a noa rhuungi erhai mwaaenin aepinoamw we nge eyor aniu aenneew wooan. A ssiunaei aaen mwaaen een se memmengaag nge ese pwan nonotiw no noan imwan, pwe a noa no fetaen rhag noan paeyi kkewe.

²⁸ Iwe oatowe eweri Jesus, nge a igin eor noa, nge a foatotiw me wenimmwaen Jesus nge a aepwesaegini pwe, “Jesus, mwaaen na Naiun Deus na oarosaen taegias! Meeta minne wotipaeni me reei? Iya aeffaenipirheog pwe wosoapw aewwaeiraesiaei!”

²⁹ Eiura minnee pwe iga Jesus a oatowowuw mwuniaan aenneew we me wooan. Towunepaen oatokka epwe kkaein ngaeni, nge inamwo iga e geogeeo paiun me pirheen ngaeni ccheen nge egaen mweoiti, iwe mwuniaan we a pwigi noa noan *desert*.

³⁰ Jesus a aeineow pwe, “Meeta itoamw?”

Mwaaen we a paniuwaeni pwe, “Itaei nge Cchon,” pwonno iga a towunap mwuniaan wartae wooan.

³¹ Mwuniaan kkewe ra aeffaenipirhee Jesus pwe esoapw fangenoa iir noan niipw we e igin nennoan.

³² Eew cchon sino re mwongo fetaen wooan eew taeiit. Iwe mwuniaan kkewe ra aeffaenipirhe ngaeni Jesus pwe epwe aeweraar tae woar sino kkewe, iwe a aeweraar tae woar.

³³ Iwe aniu kkewe ra toowow me wooan mwaaen we nge ra wartae woar sino kkewe. Cchon sino we ra fattapw tiw rhag me wenepeigin rhug we ittiw noan meoneoiniun we itinong moapw noa.

³⁴ Mwaaen kkewe rhoan ffoanon sino reweri meeta we a wen, iwe ra fattapw noa arheoiuwa fetaenei noan aepinoamw we me menaai kkewe.

³⁵ Aeremas ra maeg wow pipiiy miniwe a wen, nge renoa itto reen Jesus ra itto rhuungi mwaaen we retowow mwuniaan me wooan, pwe emooat wenepeigin pirheen Jesus, nge e memmengaag nge iiy man reepiy; iwe rhoa kkewe ra igin mesag.

³⁶ Rhoawe reweri miniwe ra fioangei ngaeniir aeremas wunuunun aar aniu aenneew kkewe toowow me wooan mwaaen we.

³⁷ Iwe rhag nge oanongeer aeremesaen pwiuneoi we ra tingoareei Jesus epwe nigitiir, pwe igiwe ra igin mesag. Iwe Jesus a teotae wooan pwoot we a noa.

³⁸ Mwaaen we etowow aniu kkewe me wooan a aeffaenipirhe ngaeni Jesus epwe tapweei.

Nge Jesus a aefenganoa, nge a aengaeni pwe,

³⁹ “Sefaaen noa neepwugusoamw nge wa noa fioangei meeta e Deus a feeori ngaeniug.” Iwe mwaaen we a noa fetaen noan aepinoamw we a noa fioangei fetaenei meeta we Jesus a feeori ngaeni.

Rhoapwut we Naiun Jairus me Rhoapwut we e Geotteopa Mengaagiun Jesus

(Mat 9.18-26; Mark 5.21-43)

⁴⁰ Oatowe Jesus enoa sefaaeniti peigin meoneoiniun we epeig, aeremas ra itto aetiwa, pwe igiwe ra wetiwet noa rhag iiy.

⁴¹ Erhai mwaaen itan Jairus a noa itto; iiy erhai soamwoonin wutteeer Jews. A itto foatoti weni mmwaen pirheen Jesus a aeffaenipirhe ngaeni epwe tapweei noa reen iimw na imwan,

⁴² pwe igiwe rhoapwut we naiun iwe enaaen seig me ruwowu raegin a oaropaen mae.

Igiwe Jesus a tapweei noa nge aeremas ra igin itto aetietiy ngaeni.

⁴³ Eno erhai rhoopwut neeiir ese iug aan peitaeg noa noan seig me ruwowu raeg, nge esooar erhai ne emmwenen aecchipwa.

⁴⁴ Rhoopwut we a itto me niugiusagiuriun Jesus a itto geotteopa soapwon mengaagiun, iwe rhag nge e iug noa aan noa epeig faniuw.

⁴⁵ Nge Jesus a aeineo pwe, “Iyo we e geotteopayaei?”

Oanongeer rhoowe nge re iura pwe saapw iir, nge Peter a iura pwe, “Soamwoon, regin ssow rhooakka re pwaeniaeniug noa me aetietiy ngaeniug.”

⁴⁶ Jesus a iura pwe, “Erhai imwu egeotteopayaei, pwe imeyaefi maemaewaei aan toowow me wooai.”

⁴⁷ Iwe rhoopwut we a giuneei pwe a pwae miniwe efeeori, iwe a noa faaeraeg ngongongoto a itto aerheei tiw me weni mmwaen pirheen Jesus. Weni mmweer rhooanap we iwe niewe a aengaeni faaen minne egeotteopa reen me wunuunun aan iug noa aan noa epeig faniuw oatowe egeotteopa.

⁴⁸ Jesus a aengaeni niewe pwe, “Naeyi, oamw niugiuniug minne a aecchipwoag tae. Wonoa noan oapoas.”

⁴⁹ Nge igiwe Jesus erhiuwen kekkepas, nge erhai rhooan oarong a noa itto me reen imwaen Jairus nge a aengaeni Jairus pwe, “A mae noa rhoopwut we noawumw, wosoapw rhiuwen angiurhiu no Sinsei na.”

⁵⁰ Jesus erongorong miniwe nge a aengaeni Jairus pwe, “Wosoapw mesag; niugiuniug rhag ina nge epwe menaw tae.”

⁵¹ Oatowe enoa toorito iimw we, ese tipan pwe aeremas repwe tapweei nong nee iimw pwe aeggaen Peter rhag me John me James iwe me mwaaen we seman me inaen aet we.

⁵² Oanongeer aeremas kkewe noan iimw we ra saeng woan aet we. Jesus a iura pwe, “Oawsoapw saeng; aeteen iye ese mae, pwe aan rhag maiur!”

⁵³ Rhooa kkewe ra kekkaei aegini pwe igiwe re giuneei pwe aet we a mae.

⁵⁴ Jesus a ammwarhiu tae paiun nge a iura pwe, “Rhimwitae, moawwerh!”

⁵⁵ Iwe a menaw tae nge a rhiuwei rhimwitae rhag. Iwe Jesus a aengaeniir repwe ngaenneei anan mwongo.

⁵⁶ Mwaaen we seman me inaen aet we ra riutae, nge Jesus a ammwir ngaeniir pwe resoapw aengaeni mwo nge erhai meeta e a wen.

9

Jesus a Aefenaar Noa Rhoawe Seig me Riiurhai
(Mat 10.5-15; Mark 6.7-13)

¹ Jesus a faingi fengaenniir rhoawe seig me riiurhai a fang ngaeniir nemaenieer me aar manaman pwe repwe asiur aniu aenneew me aecchipwaar rhoa semwaai.

² Iwe a aefenaar noa pwe repwe noa fenaiuw minna Mweoiun Deus nge re aecchipwaar rhoa semwaai.

³ A aengaeniir pwe, “Esooar minne oawpwe pwigi woan aaemi saei: oawsoapw pwigi yomi, oawsoapw pweipwog aaemi pwetoaw, oawsoapw pweipwog mwongo, oawsoapw pweipwog senaapiy, oawsoapw pwan pweipwog ssiuwenin mengaagiumi.

⁴ Ese tiwegin iya re aetiwaegaemi me ee, oawno noan iimw naan toori aaemi oawpwe siu me reen aepinoamw naan;

⁵ iwe nge pwiuneoi na aeremas rese aetiwaegaemi me ee, nge oawwa siusaengi pwiuneoi we nge oawwa iurhiugi noa ppweoniun me woan pirhemi pwe eew atapeonneog ngaeniir.”

⁶ Rhoan kkayeo kkewe ra noa fetaen noan aepinoamw kkewe, ra noa fenaiuw Kkepas Mwanwaai we nge re aecchipwaar aeremesaen oanongaen pwiuneoi.

Aaen Eroles Pwurhopwurh Fetaen
(Mat 14.1-12; Mark 6.14-29)

⁷ Oatowe Eroles, we soamwoonin Galilee, erongorong minikkewe a wen a igin pwurhopwurh fetaen, pwe aaemweoi re iura pwe John Baptist a menaw sefaaen.

⁸ Aaemweoi re iura pwe Elijah minne a pwaeto, iwe nge pwan aaemweoi re iura pwe erhai *profeta* kkewe mweoiwe minne a menaw sefaaen.

⁹ Eroles a iura pwe, “John iwe iya gopiy noa iiuwaen, nge iyo mwaaneei ironorong kkepesan?” Iwe a aekkaetemaegini fetaeneei aan epwe noa weri Jesus.

Jesus e Oamwongoor Nimingeras Aeremas
(Mat 14.13-21; Mark 6.30-44; John 6.1-14)

¹⁰ Iwe ra sefaaeneto oapostonus kkewe ra itto aengaeni Jesus meeta kkewe ra feeori. A wummwuur, iwe iir rhag ra noa reen eew aepinoamw itan Bethsaida.

¹¹ Igiwe pwuwaen aeremas we ra rongorong ra pwan ttapw noa mwirin. Jesus a aewenimmwaar, a fenaiuw ngaeniir wunuunun minna Mweoiun Deus iwe nge e aecchipwaar rhoakka re semwaai.

¹² Noan faefin we nge rhoan kkayeo kkewe naiun ra itto reen nge ra aengaeni pwe, “E igin anug noa igei nge a pwan

pwoong. Aefengaar noa aeremas kaan nee aepinoamw pwe repwene noa sipegin chuwaai aeneer mwongo.”

¹³ Jesus a faer aengaeniir pwe, “Oawfang ngaeniir aeneer.”

Nge ra iura pwe, “Niffai rhag fenoawa me riurhai iig minne eno remaem. Womwerhaen pwe aeipwe noa nge aeiya noa chuwaai to aeneer rhoanap een?”

¹⁴ (Repwe nimingeras mwaaen reno igiwe.)

Jesus a aengaeniir rhoan kkayeo kkewe naiun pwe, “Oaw aengaeniir pwe repwe mooat tiw nge repwe aenimeig aeremas noan eew me eew pwoatu.”

¹⁵ Weni mwirin aar rhoan kkayeo kkewe feeori miniwe,

¹⁶ nge Jesus a pwigi fenoawa kkewe niffai me iig kkewe riurhai, a fattae naaeng nge a fang ngaeni Deus aan aerhigerhig. Iwe a giniiy fenoawa kkewe nge a fang ngaeniir rhoan kkayeo kkewe pwe repwe inetiy wooar aeremas kkewe.

¹⁷ Oanongeer nge ra maegin mwongo iwe ra mat noa. Iwe rhoan kkayeo kkewe ra oawuta seig me ruwowu rhiug reen nuseg kkewe.

Peter e Iura pwe Jesus Iwe Kristus

(Mat 16.13-19; Mark 8.27-29)

¹⁸ Igiwe Jesus noa rhag aan noa maeipin, rhoan kkayeo kkewe ra noa itto reen. Iwe a aeiyeigiir, “Aeremas re iura pwe ngaang iyo?”

¹⁹ Ra paniuwaeni, “Aaemweoi reiura pwe een John Baptist, nge aekkaaemweoi reiura pwe een Elijah, nge pwan aekkaaemweoi reiura pwe een erhai *profeta* kkewe mweoiwe nge wa menaw sefaaen.”

²⁰ A aeiineeor pwe, “Nge aaemi, oaw iura pwe ngaang iyo?”

Peter a paniuwaeni pwe, “Een Kristus we Naiun Deus.”

Jesus a Aepesa Waeiraesin me Maenoan

(Mat 16.20-28; Mark 8.30–9.1)

²¹ Jesus a aetiwenigiy ngaeniir pwe resoapw aengaeni mwo nge erhai minnee.

²² Nge a pwan aengaeniir pwe, “Mwaaen na Naiun Aeremas ina epwe gin affayeo nge eserhoawun me neeiir mwaaen kkewe aar me soamwoonin patere me sinsein aniug. Repwene niy noa nge eoniuraen mwirin nge a menaw sefaaen.”

²³ Nge a aengaeniir oanongeer pwe, “Erhai ne emwerhaen tapweaei, epwe aerheei noa niunniwaennen wooan oanongan, a aiufera aan kurus oanongaen raaenin, nge a tapweeito mwiriy.

²⁴ Pwe iyo emwerhaen ammwarhiu menewan, epwe ppiung saengi. Nge iyo eppiung saengi menewan pwonno ngaang, epwe giuneei menaw.

²⁵ Epwe yor ipitan igine eyo ngaeniug oanongan noa faeinaengiy nge a soano saengiug menewoamw? Esooar ipitan!

²⁶ Aere wosaew aeginiaei me fenai kka aaei, ina nge mwaaen we Naiun Aeremas epwe pwan saew aeginiug igine a noa itto noan nningen me nningen mwaaen na Seman me nningeer angkenus kena resantus.

²⁷ Ipwe aniugiuniugiuw ngaenigaemi pwe eyor aemweoi aeremas igei resoapw mae toori oatona repwe weri minna Mweoiun Deus.”

Nniuwen Noan Wunuunun Jesus

(Mat 17.1-8; Mark 9.2-8)

²⁸ Epwe eew noa *week* mwirin aan Jesus aepesa minikkeei, nge a pwigiir Peter, John, me James ra ittae maeipin woan eew rhug.

²⁹ Oatowe emaeipin, a nniuwen noa wunuunun woan mesan, nge miniwe mengaagiun a maretin pwerhepwerh noa.

³⁰ Ese mmwaei mwo nge riiurhai mwaaen ra itto mwae-nieniy ngaeni. Iir Moses me Elijah,

³¹ repwaeto noan nning seramram nge ra itto mwaenieniy ngaeni Jesus reen wunuunun aan epwene pwaeritae aen Deus koat reen aan epwe mae noa me noan Jerusalem.

³² Peter me rhooawe rhoaniuwan ra igin maiur, nge renoa mmasetae ra weri miniwe seramramaen nningen Jesus me mwaaen kkewe riiurhai iwe re iu oaron.

³³ Igiwe mwaaen kkewe riiurhai ra siunoa, nge Peter a aengaeni Jesus pwe, “Sinsei, a igin gacch pwe sino igei. Aeipwe aiuwtae enuw iimw tampwoning, eew imwoamw, eew imwaen Moses, me eew imwaen Elijah.” (Ese metefaaegini faaen minikkiwe e aepesa.)

³⁴ Igiwe e rhiuwen kkepas, a itto eew toapw pwaniur noa faaen niuriun; rhooran kkayeo kkewe ra mesag reen toapw we a itto pwaniur noa.

³⁵ Eew mangiungiu a noa ittiw me noan toapw we, “Ieen mwaaen e naeyi, iye iya finitae—oaw aiussaening ngaeni!”

³⁶ Iwe mangiungiu we a iug noa, iwe a Jesus noa rhag. Rhooran kkayeo kkewe ra anniug aegini noa rhag miniwe, nge esoar mwo erhai ne re aengaeni meeta we ra weri reen oatowe.

Jesus e Aecchipwa Erhai Aetemwaaen Eyor Aniu Aenneew Wooan

(Mat 17.14-18; Mark 9.14-27)

³⁷ Mmasetaeen raen we eraen nge Jesus me rhooran kkayeo kkewe eoniurhai ra ittiw me woan rhug we, nge eew pwuwa temoag ra itto reen Jesus.

38 Erhai mwaaen a aekkepwas me noan pwuwa we, “Sin-sei! Faaen pirhemw, itto pipiiy aet e naeyi—ieen rhag naeyi mwaaen!

39 Oate aniu aenneew een epwe kkaein tiw wooan, nge erhiuwen apwas rhag nge a ittiw cchech fetaen, pwuropwur wow noan ewan; eaewwaeiraesi fetaeneei rhag nge esa siusaengi no!

40 Iya aeffaenipirhe ngaeniir rhoon kkayeo kkewe noawumw pwe repwe oatowowuw, nge ese mmwen ngaeniir.”

41 Jesus a paniuwaeni pwe, “Ifa mwo aaemi se niugiuniug me ruguppin faaen oateei! Epwe ifa ssiunaein aaei ipwe no reemi? Epwe ifa wusun aaei noaneenaai reemi?” Iwe nge a aengaeni mwaaen we pwe, “Pwigito aetemwu noawumw iga.”

42 Igiwe aetewe a itto reen nge aniu aenneew we a aerheitiw wooan ppweon a ittiw cchech fetaen. Jesus a aerh ngaeni aniu aenneew we pwe epwe toowow, iwe a aecchipwa aet we, iwe a iseni sefaaeniy ngaeni mwaaen we seman.

43 Oanongeer rhoowe ra mwaar reen maemaewaen kke-menaen Deus.

Jesus a Pwan Aepesa Wunuunun Aan Maenoo
(Mat 17.22-23; Mark 9.30-32)

Oanongeer aeremas kkewe nge ra riutae reen meeta kkewe Jesus a feori nge a aengaeniir rhoon kkayeo kkewe naiun pwe,

44 “Oawteorh maniuwegini minne ipwe aengaenigaemi! Mwaaen we Naiun Aeremas epwene yonong nee paiiur aeremas.”

45 Iwe nge iir rhoon kkayeo kkewe naiun rese metefaaegini faaen miniwe mwaenian. Miniwe ekooap saengiir pwonno rete metefaaegini, iwe iir ra mesag pwe repwe aeiyeg.

Iyo e Oarosaen Taegias?
(Mat 18.1-5; Mark 9.33-37)

46 Iwe rhoon kkayeo kkewe ra aengiingi fengaen neeiir ngaere iyo e oarosaen taegias.

47 Jesus a giuneei niunniywaen kkewe aar, iwe a pwiigi erhai wonigaet a aiuw tiw oaron,

48 a aengaeniir pwe, “Iyo e aetiwa aeteen faaen itaei, ina e aetiwaeyaei; nge iyo erhai ne e aetiwaeyaei, ina e aetiwa aeremas na efangeto ngaang. Pwe iyo na oarosaen sessoan neemi nge ina iiy minne oarosaen taegias.”

Iyo na Ese Appaniuwaenigaemi Nge Ina Rhoaniuwaemi
(Mark 9.38-40)

49 John a iura pwe, “Sinsei, aeiweri erhai mwaaen eoatowowuw aniu aenneew faaen itoamw, nge aeiya aengaeni pwe epwe iug noa pwe saapw iiy rhoaniuwarh.”

50 Jesus a aengaeni pwe, “Oawsoapw aiugiu noa, pwe iyo na ese appaniuwaenigaemi ina rhoaniuwaemi.”

Eew Aepinoamwon Samaria Ese Aetiwa Jesus

51 Igiwe a arapeto oaton aeen Jesus noa naaeng, a aettiweginiy nee tipan epwe noa Jerusalem.

52 A fangenoa rhoan pweipwogin kkepas repwe noa woan eew aepinoamw me Samaria repwe noa oamoanatae oanongaen meeta me weni mmwan.

53 Iwe nge aeremesaen pwiuneoi we rese mwerhaen aetiwa pwe igiwe epwae ngaeniir pwe epwene noa Jerusalem.

54 Igiwe James me John ra giuneei miniwe ra aengaeni pwe, “Soamwoon, wo mwerhaen pwe aeipwe tingoar noa aengaet naaeng pwe epwe ittiw figiir noa?”

55 Jesus a toagun ngaeniir a soong ngaeniir.

56 Iwe Jesus me rhoan kkayeo kkewe naiun ra noa woan eew noa aepinoamw.

Rhoan Mwerhaen Tapweei Mwirin Jesus

(Mat 8.19-22)

57 Igiwe ra noa erhai mwaaen a aengaeni Jesus, “Ese tiwegin iga wopwe noa ee nge ngaang ipwe tapweog.”

58 Jesus a aengaeni pwe, “Fox eyor ngeteer, man aeniaen eyor feseer, iwe nge mwaaen we Naiun Aeremas esooar eew pwiuneoi ne epwe noa wonotiw aseoseo ee.”

59 Jesus a pwan aengaeni erhai mwaaen, “Itto tapweaei.”

Iwe mwaaen we a paniuwaeni pwe, “Soamwoon, mmwaen fang mwo ngaang ipwe sefaaen noa nipwaeni noa mwaaen na semaei.”

60 Jesus a paniuwaeni pwe, “Nigitiir rhoa mae repwe sipegin nipwaeni aar mae. Nge een wa noa arheoiuwa fetaeneei kkepesaen minna Mweoiun Deus.”

61 Pwan erhai mwaaen a iura, “Menap, ipwe tapweog; nge ipwe mmwaen noa mwo oapwongiir aaei famini.”

62 Jesus a aengaeni pwe, “Erhai ne epwe rhaepetae aan engaengaen maat nge eeffan sefaaen nge iiy esoapw firh ngaeni minna Mweoiun Deus.”

10

Jesus e Aefenaar Noa Rhoawe Fisiig me Riurhai

1 Mwirin minneen nge Soamwoon a finiir fisiig me riurhai mwaaen, nge a aefenaar noa e repwe riurhai me riurhai,

pwe repwe gommw noa noan eew me eew aepinoamw me taeninimw kkewe iiy epwe noa e.

² Iya aengaeniir pwe, “A towunap uwaen menaai, nge re fitiman rhag rhooran gin. Oawmaecipin ngaeni soamwoonin maat we pwe epwe fangenoa rhooran engaang pwe repwe giniiy oanongaen uwaen maat we aan.

³ Oawnoa! Ipwene aefengaegaemi noa pwe oawpwene weei rhag *sheep* neeiir *wolves*.

⁴ Oawsoapw pweipwog aaemi saiff ngaere pwetoaw ngaere nokkaemi; nge oawsoapw iunoa pwe oawpwe koapwong ngaeniir aeremas me wooan ennap.

⁵ Ese tiwegin eew iimw ne wopwe toonong noan nge mesaemmwaen minna wopwe iura ina, ‘Oapoas epwe no reer rhooran imweei.’

⁶ Ngaere eyor erhai aeremas ne epoas eno iginaan, iwe nge oawwa nigitiw kkepessaen oapoas we aaemi reen; iwe ngaere esooar, ina nge oawwa pwigi sefaaenyi kkepessaen oapoas we aaemi.

⁷ Oawpwe no rhag noan iimw we, nge oawmwongo nge oawiun ese tiwegin meeta refang ngaenigaemi, pwe rhooran engaang ina epwe toowow paniuweer. Oawsoapw siu me reen eew iimw nge oawnoa me reen eew.

⁸ Ngaere igine oawtonong noan eew aepinoamw nge re aetiwagaemi, oawmwongo meeta refang ngaenigaemi,

⁹ oaw aecchipwaar rhooa semwaai noan aepinoamw naan, nge oaw aengaeniir aeremas kena reno noan pwe, ‘Mweoiun Deus a arapeto reemi.’

¹⁰ Ngaere oawitinong noan eew aepinoamw nge rese aetiwagaemi, nge oawwa itiwow wooan ennap nge oawwa iura pwe,

¹¹ ‘Eew mwo ppweoniun noan aepinoamw e aepinoamwomi iye emmwarh tae wooan pirhemaem nge iye aeipwene peonitiw reemi. Nge oawwa maengi rhag pwe minna Mweoiun Deus ina a arap ngaenigaemi!’

¹² Iya aengaenigaemi pwe noan Raaenin Apwiung nge Deus epwe faayeow re Sodom memmweer aeremesaen aepinoamw naan!

Aepinoamw Kkewe Rese Niugiuniug (Mat 11.20-24)

¹³ “Ifa mwo aenneewan ngaenigaemi aaemi rhooran Chorazin! Pwan ifa mwo aenneewan ngaenigaemi aaemi rhooran Bethsaida! Aere kkeman kka refeeori me wooan igeei minne refeeori me wooan Tyre me Sidon, ina nge a ssiunaei rhag aar moaat tiw, nge ra memmengaag tutu nge

re oamworomwor tae fenang wooar, pwe epwe pwae noa aar toagun saengi monofit!

¹⁴ Noan Raaenin Apwiung nge Deus epwe faayeow re Tyre me re Sidon me mmwaemi.

¹⁵ Nge een Capernaum! Wotipaeni wopwe tooritae naaeng? Een wopwe ppiungiutiw noan nifierno!”

¹⁶ Jesus a aengaeniir rhoan kkayeo kkewe naiun pwe, “Iyo e aiussaening ngaeniug e aiussaening ngaeniaei; nge iyo e oapwutaegaemi e oapwutaeyaei, nge iyo e oapwutaeyaei e oapwuta iyo na efangeto ngaang.”

Rhoawe Fisiig me Riiurhai ra Sefaaeneto

¹⁷ Mwaaen kkewe fisiig me riiurhai ra sefaaeneto noan aar igin kker. Ra iura, “Soamwoon, mwuniaan mwo nge re aiussaening mwaeniaemaem reen kkemenaen minna itoamw!”

¹⁸ Jesus a paniuwaeniir pwe, “Iweri Saetan aan ppiungiutiw pwe eweei rhag ffiutiwen weriwer me noan naaeng.

¹⁹ Aiussaening! Iya ngaennegaemi kkaeinemi, pwe epwe mmwen pwe oawpwe faaeraeg wooar sowufaeng me maen-nipwong, nge oawniiy noa minikkena kkaeinen mwuniaan nge esooar minne oawpwe woas reen. ²⁰ Iwe nge oawsoapw igin kker reen pwonno iga aniu aenneew re aiussaening ngaenigaemi; pwe oawfaer kker pwe iga itaemi a foatofaat me wooan naaeng.”

Jesus a Kker

(Mat 11.25-27; 13.16-17)

²¹ Reen oatowe nge Jesus a sseog noan kker me reen Espritu Santus nge a iura pwe, “Semaiei, Soamwoonin naaeng me soanop, iya ngaenneog oamw aerhigerhig, pwe wa oapanoa minikkei saengiir rhoa reepiy me metefaaegini, nge wa pwaeri ngaeniir rhoa kkewe rew eer wonigaet. Ennet, Semaiei, pwe ina minna wo tipaeni epwe wen.

²² “Semaiei a ngaenneaei oanongaen meeta. Nge esooar erhai ne e giuneei minna Naiun pwe aeggaen minna Seman rhag, nge esooar ne e giuneei minna Seman pwe aeggaen minna Naiun rhag, iwe me iyo kena minna Naiun a finiir tae pwe epwe pwaeri ngaeniir.”

²³ Iwe Jesus a toagun ngaeniir rhoan kkayeo kkewe naiun nge a iura pwe, “Wenepwu iir maskena ra weri meeta aemi oawwa weri!

²⁴ Iya aengaenigaemi pwe resow *profeta* me *king* ra mwerhaen weri meeta kka aemi oawwa weri, nge iir rese weri. Ra pwan mwerhaen rongorong meeta kka aemi oawwa rongorong, nge iir rese rongorong.”

Fioangon Re Samaria we e Mwamwaai

²⁵ Erhai sinsein anniug a itto epwe soatoni Jesus. Mwaaen we a iura pwe, “Sinsei, meeta minne ipwe feeori nge epwe yo ngaeniaei menaw na esooar iaenin?”

²⁶ Jesus a paniuwaeni pwe, “Meeta miniwe Pwapwior we e Santus e iura? Meeta aemmetefan me reemw?”

²⁷ Mwaaen we a iura pwe, “Wopwe aerhaengi Soamwoon na oamw Deus reen oanongaen neetipoamw, reen oanongaen ngeoniumw, reen oanongaen oamw niunniuwaen, pwan reen oanongaen maemaewoamw, iwe nge wa aerhaengiir rhoan weni oaromw taeppen rhag oamw sipegin aerhaengi oanongoamw.”

²⁸ Jesus a iura pwe, “Ennet ngaeniug, wopwe feeori minikkena nge wopwe menaw.”

²⁹ Iwe nge iiy e tipaeni epwe pwaeri noa pwe ennet meeta kkewe e iura, iwe a aeineow Jesus pwe, “Iyo kena aeremesaen weni oaroi?”

³⁰ Jesus a paniuwaeni pwe, “Eyor erhai mwaaen emwet saengi Jerusalem epwe noa Jericho nge rhooa mwoarho ra torofi, ra pwiigi saengi mengaagiun, ra niyy, nge ra nigiti noa nge epwene oaropaen mae.

³¹ Enoa wen ngaeni pwe erhai patere epwan taeri rhag ennap we; igiwe eweri mwaaen we nge a toakonoa peigin aan we me epeig.

³² Epwan ina wunuunun erhai re *Levite* epwan itto pwiuneoi we, a weri mwaaen we nge a pwan toakonoa me peigin ennap we.

³³ Iwe nge erhai re Samaria enoa faaeraegto, a pwan itto rhuungi mwaaen we, eweri rhag mwaaen we nge a gin ffaiyeow.

³⁴ A noa reen mwaaen we, a noa aepiti minikkewe ginisan ngaeni tiikka me *wine*, iwe a tiugiumi noa; a iseni tae mwaaen we woan manewe naiun nge a pwiigi noa noan imwaen waseona, iwe a noa aemmwena me ee.

³⁵ Mmasetaen raaen we eraaen a pwiigi riiufai faifayiun senaapiy a ngaenneei mwaaen we aan iimw we. Iwe a aengaeni pwe, “Wa aemmwena aeremas een, nge ese tiwegin meeta paerenooan oamw ammwun, nge ngaang ipwe aese-faaeni ngaeniug oate ipwe sefaaeneto.”

³⁶ Jesus a soapwei noa, “Noan oamw niunniuwaen nge ifa erhai me neeiir rhooa kkewe eoniurhai ne effaiyeow mwaaen we rhooa mwoarho reniyy?”

³⁷ Sinsein anniug we a paniuwaeni pwe, “Aeremas we e aemmwena.”

Iwe Jesus a paniuwaeni pwe, “Wonoa nge wa noa feeori taeppen rhag minnaan.”

Jesus a Noa Sengaeriir Martha me Maria

³⁸ Igiwe Jesus me rhoosan kkayeo kkewe naiun ra noa, Jesus a itinong noan eew aepinoamw nge erhai rhoopwut itan Martha a aetiwa nong noan iimw we imwan.

³⁹ Eno erhai pwiin rhoopwut itan Maria, a itto mooat tiw reen pirheen Soamwoon nge a aiussaening ngaeni fenai kkewe aan.

⁴⁰ Martha a tip mworhomworh reen oanongaen engaang kkewe a feori, iwe a itto reen Jesus a aengaeni pwe, "Soamwoon, wose aetenaegiy noa mwo pwe nie pwiyy a nigiti ngaeniaei rhag oanongaen engaang pwe ipwe feori? Aengaeni pwe epwe itto tipaengiaei!"

⁴¹ Soamwoon a iura pwe, "Martha, Martha! Etowunap minikkenwa wa aiunaengiy noa rhag nge esa poas no tipoamw reen,

⁴² pwe aeggaen eew noa rhag minne eyor ipitan. Maria a fini minna egacch, nge esooar erhai ne epwe pwiigi saengi."

11

Jesus a Fenaiuw Wunuunun Maeipin (Mat 6.9-13; 7.7-11)

¹ Eraaen nge Jesus a maeipin eew pwiuneoi. Oatowe enoa moann aan maeipin, erhai me neeiir rhoosan kkayeo kkewe a aengaeni pwe, "Soamwoon, fenaiuw ngaenigemaem wunuunun maeipin, taeppen aen John fenaiuw ngaeniir rhoosan kkayeo kkewe naiun."

² Jesus a aengaeniir pwe, "Iginde oawpwe maeipin, ieen minne oawpwe iura:
'Semmaem,

aemwo epwe ssoar minna itoamw ina e santus;
aemwo Mweoiumw epwe war.

³ Ngaennegemaem aenemaem mwongo eraaen me eraaen.

⁴ Wopwe saeneti noa aemaem monofit,
wunuunun pwan aemaem aeiya saenetiir noa rhoakkena
re monofit ngaenigemaem.

Wosoapw oatonongegemaem noan sessoat."

⁵ Iwe Jesus a aengaeniir rhoosan kkayeo kkewe naiun pwe, "Ngaere igine a nugaenipwoong nge erhai me neemi a noa reen imwaen erhai maereyaeren nge a iura pwe, 'Maereyaerei, ipwe tingoareog mwo eoniufai fenoawa.

⁶ Erhai maereyaerei enaaen wareto rhag me woan aan saei, nge esooar minne ipwe fang pwe anan me reen imwaei!"

⁷ Iwe nge ngaere mwaaen we maereyaeremw a noa kkepas wow me nee iimw nge e iura pwe, 'Wosoapw itto aetipoapwutaeyaei! A fasiun amwarh noa asam nge ngaang me aetekka naeyi aeiya maiur. Isoapw mmwenen rhimwitae pwe ipwe iseis ngaeniug aegiaeg.'

8 Ipwe aengaenigaemi pwe inamwo eiura esoapw rhimwitae pwe epwe ngaenneog fenoawa kena pwe iga oaw maereyaer, nge iiy ina epwe fasiun rhimwitae pwe epwe ngaenneog oanongaen minikken a wotingoar pwe iga een wose saew reen oamw tingoar noa rhag.

9 Ina minne ngaang ipwe aengaenigaemi pwe: oawpwe tittingoar, ina nge epwe yo ngaenigaemi; oawpwe giutta, ina nge oawpwe weri; oawpwe apiungiupiung wooan asam, ina nge epwe sugaeg ngaenigaemi.

10 Pwe iyo a tittingoar nge epwe yo ngaeni, nge iyo a giutta epwe weri, nge asam epwe sugaeg ngaeni iyo na eapiungiupiung.

11 Emmwen pwe aaemi saam kena oawpwe ngaenneei naimi sowufaeng igine e tingoar iig?

12 Me ngaere oawpwe ngaenneei erhai maennipwong aere e tingoar soagun?

13 Inamwo aaemi aeremas aenneew, nge oawwa giuneei aaemi oawpwe fang ngaeniir naimi minikka e mwamwaai. Epwe ifa mwo nepaen faerigitin aaen minna Semaemi woai naaeng epwe fang Espritu Santus ngaeniir rhoakkena re tingoar ngaeni!"

Jesus me Beelzebul

(Mat 12.22-30; Mark 3.20-27)

14 Jesus a oatowowuw erhai aniu aenneew me wooan erhai mwaaen ese mmwenen kkepas; oatowe e oatowowuw aniu aenneew we me wooan mwaaen we, iwe mwaaen we a rhaep aan mmwenen kkepas fetaen. Iwe pwuwaen aeremas we ra mwaar reen miniwe,

15 nge aekkaaemweoi ra iura pwe, "Beelzebul, manewe soamwoonin aniu aenneew, minne efang maemaewan pwe epwe asiur noa aniu aenneew."

16 Nge aaemweoi re niunniuwaennei repwe aegina Jesus, iwe ra aengaeni pwe epwe feori eew kkeman pwe epwe pwaeri noa pwe efin tipaen Deus reen.

17 Nge Jesus e giuneei niunniuwaen kkewe aar, iwe a aengaeniir pwe, "Aere eew faniuw a ginigin fesaeng nge ra fiow fengaen wooar, faniuw een esoapw ssiunaei; nge rhoan eew famini ne rese tip eew nge repwe toaroporop.

18 Iwe ngaere minna mweoiun Saetan epwan ginigin kkit tiw nge re fiffiow fengaen rhag wooar, epwe ifa wusun rhag nge epwe iutae aan nemenem? Oawiura pwe i oatowowuw mwuniaan pwe iga Beelzebul efang ngaeniaei maemaewaei.

19 Ngaere igine e ieei wunuunun aaei asiur noa, iwe nge eifa wusun aar rhoa kkomwu rhoaniuwaemi asiur noa

aniu aenneew? Rhooa kkomwu rhoaniuwaemi ra pwaeritae pwe oaw mwaerhei!

²⁰ Aapw, ngaang ina ioatowowuw aniu aenneew noan minna kkemenaen Deus, nge ieen minne a pwaeri noa pwe minna Mweoiun Deus a faer toorigaemi.

²¹ "Iginerhai mwaaen mamaaw, a fasiun oamoannatae oanongaen niman, nge eposuw iimw na imwan, ina nge oanongan noa pisaegin nge epwe gofaeg rhag.

²² Iwe ngaere igine erhai mwaaen e mamaaw saengi a itto fiow ngaeni nge a niyy, ina nge epwene pwiigi noa oanongaen minikkewe niman ikkiwe mwaaen we a aisetip wooan nge a noa inetiy fetaeneei meeta kkewe e mwoarhow.

²³ "Erhai ne ese tapweaei, nge iyy rhooa aenneew ngaeniaei, nge erhai ese tipaengiaei reen ioi, iyy erhai rhoan oammwoatoar.

Sefaaeneton Aniu Aenneew

(Mat 12.43-45)

²⁴ "Iginerhai aniu aenneew epwe toowow me wooan erhai aeremas, nge ina epwene faeraeg fetaen wooan faniuw paenekka pwe egiut nenien aan aseoseo. Ngaere esooar eew neniyy erhuungi, nge ina epwene aengaeni oanongan pwe, 'Ipwene sefaaen noa reen imwaei iwe i siusaengi.'

²⁵ Iwe a sefaaen nge a noa rhuungi iimw we pwe a nimegacch noa noan pwe oanongaen aegiaeg nge a wonopaeg noa nenien.

²⁶ Iwe epwe noa nge a noa paeniir to fusiومان aniu aenneew kena re igin kkaein aar aenneew saengi, nge ra itto no pwiuneoi we. Iwe igiwe a moann oanongan noa, nge wunuunun aeremas we a faer igin aenneew saengi mmwaen miniwe rhaepetaen."

Ennetaen Kker

²⁷ Oatowe Jesus eaepesa minikkeei, erhai rhoopwut eno noan pwuwa we a kkepas tae nge a iura pwe, "Ifa mwo nepaen mwamwaaaiun tipan rhoopwut na etimenewaeginiug me e attiug!"

²⁸ Iwe Jesus a paniuwaeni pwe, "Epwe faer ifa mwo mwamwaaaiun tipeer rhoakkena rerongorong minna oanoon Deus nge re aesirowu!"

Re Tittingoar Eew Kkeman

(Mat 12.38-42)

²⁹ Oatowe aeremas kkewe ra itto roangei noa Jesus, a kkepas nge eiura pwe, "A ifa mwo aenneeweer aeremesaen mweoi e igina! Retittingoar eew kkeman, nge esooar eew kkeman ne epwe pwae ngaeniir pwe aeggaen kkeman we rhag Deus efeori ngaeni Jonah.

³⁰ Epwe weei rhag wunuunun aalen *profeta* Jonah eno pwe eew aeginn ngaeniir re Nineveh, nge mwaaen na Naiun Aeremas epwene no pwe eew aeginn ngaeniir aeremesaen mweoi e igina.

³¹ Noan Raaenin Apwiung nge Queen reen Sheba epwe iutae nge a oamonofiti aeremesaen mweoi e igina, pwe iiy a itto saengi faniuwaen taaw noa pwe epwe itto aiussaening ngaeni aalen *king* Solomon kkepessaen reepiy; nge ipwe aengaenigaemi pwe erhai e taegias saengi Solomon eno igeei!

³² Noan Raaenin Apwiung re Nineveh repwe iutae nge ra oamonofiti aeremesaen mweoi e igina, pwe iga iir re toagun saengi monofitiir oatowe re rongorong fenai kkewe aalen Jonah; nge ipwe aengaenigaemi pwe erhai e taegias saengi Jonah eno igeei!

Minna Seremaen Oanong

(Mat 5.15; 6.22-23)

³³ “Esooar erhai epwe figi eew oappwun nge a oapanoa ngaere iseni nong faaen saepiy; pwe ina epwe faer iseni tae woan nenien oappwun, pwe aeremas repwe weri sereman igine repwe toonong.

³⁴ Minikken a mesoamw ikkina eweei pwe oappwunon oanongoamw. Igin eepwe ffat mesoamw, ina nge minna oanongoamw epwe seram; nge igine ese ffat mesoamw, ina nge minna oanongoamw epwe rorhappiung.

³⁵ Iseni tipoamw pwe seram na neetipoamw ete no pwe rorhappiung.

³⁶ Ngaere igine oanongoamw e seram, nge esooar mwo egius me reen ne eno noan rorhappiung, ina nge oanongoamw epwe seram taeppen rhag aalen eew oappwun aesseremoag.”

Jesus a Pwaeritae Tereer Pharisee me Sinsein Anniug Kkewe

(Mat 23.1-36; Mark 12.38-40)

³⁷ Iwe oatowe Jesus enoa moannon kkepas, erhai Pharisee a aerigirig iiy pwe epwe noa mwongo reen; iwe a noa mooat tiw reen pwe ra mwongo.

³⁸ Pharisee we e riutae oatowe eweri Jesus pwe ese nniuwa paiun weni mmwaen aan epwe mwongo.

³⁹ Iwe Soamwoon a aengaeni pwe, “Iwe igina, aaemi Pharisee oawgaen nniuwa niugiun aaemi kkap me saepiy, nge nee tipaemi e sseogiun rhegoaw me feoffeoor aenneew.

⁴⁰ Oawpwurh! Saapw Deus minne efeeri minna niugiun me pwan minna noan?

⁴¹ Oawfang ngaeniir rhoa affayeo oawton kkap me saepiy kena aaemi, ina nge oanongan aegiaeg epwe nim me reemi.

42 “Ifa mwo aenneewan ngaenigaemi aaemi Pharisee! Oawngaenneei Deus eew me reen giniginin seig me reen *mint* me *dill* me *cumin* me oanongaen waningas, iwe nge oawoatoranoa ikkina efin me aaemi ffayeo ngaeni Deus. Ikkeei anniug kka oawpwe pomwoni, nge oawsoapw nigiti noa ikkina aekkaew.

43 “Ifa mwo aenneewan ngaenigaemi aaemi Pharisee! Oawaerhaengi rhag oawpwe mooat woan neniyy kkena neniier rhooa taegias me noan wutteer Jews, nge re aerhaengi aar aeremas repwe aewenimmwaar me aesirowuur me noan imwaen chuwaai.

44 Ifa mwo aenneewan ngaenigaemi! Oawwa weei paeyi kkewe esoar aeginn woan ikkiwe aeremas re faaeraeg fe-taen woan nge rese giuneei.”

45 Iwe nge erhai me neeiir sinsein anniug kkewe a aengaeni pwe, “Sinsei, wopwan igin aessaewaegemaem reen meeta kkomwu wo iura!”

46 Jesus a paniuwaeni pwe, “Epwe pwan ifa mwo aenneewan ngaenigaemi aaemi sinsein anniug kena! Pwe oawwa iseis tae mini choaw woar aeremas, nge aaemi mwo nge oawse aetiwow egatt aiuttiumi pwe oawpwe tipaengiir.

47 Ifa mwo aenneewan ngaenigaemi! Oawfeeri paeyieer rhoowe *profeta* pwe epwe gacch, pwe ina iir rhooa kkewe rhaepeto kkewe aaemi reniyy maaer noa.

48 Aaemi woan oanongaemi oawwa aepwaeri noa pwe oawtipieew ngaeni meeta kkewe rhaepeto kkewe aaemi refeeri; reniyy maaer noa *profeta* kkewe, nge aaemi oawwa feeri paeyieer.

49 Iwe reen minneei nge minna Repiaen Deus e iura pwe, ‘Ipwe fangetiw *profeta* me rhoan akkiuneo reer; nge iir repwe niyy maaer noa aekkaemweoi nge re aewwaeiraesiir aekkaemweoi.’

50 Iwe aeremesaen faaen mweoiu repwene aegaeregaer pwe faan ngaeniir *profeta* kkewe reniyy maaer noa saengi oatowe ffeer taen faeinaengiy,

51 saengi oatowe reniyy maei noa Abel noa ngaeni oatowe reniyy maei noa Zechariah, iwe reniyy tiw me nepetaen antar me Pwiuneoi we epin. Ennetaen, ipwe aengaenigaemi, pwe aeremesaen faaen mweoiu nge repwe aegaeregaer pwe faan ngaeniir *profeta* kkewe reniyy maaer noa.

52 “Ifa mwo aenneewan ngaenigaemi aaemi sinsein anniug! Oaw ammwarhiu *key* we epwe sugi ngaeni asam we aesemaen reepiy; aaemi mwo nge oawsoapw pwan toonong, nge oawpwan aiugiur iyo kena repwe mwerhaen toonong!”

⁵³ Oatowe Jesus a siusaengi pwiuneoi we, nge sinsein aniuug kkewe me *Pharisee* kkewe ra rhaep aar aepesa aenneewa nge rekkepas aeyeg ngaeni reen mesemesaen aegiaeg,

⁵⁴ minni pwe repwe oatupwu pwe repwe pipiiy ngaere epwe rugunoa aan kkepas.

12

Eew Atapeonneog Reen Riugiuriug

(*Mat 10.26-27*)

¹ Iga sengeras aeremas repwe pwuwa fengaen, nge ra pwuu tae rhag wooan pirheen erhai, Jesus a aenganiir rhooran kkayeo kkewe naiun pwe, “Oaw aefaennigaemi reen *yeast* kkewe aar *Pharisees* –wewen minneei nge aar riugiuriug.

² Oanongaen meeta na epwe mwoan nge epwe pwaetae, nge oanongaen meeta ewop nge epwene pwae noa.

³ Iwe ina ese tiwegin minne oaw aepesa me ne roorh nge ina epwene rong noa noan seram, nge ese tiwegin minne oawpwe ngiuniungiuniuw me neeiimw nge ina aeremas repwene aekkepas aegini fetaeneei me wooan wungaen iimw.

Iyo na Sipwe Mesagiu

(*Mat 10.28-31*)

⁴ “Ipwe aengaenigaemi, weni maereyaerei, oawsoapw mesagiiur rhooramwu regaen niiy noa oanongaemi, pwe epwe noa weni mwirin nge esooar no eew min aenneew ne repwe rhiuwen mmwenen feeori.

⁵ Ipwene pwaeri ngaenigaemi iyo na oawpwe mesagiu: oawpwe mesagiu Deus, pwe iiy minne eyor maemaewan pwe epwe oatoragaemi nong noan nifierno weni mwirin aan niiy gaemi noa. Niugiuniug ngaeniaei, pwe iiy minne oawpwe mesagiu!

⁶ “Pwe meeta, saapw riiufai checcha nge panuwaenin nimman nicchok? Iwe nge esooar mwo erhai neeiir ne Deus e maniuwegi noa.

⁷ Oanongaen aennirhimwemi mwo nge Deus e paengi. Ina oawsoapw mesag, pwe aaemi ina eyor ipitaemi memmweer towuneeper nicchok!

Pwuwafaai me Oasoarhoawuna Kristus

(*Mat 10.32-33; 12.32; 10.19-20*)

⁸ “Ipwe aengaenigaemi pwe ese tiwegin iyo kkena re aepesa pwe iir naeyi me neeiir aeremas, nge epwe pwan ina wunuunun aen mwaaen we Naiun Aeremas epwe feeori ngaeniir me weni mmweer angkenus kkena naiun Deus.

⁹ Nge iyo kena resaep saengiaei me neeiir aeremas, nge epwe pwan ina wunuunun aeen mwaaen we Naiun Aeremas feeri ngaeniir me wenimmweer angkenus kkena naiun Deus.

¹⁰ “Ese tiwegin iyo na ekkepas aenneewa mwaaen we Naiun Aeremas nge epwe mmwenen mwusunoa; nge iyo na ekkepas aenneewa Espritu Santus esoapw mmwenen saenetaeg.

¹¹ “Igin repwe pwigiug noa pwe wopwe noa apwiung noan wutteeer Jews aere wenimmweer *governor* ngaere soamwoonin faniuw, nge oawsoapw pireiir reen wunuunun meeta kena oawpwe feeri me aepesa.

¹² Espritu Santus epwe kapwiungiu ngaenigaemi meeta kena oawpwe aepesa.”

Fioangon Awewen Erhai Mwaaen Naiwiis we Epwurh

¹³ Erhai mwaaen me noan pwuwa we a aengaeni Jesus pwe, “Sinsei, aengaeni maan na pwiyy pwe epwe aemegena woa-maem minikkena pisaegimaem ina mwaaen na semmaem e nigiti ngaenigemaem.”

¹⁴ Jesus a paniuwaeni pwe, “Maereyaerei, iyo efang ngae-niaei maemaewaei pwe ipwe aettiwegini ngaere ipwe aemegena pisaeg kena woami?”

¹⁵ A aengaeniir pwe, “Oawneogiuw tipaemi nge oawafaennigaemi reen mesemesaen rhegoaw, pwe wenewenen oamw menaw ina ese ffeorto me reen minikkena oamw, inamwo ifa nepaen oamw naiwiis.”

¹⁶ Iwe nge Jesus a aeni ngaeniir fioangon awewe een: “Eno erhai mwaaen ne e naiwiis nge e towunap uwaen mwongoon minikkena pwugusan.

¹⁷ A niunniuwaennei nong rhag wooan oanongan; ‘Esooar no iga ipwe iseni noa e uwaen minikka fetaen ee. Meeta ipwe feeri?’

¹⁸ A aepesa pwe, ‘Ieen minne ipwene feeri. Ipwene fereei tiw soko e aaei nge iya feeri sefaaeny aekkaew min tette-moag, pwe ipwene iseni oanongaen uwaen minikka fetaen me minikka pisaegiy noan.

¹⁹ Nge ina ipwene gaen iura pwe, mwaaen wenepwu! A yo ngaeniug oanongaen minikkewe emwamwaai pwe ammwenemw reen fitowu mwo raeg. Wonoa amaniuwa noa, wopwe mwongo, iun, nge wo apwapwa fetaen.’

²⁰ Nge Deus a aengaeni pwe, ‘Wopwurh! Noan pwongin eei rhag nge wopwene fangetae oamw nngas; iwe nge iyo na epwene pwigi oanongaen minikka wa iseni rhag pwe ammwenemw?’”

²¹ Jesus a soapwei noa, “Egaen ieei wusun minne egaen wen ngaeniir rhooakka regaen oacchongatae rhag naiwiiseer, nge rese naiwiis faaen mesaen Deus.”

Niugiuniug Ngaeni Deus
(Mat 6.25-34)

²² Iwe Jesus a aengaeniir rhoaan kkayeo kkewe naiun pwe, “Iwe ipwe aengaenigaemi pwe oawsoapw aiunaeng reen mwongo kkomwu oawpwe menaw reen, ngaere reen mengaagiun oanongaemi.

²³ Menaw ina eigin yor rhaengin mmwaen mwongo, nge oanong ina eyor rhaengin me mmwaen mengaag.

²⁴ Pipiir mwiiy kenaan: rese foat faiun waniwan ngaere gin uwaen waniwan; esooar aar soko; nge Deus e oamwongoor! Aaemi eigin yor ipitaemi memmweer man aeniaen!

²⁵ Eyor neemi epwe mmwenen enaenaeni noa egius mewan reen aan aiunaeng?*

²⁶ Ngaere igine ese mmwen ngaenigaemi minikka epaerhigerhig, pwan minin meeta aaemi pireiir reen ikka aekkaew?

²⁷ Pipiyy wunuunun aaen peon waniwan menawtae: rese engang nge rese pwan ffeeor mengaagiur. Nge ngaang ipwe aengaenigaemi, pwe igiwe mwo *king* Solomon e menaw iwe erhai man ssow wiinan nge esooar mengaagiun ne enning noa me mmwaen peon waniwan kaan.

²⁸ Pwe Deus minne aememmengaagiur fetinen neeiin waniwan –fetin kka eyor igina, nge resoapw nonoa naiu, pwe ra figaeg noa newumw. Pwe meeta, Deus esoapw mmwenen aememmengaagiugaemi? Me gaen mwittiginen aaemi niugiuniug!

²⁹ “Iwe oawsoapw igin aenneewa tipaemi, oawsoapw tip mwaramwar reen meeta kena oawpwe mwongo me iun.

³⁰ (Pwe re Gentiles me noan faeinaengiy nge retip mwaramwar reen oanongaen minikka.) Minna na Semaemi e giuneei pwe oawpwe ammweneni minikkei.

³¹ Nge ina rhag, oawpwe pwan giutta minna Mweoiun Deus, nge ina nge iiy epwe fang ngaenigaemi meeta kenaan.

Wenepwu Kena Wooai Naaeng
(Mat 6.19-21)

³² “Oawsoapw mesag, aaemi ikkina fitiman, pwe minna Semaemi ina e mwamwaai tipan epwe ngaennegaemi minna Mweoiun.

³³ Chuwaiuw noa oanongaen pisaegimi nge oawfang senaapian ngaeniir rhooa mwaenene. Oawpweipwog aaemi

* **12:25** aere: Eyor erhai me neemi ne epwe mmwen aenaenaenoa egius taegiasan oanongan reen aan aiunaeng?

pwetoaw kkewe ese mmwenen ffeir, nge oawwa iseis nong wenepwuwaemi me wooainaaeng noan, ina esoapw mmwenen gitigit tiw pwe esooar maan mwoarho ne epwe mwoarhow, nge esooar manepwur ne epwe mmwenen fer-ei.

³⁴ Pwe pwunnomi epwe no rhag iga wenepwuwaemi eno ee.

Rhoan Akkiuneo Kkewe re Anneogiuneog

³⁵ “Oawpwe neogiuw tipaemi reen minikka epwe ikkitto, oawwa pwiigi aaemi oappwun nge oawwa figi,

³⁶ pwe epwe weer rhag rhoan akkiuneo kkewe rewewweti maasta we aar aan epwe sefaaen to me reen gupwunon appwiuniupai we. Oatona epwe noa sefaaen nge epwe apiungiupiung rhag asam we, nge ra sugi.

³⁷ Ifa mwo aar kker rhoan akkiuneo kka maasta we aar epwe noa itto nge erhuungiir pwe rerhiuwen mmas pwe rewewweti noa rhag! Ennetaen, ipwe aengaenigaemi, pwe maasta we epwe noa itto nge a pwiniti mengaagiun, a amooattiweer, nge iiy minne epwene ffeeor ngaeniir aeneer.

³⁸ Ifa mwo aar kker igrine maasta we eitto rhuungiir nge reoamoannatae, inamwo igrine enoa itto nugaenipwoong ngaere weni mmwaei raean!

³⁹ Nge oawpwe metaf pwe ngaere soaw iimw we e giuneei oaton aaen maan mwoarho we epwe itto, iwe nge iiy esoapw fang ngaeni rhoa mwoarho we epwe fereeinong iimw we imwan.

⁴⁰ Nge pwan aaemi nge oawpwan oamoannatae, pwe mwaaen we Naiun Aeremas epwe noa itto reen eew oat ina aaemi oawsoapw tapeonneog reen.”

Rhoan Akkiuneo we e Wenewen me Iwe Ese Wenewen (Mat 24.45-51)

⁴¹ Peter a iura pwe, “Soamwoon, nge aemaem rhag minne wo niuwaennei ngaenigemaem fioangon awewe een, ngaere oanongeer aeremas?”

⁴² Soamwoon a iura pwe, “Ina nge iyo rhoan akkiuneo na ewenewen nge ereepiy? Iiy minne maasta we a fang ngaeni pwe epwe nemaeniir rhoan akkiuneo kkewe nge engaenneer mwongo noan oaton efin.

⁴³ Ifa mwo wenepwuwaen rhoan akkiuneo we, aere maasta we aan e itto giuneei aan feeori minikkeei igiwe ewar!

⁴⁴ Ennetaen, ipwe aengaenigaemi, pwe maasta we epwe ngaennei rhoan akkiuneo we pwe epwe nemaeni oanongaen minikkewe pisaegin.

⁴⁵ Nge ngaere igrine rhoan akkiuneo we eniuwaennei pwe maasta we aan epwe mmwaei aan sefaaeneto, nge a rhaepetae aan wirhiir rhoan akkiuneo kkewe rhinan,

mwaaen fengaaen me rhoopwut, nge emwongo nge eiun epwunaas noa,

⁴⁶ ina nge maasta we epwe sefaaeneto noan raaenin we rhoaan akkiuneo we ese niuwaennei, me eew oaton esoapw giuneei. Iwe maasta we epwene fena kititiw nge efang noa neeiir rhooawe rhooa misimis.

⁴⁷ “Rhoaan akkiuneo na e giuneei minna maasta we aan emwerhaen pwe epwe feeri, nge ese oamoannatae pwe epwe feeri, ina nge epwe igin temoag aegaeregaer na repwe feeri ngaeni.

⁴⁸ Iwe nge rhoaan akkiuneo na ese giuneei minna maasta na aan etipaeni, nge efaer feeri minne epwe woawwoaw reen, ina nge epwe ppaen woawwoaw na repwe fang ngaeni. Aere Deus efang towunepaen aegiaeg ngaeni erhai aeremas, ina nge aeremas we a pwan igin towunap noa meeta epwe feeri, ina nge Deus a pwan igin towunap meeta epwe aei-ineow.

Jesus Minne e Pwigito Aengimaw

(Mat 10.34-36)

⁴⁹ “Iya itto ipwe ffooanaetae eew aengaet woan faeinaengiy, nge eifa mwo aaei aeniaen ngaere a fasiun giu!

⁵⁰ Eyor eew paptismus ipwe paptismus reen, nge eifa mwo nepaen waeiraes noan tipaei igina toori aan epwe moanno noa!

⁵¹ Oawniuwaennei pwe iitto pwe ipwe pwigito oapoas noan faeinaengiy? Aapw, saapw oapoas, pwe aeyimweoi.

⁵² Saengi igina a noa eew iimw ne re nimman aeremesaen ina repwene aeyimweoi, eoniurhai repwene aengimaaw ngaeniir ikkina riiurhai nge riiurhai repwene aengimaaw ngaeniir ikkina eoniurhai.

⁵³ Semeer repwene aengimaaw ngaeniir mwaaen kkena naiiur, nge mwaaen kkena naiiur repwene aengimaaw ngaeniir mwaaen kkena semeer; iin repwene aengimaaw ngaeniir naiiur rhoopwut nge naiiur rhoopwut repwene aengimaaw ngaeniir ineer; inaen pwiuniuweer repwene aengimaaw ngaeniir pwiuniuwaen naiiur nge pwiuniuwaen naiiur repwene aengimaaw ngaeniir inaen pwiuniuweer.”

Metefaaeginin Faei Oat Kkeei

(Mat 16.2-3)

⁵⁴ Jesus a pwan aengaeniir aeremas kkewe pwe, “Oate oawweri eew toapw eittae me netow, oawwa iura rhag pwe epwe piung worhow—iwe a piung.

⁵⁵ Nge oawpwe meyaefi aaen aaeng peopeoto me eor, nge oawwa iura pwe epwene pwerhikkar – ina nge epwene pwerhikkar.

⁵⁶ Maan oatupwutupw! Oawmmwenen woo ngaeni faeinaeng me noan naaeng nge oawwa mmwenen iura wunuunun mesaei raaen; ina nge meeta faan oawse giuneei mmwenen minikka ewen oatokkeei reen?

*Oapoasson Nee Finarh me Rhoosan Kkoapwutorh
(Mat 5.25-26)*

⁵⁷ “Meeta ese mmwen ngaenigaemi pwe aaemi rhag oawpwe aettiwegini minne efin oawpwe feeori reen?”

⁵⁸ Ngaere erhai epwigiug noa noan nenien apwiung pwe wopwe apwiung, een wopwe oarhorho wopwe oapoassa nepetaemi weni mmwaen wopwe gona nenien apwiung. Ngaere wose feeori ina nge een wopwene noa weni mmwaen soaw apwiung nge iiy a aefengoag noa nee paiur *police*, nge iir ra noa kanepwusoag noa.

⁵⁹ Ipwe aengaeniug pwe iginaan iga wopwe noa no etoori oamw piungtiw oanongaen paniuwaen monofitimw.”

13

Toagun Saengi Monofitimi pwe Oawte Mae

¹ Noan eew oat aekkaerhai aeremas re fioangei ngaeni Jesus mmweneer re Galilee kkewe Pilate eniir noa reen oatowe refang aar maenigaech ngaeni Deus.

² Jesus a paniuwaeniir pwe, “Reen iga e ina wusun aar mae noa iir re Galilee kkena, nge aaemi oaw niuwaennei pwe remae pwe ekkaein monofitiir memmweer oanongeer noa re Galilee kaan?”

³ Aapw saapw ina! Ipwe aengaenigaemi pwe ngaere igine oawse toagun saengi monofitimi, nge aaemi oawpwe pwan maegin mae noa.

⁴ Nge aeremas kkewe seig me waniman ikkiwe remae noa oatowe eppiungiutiwi iimw taegias we Siloam wooar? Oaw niuwaennei pwe remae pwe ekkaein monofitiir memmweer oanongeer aeremas kena reno noan Jerusalem?

⁵ Aapw saapw ina! Ipwe aengaenigaemi pwe ngaere igine oawse toagun saengi monofitimi, nge aaemi oawpwe pwan maegin mae noa.”

Fioang Awewen Eew Fig Iwe Ese Uwa

⁶ Iwe Jesus a aengaeniir fioangon awewe een: “Eno erhai mwaaen ne emenaw tae eew *fig* me noan menaai na aan. Egiut uwaen *fig* we nge esooar minne erhuungi.

⁷ Iwe a aengaeni rhoosan menaai we naiun pwe, ‘Een pipiiy, a enuuw raeg aaei itto giut uwaan *fig* eei, nge esooar minne

irhuungi me wooan. Een gopiy tiw! Meeta ipitaen aan itto foat wooan ppweon eei?’

⁸ Nge rhooran engaengaen menaai we a aengaeni pwe, ‘Soawumwaer, nigiti mwo reen eew raeg pwe ipwe genengi pwaeniaeniy fetaeneei mwo nge iya iseis nong koyasiun.

⁹ Nge ngaere enoa raeg iiy nge a yor uwaan ina nge a mwamwaai; ngaere esooar, ina nge wonaaen gopiy tiw.’”

Jesus a Aecchipwa Aaen Semwaai Erhai Rhoopwut Wooan Sabbath

¹⁰ Wooan Sabbath nge Jesus a fenai noan eew wutteeer Jews.

¹¹ Erhai rhoopwuton pwiuneoi we a seig me wanuuw raeg aan semwaai pwe eno erhai aniu aenneew wooan; eppwoar sagiuriun nge ese mmwenen iutae.

¹² Oatowe Jesus enoa weri nge a faingiwow, “Rhoopwut mwuun, wopwene saenetaeg me reen oamw semwaai!”

¹³ A iseni tae paiun wooan niewe, nge noan oaton we rhag nge a uwen tae nge a aepingepinga Deus.

¹⁴ Soamwoonin wutteeer Jews we a soong wooan Jesus pwe igiwe e aecchipwa rhoopwut we wooan Sabbath, a kkepas tae nge a aengaeniir pwe, “Wonowu raaen raaenin aarh sipwe engaang; iwe ina epwe noa itto raaen kenaan nge oawwa itto aecchipwaar rhooa semwaai, nge saapw wooan Sabbath!”

¹⁵ Soamwoon a paniuwaeni pwe, “Maan oatupwutupw! Aaemi oawmmwenen pwaeksi naimi wakke ngaere *donkey* me noan gurur nge oawwa paeniir noa oawpwe noa aiuniur rhan wooan Sabbath.

¹⁶ Igina ina eno erhai rhooran aeinang we aaen Abraham ina a seig me wanuuw raeg aaen Saetan geoni; sisoapw saeneti nieen wooan Sabbath?”

¹⁷ Aessefaaenin kkepas we aan a aessaewaar noa rhooa kkewe rhooran kkoopwuton, nge aeremas towunap ra faer igin pwapwa reen oanongaen min mwamwaai kkewe efeeori.

Fioang Awewen Faiun Mustard we (Mat 13.31-32; Mark 4.30-32)

¹⁸ Jesus a aeiweg pwe, “Eifa wusun minna Mweoiun Deus? Meeta minne ipwe awewe ngaeni?”

¹⁹ E ieen wusun. Erhai mwaaen a pwiigi efai faiun *mustard* nge a noa foatogi noan menaai we aan. A pwaech miniwe faiun nge a temoag noa pwe efoarh waniwan, nge man aeniaen ra itto ffeeor feseer wooan raaen.”

Fioang Awewen Eew Yeast (Mat 13.33)

²⁰ Jesus a pwan aeiineo, “Meeta minne ipwe awewe ngaeni minna Mweoiun Deus?”

²¹ E ieen wusun. Erhai rhoopwut e pwigi egius *yeast* nge a nofiti fengaenniy me enuuw pwaecchin fenoawa emas toori aan pwo tae fenoawa we.”

Asam we e Rheogit
(Mat 7.13-14, 21-23)

²² Jesus a toonong noan aepinoamw kkewe me pwugos kkewe, nge a fenai fetaen aeremas igiwe enennoa ngaeni Jerusalem.

²³ Erhai a aeiineow pwe, “Soawumwaer mwuun, aekkaerhai rhag minne repwe menaw?”

Jesus a paniuwaeni pwe,

²⁴ “Oarhorho pwe wopwe faer nong noan asam na erheogit; pwe iga retowunap aeremas repwe aeginaar nong nge resoapw takkenong.

²⁵ Miniwe soamwoonin iimw we epwene iutae nge a ttiy noa asam we; iwe oawpwene iu nasam pwe oawpwene apiungiupiung nong wooan asam nge oawwa iura pwe, ‘Soawumwaer, sugi mwo asam!’ nge iiy epwe paniuwaeni gaemi pwe, ‘Ise giuneei igine aaemi oawitto me ee!’

²⁶ Nge aaemi oawpwene paniuwaeni pwe, ‘Aemaem aei mwongo me iun me reemw; een wo fenaiuw noan miniwe aepinoamwomaem!’

²⁷ Nge iiy epwene pwan iura sefaaeniy pwe, ‘Ngaang ise giuneei igine aaemi oawitto me ee. Oawsiu noa me oaroi, oanongaemi rhooa wegitaeg aenneew!’

²⁸ Ifa mwo aaemi pwe sessaeng me akkaarengi, igine oawpwene weriir Abraham, Isaac, Jacob, me oanongeer *profeta* kkewe me noan miniwe Mweoiun Deus, nge aaemi oawwa faer aekkaerh noa!

²⁹ Aeremas repwene maegeto me eotiw me netow, eor me efaeng, iwe ra itto mooat tiw noan gupwunnap na noan Mweoiun Deus.

³⁰ Iwe aaemweoi reamwirimwir repwene gommw, nge aaemweoi regommw repwene amwirimwir.”

Aaen Jesus Aerhaengerhaeng Ngaeni Jerusalem
(Mat 23.37-39)

³¹ Noan oatowe rhag nge aekkaaemweoi *Pharisee* ra itto reen Jesus ra aengaeni pwe, “Wopwene siu me igei wa noa eew pwiuneoi, pwe Eroles a mwerhaen epwene niug noa.”

³² Jesus a paniuwaeniir pwe, “Oawnoa oawwa noa aengaeni maan oatupwutupw na pwe: ‘Ipwe oatowowuw mwuniaan nge i arhiuwa aar semwaai aeremas igina me naiu, nge wooan ayeoniuraenin raaen nge a moann aaei engaang.’

³³ Inamwo nge ngaang ipwene noa raaeneei, naiu, me raaennenaan; pwe ese ffin pwe erhai *profeta* epwe noa mae me eew pwiuneoi pwe noan rhag Jerusalem.

³⁴ “Jerusalem, Jerusalem! Wa niir noa *profeta* kkewe, nge wo teraar rhoan pweipwogin kkepas kkewe Deus efangeto reemw! A faaen fiteig aaei mwerhaen pwe ipwe ioni fengaeniy noawumw aeremas, taepfen maniug a ioni fengaenniy naiun faaen paiun, nge een wose mwerhaen pwe ipwe feeori!

³⁵ Iwe *Temple* we oamw ina aeremas repwe siusaengi iwe peonoa. Ipwe aengaenigaemi pwe aaemi oawsoapw weriaei no toori oatona oawpwe iura pwe, ‘Deus epwe aewenepwuwa aeremas na epwe itto faaen itaen Soamwoon.’”

14

Jesus e Aecchipwa Aaen Erhai Mwaaen Semwaai

¹ Eew Sabbath Jesus enoa epwe noa mwongo reen imwaen erhai soamwoonin *Pharisee*; nge aeremas regaen igin pipiiy firhiy.

² Erhai mwaaen epwo pirheen me paiun a noa itto reen Jesus,

³ iwe nge Jesus a kepastae nge a aengaeniir sinsein anniug kkewe me *Pharisees* kkewe pwe, “Meeta Anniug we aarh eiura sipwe aecchipwaar aeremas woan Sabbath ngaere aapw?”

⁴ Nge iir rese paniuwaeni. Iwe Jesus a paeni mwaaen we, a aecchipwa, nge a aengaeni pwe epwene noa.

⁵ Iwe a aengaeniir rhoawe pwe, “Ngaere igrine erhai me neemi eyor naiun wonigaet ngaere wakke nge eppiung nong noan eew rhanniunim woan Sabbath, oawsoapw taiuw mwetekkaeiwow inamwo raaenin Sabbath miniwe?”

⁶ Nge erhai mwo me neeiir nge ese mmwen ngaeni epwe paniuwaeni.

Mesoanosoan me Ttiumwiun

⁷ Jesus eweriir aaemweoi me neeiir waseona kkewe re fini pwiuneoi kkewe e igin mwamwaai pwe repwe mooat ee, iwe a fioangei ngaeniir fioangon awewe een.

⁸ “Igrine erhai epwe aerigirig wopwe noa tapweei eew gupwunon appwiuniupai, wosoapw noa mooat pwiuneoi na e oarosaen mwamwaai. Pwe ina maeni epwe yor erhai ina eyor ipitan me mmwoamw ina epwe noa itto,

⁹ nge iyo we e faingigaemi epwe noa itto nge epwene aengaeniug pwe, ‘Merenoa pwe mwaaen een epwe mooat igina.’ Iwe ina een wopwene saew nge wopwene noa mooat tiw pwiuneoi na e oarosaen sessoan.

¹⁰Ieen minne oawpwe feeri, igine repwe aerigirig, wopwe noa wa noa mooat igina oarosaen sessoan ee, ina nge iyo we e faingiug epwe noa itto reemw nge epwene aengaeniug pwe, ‘Moawwerh maereyaerei, itto mooat iga e mwamwaai e.’ Ieen minne epwene aetaegisoag tae me neeiir aeremas kkena reno pwe een erhai aeremas eyor ipitoamw.

¹¹Pwe iyo na e aetaegiasa tae epwe sessoanotiw, nge iyo na epwe oasossonaetiw epwe taegias tae.”

¹²Iwe Jesus a aengaeni iyo we efaingito pwe, “Igin wopwe gaen ffeeor oamw mwongoon oanowas ngaere mwongoon faaef, wosoapw faingiir maereyaeremw ngaere pwiimw ngaere perhaengioamw ngaere iyo kkena aeremesaen wenioaromw igina renaiwiis – pwe ina repwe pwan faingi sefaaeniug pwe wopwe pwan noa tapweer reen gupwun pwe repwe paniuwaeni ngaeniug meeta we wofeori ngaeniir.

¹³Igin wopwe gaen ffeeor oamw gupwun, faingiir rhoakkena remwaenene, rhoakkena emwaetete oanongeer, rhoa mae pirheer, me rhoa parh;

¹⁴ina nge wopwe wenepwu, pwe iga iir rese mmwen repwe paniuwaeni meeta we wofeori ngaeniir. Deus epwe paniuwaeni oamw feoffeoor noan raaenin na oanongeer aeremas kena re mwamwaai repwene menaw tae me reen mae.”

*Awewen Gupwun Igin Temoag we
(Mat 22.1-10)*

¹⁵Oatowe erhai me neeiir waseona kkewe remooat reen *table* we e rongorong minikkewe, nge a aengaeni Jesus pwe, “Ifa mwo aar kker rhoakka repwe tapweei gupwun na noan minna Mweoiun Deus!”

¹⁶Jesus a aengaeni pwe, “Eno erhai mwaaen efeori eew gupwun igin temoag nge eigin towunap aeremas kka efaingiir.

¹⁷Igiwe a toori oaton gupwun we nge a fang noa erhai naiun rhoaan akkiuneo epwe noa faingiir waseona kkewe, ‘Oawitto pwe oanongaen meeta nge a oamoannatae!’

¹⁸Iwe nge erhai me erhai neeiir a ffeeor fetaen mwarhneokkiur. Manewe egommw a aengaeni rhoan akkiuneo we pwe, ‘Ngaang iya chuwaiuw eew maat nge ipwe noa mwo sengaeri; faaen pirhemw nge isoapw mmwenen tapweog.’

¹⁹Nge iwe erhai a iura pwe, ‘Ngaang inaaen chuwaiur seig wakke nge iye ipwene noa aegina aaei aengaangaar; faaen pirhemw nge isoapw mmwenen tapweog.’

²⁰ Nge iwe erhai a iura pwe, 'Ngaang iye inaaen appwiuniu-pai noa rhag, nge ina faaen minne isoapw mmwenen toowow reen.'

²¹ Iwe rhoan akkiuneo we a sefaaen nge a noa aengaeni maasta we aan oanongaen minikkewe re iura. Maasta we a igin soong nge a aengaeni rhoan akkiuneo we pwe, 'Mwetekkaei wow wooan aan temoag kena me aan mwittig kkomwu ne aepinoamw, nge wa pwigiir to rhoa mwaenene, rhoa mwaetete oanongeer, rhoa parh, me rhoa pirhmae.'

²² Ese mmwaei mwo nge rhoan akkiuneo we a itto iura pwe, 'Iya moann aaei feeri meeta kkewe woiura, nge erhiuwen nenieer aeremas.'

²³ Iwe maasta we a aengaeni rhoan akkiuneo we naiun pwe, 'Wonoa itiwow noan ennap me aan paecchig kena enoa niugiun aepinoamw pwe wopwe noa faingiir to aeremas, pwe epwe sseog noa noan iimw we imwaei.'

²⁴ Ipwe aengaenigaemi pwe esooar erhai me neeiir rhoawe si mmwaen faingiir ne epwe nnaeri egius me reen mwongoon gupwun e aaei.'"

*Wunuunun Aaen Erhai Epwe No pwe Rhoan Kkayeo
(Mat 10.37-38)*

²⁵ Eew oat igiwe e igin towunap aeremas re tettapwei Jesus, a wegitaeg nge a aengaeniir pwe,

²⁶ "Iyo kka reitto reei resoapw mmwenen no pwe naeyi rhoan kkayeo igine rese aerhaengiaei noa memmweer se-meer me ineer, rhoan ngaenneer me naiiur, pwiir me mwengeyeer, me iir wooan oanongeer.

²⁷ Iyo kena rese aiufera aar kurus nge ra itto tapweaei resoapw mmwenen no pwe naeyi rhoan kkayeo.

²⁸ Ngaere igine erhai me neemi eniunniwaennei pwe epwe feeri eew iimw taegias, mesaemmwaen minne wopwe feeri ina wopwe mooat tiw wa aeperha paniuwaen, pwe wopwe giuneei ngaere epwe toaw ngaeniug paniuwaen aan moann ngaeniug engaang na oamw.

²⁹ Ngaere wose feeri minnee, nge ina esoapw mmwenen moann ngaeniug iimw taegias eei mwirin oamw feeri noa poasopoason; nge oanongeer rhoakkena reweri meeta ewen repwene kekkaei aeginiug.

³⁰ Nge repwene iura pwe, 'A rhaepetae oamw kaiu nge ese mmwenen moann ngaeniug oamw engaang!'

³¹ Ngaere erhai *king* e pwigiir seig sengeras sonotaw repwe noa moawun ngaeni pwan erhai *king* e pwigiir riiuweig sengeras sonotaw, mesaemmwaen ina epwe mooat tiw a niunni-uwaennei mwo ngaere epwe mmwenen niir rhoan peig na epeig.

³² Ngaere esoapw mmwen, iwe epwene fangenoa naiun rhoan akkiuneo reen *king* na erhai iga e rhiuwen taaw pwe repwe feori fengaenniy oapoas nepeteer.

³³ Epwe ieei rhag wusun pwe esoar neeimi ne epwe mmwenen no pwe naeyi rhoan kkayeo igine ese oatoranoa oanongaen aegiaeg.”

Aesiig we Ese Saaet
(*Mat 5.13; Mark 9.50*)

³⁴ “Aesiig ina emwamwaai, iwe ngaere esa saaet no, sisoapw mmwenen aesaeti sefaaenyi.

³⁵ Ese gacch ngaeni ppweon ngaere koiyas; re aekkaerh noa. Iyo eyor saeningan, epwe rongorong!”

15

Sheep we e Mwaenirh Noa
(*Mat 18.12-14*)

¹ Eew raaen nge ra noa ssow to rhoan iyoiyon *tax* me rhoa monofit ra itto aiussaening ngaeni Jesus.

² Nge Pharisees me sinsein anniug kkewe a rhaepetae aar mwangiuniungiun pwe, “Mwaaeneei e aetiwaar rhoa monofit nge epwan mmwenen mwongo reer!”

³ Jesus a aeni ngaeniir floangon awewe we:

⁴ “Aere igine erhai neeimi eyor epwiugiuw naiun *sheep* iwe nge erhai me neeiir e mwaenirh noa —meeta wopwene feori? Wopwene nigitiir noa *sheep* kkewe tiweig me tiweman nge wa noa giutta fetaeneei manewe e mwaenirh noa ssiaaenin oamw noa rhuungi. ⁵ Igin wonoa rhuungi nge wopwene igin kker, nge wopwene ngaettae wooan eferoamw

⁶ nge wa pwigi noa neeiimw. Wopwene faingiir to weni maereyaeremw me rhoan no oaromw, wopwene aengaeniir pwe, ‘Iya igin kker pwe iya rhuungi *sheep* we naeyi iwe e mwaenirh noa. Sipwene oogupwuna!’

⁷ Iwe, ipwe aengaenigaemi pwe epwe pwan igin temoag kkeren weeinaaeng wooan erhai man monofit etoagun saengi monofitin mmweer rhoawe tiweig me tiweman ikkiwe rese toagun saengi monofitiir.

Faiun Senaapiy we Eppiung Noa

⁸ “Aere igine eyor erhai rhoapwut eyor seig naiun faiun senaapiy nge efai eppiung noa —meeta niewe epwene feori? Epwe figi eew oappwun, a peoni noan iimw we imwan, nge a aetemaeginiy aan giutta toori aan noa weri.

⁹ Oatona epwe noa weri nge epwene faingiir maereyaeren me rhoakkena reno oaron nge epwene aengaeniir pwe, ‘Iya

igin kker pwe iya weri faiun senaapiy we eppiung saengiaei. Sia oogupwuna.'

¹⁰ Ipwe aengaenigaemi pwan ieen rhag taeppen aar kker angkenus kkewe naiun Deus igine erhai maan monofit a toagun saengi monofitin."

Aetemwaaen we e Mwaenirh Noa

¹¹ Jesus a soapwei noa nge a iura pwe, "Eyor erhai mwaaen reno riiurhai naiun aetemwaaen.

¹² Aetewe egit a aengaeni pwe, 'Semaiei, ngoatto inetiyy me reen minikkomwu oamw.' Iwe mwaaen we a giniyy minikkewe aan woar aet riiurhai kkewe naiun.

¹³ Enoa mwirin fitowu raaen nge aetewe egit a chuwaiuw noa minikkewe aan nge a pwingi senaapian nge a siusaengi miniwe pwugusan. A noa woan eew faniuw taaw noa, iwe a noa oasonopa noa senaapiy kkewe naiun reen wegitaeg kkewe e aenneew.

¹⁴ Iwe a noa oarosa noa senaapiy kkewe naiun. Nge enoa weni mwirin a noa itto eew naengeta ngaeni faniuw we, iwe a noa mwaenene noa aetewe.

¹⁵ Iwe a noa engaang ngaeni erhai aeremesaen faniuw we, aan engaang ina rhooan oamwongon sino.

¹⁶ Aetewe a gaen aeniaen pwe epwe mwongo minikkewe anan sino pwe igiwe esooar ne egaen ngaenneei anan.

¹⁷ Amwiucchiunoan igiwe aetemwaaen we enoa metaf noa woan nge a iura pwe, 'Oanongeer rhooan engaang kkewe naiun mwaaen we semaei nge eigin towunap aeneer nge ngaang iye ipwene oaropaen maen pecchai noa!

¹⁸ Ipwene iutae igina nge ipwene noa reen mwaaen we semaei nge iya aengaeni pwe, "Semaiei, iya monofit ngaeni Deus nge iya pwan monofit ngaeniug.

¹⁹ Esa ferhanno ipwe ffai pwe ngaang noawumw; aeffitae-giaei noa rhag me rhooan engaang kkena noawumw."

²⁰ Iwe a iutae a sefaaen noa reen mwaaen we seman.

"Aetewe erhiuwen taaw saengi iimw we imwan nge mwaaen we seman a weri; a igin ffaiyeow, iwe a fattapw ngaeni, a roamito aetewe naiun nge a faeisongei.

²¹ Nge aetewe a iura pwe, 'Semaiei, iya monofit ngaeni Deus nge iya pwan monofit ngaeniug. Isa ferhanno ipwe ffai pwe ngaang noawumw.'

²² Nge faer mwaaen we seman a faingiir rhooan akkiuneo kkewe naiun, 'Oaw mwetekkaei! Oawnoa pwigito mengaag na oarosaen mwamwaaai oawpwe aememmengaagiu ngaeni. Nge oawwa iseni tae efai *ring* woan aiuttiun nge oaw iseni tae nokkaan woan pirheen.

²³ Iwe nge oawwa noa oawpwe noa pwigito wakke na oarosaen soopwun oawwa itto niy pwe oaw sipwene feori eew gupwun faeregite pwe aan!

²⁴ Pwe aetewe naeyi iwe a mae, igina a menaw; e mwaenirh noa nge igina iya weri.' Iwe ra feori gupwun we aar.

²⁵ "Noan oatowe nge aetewe e tugufaeyi eno noan maat. Nge a noa sefaaeneto reen iimw we imweer nge a rongorong pwe ra pwai me wur.

²⁶ A faingi erhai rhoan akkiuneo kkewe a aeineow pwe, 'Meeta a wen?'

²⁷ Rhoan akkiuneo we a iura pwe, 'Aet we pwiimw a sefaaeneto nee iimw, nge mwaaen we semoamw a aengaeniir repwe niy noa wakke we oarosaen soopwun pwe igiwe enoa sefaaeneto nge esoar minne ewen ngaeni.'

²⁸ Aet we e tugufaeyi a soong esa mwerhaen toonong no nee iimw; iwe mwaaen we seman a teowow aeffaenipirhe ngaeni epwe toonong.

²⁹ Nge iiy a appaniuwaeni mwaaen we seman, 'Pipiiy, fiteig raeg aaei engaang ngaeniug taeppen aen engaang erhai *slave*, nge esaaen yor mwo faaen eew ne i tipowwen ngaeniug. Nge meeta minne wo ngaenneaei? Erhai mwo *goat* nge wose ngaenneaei pwe aeipwe gupwun wooan me rhoakka maereyaerei!

³⁰ Nge aete noawumw iye eoasonopa noa senaapiaen minikkewe wofang ngaeni wooar rhoapwutoi chuwaai, nge enoa rhag itto nge wa niy ngaeni wakke we oarosaen soopwun pwe aan mwongoon gupwun!

³¹ Mwaaen we seman a iura pwe, 'Moawwerh naeyi, een wnonno rhag oaroi, nge oanongaen minikka aaei nge eno pwe oamw.

³² Nge sipwe apwapwa pwe sa kker, pwe aetewe pwiimw iwe a mae nge igina a menaw sefaaen; e mwaenirh noa nge igina iya weri.'"

16

Soamwoonin Engaang we e Riugiuriug

¹ Jesus a aengaeniir rhoan kkayeo kkewe naiun pwe, "Eno erhai mwaaen naiwiis eno erhai naiun rhoan akkiuneo enemaeni minikkewe pisaegin. Ra aengaeni mwaaen we pwe rhoan akkiuneo we a oasonopa senaapiy kkewe naiun,

² iwe a faingito a aengaeni pwe, 'Meeta minne iya rongorong pwe fioangomw? Foatogitiw pwapwiron minikka pisaegiy, pwe iga een wosoapw nono pwe rhoan nememaen minikka aaei.'

³ Rhoan akkiuneo we a kkepastiw rhag wooan nge a iura pwe, 'Maasta e aaei epwene arhiuwaeyaei me reen engaang

e aaei. Meeta ipwene feeori? Ngaang ise mamaaw pwe ipwe noa no pwe rhooran kkenin maat, iwe nge ngaang isaew pwe ipwe noa tingoar fetaen.

⁴ Iya giuneei meeta ipwene feeori! Oatona epwe noa sooar noa engaang e aaei, epwene yor maereyaerei ikka repwene aewenimmwaeyaei nong noan imweer.’

⁵ Iwe a faingiir nong rhooa kkewe eyor monofitiir ngaeni maasta we aan. A aeineow iwe egommw pwe, ‘Fiteig monofitimw ngaeni maasta e aaei?’

⁶ Mwaaen we a paniuwaeni pwe, ‘Epwiugiuw pwaerinaen tiikkaen *olive*.’ Rhooran akkiuneo we a iura pwe, ‘Ieen pwapwioron monofitimw; itto mooat tiw nge wa foatogi pwe nimeig.’

⁷ A pwan aeineow iwe erhai pwe, ‘Nge een –fiteig monofitimw?’ Mwaaen we a paniuwaeni pwe, ‘Sengeras tutuun *wheat*.’ Nge a pwan aengaeni pwe, ‘Ieen pwapwioron monofitimw, foatogi pwe wanepwiugiuw.’

⁸ Pwonno reen meeta we a feeori, maasta we a aepingepinga rhooran akkiuneo we naiun iwe eriugiuriug, pwe ieei faaen minne aeresesaen soanop re igin tipaecchem reen feoriun minikka ammweneer woan oanongeer memmweer rhoakkena reno noan seram.”

⁹ Iwe Jesus a pwan iura pwe, “Ipwe aengaenigaemi pwe, oawgiut maereyaeremi nge oawpwe nainai meeta wiinaemi me soanop, pwe oawpwe noa mae noa nge repwe mmwenen aewenimmwoag nong noan iimw na esooar iaenin.

¹⁰ Iyo na ewenecchar menewan noan minikka emwittig nge epwe pwan wenechar menewan noan minikka etetemoag; nge iyo na eotupwutupw noan minikka emwittig nge epwe pwan oatupwutupw noan ikka etetemoag.

¹¹ Pwe ngaere ese wenechar menewoamw noan minikka pisaegin woan soanop, nge epwe ifa wusun nge epwe niugiug reen pisaeg kka ennet?

¹² Pwe ngaere ese wenechar oamw engaang ngaeni pisaegin erhai, nge iyo epwe mwerhaen fang ngaeniug ikkina pisaegimw?

¹³ “Esooar erhai rhooran akkiuneo epwe engaang ngaeniir riurhai maasta. Ina epwe oapwuta erhai, nge aerhaengi iwe erhai, me ngaere epwe mwamwaaingaeni erhai, nge a aenneew ngaeni erhai. Ese mmwen oawpwe engaangappag ngaeni Deus me senapiy.”

*Aekkaew Kkepas Kkewe Aaen Jesus
(Mat 11.12-13; 5.31-32; Mark 10.11-12)*

¹⁴ Igiwe Pharisees kkewe ra rongorong minneei ra aeni fe-taeneei aegekkaei Jesus, pwe igiwe iir re aerhaengi senaapiy.

¹⁵ Jesus a aengaeniir pwe, “Aaemi rhooa kkewe regaen feori mwamwaaiuw wunuunuur me noan meseer aeremas, nge Deus e giuneei noan tipaemi. Pwe minikka egaen yor ipitaen me noan tipeer aeremas nge esooar ipitan me noan tipaen Deus.

¹⁶ “Oasoapwosoapw kkewe aaen Moses me ikkiwe foato-gieer profeta kkewe e enoa toorito oaton John Baptist; mwirin a itto Kkepas Mwamwaai we reen Mweoiun Deus, iwe oanongeer aeremas ra aetietiy nong repwe toonong.

¹⁷ Iwe nge emererhaeg egius aaen naaeng me soanop repwe nurh noa me mmwaen aeppaerhigin oasoapwosoapw kkeei epwe nurh noa.

¹⁸ “Erhai mwaaen epwe mweoi saengi pwiuniuwan nge a noa pwiuniuwaeni erhai, nge iiy a feori eew feoffeoor aenneew; nge erhai ne e pwiuniuwaeni erhai rhoapwut ne a susaengi pwiuniuwan nge iiy a feori monofit.

Mwaaen we e Naiwiis me Lazarus

¹⁹ “Eno erhai mwaaen naiwiis e memmengaag rhag men-gaag choaw paniuwan nge egin mwamwaai aan nonno oanongaen raaenin.

²⁰ Epwan no erhai mwaaen affayeo itan Lazarus, erupw wooan oanongan, epwan gaen ikkitto reen aesemaen imwaen mwaaen naiwiis we,

²¹ egaen aeniaen pwe epwe mwongo peipeyin mwongo kena egaen ppiungtiw me wooan *table* we aaen mwaaen naiwiis we. Nge gonaag mwo nge re itto tumwuri minikkewe rupwun.

²² Iwe mwaaen affayeo we a maenoa nge angkenus ra itto pwigi epwe noa mooat oaron Abraham me noan gupwun we weei naaeng. Iwe nge mwaaen naiwiis we a pwan mae ra noa nipwaeni,

²³ nge noan nifierno wonowe a igin metaeg, a noa fattae a noa weri Abraham me itaaw noa, a noa weri Lazarus pwe eno oaron.

²⁴ Wonowe a faingi, ‘Semaei Abraham, faayeowaei, wa fangenoa mwo Lazarus epwe rhiri aiuttiun noan eew rhaan pwe epwe itto aepetapeta minne rheon iuuwaei pwe ngaang iya igin metaeg noan aengaeteei!’

²⁵ Abraham a iura pwe, ‘Wo maengiy rhag naeyi, pwe noan oatowe wo menaw nge oanongaen mini mwamwaai nge itto reemw, nge Lazarus iwe oanongaen mini aenneew nge enoa reen. Igina iya no noan kker nge een wa no noan waeiraes.

²⁶ Nge soapw pwan ina rhag, pwe eew niipw gin nennoan eno nepetarh, manekka remwerhaen faaeraeg wow me

igaan nge resoapw mmwenen toowow, nge iyo kena remwerhaen faaeraegto me igina nge resoapw pwan mmwen.'

²⁷ Mwaaen naiwiis we a iura pwe, 'Iya tingoar aef-faenipirhe ngaeniug semaei Abraham wopwe fangenoa Lazarus reen imwaen mwaaen we semaei,

²⁸ igiwe reno rhooa nimman pwiyy ee. Aengaeni epwe noa a noa atapeonneogiiur pwe rete itto noan pwiuneoi e nenien waeiraes.'

²⁹ Abraham a iura pwe, 'Mwaaen kkewe pwiimw ra fasiun tapeonneog reen Moses me profeta kkewe; repwe aiussaening ngaeni meeta repwe iura.'

³⁰ Mwaaen naiwiis we a paniuwaeni pwe, 'Ese nnaaf minna, semaei Abraham! Pwe ngaere erhai e menaw sefaaen tae me reen mae a noa reer nge repwe toagun saengi monofitiir.'

³¹ Abraham a iura pwe, 'Aere rese aiussaening ngaeniir Moses me profeta kkewe, nge iir resoapw niugiuniug, in-amwo me igine erhai e menaw sefaaen tae me reen mae noa.'"

17

Meeta Kka e Oamonofitiir Aeremas

(Mat 18.6-7, 21-22; Mark 9.42)

¹ Jesus a aengaeniir rhoaan kkayeo kkewe pwe, "Minikka e feoffeori pwe aeremas repwe monofit ina epwe wewwen rhag, nge ifa mwo aenneewan ngaeni aeremas na efeori minikkei pwe epwe wen!

² Efaer gacch ngaeni igine aere egeeogeeo tae efai fai temoag rhaepin iuwan a aegekkaerh noa neeset me mmwaen aan feori pwe erhai aet mwittig kaan epwe monofit.

³ Iwe oaw emwaeri meeta kkomwu oawgaen feori!

"Aere igine erhai pwiimw e monofit, soong ngaeni, aere e toagun saengi aan monofit, saeneti noa.

⁴ Aere igine e monofit ngaeniug faaen fisuuw noan eraaen, nge a gaen itto aengaeniug pwe, 'ngaang iya toagun saengi monofitiiy,' wopwe pwan saeneti noa."

Niugiuniug

⁵ Oapostonus kkewe ra aengaeni Soamwoon pwe, "Oatomoga noa aemaem niugiuniug."

⁶ Soamwoon a paniuwaeni pwe, "Aere aaemi niugiuniug eweei nepaen faiun *mustard* een, emmwen oawpwe aengaeni waniwan temoag een pwe, 'Wisaegtae me waeroamw wa noa foat noa nee set!' ina epwe rongorong ngaeniug.

Aaen Erhai Rhooan Akkiuneo Engaang

⁷ “Aere erhai noawumw rhooan akkiuneo engaang fe-taen noan maat aere e aefaenniy noawumw *sheep*, iwe nge enoa itto me noan maat, wopwe mmwenen aengaeni pwe aemwetekkaeiyyug pwe epwene mwongo?”

⁸ Aapw aere! Wopwe faer aengaeni pwe, ‘Wonoa feeori aenaeni mwongo, nge wa ngaettae mengaagiun oamw engaang nge wa itto ngoatto aenaeni pwe ipwe mwongo nge i iun; inoa moann nge een wonaaen mwongo.’

⁹ Rhooan akkiuneo we mwo nge wosoapw ngaenneei aan aerhigerhig pwe iga e tapweei oamw akkiuneo, aere meeta?

¹⁰ Epwan ina rhag wusumi; oatona oawpwe oamoanna meeta oawpwe feeori, nge oawwa iura pwe, ‘Aemaem rhag rhooan akkiuneo; aeifeori rhag engaang kka aemaem.’”

Jesus e Aecchipwa Seig Mwaaen

¹¹ Igiwe Jesus a nennoa ngaeni Jerusalem, efaaeraeg woan ayiuweyiwen nepetaen Samaria me Galilee.

¹² Oatowe a toonong noan eew pwugos, a rhuungiir seig mwaaen kaenepaai. Re iu rhag me itaaw,

¹³ nge ra aekkepwas, “Jesus! Soamwoon! Faayeogemaem!”

¹⁴ Jesus a weriir nge a aengaeniir pwe, “Oawnoa aengaeniir patere pwe repwe worigaemi.”

Igiwe ra feffaeraeg noa nge a rhiuw noa minikkewe kaenepaiir.

¹⁵ Oatowe erhai me neeiir a weri pwe a cchipw noa miniwe ginin, iwe a sefaaen, nge a gaen igin oatomogatae aan aeppingepinga Deus.

¹⁶ A itto aerheitiw oanongan reen pirheen Jesus a itto fang aan aerhigerhig. Mwaaen we nge erhai re Samaria.

¹⁷ Jesus a kkepas nge a iura pwe, “Nge aetae iwe seig rhooa kkewe e mwamwaai noa giniir; nge ifa ikkiwe tiweman?”

¹⁸ Meeta faaen minne waseona een rhag minne e sefaaeneto pwe e itto fang aen Deus aerhigerhig reen?”

¹⁹ Nge Jesus a aengaeni pwe, “Iutae wa noa; pwe oamw niugiuniug a aetekkoagtae.”

*Itton Minna Mweoiun Deus
(Mat 24.23-28, 37-41)*

²⁰ Aekkaerhai Pharisees re aeiiineow Jesus ineeta epwe itto minna Mweoiun Deus. Nge a paniuwaeni pwe, “Minna Mweoiun Deus ina esoapw itto nge noan taeppen we sipwe rhuungi.

²¹ Esooar ne epwe iura pwe, ‘Oaw pipiiy pwe ieei iiy!’ aere ‘Inaan iiy!’; pwe minna Mweoiun Deus ina a no neemi.”

²² Iwe aengaeniir rhooran kkiyeo kkiyeo naiun pwe, “Eyor oatokka oawaenaeneei pwe oawpwe weri eew minikka raaenin mwaaen we Naiun Aeremas, nge oawsoapw weri.

²³ Eyor manekka repwe aengaenigaemi pwe, ‘Fanna igi-naan!’ aere, ‘Fatto igaan!’ Nge aaemi oawsoapw toowow noa giutta fetaeneei.

²⁴ Pwe igine epwene weriwer noan naaeng nge eaesserema noa noan naaeng, ina epwe pwan ina wusun mwaaen we Naiun Aeremas noan minna raaenin.

²⁵ Nge mmwan, ina epwe igin affayeo me serhoawun me reer aeremesaen raaennekkei.

²⁶ Epwe pwan taeppen miniwe ewen mweoiun Noah, ina epwe pwan wen noan raaenin mini Naiun Aeremas.

²⁷ Oanongeer aeremas rerhiuwen mwommwongo me kukkupwun, nge mwaaen me rhoopwut re pwiuppwiuniuw toori raaenin we Noah a teotae rhiun pwoot we waan, iwe eitto rhag noataer we niir noa oanongeer.

²⁸ Epwe pwan taeppen wenimweoiun Lot. Oanongeer aeremas nge re mwongo noa rhag me kkupwun noa rhag, nge re chuwaai fetaen, foato fetaen, me kaiu fetaen iimw.

²⁹ Noan raaenin we Lot a nigiti Sodom, aengaet me *sulfur* a piungtiw me noan naaeng a ittiw niir noa oanongeer.

³⁰ Epwe pwan ina wusun minne epwe wen noan raaenin na epwe pwaeto mwaaen we Naiun Aeremas.

³¹ “Noan raaenin naan nge iyo eno woan wungaen iimw, esoapw teotiw no nee iimw epwe pweipwog pisaegin; pwan ina rhag wusun iyo eno noan maat pwe esoapw pwan sefaen noa nee iimw.

³² Oawmaengiy rhag niewe pwiuniuwaei Lot!

³³ Iyo na emwerhaen epwe ammwarhiu menewan ina epwe ppiung saengi; nge iyo na eppiung saengi menewan, ina epwe menaw.

³⁴ Ipwe aengaenigaemi, pwe noan pwongin naan riiurhai aeremas re maiur woan eew poa; erhai repwe pwigi noa nge erhai epwe notiw.

³⁵ Riiurhai rhoopwut repwe ammaat mwongo; erhai repwe pwigi noa nge erhai epwe notiw.

³⁶ [Igin riiurhai mwaaen repwe engaang noan maat nge erhai ra pwigi noa nge erhai a notiw.]*

³⁷ Rhooran akkiuneo kkiyeo naiun ra aeineow pwe, “Iya, Soamwoon?”

Jesus a paniuwaeni pwe, “Ese tiwegin igine epwe yor erhai manimae ee, nge witiyas repwe mweoiuto reen.”

* **17:36** Petenan eei nge esoano noan aekkaew petenan kka efoatofoat noan kkepessaen Greek.

18

Fioang Awewen Erhai Rhoopwut Mae Pwiuniuwan me Erhai Soaw Kapwiung

¹ Iwe Jesus a fioangei ngaeniir rhooran kkayeo kkewe naiun eew fioangon awewe pwe repwe memmaeipin noa rhag oanongaen oat nge resoapw mwetekkaein fangetae.

² “Eno erhai soaw apwiung noan eew aepinoamw nge ese mesagiu Deus nge ese pwan aesirowuur aeremas.

³ Noan aepinoamw we nge epwan no erhai rhoopwut a mae pwiuniuwan, nge esooaw ikkitto rhag reen pwe epwe tipaengi nge a aengaeni pwe, ‘Tipaengiaei me reer rhooran appaniuwaen ngaeniaei.’

⁴ A ssiunaei aeen soaw apwiung we ese mwerhaen tipaengi rhoopwut we, nge enoa mwirin nge a maengiy nong rhag noan tipan pwe, ‘Inamwo ikka ise mesagiu Deus aere aesirowu aeremas,

⁵ iwe nge iga rhoopwut een a soaw ikkitto rhag angiurhiuwaei, iwe ipwene feeori ngaeni meeta na e tipaeni. Ngaere ise feeori ngaeni nge ina epwe ikkitto rhag angiurhiuwaei toori aaei sipegin aerhigerhig noa.’”

⁶ Iwe Soamwoon a pwan iura pwe, “Oaw aiussaening ngaeni meeta soaw apwiung aenneew we a iura.

⁷ Iwe Deus esoapw faer ppaeniir aeremas kkena a finiiir iga ra sessaeng ngaeni rhag neepwoong me neeraaen pwe epwe tipaengiir? Oaw niuwaennei nge epwe mmwaei aan tipaengiir?

⁸ Ipwe aengaenigaemi pwe Deus epwe mwetekkaei aan oayoow ngaeniir minikkena iir retipaeni. Iwe oaw niuwaennei pwe mwaaen we Naiun Aeremas epwe weri tiwegin me woan soanop reen oatonoa epwe sefaaeneto?”

Fioang Awewen Erhai Pharisee me Erhai Rhooran Iyoiyon Tax

⁹ Jesus a pwan fioangei awewe een ngaeniir aeremas kka remaengiy pwe iir regacch noa memmweer aaemweoi iwe nge oanongeer aeremas re sessoan tiw faer.

¹⁰ “Nonno noa woar riiurhai mwaaen renoa noan *Temple* we pwe repwe noa maeipin; erhai Pharisee nge erhai rhooran iyoiyon *tax*.

¹¹ Pharisee we a noa imweoi noa pwe a maeipin nge a iura pwe, ‘Wa aerhigerhig Deus pwe ngaang ise rhegoaw, ise oatupwutupw, me maiur ngaeni pwiuniuwaen erhai, taeppeer aeremas kka aaemweoi. Wa aerhigerhig pwe ngaang ise taeppen rhooran iyoiyon *tax* na eno ginaan.

12 Ngaang ise mwongo noan riuraan noan eew *week*, nge iya fang ngaeniug giniginin eew me reen seig me reen oanongan noa meeta paniuwaei.'

13 Nge rhoan iyoiyon *tax* we eiu me itaaw noa nge ese mmwen mwo nge epwe fattae weenaang, a gaen tugutuguw ne aiungan nge a gaen iura pwe, 'Deus, faaye-owaei, ngaang erhai man monofit!'"

14 Jesus a iura pwe, "Ipwe aengaenigaemi pwe rhoan iyoiyon *tax* naan nge saapw Pharisee naan minne enoa nee iimw nge e mwamwaai me noan sapweoiniun Deus. Pwe iyo na e aetaegiasa tae epwe sessoanotiw, nge iyo na epwe oasossonaetiwe epwe taegias tae."

Jesus a Maeipinaar Wonigaet Mwittig
(Mat 19.13-15; Mark 10.13-16)

15 Aemweoi aeremas repwigito naiiur wonigaet mwittig pwe Jesus epwe iseni tae paiun woar. Rhoan kkayeo kkewe naiun ra weriir nge ra soong ngaeniir reen miniwe refeeori,

16 nge Jesus a faingiir aetekkewe nge a aengaeniir pwe, "Fangeto aetekkena reei, nge oawsoapw aiugiur, pwe minna Mweoiun Deus ina aar aeremas kka reweer wonigaet.

17 Ennetaen, ipwe aengaenigaemi pwe iyo na ese aetiwa Mweoiun Deus taeppen erhai wonigaet, nge esoapw toonong noan."

Erhai Mwaaen Naiwiis
(Mat 19.16-30; Mark 10.17-31)

18 Erhai soamwooniir Jews a aeiineow Jesus pwe, "Sin-sei mwamwaai, meeta ipwe feeori nge epwe yo ngaeniaei menaw na esooar iaenin?"

19 Jesus a aengaeni pwe, "Meeta wo iura pwe imwamwaai reen?" Esooar erhai ne e mwamwaai pwe aeggaen Deus rhag.

20 Wogiuneei anniug kkewe: wosoapw ffeeor manetemwaai, wosoapw nni aeremas, wosoapw mwoarho, wosoapw oatupwutupw tae kkepas woan erhai, aesirowuur semoamw me inoamw.

21 Mwaaen we a paniuwaeni pwe, "Saengi rhag neenipwaen wonigaetei nge ngaang itapweei oanongaen oasoapwosoapw kkeei."

22 Igiwe Jesus a rongorong miniwe nge a aengaeni pwe, "Erhiuwen no eew minne wopwe feeori. Wonoa ameow noa oanongaen pisaeginw nge wa fang senaapian ngaeniir rhoa affayeo, ina nge epwe yor wiinoamw me woai naaang. Iwe wa itto wopwe itto tapweaei."

23 Igiwe mwaaen we a rongorong miniwe a igin aenneew tipan, pwe igiwe iiy erhai man naiwiis.

²⁴ Jesus a weri pwe a aenneew tipan nge a iura pwe, “Ifa mwo waeiraesin aar rhoopakka re pisaegisaeg repwe toonong noan minna Mweoiun Deus!

²⁵ Egin mererhaeg aaen erhai *camel* epwe toonong noan ngetaen efoarh oaguwa, me mmwaen aaen erhai mwaaen pisaegisaeg epwe toonong noan minna Mweoiun Deus.”

²⁶ Rhooa kkewe re rongorong miniwe ra aeiineo pwe, “Iwe, iyo rhag epwe mmwenen menaw?”

²⁷ Jesus a paniuwaeni pwe, “Minikken a ese mmwen ngaeniir aeremas nge emmwen ngaeni Deus.”

²⁸ Peter a iura pwe, “Pipiiy! Aemaem aeiya nigiti pwu-gusaemmaem nge aeiya itto tapweog.”

²⁹ Jesus a aengaeniir pwe, “Ennetaen, ipwe aengaenigaemi pwe aere erhai esiusaengi imwan, aere pwiuniuwan, aere pwiin, aere seman aere inan, aere naiun pwe faaen itaen minna Mweoiun Deus,

³⁰ ina epwe gin temoag minne epwe pwiigi reen oate igina, nge noan oatona epwe itto epwe pwan pwiigi menaw na esoar iaenin.”

Aeinuwaen Aaen Jesus Aepesa Aan Maenoa
(*Mat 20.17-19; Mark 10.32-34*)

³¹ Jesus a paeniir noa rhoaan akkiuneo kkewe seig me riurhai a aengaeniir pwe, “Oawaiussaening! Sipwene noa Jerusalem nge oanongaen meeta kkewe profeta kkewe reiura pwe wunuunun mwaaen we Naiun Aeremas ina epwene netaen wen.

³² Repwene iseni nong neepaiur Gentiles, ina repwene aeni aegekkaei, me aessaewa, nge re oattuffa.

³³ Repwene wirhiy nge reniiy noa, mwirin enuuw raaen nge a menaw sefaaen tae.”

³⁴ Nge rhoaan akkiuneo kkewe naiun nge rese metefaaegini minikkewe; pwe faan kkepas kkewe nge emwoan saengiir, iwe rese metefaaegini meeta kkewe Jesus e aepesa.

Jesus a Aeffetanao Mesaen Erhai Mwaaen Parh
(*Mat 20.29-34; Mark 10.46-52*)

³⁵ Jesus a aekkaerepa to Jericho, igiwe erhai mwaaen parh emooaton wenepigin aan nge e tittingoar noa rhag.

³⁶ Igiwe a rongorong aar rhoaanap we itto faaeraeg noa me oaron, nge a aeiineeor pwe, “Meeta eei?”

³⁷ Ra aengaeni pwe, “Jesus re Nazareth iye epwe faaeraeg na me igeei.”

³⁸ Mwaaen we aekkepwas noa, “Jesus, Naiun David, faaye-owaei!”

³⁹ Aeremas kkewe reno mmwan ra soong ngaeni pwe epwe anniug noa. Nge egius mwo nge oatomoga noa aan iyaekkepwas, “Naiun David, faayeowaei!”

⁴⁰ Jesus a iug noa nge a akkiuneo pwe repwe pwigito man masparh we reen. Igiwe a arapeto nge Jesus a aeineow pwe,

⁴¹ “Meeta wa tipaeni pwe ipwe feeori ngaeniug?”

Nge a paniuwaeni pwe, “Soawumwaer! Ngaang imwerhaen ipwe weriwer sefaan.”

⁴² Jesus a aengaeni pwe, “Iwe fanoa pwe wopwe weriwer! Oamw niugiuniug a aecchipwoag.”

⁴³ Iwe rhag nge wonowe a ffatenoa mesan, iwe a tapweei Jesus iwe a itto fang aen Deus aerhigerhig. Igiwe rhoanap we ra weri miniwe ra aepingeping a Deus.

19

Jesus me Zacchaeus

¹ Jesus a itto noan Jericho iwe ra feffaeraeg noa.

² Eyor erhai soamwoonin rhoan iyoiyon *tax* itan Zacchaeus, erhai man naiwiis.

³ Iiy eakkaegina epwe weri Jesus nge igiwe iiy erhai mwaaen mwittig ese weri Jesus me noan pwuwa we.

⁴ Iwe a fattapw noa me mmwaan pwuwa we a noa teeotae woan efoarh waniwan pwe epwe weri Jesus aan faeraeg noa me igiwe.

⁵ Oatowe Jesus enoa itto pwiuneoi we, enoa fattae a weri Zacchaeus iwe a aengaeni pwe, “Mwetekkaeitiw Zacchaeus pwe ipwe no noan iimw we imwoamw raaneeni.”

⁶ Zacchaeus a teo mwetekkaeitiw a itto aewenimmwa Jesus noan aan kker.

⁷ Oanongeer aeremas kkewe ra weri minikkewe a rhaepetae aar mwangiuniungiun pwe, “Mwaaen een epwene noa no noan imwaen erhai man monofit!”

⁸ Zacchaeus a iutae nge a aengaeni Soamwoon pwe, “Soawumwaer! Ngaang ipwene fang esoapw pisaegiy ngaeniir man affayeo, nge ngaere eyor mane iriugiuriug ngaeni nge ipwe aesefaeni paniuwaen minikkena aan faan faawu.”

⁹ Jesus a aengaeni pwe, “Menaw a toori imweei raaneeni, pwe pwan mwaaeneei nge pwan iiy teoteeon Abraham.

¹⁰ Manewe Naiun Aeremas eitto giut nge eitto aemewaar rhoa mwaenirh noa.”

Fioangon Faiun Gold

(Mat 25.14-30)

¹¹ Nugunupaen aar aeremas aiussaening minikkeei nge Jesus a soapwei noa aan kkepas nge a fioangei ngaeniir eew

fioangon awewe. Igina nge a aekkaerepa noa Jerusalem, nge rhooawe ra niuwaennei pwe miniwe Mweoiun Deus epwene oaropaen pwaeto.

¹² A iura pwe, “Eno erhai mwaaen taegias epwene noa wooan eew faniuw taaw noa epwene noa no pwe *king*, nge mwirin a sefaaeneto neepwugusan.

¹³ Wenimmwaen aan epwe noa a faingi fengaenniir rhoaan akkiuneo kkewe naiun iwe seig, nge a ngaenneer eew tutuun *gold* nge a aengaeniir pwe, ‘Oawgiutta ngaere eyor minne oawpwe aemenewa ngaeni minneen igine ipwene noa.’

¹⁴ Iwe nge aeremas kkewe naiun nge reoapwuta, iwe ra fangenoa rhoaan pweipwogin mwaenieer wooan faniuw we eew pwe, ‘Aemaem aeise tipaeni mwaaen een pwe epwe no pwe aemaem *king*.’

¹⁵ “Ra oatonongei mwaaen we pwe *king* nge a noa sefaaeneto. Iwe rhag nge a akkiuneo rhoaan engaang kkewe naiun pwe repwe itto reen pwe epwe pipiyy a ifa nepaen minne ra aemenewa ngaeni senaapiy kkewe.

¹⁶ Iwe egommw a iura pwe, ‘Menap, a seig aan paer noa faiun *gold* minne iya aemenewa ngaeni iwe efai iwe wongaenneaei.’

¹⁷ Mwaaen we a iura pwe, ‘Wo igin mwamwaa. Een erhai rhoaan akkiuneo we wo igin mwamwaa! Pwonno iga min paerhigerhig mwo nge wo aniugiuniug noan, een wopwene nemaeni seig aepinoamw.’

¹⁸ Rhoaan akkiuneo we ariiurhaiun a noa itto a iura pwe, ‘Menap, a nimowu aan paer noa faiun *gold* minne iya aemenewa ngaeni iwe wongaenneaei.’

¹⁹ Iwe mwaaen we a iura pwe, ‘Een wopwene nemaeni nimowu aepinoamw.’

²⁰ Iwe erhai a noa itto nge a iura pwe, ‘Menap, ieen faiun *gold* we noawumw i oapa noan eew mengaag.

²¹ I mesagiug pwe iga een erhai mwaaen sosoong. Wopwigi minikka saapw oamw nge wo giniyy minikka saapw foatogiyoamw.’

²² Mwaaen we a aengaeni pwe, ‘Een erhai rhoaan akkiuneo eanneew! Minikkomwu mwaenioamw nge ipwene oamonofitiug wooan! Wogiuneei pwe ngaang erhai man sosoong, ipwigi mwo nge minikkena saapw aaei nge i giniyy uwaen irae kena ise foatogi.

²³ Iwe meeta rhag wose ngoannong senaapiy we naeyi noan *bank* reen? Ina nge ipwe pwigi nge epwene yor menewan iga iya sefaaeneto.’

²⁴ A aengaeniir rhooa kkewe reiu pwe, ‘Pwigi saengi

mwaaen mwuun faiun *gold* na nge oawwa ngaenneei mwaaen we seig naiun faiun *gold*.’

²⁵ Nge ra aengaeni pwe, ‘Menap, a fasiun seig naiun *gold*!’

²⁶ A iura pwe, ‘Ipwe aengaenigaemi pwe, iyo a yor meeta aan nge repwe pwan fang ngaeni, nge iyo ese yor meeta aan nge repwe pwigi saengi mwo nge iwe egius iwe eyor reen.

²⁷ Igina, nge rhooa kkewe rhoaan kkoapwutoi ikkiwe rese tipaeni pwe ipwe no pwe aar *king*, oawpwigiir to igei, iwe oawwa itto niir tiw me weni mmwaei!”

Toonongon Jesus Noan Jerusalem

(*Mat 21.1-11; Mark 11.1-11; John 12.12-19*)

²⁸ Mwirin aen Jesus aepesa minnee, nge a gommw noa weni mmweer ra noa ngaeni Jerusalem.

²⁹ Igiwe a aerepato Bethphage me Bethany me reen miniwe rhugun *Olives* nge a akkiuneeor noa riiurhai rhoaan kkayeo kkewe naiun

³⁰ nge a aengaeniir pwe: “Oawnoa noan pwugos mwu mmwaemi; nge oatona oawpwe toonong nge oawpwe weri erhai *donkey* mwittig e feotaeg ina esaaen yor mwo erhai ne ewaawa. Oawpwaesi oawwa pwigito igei.

³¹ Ngaere igine aeremas eaeineogaemi aere meeta oawsaeneti reen, oawwa aengaeni pwe Soamwoon e mwerhaen waawa.”

³² Ra noa nge oanongaen min kkewe Jesus e aengaeniir nge ewen ngaeni.

³³ Igiwe ra pweppwaesi ooas mwittig we nge manewe naiun a mwaenieniy ngaeniir, “Meeta oawwa pwaesi noa reen?”

³⁴ Ra paniuwaeni pwe, “Maasta e mwerhaen waawa”,

³⁵ iwe ra pwigi noa *donkey* we reen Jesus. Ra iseni tae minikkewe mengaagiir wooan, iwe ra iseni tae Jesus wooan.

³⁶ Igiwe Jesus a faaeraeg nge aeremas ra mmeraeg tiw mengaagiir wooan ennap we.

³⁷ Igiwe a aerepato Jerusalem, pwiuneoi we ennap we eittiw me reen rhugun *Olives*, rhooa towunap kkewe naiun rhoaan kkayeo ra rhaepetae aar fang aan Deus aerhigerhig, nge re aekkepwas temoag tae reen aar aepingepinga Deus reen oanongaen manaman kkena ra weri.

³⁸ Ra iura pwe, “Deus epwe aewenepwuwa *king* na eitto faaen itaen Soamwoon! Oapoas me woainaaeng me nning ngaeni Deus na oarosaen taegias!”

³⁹ Aemweoi Pharisees reno noa pwuwa we ra aengaeni Jesus pwe, “Sinsei, mwaenieniy ngaeniir rhoaan kkayeo kkomwu noawumw pwe resoapw oacchorong!”

⁴⁰ Jesus a paniuwaeniir, “Ipwe aengaenigaemi pwe, aere igine repwe anniug, ina nge fai kaan minne repwe aekkepwas.”

Jesus a Saengiti Jerusalem

⁴¹ Igiwe Jesus a aerepato aepinoamw we, nge oatowe eweri nge a saengiti,

⁴² nge a iura pwe, “Aetaemwo wogaen giuneei raaneeni meeta minne epwe pwigito oapoas! Nge igina een wosoapw mmwenen weri!

⁴³ Eew oat epwe noa itto rhoan kkoapwutomw repwene roangeog noa, nge reaetippoag, nge ra pineyi saengiug oanongaen pwiuneoi.

⁴⁴ Repwene oatoaropoag noa een me aeremas kkomwu noan minimwu neniemw; esooar efai faai kaan ne epwe notiw nenien, pwe iga een ese pwae ngaeniug oatowe Deus e itto pwe epwe aemenewoag!”

Jesus a Noa Noan Temple we

(Mat 21.12-17; Mark 11.15-19; John 2.13-22)

⁴⁵ Jesus a noa noan *Temple* we nge a rhaepetae aan asiir wow rhoan ameomeo kkewe reno noan,

⁴⁶ a aengaeniir pwe, “Efoatofaat noan Pwapwior we e Santos pwe Deus e aepesa pwe, ‘*Temple* e aaei nge imwaen maeipin.’ Nge aaemi oawwa ssiuweniy pwe nenien wopoor rhoa mwoarho!”

⁴⁷ Oanongaen raen nge Jesus efenai noan *Temple* we. Soamwoonin patere me sinsein anniug me soamwooniir aeremas kkewe ra mwerhaen niy noa,

⁴⁸ nge ina rhag esooar eew meeta ne re giuneei pwe repwe feeori ngaeni, pwe igiwe oanongeer aeremas kkewe nge retipaeni repwe aiussaening ngaeni minikkewe petenaen mwaenian.

20

Kkepas Aeiineon Nemaeniaen Jesus

(Mat 21.23-27; Mark 11.27-33)

¹ Eraaen igiwe Jesus efenai ngaeniir aeremas me noan *Temple* we, efenaiuw Kkepas Mwamwaai we, nge soamwooniir patere, me sinsein anniug me fengaen me rhoa kkewe ra tugufaeyi ra noa itto

² nge ra aengaeni pwe, “Meeta nemaenioamw pwe wopwe feeori minikkeei? Iyo a ngaenneog oamw nemenem?”

³ Jesus a paniuwaeniir pwe, “Ipwe aeineogaemi eew kkepas aeineo. Oaw aengaeniaei,

⁴ iya eitto aen John nemenem pwe epwe paptismus fe-taen: saengi Deus aere saengi aeremas?”

⁵ Ra rhaepetae aar aengimaw fengaen wooar, “Meeta sipwe iura? Aere sipwe iura pwe, ‘Saengi Deus,’ nge iiy epwe aeiineogirh pwe, ‘Nge meeta rhag oawse niugiuniug ngaeni John reen?’

⁶ Nge aere sipwe iura pwe, ‘Saengi aeremas,’ ina nge pwuwaen aeremas eei nge repwene teragirh, pwe iga re niugiuniug pwe John nge erhai profeta.”

⁷ Ra paniuwaeni pwe, “Aeise giuneei iga e itto me ee.”

⁸ Iwe nge Jesus a aengaeniir pwe, “Ina nge ngaang isoapw pwan aengaenigaemi iya iga ipwigi me ee nemaeniaei pwe ipwe feori minikkeei.”

*Fioangon Awewen Rhoan Aemmwenen Maat we
(Mat 21.33-46; Mark 12.1-12)*

⁹ Iwe Jesus a aeni eew fioang aweve ngaeniir aeremas kkewe. “Eno erhai mwaaen a foatogi eew maetaen *grape*, nge a ngaenneer aaemweoi rhoan maat pwe repwe aefaenniy. Iwe rhag nge a saei taaw noa.

¹⁰ Enoa itto oatowe repwe giniy uwaen waniwan kkewe, a fangenoa erhai rhoan akkiuneo pwe epwe noa pwigi wiwiin me reen uwaen maat kkewe. Nge rhoan maat kkewe ra wirhiy nge ra aesefaaeni noa nge esooar meeta epwigi.

¹¹ Iwe a pwan fangenoa erhai rhoan akkiuneo; rhoan maat kkewe ra pwan noa wirhiy nge ra feori ngaeni aekkaew wegitaeg aessaew nge re aesefaaeni noa nge esooar meeta epwigi.

¹² A pwan fangenoa aeiniurhaiun rhoan akkiuneo kkewe; rhoan maat kkewe ra pwan oawoasu nge re aerheiwow niugiun maat we.

¹³ Manewe aan maat we a iura pwe, ‘Meeta minne ipwene feori? Maeni ipwene fangenoa aeterhaeng e naeyi; e tiwegin nge repwe aesirowu!’

¹⁴ Nge igiwe rhoan maat we ra weri, ra pwiungiuw fengaenniy wooar pwe, ‘Ieei mwaaen we naiun mwaaen we aan maat eei iwe epwe pwugusaeni minnee. Oaw itto sipwe niy noa, pwe sipwe pwigi minne pwugusaen pwe pwugusarh!’

¹⁵ Iwe ra oatorawow niugiun maat we nge ra niy noa.”

Jesus a aeiineeor pwe, “Meeta manewe aan maat we epwe feori ngaeniir rhoan maenemaen kkewe?

¹⁶ Epwe itto a itto niir noa mwaaen kkewe, nge a ngaenneer aaemweoi maat we.”

Igiwe aeremas ra rongorong minnee nge ra iura pwe, “Aapw saapw ina!”

¹⁷ Jesus a wegitaeg ngaeniir nge a aeiineeor pwe, “Iwe ina nge meeta awewen miniwe noan Pwapwior we e Santus?

‘Fai we rhoan kiau iimw re aerheei noa,

nge faer ina fai we egin yor ipitan me mmwaen oanongan.'

¹⁸ Oanongeer rhoakka repwe ppiungiutiwoan woan faai een nge repwe mwetoarotoar noa; nge aere faai een epwe ppiungiutiwoan erhai, epwe aepettatiw."

Kkepas Aeiineon Tax

(*Mat 22.15-22; Mark 12.13-17*)

¹⁹ Sinsein anniug me soamwoonin patere kkewe ra mwerhaen repwe torofi Jesus, pwe igiwe re giuneei pwe fioangoor miniwe a aengaeniir; nge igiwe re mesagiur aeremas kkewe.

²⁰ Iwe ra weti ngaeni eew oat ne repwe mmwenen torofi. Ra fang ngaeniir aaemweoi mwaaen senaapiy pwe repwe noa feoriir noa pwe iir aaemweoi mwaaen wenewen, iwe ra fangenoa iir pwe repwe noa oatupwu Jesus pwe repwe torofi reen aan kkepas pwe epwe mmwen pwe repwe fangenoa iir reen *Governor* reen Rome ina eyor maemaewan.

²¹ Iwe aeremas kkewe ra aengaeni Jesus pwe, "Sinsei, aeigiuneei pwe minikkomwu woapesa nge ewenewen. Aeigiuneei pwe een wose aefaennyi wunuunun erhai me erhai, nge wa fenaiuw wenewenen nee tipaen Deus ngaeniir aeremas.

²² Aengaenigemaem, emwamwaai aarh sipwe fang *tax* ngaeni Soamwoonin Rome, aere aapw?"

²³ Jesus emetefaaegini oatupwutupw we aar nge a aengaeniir pwe,

²⁴ "Pwaerito efai senaapiy *silver*. Mesaen iyo me itaen iyo imwu eno woan?"

Ra paniuwaeni pwe, "Soamwoonin Rome."

²⁵ Jesus a iura pwe, "Iwe ina nge oawngaenneei Soamwoonin Rome meeta aaen Soamwoonin Rome, nge oawngaenneei Deus meeta aaen Deus."

²⁶ Iwe esooar meeta ne emmwen pwe repwe torofi Jesus reen petenaen kkepas kkewe epaniuwaeni ngaeniir me weni mmweer rhoa towunap we, iwe ra anniug noa rhag pwe ra mwaar reen sefaaenin kkepas kkewe aan.

Kkepas Aeiineon Menaw Sefaaen

(*Mat 22.23-33; Mark 12.18-27*)

²⁷ Aaemweoi Sadducees, iwe reiura pwe esooar menaw sefaaen me reen mae, ra itto aengaeni Jesus pwe,

²⁸ "Sinsei, Moses minne e foatogi anniug eei pwe aemaem: 'Aere erhai mwaaen a mae nge esooar naiun woan rhoapwut we pwiuniuwan, ina nge mwaaen we pwiin epwe pwiuniuwaeni rhoapwut we pwe epwe yor naiun pwe epwe ffai pwe naiun mwaaen we a mae.'

²⁹ Reno fiusiومان pwipwi; mwaaen we e tugufaeyi a pwiuniuwaeni nge emae noa nge esooar naiun.

³⁰ Iwe ariiurhaiun a pwan pwiuniuwaeni rhoopwut we,
³¹ pwan ina rhag iwe aeiniurhaiun. Oanongeer me fiusi-
 uman nge ina rhag miniwe ewen ngaeniir. Remae noa nge
 esooar naiiur.

³² Mwirin noan, nge rhoopwut we a maenoa.

³³ Iwe igina, wooan raaenin na manimae repwene menaw
 sefaaen, iyo me neeiir epwe pwiuniuwaeni rhoopwut we?
 Pwe igiwe rhoawe fusiومان nge re pwiuniuwaeni niewe.”

³⁴ Jesus a paniuwaeniir pwe, “Mwaaen me rhoopwuton
 faaen mweoiuw nge re rhoaan ngaenne,

³⁵ iwe nge mwaaen me rhoopwut kena ra ffin tae pwe
 repwe menaw sefaaen iwe nge ra no noan mweoi na epwe
 noa itto nge ina resoapw rhiuwen pwiuppwiuniuw.

³⁶ Iir repwene weei rhag angkenus pwe resoapw mmwe-
 nen mae. Ra no pwe naiun Deus pwe ra menaw sefaaen me
 reen maenoa.

³⁷ Moses a aeffeta noa pwe manimae nge re menaw sefaaen
 tae. Me reen petenaen fioangon waniwan we eppwunuwow
 aengaet me reen iwe e aepesa kkepessaen Soamwoon pwe,
 ‘aaen Abraham Deus, aaen Isaac Deus, me aaen Jacob Deus.’

³⁸ Pwe iiy minne aar Deus rhooakka re menaw nge soapw
 rhooakka ra mae, pwe me reen nge oanongeer aeremas nge
 re menaw me reen.”

³⁹ Aekkaemweoi me neeiir sinsein anniug we ra mwae-
 nieniy tae, “Sinsei, eigin gacch aessefaaenin kkepas we
 oamw!”

⁴⁰ Pwe iir ra mesag pwe repwe aeiineo mwo nge eew kkepas
 aeiineo.

Kkepas Aeiineon Iyo na Kristus

(Mat 22.41-46; Mark 12.35-37)

⁴¹ Jesus a aeiineeor pwe, “Meeta emmwen pwe re iura pwe
 Kristus nge teoteeon David reen?”

⁴² Pwe David wooan oanongan nge e iura me noan pwap-
 wior we Psalms,

‘Soamwoon a aengaeniaei Soamwoon:

Mooat tiw peig mwaaeneei

⁴³ toori aaei ipwe iseniir tiw rhoaan oapwutoag faaen
 pirhemw

pwe repwe no pwe nenien pirhemw.’

⁴⁴ David e faingi pwe iiy ‘Soamwoon’; iwe nge e ifa wusun nge
 Kristus epwe no pwe teoteeon David?”

Jesus a Atapeonneogiur Reen Sinsein Anniug Kkewe

(Mat 23.1-36; Mark 12.38-40)

⁴⁵ Igiwe aeremas re aiussaening ngaeni nge Jesus a aen-
 gaeniir rhoaan kkayeo kkewe naiun pwe,

46 “Oawaefaennigaemi reen sinsein anniug kkewe, reaerhaengi aar faaeraeg fetaen faaen mengaagiur min enaenaei, nge reaerhaengi aar aeremas repwe aewenimmwaar me aesirowuur me noan inwaen chuwaai, nge re fini rhag neniy kkena nenieer rhooa taegias me noan wutteer Jews me pwiuneoi mwamwaai me noan gupwun.

47 Re oapwurhaar rhoopwut kkewe ra mae pwiuniuweer, nge ra pirifa saengiir pwuguseer, nge ra oangona ngaeniir aeremas aar maeipin enaei! Iwe nge aegaeregaeriir ina epwene igin waeiraes!”

21

*Maenigaech we Aaen Rhoopwut we a Mae Pwiuniuwan
(Mark 12.41-44)*

1 Jesus a fan fetaen nge a weriir rhooa naiwiis pwe ra iseis nong aar maenigaech noan nenien maenigaech me noan *Temple* we,

2 iwe nge a pwan weri erhai rhoopwut mwaenene a maenoa pwiuniuwan a iseis nong riufai manfaifai pwe aan maenigaech.

3 Nge a iura pwe, “Ennetaen, ipwe aengaenigaemi pwe maenigaech na rhoopwut mwaenene we efang ina e temoag saengi aar oanongeer aeremas towunap kkewe.

4 Pwe oanongeer nge reiseni nong nusegin wiineer; nge rhoopwut een inamwo iga eigin affayeo nge efang oanongaen minikka eno reen.”

*Jesus e Aepesa Toaroponoan Temple we
(Mat 24.1-2; Mark 13.1-2)*

5 Aaemweoi me neeiir rhoaan kkayeo kkewe re fiffioangei *Temple* we reen nningen faai kkewe eno wooan me niffang kkewe aar aeremas ngaeni Deus. Nge Jesus a iura pwe,

6 “Oanongaen minikka oawwa weri, ina eyor eew oat ina epwe noa itto nge esooar efai faai kaan ne epwe notiw nenien; oanongan noa nge repwene toaropoti.”

*Affayeo me Aewwaeiraes
(Mat 24.3-14; Mark 13.3-13)*

7 Ra aeiineow pwe, “Sinsei, ineeta epwe wen minnee? Meeta na epwe wen nge epwe pwaeri ngaenigemaem pwe minikkei nge epwene wen?”

8 Jesus a iura pwe, “Oawaefaennigaemi; oawteorh tupw. Towunepeer aeremas repwene itto faaen itaei nge repwene aepesa pwe, ‘Ngaang minne iiy! A ieei oatowe!’ Nge oawsoapw tapweer.

9 Oawsoapw mesag igrine oawpwe rongorong kkepessaen moawun me fitigogon wenifaniuw; ikkei minikka epwe

mmwaen wen, iwe nge saapw reen a arapeto ne soapwonoan.”

¹⁰ A pwan soapwei noa a pwan iura pwe, “Faniuw me faniuw nge repwene fiow fengaen, eew mweoi me eew mweoi repwene moawun fengaen.

¹¹ Epwene yor fanemwar tettemoag, me naengeta, me semwaai temoag me oanongaen pwiuneoi; epwene yor mini ariuriu me aemmesag ittiw me weei naaeng.

¹² Ina rhag nge weni mmwaen minikkeei epwene wen, ina repwene torofigaemi nge ra aewwaeiraesigaemi; ra pwigigaemi noa noan wutteeer Jews pwe oawpwene noa apwiung iwe nge oawnoa kanepwus; repwene pwigigaemi weni mmweer *king* me soamwoon pwe faaen itaei.

¹³ Nge a ieei oaton aaemi oawpwe aepesa Kkepas Mwamwaai we.

¹⁴ Oawpwe fasiun oamoannatae neetipaemi pwe oawsoapw aiunaengiy aaemi noa saenetigaemi,

¹⁵ pwe ngaang ipwe ngaennegaemi mwaeniaemi me repi-aemi nge esooar erhai rhoon kkoapwutomi epwe mmwen epwe appaniuwaeni aere paniuwaeni mwaeniaemi.

¹⁶ Aaemi ina inaemi me semaemi, pwiimi, perhaengiyaemi, me maereyaeremi, minne repwe fangenoa aaemi. Nge aaemweoi aaemi ina repwene nigaemi noa.

¹⁷ Oanongeer aeremas nge repwene oapwutaegaemi noa pwe faaen itaei.

¹⁸ Ina rhag ina eyaen mwo aennirhimwemi nge esoapw ppiung noa.

¹⁹ Oaw oarhorho, nge ina nge oawpwe menaw.

*Jesus a Aepesa Wunuunun Ffeir Noan Jerusalem
(Mat 24.15-21; Mark 13.14-19)*

²⁰ “Iginde oawpwe weriir sonotaw aar pwaeniaeniy noa Jerusalem, ina nge oawwa giuneei pwe a arap oaton aan epwene ffeir noa.

²¹ Iwe rhooawe reno Judea repwe fattapwetae weei rhug; rhooawe reno nee aepinoamw repwe siusaengi, rhooawe reno neman nge resoapw ittiw no nee aepinoamw.

²² Pwe ikkinaan raaenin kena raaenin aegaeregaer, nge minikkeei epwe pwaeritae minikkiwe mwaeniaen Pwapior we e Santus e aepesa.

²³ Epwe ifa mwo aar affayeo rhoapwut pwoopwo me ikka re nayigit noan oaton naan! Temoagon aewwaeiraes epwene itto wenifaniuw, nge aeen Deus aegaeregaer epwene itto wooar aeremas kaan.

²⁴ Aaemweoi repwene mae wooan saeitan nge aaemweoi repwene pwigiir noa wooan aekkaaemweoi faniuw; nge re

Gentiles ina repwene itto pwuraegraeg wooan Jerusalem toori aan moanno noa minna ootoor.

Itton Mwaaen we Naiun Aeremas
(Mat 24.29-31; Mark 13.24-27)

²⁵ “Epwene yor eew aeginn epwene wen ngaeni aenet me meram me fiu. Nge wooan soanop nge towunepaen faniuw repwene maegin no noan aewwaeirae, repwene mesagiu piungpiungiun noa me pwuurtaen saaet.

²⁶ Aeremas repwene niyoarorhrorh reen aar mesag noan aar wetiwet ngaeni meeta epwe wen ngaeni faeinaengiy, pwe minikkenmaemaewaen noan naaeng repwene mwagiut saengi nenieer.

²⁷ Noan oatonaan nge miniwe Naiun Aeremas epwene pwaeto me noan naengemaan reen maemaewan me nnin-gen.

²⁸ Oatona epwe wen minikkeei, nge oawwa iutae nge oawwa saeregi tae rhimwemi, pwe menewaemi ina a arapeto.”

Fenaiun Waniwan e Fig
(Mat 24.32-35; Mark 13.28-31)

²⁹ Jesus a aengaeniir floangon awewe een: “Oawmaengiy efoarh waniwan *fig* me oanongaen waniwan kkewe aaemweoi.

³⁰ Nge oawpwe weri minikkenmaemaewaen pwe a pwiugiuw wow, oawwa giuneei pwe a arapeto neraeg.

³¹ Epwan ieei rhag taeppen, igine oawweri minikkeei pwe a wen, ina nge oawwa giuneei pwe arapeto minna Mweoiun Deus.

³² “Ennetaen, ipwe aengaenigaemi pwe oanongaen minikkeei nge epwe wen wenimmwaen iga aeremesaen igina repwe maenoa.

³³ Naaeng me soanop repwe soapwonoa, nge aaei kkepas esoapw soapwonoa.

Oaw Aefaennigaemi

³⁴ “Oaw aefaennigaemi pwe oawte igin gupwun me oappwunaas me aaemi aiunaengiy menaen menaw eei, nge epwe tooto raaenin naan nge epwe rhiuwen torofigaemi rhag

³⁵ taeppen iga oawyo noan taefirh. Pwe minneeina epwe wen ngaeniir oanongeer aeremesaen noan faeinaengiy.

³⁶ Ina oawpwe aefaennigaemi nge oawmaeipin noa rhag pwe epwe yor maemaewaemi noan oatonaan epwe wewenewen minikkeei iwe me aaemi noa iutae me weni mmwaen mwaen we Naiun Aeremas.”

³⁷ Jesus aeni raaenin kkeei reen aan fenai noan *Temple* we, nge enoa nee oatofaaef, nge a noa wooan rhugun *Olives*.

³⁸ Nee oatosor moawugowug nge oanongeer aeremas ra maegeto noan *Temple* we pwe repwe aiussaening ngaeni aan fenai.

22

Aar Rhiu Aenneewa Jesus

(*Mat 26.1-5; Mark 14.1-2; John 11.45-53*)

¹ A arapeto oaton gupwunon fenoawa we esooar *yeast* reen, iwe regaen iura pwe *Passover*.

² Soamwoonin patere me sinsein anniug kkewe remesagiur aeremas iwe ra kiukkiutta eew oat ne repwe niyu noa Jesus noan mwoanomwoan.

Judas a Tipaeni Epwe Fangenoa Tinnimaen Jesus

(*Mat 26.14-16; Mark 14.10-11*)

³ Saetan a itinong nee tipaen Judas, pwan itan Iscariot, iwe erhai me neeiir rhoan kkayeo kkewe seig me riiurhai.

⁴ Judas a noa mwaenieniy ngaeniir soamwoonin patere kkewe me soamwooniir poosun *Temple* we reen wunuunun aan epwe fang ngaeniir Jesus.

⁵ A gacch nee tipeer rhoowe iwe ra iura pwe repwene fang senaapiy reen miniwe epwene feeri.

⁶ Judas a tipieew ngaeni miniwe iwe a rhaepetae aan kiukkiutta eew oaton ne egacch pwe epwe fangenoa mewaen Jesus nge aeremas resoapw giuneei.

Jesus Oamoannatae pwe Epwe Mwongo Mwongoon Passover

(*Mat 26.17-25; Mark 14.12-21; John 13.21-30*)

⁷ A itto raaenin gupwunon fenoawa we esooar *yeast* reen, igiwe regaen ninni *sheep* pwe mwongoon *Passover*.

⁸ Jesus a fangenoa Peter me John a aengaeniir pwe, "Oawnoa oamoannatae mwongoon *Passover* we aarh."

⁹ Ra aeiineow pwe, "Iya iga wo mwerhaen pwe aeipwe noa oamoannatae me ee?"

¹⁰ A paniuwaeniir pwe, "Oawitinong nee aepinoamw, nge erhai mwaaen na epwe pweipwog ruumen rhaan ina epwe itto rhuungigaemi. Oawwa tapweei noa noan iimw na epwe noa toonong noan,

¹¹ nge oawwa aengaeni mwaaen na imwan iimw naan pwe: 'Sinsei e aeiineo ngaeniug pwe, Ifa sengkin na rhoan kkayeo kena naeyi me ngaang aeipwe mwongoon *Passover* me ee?'

¹² Ina epwene pwaeri ngaenigaemi eew sengkin faeregiti ina wooan tae, ina efasiun moannotae noan, nge ina igina oawpwene noa oamoannatae me ee."

13 Ra noa rhooawe ra noa weri pwe oanongaen minikkewe Jesus e aengaeniir nge ewen ngaeni, iwe ra noa oamoannatae mwongoon *Passover* me ee.

Aaen Soamwoon Mwongoon Faaef
(*Mat 26.26-30; Mark 14.22-26; 1 Cor 11.23-25*)

14 Enoa toori oatowe nge Jesus a mooat tiw reen *table* we reer oapostonus kkewe naiun.

15 A aengaeniir pwe, “A igin noa tipaei pwe sipwe aeni fengaenniy mwongoon *Passover* eei weni mmwaen aaei ipwe toonong noan aaei aewwaeiraes!

16 Pwe ipwe aengaenigaemi pwe, isoapw rhiuwen mwongonoa mwongo eei toori oatona epwe pwae noa oanongaen minna faan minna mwongoon *Passover* me noan minna Mweoiun Deus.”

17 Iwe Jesus a pwiigi eew kkap, a fang aan aerhigerhig ngaeni Deus, nge a iura pwe, “Oaw pwiigi minneen pwe oawpwe amakkiu fengaenniy woami.

18 Ipwe aengaenigaemi pwe saengi igina a noa nge isoapw iun no *wine* een toori tooton minna Mweoiun Deus.”

19 Iwe a pwiigi fenoawa we a fang aan maecipinen aerhigerhig, iwe a giniiy nge a ngaenneer nge a iura pwe, “Ieen minne oanongaei, iye ipwene fangenoa pwe aegin aaemi. Oawpwe feeri minneen pwe ipwe gaen memmaeng ngaenigaemi.”

20 Pwan taeppen rhag miniwe efeeri igiwe a noa moanno noa mwongo we nge pwiigi kkap we nge a iura pwe, “Ieen miniwe kkepaen ppwon ffeo we aaen Deus iye reen minne cchaei, iye epwene nipinoa pwe aegin aaemi.

21 “Iwe nge oawpipiyy! Pwe mwaaen we epwe fangenoa tinnimaei iye eno reei oaron *table* eei!

22 Mwaaen we Naiun Aeremas ina epwene mae noa noan aaen affeoor Deus, iwe nge ifa mwo aenneewan ngaeni mwaaen na e fangenoa tinnimaen!”

23 Iwe rhag nge ra maegetae aeineo fengaen wooar iyo erhai neeiir na epwe mmwenen feeri minnee.

Aengiingin Iyo na e Taegias

24 Rhooa kkayeo kkewe ra itto aengiingi fengaen wooar iyo na oarosaen taegias.

25 Jesus a aengaeniir pwe, “*King* kena soamwooniir re Gentiles ina eyor maemaeweer wooar, iwe nge iir soamwoon kaan nge iir minne re iura pwe ‘iir maereyaereer aeremas.’

26 Nge aaemi esoapw ieei wusumi; oawpwe faer feeri pwe iyo na oarosaen taegias epwe faer weer rhag maan wonigaet, nge soamwoon repwe weer rhag rhoan akkiuneo.

27 Iyo na oarosaen taegias, manna emooat tiw pwe epwe mwongo aere manna e inet mwongo? Manewe emooat tiw

minna e taegias. Ngaang iye ino neemi nge ngaang minne i inet mwongo.

²⁸ “Oawwa nonno reei noan oanongaen aaei waeiraes;

²⁹ nge eweei rhag igiwe manewe Semaai a ngaenneaei maemaewaei pwe ipwe nemenem, nge ngaang ipwe pwan ngaennegaemi iiy maemaewaei.

³⁰ Aaemi oawpwe mwongo me iun me reen *table* e aeinoa minna Mweoiuy, iwe nge aaemi oawpwe mooat wooan minikkeneneniier soamwoon oawpwe nemaeniir aeinang kkewe seig me ruwowu ikkiwe aaen Israel.

*Jesus e Aepesa Aaen Peter Iura pwe Ese Giuneei
(Mat 26.31-35; Mark 14.27-31; John 13.36-38)*

³¹ “Simon, Simon! Aiussaening! A fasiun saenetaeg pwe Saetan epwe soatonigaemi, pwe epwe aeyimweoiuw noa rhooa mwamwaa me rhooa aenneew, taeppen rhag iga rhoaan maat regaen aeyimweoiuw noa *wheat* saengi peeon.

³² Nge ngaang i maeipinoag een Simon, pwe oamw niugiuniug esoapw ppiung noa. Nge oatonoa wopwe noa toagun ngaeniaei nge wa aemaewaar rhooa kkomwu pwiimw.”

³³ Peter a paniuwaeni pwe, “Soamwoon, ngaang iya oamoannatae ipwe tapweog reen kanepwus me oamw mae!”

³⁴ Jesus a iura pwe, “Iaengaeniug Peter, pwe esoapw keokkeok maniug neepwongiy toori oatona wopwe iura faaen enuuw pwe wose giuneei.”

Pwetoaw, Tutu, me Saeitan

³⁵ Jesus a aeiiineor rhoan kkayeo kkewe naiun pwe, “Oatowe i aefengaegaemi noa nge esooar aaemi pwetoaw, tutu me nokka, nge eyor minne esooar reemi?”

Ra paniuwaeni pwe, “Esooar mwo.”

³⁶ Jesus a iura pwe, “Nge igina, iyo eyor aan pwetoaw aere tutu nge epwe pwigi; nge iyo esooar naiun saeitan, epwe chuwaiuw noa mengaagiun pwe epwe meoni efoarh saeitan.

³⁷ Pwe ipwe aengaenigaemi pwe Pwapwior we e Santos eiura pwe, ‘Iiy ina a pwan aeffitaeg ngaeniir rhag rhoakkena re aenneew,’ ina epwe nnetaen wen ngaeniaei, pwe iga minikka kkepesaei ikka e foatfoat nge ikka a pwae noa pwe ennet.”

³⁸ Rhoan kkayeo kkewe ra iura pwe, “Emwaeri! Soamwoon, riiufoarh saeitan ikka!”

Nge iya iura pwe, “A toaw!”

*Jesus a Maeipin Wooan Rhugun Olives
(Mat 26.36-46; Mark 14.32-42)*

³⁹ Jesus a nigiti aepinoamw we nge a noa ngaeni miniwe rhugun *Olives*, igiwe e fasiun gaen noa e, nge rhoan kkayeo kkewe ra pwan tapweei noa.

⁴⁰ Igiwe ra toori pwiuneoi we, nge a aengaeniir pwe, “Oaw maeipin pwe oawte ppiungiunong noan sessoat.”

⁴¹ A nigitiir iwe a soar mwet taaw saengiir egius, a noa foatotiw pwe a maeipin.

⁴² A iura pwe, “Semaiei, aere wo mwerhaen nge wa arhiuwa saengiaei kkepaen waeiraes ee. Nge soapw minne tipaei, pwe minna tipoamw minna epwe mmwen.”

⁴³ Erhai angkenus naaeng a itto reen a itto aemaemaewa tae.

⁴⁴ Noan aan igin waeiraes egius mwo nge e aetemaegin reen aan maeipin, moaniyoanon essopwetiwe neeppweon nge a weei rhag sossopwun ccha.

⁴⁵ Enoa iutae me reen maeipin, a sefaaen noa reer rhoan kkayeo kkewe naiun nge a noa weriir pwe ra maiur, ra gin mmaniuniu reen aar nee tip cchoaw.

⁴⁶ A aengaeniir pwe, “Meeta oawwa maiur reen? Oaw rhimwitae oawwa maeipin pwe oawte ppiungiunong noan sessoat.”

Aar Torofi Jesus

(Mat 26.47-56; Mark 14.43-50; John 18.3-11)

⁴⁷ Jesus erhiuwen mwaenieniy nge a noa itto eew pwuwaen aeremas, Judas minne emmweer, iwe erhai me neeiir rhoawe seig me riiurhai a war. A itto reen Jesus a itto faeisongei.

⁴⁸ Nge Jesus a iura pwe, “Judas, faeisiong mwu oamw minimwu wopwene fangenoa tinnimaen Naiun Aeremas reen?”

⁴⁹ Oatowe rhoan kkayeo kkewe reno reen Jesus ra giuneei miniwe epwene wen, nge ra aeineow pwe, “Soamwoon, aeipwe mmwenen nainai saeitana kka naimaem?”

⁵⁰ Erhai me neeiir epwigi fena rhoan akkiuneo we naiun Soamwoonin Patere iwe gopiy noa peig mwaaenen saeningan.

⁵¹ Iwe nge Jesus a iura pwe, “Iug noa, a gacch nepaen!” A geotteopa saeningaen mwaaen we iwe a gacch noa.

⁵² Jesus a aengaeniir rhoawe soamwoonin patere me soamwooniir poosun *Temple* we me mwaaen tugufaeyi kkewe re itto pwe repwe itto torofi, “Meeta oawnoa itto faaen saeitana me soapwon irae reen, pwe iga aetae ngaang erhai man mwoarho?”

⁵³ Inonno reemi oanongaen raaen noan *Temple* we, nge esoar aaemi torofiaei. Iwe nge igina minne a oatomi, pwe iga maemaewaen pwoong roorh a nemenem.”

Peter a Iura pwe Ese Giuneei Jesus

(Mat 26.57-58, 69-75; Mark 14.53-54, 66-72; John 18.12-18, 25-27)

⁵⁴ Ra torofi Jesus ra pwingi noa noan iimw we imwaen Soamwoonin Patere; nge Peter epwan tettapweer to me itaaw.

⁵⁵ Effoan eew aengaet noan wororaen iimw we, nge Peter a itto mooat tiw oaroor rhooawe referoangoroangei noa aengaet we.

⁵⁶ Igiwe erhai rhoopwut rhooan engaang a weri pwe emooat oaron aengaet we, a fan wenewen ngaeni nge a iura pwe, "Pwan mwaaen een nge rhoaniuwaen Jesus!"

⁵⁷ Nge Peter e iura pwe, "Rhoopwut mwuun, ngaang ise giuneei mwaaen na!"

⁵⁸ Ese mmwaei mwo nge erhai mwaaen a pwan weri Peter nge a pwan iura pwe, "Pwan een erhai rhoaniuwan!"

Nge Peter a iura pwe, "Mwaaen mwuun, soapw ngaang!"

⁵⁹ Epwe eew awa me mwirin nge erhai mwaaen a pwan kkepas ngaeni pwe, "Ennetaen pwe mwaaen een rhoaniuwaen Jesus, pwe iga iiy pwan erhai re Galilee!"

⁶⁰ Peter a paniuwaeni pwe, "Mwaaen mwuun, ise giuneei meeta mwu wo iyaekkepesa!"

Iwe rhag nge igiwe e rhiuwen mwaenieniy nge a keokkeok noa maniug we.

⁶¹ Soamwoon a wegitaeg a fan wenewenei Peter, iwe nge Peter a maengiy meeta we Soamwoon eaengaeni, "Weni mmwaen epwe keokkeok maniug neepwongiy, nge een wopwe aepesa faaen enuuw pwe wose giuneaei."

⁶² Peter a toowow a igin noa saeng.

Ra Aeni Aegekkaei Jesus Nge re Wirhiy

(Mat 26.67-68; Mark 14.65)

⁶³ Mwaaen kkewe reposuw Jesus ra aeni fetaeneei aegekkaei nge re wirhiy.

⁶⁴ Ra pwanuw noa mesan nge ra aeiineow pwe, "Aegina! Iyo we e wirhiug?"

⁶⁵ Egin towunap kkepas aenneew kka repwan aengaeni.

Jesus a Noa Weni Mmwaen Council

(Mat 26.59-66; Mark 14.55-64; John 18.19-24)

⁶⁶ Enoa itto raaenin we, nge tugufaeyi me soamwoonin patere me sinsein anniug ra mwiirh fengaen, nge ra pwigito Jesus me weni mmweer.

⁶⁷ Ra aengaeni pwe, "Aengaenigemaem, een minne Kristus?"

A paniuwaeni, "Aere iaengaenigaemi nge oawsoapw ni-giuniug ngaeniaei;

68 iwe aere i aeiineogaemi eew kkepas aeiyege, oawsoapw paniuwaeni.

69 Iwe nge saengi igina a noa, miniwe Naiun Aeremas epwene mooat peig mwaaenen Deus na oarosaen maemaew.”

70 Ra maegin iura pwe, “Ina nge een minne Naiun Deus?”

Nge a paniuwaeniir, “Aaemi minimwu oawiura pwe ngaang.”

71 Ra iura pwe, “Esooar no ne sirhiuwen weti pwe epwe itto pwaeritae aenneewan! Giirh wooan oanongarh nge sia rongorong miniwe e iura!”

23

Jesus me Weni Mmwaen Pilate

(*Mat 27.1-2, 11-14; Mark 15.1-5; John 18.28-38*)

1 Rhooa towunap we ra maegin iutae ra paeninoa Jesus weni mmwaen Pilate,

2 iwe a rhaepetae aar oaturu Jesus me ee: “Aemaem aeiweri mwaaen een pwe eoatupwuur aeremas, egaen iura pwe resoapw fang *tax* ngaeni Soamwoonin Rome, nge epwan iura pwe iiy miniwe Kristus, iwe erhai *king*.”

3 Pilate a aeiineow pwe, “Een minne aar *king* re Jews?”

Jesus a paniuwaeni, “Een minimwu wo aepesa.”

4 Pilate a aengaeniir soamwoonin patere kkewe me aeremas kkewe pwe, “Esooar meeta minne igiuneei pwe teren mwaaen een.”

5 Nge ra egius mwo nge re aengimaaw tae, “Reen aan fenai minne a rhaepiy tae fiow nepeteer aeremas me wooan oanongaen Judea. Erhaepetae me Galilee iwe nge igina a toorito igei.”

Jesus Weni Mmwaen Eroles

6 Igiwe Pilate a rongorong minneei, nge a aeiyege pwe, “re Galilee mwaaen een?”

7 Igiwe a pwae ngaeni pwe Jesus eitto me pwiuneoi we Eroles e nemaeni, iwe a fangenoa Jesus reen Eroles, iwe iiy epwan no Jerusalem reen oatowe.

8 Eroles a igin kker igiwe a weri Jesus, pwe igiwe a fasiun rongorong kkepesaen Jesus nge e tipaeni pwe epwe weri rhag me mweoiuwe. Etipaeni pwe epwe weri aen Jesus feeori aekkaew kkeman.

9 Iwe Eroles a aeiyegeiy Jesus aekkaew kkepas aeiyege, nge Jesus ese paniuwaeni.

10 Soamwoonin patere kkewe me sinsein anniug kkewe ra toonong nge ra aetemaeginiy pwe repwe oamonofitiy Jesus.

11 Eroles me sonotaw kkewe naiun ra aeni aegekkaei Jesus iwe nge refeori ngaeni aekkaew min aenneew; iwe ra iseni

tae eew mengaag nning wooan iwe nge ra fang sefaaen noa reen Pilate.

¹²Noan raaenin we rhag nge Erotas me Pilate ra maereyaer noa; nge igiwe mmwan nge re aenneew fengaen.

Ra Aettiweginiy Aaen Jesus Mae Noa
(*Mat 27.15-26; Mark 15.6-15; John 18.39–19.16*)

¹³Pilate a faingi fengaenniir soamwoonin patere, me mwaaen kkewe me rhooa towunap we,

¹⁴nge a aengaeniir pwe, “Oawpwigito mwaaen een reei nge oawiura pwe eotupwuur aeremas. Igina iya pipiiy gacchiuw me igeei nge esooar minne iweri pwe oawpwe oamonofitiy wooan.

¹⁵Erotas mwo nge esooar minne e oamonofitiy ngaeni, iwe a aesefaaenito reerh. Esooar meeta ne mwaaen een efeori nge epwe mae reen.

¹⁶Iwe ipwene aengaeniir pwe repwene wirhiy nge ra saeneti noa.” [

¹⁷Noan oanongaen gupwunon *Passover* nge Pilate egaen saeneti noa erhai rhooran kanepwus ngaeniir aeremas.]*

¹⁸Rhooranap we ra aekkepwas rhag pwe, “Niiy noa! Saeneti ngaenigemaem Barabbas!” (

¹⁹Barabbas ekanepwus reen aan aeffiowuur aeremas noan aepinoamw we me aan nni menaw aeremas.)

²⁰Pilate emwerhaen epwe saeneti noa Jesus iwe a pwan tingoar sefaaen ngaeniir pwuwa we.

²¹Nge iir ra faer aekkepwas sefaaen pwe, “Kurusuw noa! Kurusuw noa!”

²²Aeinuwaen aen Pilate kkepas ngaeniir a iura pwe, “Meeta monofit na efeori? Ngaang esooar minne iweri pwe efeori ne sipwe niiy noa reen! Ipwene aengaeniir pwe repwe wirhiy nge ra saeneti noa.”

²³Nge iir egius mwo nge re aekkepwas temoag tae pwe repwe kurusuw noa Jesus, enoa oarosana noa nge ina miniwe ra feori.

²⁴Iwe Pilate a feori ngaeni Jesus meeta we aar aeremas tingoar.

²⁵Pilate a saeneti noa mwaaen we retipaeni, iwe rekanepwusa pwe aeffiow aeremas me nni menaw aeremas, nge Jesus a iseni ngaeniir pwe repwe feori ngaeni minna re tipaeni.

Ra Kurusuw Noa Jesus
(*Mat 27.32-44; Mark 15.21-32; John 19.17-27*)

* **23:17** Petenan eei nge esoano noan aekkaew petenan kka efoatofoat noan kkepessaen Greek.

26 Sonotaw kkewe ra paeninoa Jesus, igiwe ra feffaaeraeg noa, ra rhuungi erhai re Cyrene itan Simon iwe eitto saengi eew soapw. Ra torofi iwe ra ngaettae kurus we wooan, nge ra feeri pwe epwe aiuferu kurus we me mwirin Jesus.

27 Eew pwwaen aeremas towunap ra tettapwei noa mwirin; aekkaerhai rhoopwut reno neeiir ra saengiti.

28 Jesus a wegitaeg ngaeniir nge a aengaeniir pwe, "Rhoopwuton Jerusalem! Oawsoapw saengitiaei, pwe oawfaer saengiti gaemi me aetekkomwu naimi.

29 A ikkitto raaennekena aeremas repwene iura pwe, 'Ra wenepwu rhoopwut kkena esooar naiiur, esaaen yor mwo aar nainai, nge esaaen yor mwo aar atiut!'

30 Ina oatona aeremas repwene aengaeni rhug pwe, 'Pitungtiw woamaem!' nge re aengaeni taeiit pwe, 'Oapaegemaem!'

31 Pwe ngaere minikkei a wenewen iga erhiuwen arawaraw waniwan, nge epwe ifa wusun igine a ppwass?'"

32 Riiurhai mwaaen, rhooran kanepwus, ra pwan paeniir wow repwe noa niir noa me reen Jesus.

33 Renoa itto reen pwiuneoi we regaen iura pwe "Peopeoi Rhimw", ra itto kurusuw noa Jesus me ee, fengaen me rhooran kanepwus kkewe riiurhai, erhai me peig mwaaenin nge erhai me peig rhoopwuton.

34 Jesus a iura pwe, "Semaiei, oamwusaar noa! Rese metaf reen minikka refeeri."

Reaekkaerh *dice* pwe repwe inetiy minikkewe mengaagiun wooar.

35 Aeremas ra iun oawruru soamwooniir Jews kkewe ra gaen aeni fetaeneei aegekkaei: "A aemenewaar aamweoi; iwe nigiti ngaeni epwe aemenewa oanongan ngaere enetaen pwe iiy Kristus we Deus e fini!"

36 Sonotaw kkewe ra pwan aeni fetaeneei aegekkaei: ra itto reen ra ngaenneei *wine* kkewe emwaenn,

37 nge ra iura pwe, "Aemenewa oanongoamw ngaere enetaen pwe een soamwooniir Jews!"

38 Wooan tae rhimwen nge effoat pwe: "Ieen minne Kingaen Jews."

39 Erhai me neeiir rhooran kanepwus kkewe e kurus a gaen aessaewa pwe: "Saapw een miniwe Kristus? Aemenewoag nge wa pwan aemenewaegemaem!"

40 Nge mwaaen we erhai a soong ngaeni a iura pwe, "Wose mesagiu Deus? Oamw mae epwan aeffitaeg ngaeni rhag aan.

41 Iwe nge giirh ina efin pwe sipwe kurus pwe paniuwaen aenneew kena giirh sifeeri; nge iiy esooar min aenneew ne efeeri."

⁴² Iwe nge a aengaeni Jesus pwe, “Maengiaei, Jesus, igine wopwene noa itto noan nemenem na oamw!”

⁴³ Jesus a aengaeni pwe, “Iya ppwoneei ngaeniug raaeneei pwe een wopwe no reei noan Paradise.”

Maenoan Jesus

(Mat 27.45-56; Mark 15.33-41; John 19.28-30)

⁴⁴⁻⁴⁵ Saengi nugunupaen oanowas nge aenet esa ttin no nge a rorhappiung noa faniuw we enoa gona enuw konook; iwe nge mengaag we etteoraeg noan *Temple* we mwo nge a taeringatiw faaen ruwowu. ⁴⁶ Jesus a aekkepwas noa nge a iura pwe, “Semaiei! Iya iseni nong minne ngeoniuy noan poawumw!” Eiura rhag minneei nge a nurh noa aan ngasangas.

⁴⁷ Soamwoonin sonotaw we eweri miniwe a wen, iwe a aepingepinga Deus, nge iwe a iura pwe, “Ennet pwe erhai aeremas mwamwaai mwaaen we!”

⁴⁸ Igiwe aeremas kkewe remaegeto pwe rhoaan oawruru miniwe a wen, igiwe ra weri, ra sefaaen noa nee iimw, nge ra tugutuguw aiungeer reen aenneewaen tipeer.

⁴⁹ Oanongeer rhooa kkewe regiuneei Jesus, fengaen me rhoapwut kkewe re tapweeito me Galilee, renoa iun oawruruto me itaaw.

Paeyinoan Jesus

(Mat 27.57-61; Mark 15.42-47; John 19.38-42)

⁵⁰⁻⁵¹ Eno erhai mwaaen itan Joseph iwe re Arimathea, eew aepinoamw me noan Judea. Iiy erhai mwaaen mwamwaai nge essoar, ewewweti rhag itton minna Mweoiun Deus. In-amwo igiwe iiy erhai rhoaan *Council* we, nge ese tipeew ngaeni niunniywaen we aar me miniwe ra feeori.

⁵² A noa reen Pilate nge a noa tingoar miniwe oanongaen Jesus.

⁵³ A noa pwinititiw miniwe oanongaen nge a tiugiumi noa noan mengaag pwerh we, nge a oawnanong noan paeyi we iwe ekken wow neeiin faai, iwe esaaen yor mwo manimae ne etonong noan.

⁵⁴ Woan Aenimowu miniwe, a gin egius rhag nge epwene itto Sabbath.

⁵⁵ Rhoapwut kkewe re tapweei mwirin Jesus me Galilee ra tapweei noa Joseph ra noa weri paeyi we me wunuunun aen miniwe oanongaen Jesus won noan.

⁵⁶ Ra sefaaen noa neeiimw ra noa oamoannatae aar waningas me neoningas pwe repwe noa aepiti miniwe oanongaen Jesus.

Woan Sabbath ra aseoseo, pwe ina miniwe efoatfoat noan Anniug we.

24

Aaen Jesus Menaw Sefaaen

(*Mat 28.1-10; Mark 16.1-8; John 20.1-10*)

¹ Sunday nee oatosor moawugowug nge rhoopwut kkewe ra mwet noa reen paeyi we, nge re pweipwog noa neoningas kkewe re oamoannatae.

² Ra noa weri fai we pwe a mwagiut saengi aesemaen paeyi we,

³ iwe ra toonong noan paeyi we; nge rese rhuungi miniwe oanongaen Soamwoon Jesus.

⁴ Ra riu reen meeta we a wen, iwe rhag nge riiurhai mwaaen igin maretin mengaagiur ra iu me oaroor.

⁵ Reen aar igin mesag, rhoopwut kkewe ra foatotiwe neppweon, nge mwaaen kkewe ra aengaeniir pwe, “Meeta faan aaemi giutta mwaaen e menaw me neeiir rhooa mae reen?”

⁶ Esa nono igeei; a menaw sefaaen tae. Oaw maengiy meeta we e aengaenigaemi igiwe eno noan Galilee:

⁷ ‘Mwaaen we Naiun Aeremas ina epwene toonong neepaiur rhooa monofit, repwe kurusuw noa, nge mwirin enuuw raaen epwe menaw sefaaen tae.’”

⁸ Iwe nge ra maengiy noa meeta kkewe Jesus e aepesa,

⁹ ra sefaaen saengi paeyi we, ra noa fioangei ngaeniir rhooawe seig me erhai rhoaan kkayeo me pwan oanongeer rhooawe aaemweoi.

¹⁰ Rhoopwut kkewe iwe Maria Magdalene, Joanna, me Maria we inaen James; iir me rhoopwut kkewe aaemweoi ra aengaeniir oapostonus kkewe minikkewe a wen.

¹¹ Nge oapostonus kkewe ra maengiy pwe meeta we rhoopwut kkewe re aepesa nge min ffeoretae rhag, iwe rese niugiuniug ngaeniir.

¹² Nge Peter a iutae rhag nge a fattapw noa reen paeyi we; a pwoarotiw nge a weri pwe a mengaag kkewe rhag. Iwe a mwet sefaaen noa neeiimw nge a mwaar reen meeta we a wen.

Faaeraeg Ngaeni Emmaus

¹³ Noan raaenin we rhag nge riiurhai mwaaen kkewe rhoa-niuwaen Jesus ra faaeraeg ngaeni eew soapw itan Emmaus, iwe epwe fisuuw *miles* saengi Jerusalem,

¹⁴ iwe nge regaen mwaenieniy fengaen wooar reen oanongaen meeta kkewe a wen.

¹⁵ Igiwe re kekkepas me fioangei minikkewe, nge Jesus a noa arapeto reer iwe a itto faaeraeg eew noa meyiir;

¹⁶ nge ra weri nge rese giuneei pwe Jesus miniwe.

¹⁷ Jesus a aengaeniir pwe, “Meeta mwu oawiyaepesa fengaeniy, wooan aaemi feffaaeraeg noa?”

Iwe ra iunoa, ra mas affayeo noa.

¹⁸ Erhai me neeiir, itan Cleopas, a aeiineow pwe, “Een rhag me neeiir waseona wooan Jerusalem minne wose giuneei meeta kka a wewwen noan raaenin kkewe a noa?”

¹⁹ “Meeta kena?” a aeiyege.

Ra paniuwaeni pwe, “Minikkewe ewen ngaeni Jesus re Nazareth we. Mwaaeneei nge erhai profeta, iwe Deus me oanongeer aeremas nge regiuneei pwe eyor maemaewan noan oanongaen meeta kka e iura me feeori.

²⁰ Soamwoonin patere me mwaaen kkewe aarh ra fangenoa pwe repwe noa niy noa, iwe me kurusuw noa.

²¹ Nge aeiya iseni aemaem aepiniugiuniug wooan pwe iiy minne epwene saeneti noa Israel me noan aenneew! Nge soapw ina rhag, pwe a enuuw raaen mwirin aan wen minikkewe.

²² Aaemweoi rhoapwut kkewe rhoaniuwarh minne reariugemaem; renoa reen paeyi we neeoatosor moawugowug,

²³ nge rese weri miniwe oanongan. Ra sefaaeneto nge ra iura pwe aaemweoi angkenus repwae ngaeniir nge ra aengaeniir pwe iiy a menaw sefaaen tae.

²⁴ Aaemweoi aemaem ra noa reen paeyi we nge ra noa weri pwe oanongaen meeta kkewe rhoapwut kkewe re aepesa nge ennet, pwe rese weri minna oanongan.”

²⁵ Iwe Jesus a aengaeniir pwe, “A ifa mwo pwurhomi, me mmwaeyin aaemi niugiuniug ngaeni oanongaen meeta profeta kkewe re iura!

²⁶ Pwe esoapw faer ieei wusun aaen Kristus waeiraes reen minikkei weni mmwaen aan noa toonong noan minna nningen?”

²⁷ Iwe Jesus a aemmetefa ngaeniir meeta kkewe kkepesan me noan oanongaen Pwapwior we e Santus, rhaepetae me noan mini pwapwiron Moses me oanongaen minikkewe foatogieer profeta kkewe.

²⁸ Igiwe ra arapeto reen soapw we re faaeraeg ngaeni, Jesus a feeori pwetae epwe faaeraeg saengiir;

²⁹ nge iir ra ammwarhiu sefaaeny, ra iura pwe, “Notiw remaem, epwene oaropaen pwoong nge iye a rorhappiung noa.” Iwe a toonong pwe epwene notiw reer.

³⁰ Iwe a mooat tiw pwe epwene mwongo reer, a pwigi fenoawa we, nge a maeipina; a giniy fenoawa we nge a ngaenneer.

³¹ Iwe egius mwo nge eppwun noa meseer nge ra giuneei pwe iiy, iwe rhag nge e soano saengiir.

³² Ra iura fengaenny pwe, “Meeta ese weei rhag ppwunon aengaet me noan tiparh, igiwe e mwaaenieny ngaenigirh me

woan ennap reen aan aemmetefa ngaenigirh meeta we efoatofaat noan Pwapwior we eSantus?"

³³ Ra iutae rhag ra noa Jerusalem, ra noa rhuungi rhoan kkayeo kkewe seig me erhai me rhooawe aaemweoi,

³⁴ ra iura pwe, "A menaw sefaaen Soamwoon! A pwaee ngaeni Simon!"

³⁵ Rhoowe riiurhai ra itto fioangei ngaeniir miniwe ewen me woan ennap, me wunuunun aar giuneei pwe iiy Soamwoon igiwe a giniyi fenoawa we.

*Jesus a Pwaee Ngaeniir Rhooan Kkayeo Kkewe Naiun
(Mat 28.16-20; Mark 16.14-18; John 20.19-23; Feof 1.6-8)*

³⁶ Oatowe rhoa kkewe riiurhai rerhiuwen mwaenieniy, nge Soamwoon erhiuwen iunoa rhag me neeiir nge a aengaeniir pwe, "Oapoas epwe no reemi."

³⁷ Ra igin mesag pwe ra maengiy pwe ra weri erhai aniu.

³⁸ Nge a aengaeniir pwe, "Meeta oawwa aiuraeg reen? Meeta oawtip mwaramwar fetaen reen?"

³⁹ Oawpipiyy paeyi me pirheei, pwe oawpwe weri pwe ngaang minneen. Oawgeotteopayaei, pwe oawpwe giuneei, pwe esooar aniu ne egaen yor fitigon me rhiun, nge oawpwe weri pwe eyor woai."

⁴⁰ Igiwe e aepesa minneei nge a pwaeri ngaeniir paiun me pirheen.

⁴¹ Nge iir resaaen niugiuniug rhag, reen aar igin kker me tip mwaramwar; iwe a aeineeor pwe, "Eyor minne sipwe mwongo me igeei?"

⁴² Iwe ra ngaenneei egiufet iig appwerh,

⁴³ iwe epwigi nge a aengi me wenimmweer aeremas kkewe.

⁴⁴ Iwe a aengaeniir pwe, "Ikkeei minikkewe ifasiun aengaenigaemi oatowe irhiuwen no reemi: oanongaen minikkewe effoat pwe wunuunuy noan Oasoapwosoapw we aaen Moses, me minikkewe foatogieer profeta kkewe, iwe me noan pwapwioron Psalms nge epwe nnet."

⁴⁵ Nge a sugi noa aar niunniywaen pwe repwe metefaegini oawton Pwapwior we eSantus,

⁴⁶ nge a aengaeniir pwe, "Teen miniwe effoat: Kristus epwe affayeo nge a menaw sefaaen mwirin eoniuraen,

⁴⁷ nge noan minna itan nge kkepas we kkepessaen toagun saengi monofit iwe me sessaenin monofit epwe fenaiuw ngaeniir oanongaen faniuw, epwe rhaepetae me Jerusalem.

⁴⁸ Aaemi rhoan pwaeritae oanongaen minikkeei.

⁴⁹ Iwe nge ngaang ipwene aefengatiw woami meeta we mwaaen we Semaai eppwoneei. Nge aaemi oawpwe no

rhag nee aepinoamw toori aan ittiw woami maemaew na wooainaaeng.”

Jesus a Noa Naaeng

(Mark 16.19-20; Feof 1.9-11)

⁵⁰ A pwiigiir wow me noan aepinoamw we toori noa Bethany, igiwe a aetitae paiun nge a aepiniir noa.

⁵¹ Nugunupaen aan aepiniir nge a nigitiir pwe a noa weei naaeng.

⁵² Iir ra oassoara iiy nge ra sefaaen noa Jerusalem, reen aar igin kker,

⁵³ nge ra no rhag noan *Temple* we reen aar fang ngaeni Deus aan aerhigerhig.

Fangkenio We Foatogiaen John

Kkepas we Efang Menaw

¹ Noan oatowe pweoneotaen faeinaengiy nge Kkepas we a fasiun no; Kkepas we eno reen Deus, nge Kkepas we ina iiy Deus.

² Saengi rhag ne pweoneotaen nge Kkepas we a no reen Deus.

³ Oanongaen meeta Deus a feeri nge e itto me reen; esoar eew aegiaeg ne ese ffeeor me reen.

⁴ Iiy Kkepas eei minne efang menaw, nge iiy menaw eei minne e aesseremaar aeremas.

⁵ Iiy seram we e aesserema roorh, nge roorh ese oarorha seram.

⁶ Deus a fang naiun rhooran pweipwogin kkepas, erhai mwaaen itan John,

⁷ iwe a itto pwe epwe aengaeniir aeremas wunuunun seram we, pwe oanongeer rhoakka repwe rongorong kkepas we nge repwe niugiuniug.

⁸ Iiy woan oanongan saapw iiy seram we; iiy e itto pwe epwe itto aepesa kkepesaen seram we.

⁹ Ieei minne oanongonniawan seram, seram we epwe itto noan faeinaengiy pwe epwe ttin tiw woar oanongeer aeremas.

¹⁰ Kkepas we a no woan faeinaengiy, iwe inamwo iga Deus efeeri faeinaengiy me reen, nge faeinaengiy ese giuneei.

¹¹ Iiy eitto woan sipegin faniawan, nge sipegin aeremaen faniawan rese aetiwa.

¹² Aekkaaemweoi re aetiwa nge re niugiuniug ngaeni; iwe ikkeei a aeitaar pwe iir naiun Deus.

¹³ Rese no pwe naiun Deus reen aar wupwutiw, nge saapw tipaen aeremas ngaere tipaen erhai mwaaen, pwe faer saengi tipaen Deus.

¹⁴ Iiy Kkepas we a itto no noa pwe aeremas, iwe a itto nonno neeirh, nge a sseog noa reen ffayeo me min nnet. Sa weri nningan, nning we mwaaen we Seman e ngaenneei pwe iga iiy rhag Naiun.

¹⁵ Iiy John e aepesa wunuunun. Aan aekkepwas aegini pwe, "Ieen iiy mwaaen we i aekkaepesa pwe, 'Iiy epwe itto mwiriy, nge iiy e taegias me mmwaei, pwe iya fasiun no me weni mmwaaen aaei supw.'"

¹⁶ Me reen temoagon ffayeo na aan a aewenepwuwagirh faaen fiteig oanongarh, a aewenepwuwagirh noa rhag.

17 Deus a fang oasoapwosoapw kkewe ngaeni Moses, nge faayeow me nnet eitto me reen Jesus Kristus.

18 Esaaen yor mwo faaen eew ne erhai a weri Deus. Pwe mwaaen na rhag Naiun, ina iiy rhag Deus, nge eno rhag wenepeigin minna Seman, nge iiy minne a giuneei noa wunuunun.

Aaen John Baptist Fenai

(Mat 3.1-12; Mark 1.1-8; Luke 3.1-18)

19 Soamwoonin Jews me noan Jerusalem ra aefengaar noa aaemweoi patere me Levites repwe noa aeiineow John pwe, “Een iyo?”

20 John ese oapa iiy iyo pwe a faer aeffeta noa nge a iura pwe, “Saapw ngaang Kristus.”

21 Iwe ra aeiineow pwe, “Iwe nge een iyo? Een Elijah?”

John a iura pwe, “Aapw, saapw ngaang.”

Nge ra pwan aeiineow pwe, “Een Profeta we?”

Nge iiy a pwan paniuwaeniir pwe, “Aapw.”

22 Nge ra aengaeni pwe, “Iwe aengaenigemaem ngaere een iyo. Pwe aeipwe noa aengaeniir mwaaen kkewe refangeto aemaem. Meeta wopwe iura reen mmwenemw?”

23 Aessefaaenin kkepas we aaen John a aepesa miniwe mwaeniaen profeta we Isaiah:

“Ngaang ‘aeremas we iyaekkepwas me noan *desert* pwe: Aewenewena ennap na ennepaei Soamwoon!”

24 Rhooran pweipwogin kkepas kkewe Pharisees re aefengaar,

25 ra aeiineow John pwe, “Ngaere saapw een Kristus, ngaere Elijah, ngaere Profeta we, iwe meeta faan wonoa paptismus aeremas reen?”

26 John a paniuwaeniir, “Ngaang i paptismus reen rhan, nge eiu erhai me neemi nge oawse giuneei.

27 Ina aeremas na epwe itto me mwiriy, nge ngaang ese fin ipwe pwaeisi geeogeeon nokkaan.”

28 Oanongaen minikkeei nge ewen me Bethany ina eno peig na eotiw me reen pwupwu we Jordan, peig we John epaptismus fetaen ee.

Sheep we Naiun Deus

29 Sorotaen raaenin we eraaen nge John a weri Jesus pwe a ikkitto, nge a iura pwe, “Inaan iiy *Sheep* we Naiun Deus, iwe e arhiuwa noa monofitin faeinaengiy!

30 Een iiy mwaaen we igaen aepesa mmwenen iwe iiura pwe, ‘Erhai mwaaen ina epwe itto mwiriy, nge iiy e taegias me mmwaei, pwe iya fasiun no me weni mmwaen aaei supw.’

³¹ Ngaang ise giuneei aere epwe iiy iyo, nge ngaang iya itto nge iya itto paptismus reen rhaan pwe epwe pwae ngaeniir re Israel ngaere iiy iyo.”

³² Iwe John a pwaeritae pwe, “Ngaang iweri Espritu Santus e ittiw me noan naaeng nge eweei erhai *dove* iwe a ittiw no noa wooan.

³³ Ngaang ise giuneei aere epwe iiy iyo, nge Deus, iwe efangeto ngaang pwe ipwe ittiw paptismus reen rhaan, nge a aengaeniaei pwe, “Wopwe weri Espritu Santus aan ittiw no wooan erhai mwaaen; iiy mwaaen we epwe paptismus reen Espritu Santus.”

³⁴ John a iura pwe, “Iya weri, iya aengaenigaemi pwe iiy minne Naiun Deus.”

Rhoawe Mmwaen Naiun Jesus Rhoan Kkayeo

³⁵ Mmasetae nge John me riiurhai rhoan kkayeo kkewe naiun ra pwan itto iu igiwe,

³⁶ nge a weri aaen Jesus faaeraeg noa. A iura pwe, “Een iiy *Sheep* we Naiun Deus.”

³⁷ Rhoan kkayeo kkewe riiurhai rerongorong miniwe e aepesa nge ra ttapw noa mwirin Jesus.

³⁸ Jesus enoa toagun, a weri aar tapweto me mwirin, iwe a aeineeor pwe, “Meeta oaw kiukkiutta?”

Ra paniuwaeni, “Wo nonno iya Rabbi?” (Wewen nge “Sin-sei”.)

³⁹ Nge iya iura pwe, “Oaw itto oawpwe noa weri.” (Epwene aerepaen faawu konook nee oatofaaef.) Ra tapweei noa ra noa weri igiwe eno nonno ee, iwe ra nonoa reen noan raaenin we.

⁴⁰ Erhai mwaaen kkewe nge itan Andrew, iwe pwiin Simon Peter.

⁴¹ Enoa rhag noa giutta mwaaen pwiin Simon, nge a aengaeni pwe, “Aeiya rhuungi Messiah.” (Wewen nge “Kristus”).

⁴² Iwe ra pwigi noa Simon reen Jesus.

Jesus a fan ngaeni nge a iura pwe, “Een Simon we naiun John, wopwene itaeni Cephas.” (Iteei nge e aeffitaeg ngaeni rhag Peter, wewen nge “faai.”)

Jesus a Faingir Philip me Nathanael

⁴³ Mmasetae nge Jesus a maengiy epwene noa Galilee. Enoa nge a rhuungi Philip nge a aengaeni pwe, “Itto tapweaei!” (

⁴⁴ Philip nge re Bethsaida, aepinoamw we Andrew me Peter re nonno ee.)

⁴⁵ Philip a noa weri Nathanael nge a aengaeni pwe, “Aeiya weri mwaaen we Moses efoatogi wunuunun noa pwap-wioron anniug we nge iwe profeta kkewe repwan foatogi wunuunun. Iiy Jesus we naiun Joseph, iwe saengi Nazareth.”

⁴⁶ Nathanael a aeiineo pwe, “Yor min mwamwaai ne epwe itto me Nazareth?”

Philip a iura pwe, “Itto pwe wopwe noa weri!”

⁴⁷ Igiwe Jesus a weri aeen Nathanael aan ikkito a floangei wunuunun pwe, “Teen iiy erhai oanongonniuaen re Israel; esoar eew min oatupwutpw ne eno wooan!”

⁴⁸ Nathanael a aeiineow pwe, “Eifa wusun nge wa giuneaei?”

Jesus a paniuwaeni pwe, “Ngaang i weriug pwe womooat faaen waniwan we *fig*, weni mmwaen aeen Philip faingiug.”

⁴⁹ Nathanael a iura pwe, “Sinsei, een minne Naiun Deus! Een minne Kingaen Israel!”

⁵⁰ Jesus a iura pwe, “Oamw rhag niugiuniug iga iaengaeniug pwe i weriug igiwe wono faaen *fig* we? Eyor aaemweoi minikka wopwe naaen itto weri ikka etaegias saengi minnee!”

⁵¹ Nge a aengaeniir pwe, “Ennetaen, ipwe aengaenigaemi minna wenewenen: oawpwe weri aan susu noa naaeng nge oawwa weriir angkenus kkewe Naiun Deus aar ittae me ittiw wooan mwaaen we Naiun Aeremas.”

2

Eew Appwiuniupai me Cana

¹ Riiuraaen me mwirin nge a yor eew appwiuniupai me noan aepinoamwon Cana me noan Galilee. Rhoopwut we inaen Jesus eno ee,

² nge Jesus me rhoaan kkayeo kkewe naiun repwan feffai repwe noa reen apwiuppwiuniuw we.

³ Igiwe a ros noa *wine*, rhoopwut we inaen Jesus a aengaeni pwe, “A ros noa aar *wine*.”

⁴ Jesus a iura pwe, “Een wosoapw aengaeniaei meeta ipwe feeri, pwe minna oatoi ina esaaen itto.”

⁵ Rhoopwut we inaen Jesus a aengaeniir rhoaan akkiuneo kkewe pwe, “Oawfeeri ese tiwegin minikkena e aengaenigaemi.”

⁶ Jews eyor aar oasoapwosoapwon aenimenim, ina faaen miniwe eno wonowu ruumen rhaan, nge eew ruume kkewe nge epwe pwiigi oawton riiuweig ngaeni eniig neosaening.

⁷ Jesus a aengaeniir rhoaan akkiuneo kkewe pwe, “Oawoawuta ruume kaan reen rhaan.” Nge ra oawuta minikkewe aseogiu noa, ⁸ nge a aengaeniir pwe, “Iwe igina oawitifi aekkaew reen rhaan oawwa pwiigi noa reen manna esoamwoonyi gupwun eei.” Iwe ra pwiigi noa reen rhaan kkewe,

⁹ nge igina nge rhaan kkewe a ffeeor noa pwe *wine*, nge mwaaen we a nnaeri. Ese giuneei igine *wine* kkewe eitto me ee (nge rhooran akkiuneo kkewe re ifi rhaan kkewe regiuneei); iwe a faingi *bridegroom* we

¹⁰ a aengaeni pwe, “Oanongeer aeremas regaen gommwaen iseis wow *wine* nneo, nge aeremas repwunaas noa nge renaaen iseis wow *wine* kka ese nneo. Nge wa gaen noa iseni *wine* na oarosaen mwamwaai pwe epwe noa no pwe oarosan!”

¹¹ Jesus a feeri aeyewaen kkeman me noan Cana me noan Galilee; a pwaeri noa minna nningen, nge rhooran kkayeo kkewe naiun ra niugiuniug ngaeni.

¹² Mwirin minnee nge Jesus me rhoopwut we inan me pwiin me rhooran kkayeo kkewe ra noa Capernaum ra noa no e noan fitiraen.

Jesus a Noa Noan Temple we

(*Mat 21.12-13; Mark 11.15-17; Luke 19.45-46*)

¹³ Akkarap oaton gupwunon *Passover*, we re Jews regaen oogupwuna, iwe Jesus a noa Jerusalem.

¹⁴ Noan *Temple* we a noa rhuungiir aeremas pwe rechuwaii fetaen wakke, *sheep*, *pigeons*, iwe me rhooran ssiuwen senaapiy repwan mooat reen aar *table*.

¹⁵ A feeri eew soapwoi saanen pwe naiun wuwoaw, iwe a aenewaar wow maan me noan *Temple* we, *sheep* me wakke; a aerheppa *table* kkewe aar rhooran aetittinen senaapiy me aeperessa noa naiiur manfaifai;

¹⁶ iwe a aengaeniir rhooran chuwaiun *pigeons* kkewe, “Oawpwigin wow me igeei! Enemmwaen mwo aaemi pwigi minne imwaen mane Sema ei pwe nenien aaemi imwaen chuwaai!”

¹⁷ Rhooran kkayeo kkewe naiun a maeng ngaeniir meeta we effoat noan Pwapwior we eSantus eiura pwe, “Deus, rhaengin minna imwoamw ina eweei pwerhin aengaet me neerhiuy.”

¹⁸ Soamwooniir Jews ra itto aeiineow pwe, “Meeta eew kkeman wopwe feeri nge epwe pwaeri ngaenigemaem pwe eyor maemaewoamw pwe wopwe feeri minikkei?”

¹⁹ Jesus a aengaeniir pwe, “Oawoataropaetiw *Temple* eei, nge noan eoniuraen ipwe feeri sefaaeniy.”

²⁰ Nge ra aeiineow pwe, “Wopwe feeri sefaaeniy noan eoniuraen? *Temple* eei effeoor noan faaeig me wonowu raeg!”

²¹ Nge *Temple* we Jesus efloangei nge iwe ina miniwe oanongan.

²² Iwe igiwe enoa menaw sefaaen tae, rhooran kkayeo kkewe naiun ra maengiy noa pwe eiura minneei, iwe ra niugiuniug ngaeni Pwapwior we e Santus me miniwe mwae-niaen Jesus.

Jesus e Giuneei Wunuunun Aeremas

²³ Igiwe Jesus eno Jerusalem reen gupwunon *Passover*, ra towunap rhooa e ra niugiuniug igiwe ra weri kkeman kkewe efeeori.

²⁴ Iwe nge Jesus ese niugiuniug ngaeniir, pwe iiy e giuneei nee tipeer oanongeer noa.

²⁵ Esooar ipitaen pwe repwe aengaeni wunuunuur aeremas, pwe iiy e giuneei meeta kkewe eno nee tipeer.

3

Jesus me Nicodemus

¹ Eno erhai soamwooniir re Jews mwaaen itan Nicodemus, iiy erhai Pharisee.

² Eew pwongin a noa reen Jesus a aengaeni pwe, “Rabbi, aegiuneei pwe een erhai sinsei aefengayaen Deus. Esooar erhai ne epwe mmwenen ffeeor kkeman kkomwu wogaen feeori, ngaere Deus ese no reen.”

³ Jesus a iura pwe, “Ennetaen, ipwe aengaenigaemi minna wenewenen: esooar erhai ne epwe weri minna Mweoiun Deus igine ese supw sefaaen.”

⁴ Nicodemus a aeiineo pwe, “Epwe ifa wusun aaen erhai mwaaen tugufaeyi epwe supw sefaaen? Iiy esoapw mmwenen sefaaen nong noan upwaen miniwe inan pwe epwe oaruwowwan aan supw sefaaen!”

⁵ Jesus a iura pwe, “Ennetaen, ipwe aengaenigaemi minna wenewenen: esooar erhai ne epwe toonong noan minna Mweoiun Deus aere ese supw me reen rhaan me Espritu Santus.

⁶ Erhai ne esupw saengi aeremas nge naiun aeremas, nge ne esupw saengi Espritu Santus nge ina iiy naiun.

⁷ Oawsoapw riu reen iga iaengaenigaemi pwe oawpwe supw sefaaen.

⁸ Aaeng ina ese tiwegin igine eaengiaeng noa ee; oawrongorong ngiungiun, nge oawse giuneei iga eitto me ee aere iya iga epwe noa ee. E ina wusuur reer rhoakka resupw to me reen Espritu Santus.”

⁹ Nicodemus a aeiineo pwe, “Epwe ifa wusun aan mmwen minneei?”

¹⁰ Jesus a paniuwaeni, “Een erhai sinsei taegias me woan Israel nge wose giuneei minneei?”

11 Ennetaen, ipwe aengaeniug minna wenewenen: aei aepesa minikka aei giuneei nge aei pwaeritae minikkena aeiweri, nge aaemi oawse rongorong aemaem kkepas.

12 Oawse niugiuniug ngaeniaei iga iaengaenigaemi minikka mmwenei noan faeinaengiy; nge epwe ifa wusun aaemi niugiuniug ngaeniaei iga ipwe aengaenigaemi minikkena mmwenei noan naaeng?

13 Esaanen yor mwo erhai ne enoa naaeng, pwe aeggaen minna rhag Naiun Aeremas, iwe e ittiw me naaeng.”

14 Wunuunun aen Moses saeregi tae sowufaeng goanoorh we wooan eew irae me noan *desert* we, epwe pwan ina rhag wusun aen aetaegiasa tae mwaaen we Naiun Aeremas,

15 pwe ina nge oanongeer aeremas kka reniugiuniug ngaeni nge repwe toori menaw na esooar iaenin.

16 Reen aen Deus igin aerhaengi faeinaengiy, a fangetiw mwaaen erhai we Naiun, pwe oanongeer aeremas kka reniugiuniug ngaeni nge resoapw maenoa nge repwe toori menaw na esooar iaenin.

17 Deus ese fangetiw mwaaen we Naiun noan faeinaengiy pwe epwe ittiw apwiungiu, pwe epwe faer ittiw aemenewa.

18 Iyo kka reniugiuniug ngaeni mwaaen we Naiun Deus nge resoapw apwiung; nge iyo kena rese niugiuniug ngaeni nge ra fasiun no noan apwiung, pwe iga rese niugiuniug ngaeni mwaaen erhai we Naiun Deus.

19 Epwe ieei wunuunun apwiung: seram a itto noan faeinaengiy nge aeremas reaerhaengi roorh me mmwaen seram, pwe iga aar feofffeor nge e aenneew.

20 Iyo kka refeofffeor aenneew nge ikkina reoapwuta seram, resoapw itto noan seram, pwonno feofffeor aenneew kkena refeefori ete pwaetae.

21 Nge iyo kkena refeefori minikkena ewenewen nge repwe itto noan seram, pwonno seram epwe pwaeritae pwe minikkena refeefori nge e tapweei minikkena tipaen Deus.

Jesus me John

22 Mwirin minneeii nge Jesus me rhoan kkayeo kkewe naiun ra noa Judea, a noa notiw reer pwe a noa paptismus fetaen aeremas.

23 Iwe nge John Baptist eno pwe epwan paptismus fetaen noan Aenon, ese taaw saengi Salim, pwe iga e igin ssow rhaan me ee. Aeremas ra noa reen pwe a paptismus aeginiir. (

24 Minneeii nge weni mmwaen igiwe John enoa kanepwus.)

25 Aemweoi rhoan kkayeo kkewe naiun John ra aengi-maw ngaeni erhai re Jew reen wunuunun aar iir re Jews oasoapwosoapwon aenimenima oanongeer.

26 Ra noa reen John nge ra aengaeni pwe, “Sinsei, womaengiy rhag mwaaen we eno reemw me peig na epeig me reen pwupwu we Jordan, iwe wofioangei kkepesan? Igina nge a paptismus fetaen nge oanongeer aeremas nge ra maeg noa reen!”

27 John a paniuwaeniir pwe, “Esooar erhai ne epwe yor eew meeta reen pwe aeggaen igine rhag Deus epwe fang ngaeni.

28 Aaemi minikkomwu naeyi rhooan pwaeritae, reen iga ngaang iura pwe, ‘Saapw ngaang Kristus, pwe ngaang minne Deus egommwaen aefengaeyaei to me mmwan.’

29 *Bridegroom* ina rhoan ngaenne aaen *bride* na; nge niewe maereyaeren mwaaen we e appwiuniupai, e iu oaron nge a kker igiwe a rongorong mwaeniaen mwaaen we. E ieen wunuunun oanongonniywaen aaei kker.

30 Iiy epwe taegias noa nge ngaang ipwe sessoanotiw.”

Iwe e Ittiw me Weei Naaeng

31 Mwaaen we eittiw me weei naaeng minne oarosaei taegias saengiir oanongeer aeremas. Iyo na eitto me wooai soanop nge iiy naiuy soanop ina epwe aepeasa mmwennen soanop, nge iyo we eittiw me naaeng nge iiy minne oarosaen taegias saengiir oanongeer aeremas.

32 E aepeasa minne eweri me erongorong, nge esooar ne e aiussaening ngaeni.

33 Nge iyo e aetiwa kkepas e aan, iwe nge iiy epwaeritae pwe Deus nge ennet.

34 Iyo we Deus a fang nge e aepeasa oanoon Deus, pwe Deus a oawunusa ngaeni oanongonniywaen minna Ngeoniun.

35 Deus we Seman e igin aerhaengi mwaaen na Naiun iwe a fang ngaeni oanongaen minna mamaawan.

36 Iyo na e niugiuniug ngaeni mwaaen we Naiun nge epwe toori menaw na esooar ssiaaenin; nge iyo ese niugiuniug ngaeni mwaaen we Naiun nge esoapw yo ngaeni menaw na esooar ssiaaenin, nge epwe no rhag noan aaen Deus aegaeregaer.

4

Jesus me Rhooapwuton Samaria we

1 Pharisees kkewe ra rongorong pwe ra towunap rhoan kkayeo kka Jesus a paptismusaar me mmwaen John nge a pwigiir pwe naiun rhoan kkayeo. (

2 Nge minna wenewenen, nge saapw Jesus pwe faer rhoan kkayeo kkewe naiun minne re paptismusaar.)

3 Iwe nge igiwe Jesus a rongorong meeta we re aepeasa, a siusaengi Judea a sefaaen ngaeni Galilee;

⁴ nge noan faaeraeg noa we aan nge epwan toonong noan Samaria.

⁵ Noan Samaria a noa reen eew aepinoamw itan Sychar, igaan nge ese taaw saengi maat we Jacob engaaneei Joseph iwe naiun.

⁶ Rhanniunim we aaen Jacob eno ee, iwe Jesus a itto mooat tiw epwe a mmaniuniu reen aan aeggaesaeisaei. A aerepa nugunupaen oanowas.

⁷ Erhai rhoopwuton Samaria a itto pwe epwe itto ifiif rhan, nge Jesus a aengaeni pwe, “Ngoatto egius rhan pwe iuniumaei.” (

⁸ Rhooran kkayeo kkewe naiun resoano pwe renoa nee aepinoamw pwe renoa chuwaai mwongo.)

⁹ Rhoopwut we a aengaeni pwe, “Een erhai Jew, nge ngaang erhai re Samaria—eifa wusun nge wa tingoareaei iuniumoamw rhaan?” (Re Jews resoapw iun nong noan aar kkap me mwongo nong noan aar saepiy re Samaria.)

¹⁰ Jesus a paniuwaeni pwe, “Aere wo giuneei meeta e Deus efang me iyo e etingoareog iuniuman rhaan, nge wo tingoar ngaeni nge iiy epwe ngaenneog minna rhaniun menaw.”

¹¹ Rhoopwut we a iura pwe, “Menap, esooar oamw pwaecchi nge rhanniunim een iye eigin nennoan. Iya iga wopwe pwiigi rhaniun menaw me ee?

¹² Jacob we rhaepetomaem minne efang ngaenigemaem rhanniunim ee; iiy me aetekkewe naiun me naiun maan nge oanongeer nge re iun saengi rhan eei. Meeta, een wo iura pwe wo taegias saengi Jacob?”

¹³ Jesus a paniuwaeni, “Rhoosaka re iun me reen rhan eei nge repwe moar sefaaen,

¹⁴ nge rhooa kena re iun me reen rhan na ngaang ipwe ngaenneer nge esooar faaen eew ne repwe moar. Rhan na ipwe ngaenneer ina epwene no pwe rhaepeton eew rhan ina epwene ngaenneer rhaniun menaw na esooar ssiaaenin.”

¹⁵ Rhoopwut we a iura pwe, “Menap, ngaenneei aei rhan na! Ina nge isoapw rhiuwen moar no nge isoapw rhiuwen itto no igei pwe ipwe itto ifiif rhan.”

¹⁶ Jesus a aengaeni, “Wonoa faingi mwaaen we rhooran ngaenne oamw nge wa sefaaeneto.”

¹⁷ Rhoopwut we a iura pwe, “Esooar rhooran ngaenneaei.”

Jesus a iura pwe, “Ennet minimwu wo iura pwe esooar rhooran ngaenne oamw.

¹⁸ Een wa moannon appwiuniupai ngaeniir nimman mwaaen, iwe nge mwaaen na wono reen igina ina soapw oanongonniawan rhooran ngaenne oamw. Wo aengaeniaei minna wenewenen kkepas.”

19 Rhoopwut we a iura pwe, “Iya weri pwe een erhai profeta, menap.

20 Re Samaria kkewe rhaepetoi re itto maeipin ngaeni Deus me wooan rhug eei, nge aaemi Jews oaw iura pwe Jerusalem minne sipwe maegin maeipin ngaeni Deus me ee.”

21 Jesus a aengaeni pwe, “Rhoopwut mwuun, niugiuniug ngaeniaei, eyor eew oat ina epwe noa itto nge aeremas resoapw maeipin ngaeni no minna Semaiei me wooan rhug eei aere noan Jerusalem.

22 Aaemi re Samaria oawse giuneei iyo mwu oawgaen maeipin ngaeni; nge aemaem re Jews aeigiuneei mane aeigaen maeipin ngaeni, pwe iga menaw na esooar ssiaaenin ina e itto me reer re Jews.

23 Nge oatona epwe itto ina a fasiun no igei, reen minna maemaewaen Espritu Santus nge aeremas repwene maeipin ngaeni Deus, nge repwene feori maeipin kkena e wenewen ina e tipaeni.

24 Deus ina ngeon, maemaewaen minne epwe mmwen pwe aeremas repwe maeipin ngaeni nge ina epwe noa reen Deus noan minna e wenewen.”

25 Rhoopwut we a iura pwe, “Ngaang i giuneei pwe Kristus epwe itto, oatona epwe itto, epwe aengaenigemaem oanongaen aegiaeg.”

26 Jesus a paniuwaeni, “Ngaang iiy minne imwaenieniy ngaeniug.”

27 Oatonaan nge rhoon kkayeo kkewe naiun Jesus ra sefaen, nge iir ra igin riu pwe e mwaenieniy ngaeni erhai rhoopwut. Nge esooar erhai neeiir ne e aeiineow rhoopwut we, “Meeta wo tipaeni?” aere aeiyeigy Jesus pwe, “Meeta wo mwaenieniy ngaeni rhoopwut na reen?”

28 Rhoopwut we a nigiti ruumen rhan we aan, nge a sefaen noa nee aepinoamw, nge a aengaeniir aeremas kkewe ee pwe,

29 “Oawitto pipiiy mwaaen ee e aengaeniaei oanongaen meeta kkewe ifeoffeori. Oawmaengiy nge iiy minne Kristus?”

30 Iwe ra nigiti aepinoamw we nge ra noa reen Jesus.

31 Noan oatonaan nge rhoon kkayeo kkewe reiyeffaenipirhe ngaeni Jesus pwe, “Sinsei, angi egiufet meeta!”

32 Jesus a paniuwaeni pwe, “Ngaang eyor aenaiei mwongo ina aaemi oawse giuneei mmwennen.”

33 Rhoon kkayeo kkewe ra aeiyeig fengaen wooar, “Eyor mwo mane e pweipwog to mwongo reen?”

³⁴ Jesus a aengaeniir pwe, “Mwongo na aenaiei ina ipwe tapweei tipaen manna efangeto ngaang, pwe ipwe oamoanna noa engaang na e ngaenneaei pwe ipwe feeori.

³⁵ Eyor eew mwaeniaemi iwe oawgaen iura pwe, ‘Faawu rhag meram nge a oaton gin.’ Nge ipwe aengaenigaemi, oaw pipiiy gacchiuw maat kaan; foat kaan ikka a maaw pwe sipwene giniiy!

³⁶ Iyo na a giniiy uwaen foat kaan ina a pwigi paniuwaen nge a ioni fengaenniy uwaen foat kaan pwe aegin menaw na esooar ssiaaenin; iwe iyo we efoat me iyo we egin nge repwe kker fengaen.

³⁷ Pwe ennetaen kkepas we regaen iura pwe, ‘Erhai epwe foat nge erhai a giniiy uwaan.’

³⁸ Iya fangenoa aaemi pwe oawpwe noa giniiy uwaen foat kena soapw foatogiyaemi; aaemweoi minne re engaang ee, nge aaemi oawwa pwigi wenepwuwaen aar engaang.”

³⁹ Retowunap re Samaria kkewe reno noan aepinoamw we ra niugiuniug ngaeni Jesus pwe igiwe rhoopwut we e aengaeniir pwe, “E aengaeniaei oanongaen minikkewe iya moannon feoffeori.”

⁴⁰ Iwe re Samaria kkewe ra itto reen iwe ra aeffaenipirheei pwe epwe notiw reer, iwe Jesus a notiw reer noan riuraan.

⁴¹ Repwan towunap rhoakka re niugiuniug pwonno reen miniwe mwaenian,

⁴² ra aengaeni rhoopwut we pwe, “Aeiya niugiuniug igina, nge saapw igiwe wo aengaenigemaem, pwe iga aemaem wooan oanongaemmaem aeiya rongorong mwaenian, iwe aeiya giuneei pwe iiy miniwe rhoaan aemenewa faeinaengiy.”

Jesus a Aecchipwa Erhai Aetemwaaen

⁴³ Mwirin aan no aegini riuraan igiwe, nge Jesus a nigiti iwe a noa Galilee.

⁴⁴ Pwe iiy wooan oanongan miniwe eiura pwe, “Profeta nge esooar aesirowuur me noan sipegin faniuweer.”

⁴⁵ Oatowe enoa toori Galilee, aemas ra itto aewenimmwa, pwe igiwe renoa tapweei gupwunon *Passover* me Jerusalem, nge ra weri oanongaen minikkewe efeeori me reen gupwun we.

⁴⁶ Iwe Jesus a sefaaen noa Cana me noan Galilee, pwiuneei we efeeori rhaan pwe *wine*. Erhai aeremesaen aam eno ee nge mwaaen na naiun nge e semwaaai me noan Capernaum.

⁴⁷ Igiwe e rongorong pwe Jesus a itto me Judea pwe epwene noa Galilee, a noa reen nge a aengaeni pwe epwe noa mwo Capernaum pwe epwe noa aecchipwa aetena naiun, pwe epwene oaropaen mae.

⁴⁸ Jesus a aengaeni pwe, “Esooar faaen eew ne erhai me neeimi epwe niugiuniug pwe aeggaen igine rhag eweri kke-man me min ariuriu.”

⁴⁹ Aeremesaen aam we a iura pwe, “Menap, itto tapweaei weni mmwaen aetena naeyi epwe mae noa.”

⁵⁰ Jesus a aengaeni pwe, “Wonoa, aetena noawumw epwene menaw!”

Mwaaen we a niugiuniug ngaeni miniwe mwaeniaen Jesus iwe a noa.

⁵¹ A faaeraeg noa nge a noa rhuungiir *slave* kkewe nge ra aengaeni pwe, “Aetewe noawumw epwe menaw!”

⁵² A aeiineeor fitowu konook minne aetewe naiun etakketae. Iwe nge iir ra paniuwaeni pwe, “Epwe eew konook nee oanowesaen naeneew pwe iwe esa pwerhikkar no ginin.”

⁵³ Iwe rhag nge miniwe semaen aetewe a maengiy noa pwe ina oatowe Jesus e aengaeni pwe, “Aetewe noawumw epwe menaw.” Iwe iiy me oanongeer rhoaan famini we aan ra niugiuniug ngaeni.

⁵⁴ A ieei minne oaruwowwaen kkeman Jesus a feori weni mwirin aan itto me Judea ngaeni Galilee.

5

Jesus a Aecchipwatae Erhai Mwaaen me Reen Eew Rhaan

¹ Mwirin minnee nge Jesus a noa Jerusalem pwe epwe noa tapweei gupwunon eew pwoong kkewe aar re Jew.

² Oaron eew rhan kken eaerepa minna aesemaen Jerusalem itan *Sheep Gate* ina nimowu pwerantaan; nge noan kkepessaen Hebrew nge Bethzatha.

³ Etowunap rhooa semwaai rewon faaen pweranta kkewe —rhooa parh, rhooa pirhema, me rhooa maemerhoar. [Re wewweti rhan we pwe epwe mwagiutiugiut,

⁴ pwe faaen aekkaew nge angkenusun Soamwoon eittiw noan rhan we iwe a gupeti. Nge iyo na egommwaen toonong noan rhan we weni mwirin aan gupetaeg, nge esaer noa ese tiwegin semwaai ne e aeni.]*

⁵ Erhai mwaaen eno ee a eniig me wanuw raeg aan semwaai.

⁶ Jesus a weri pwe ewon noa rhag igiwe, nge e giuneei pwe a ssiunaai aan semwaai; iwe a aeiineow pwe, “Womwerhaen wopwe takketae?”

⁷ Mwaaen we a iura pwe, “Menap, ngaang esooar mane epwe iseniaei nong noan rhan mwuun igine a mwagiutiugiut; iaetemaegin pwe ipwe toonong nge erhai eitto gommw noa me mmwaei.”

* 5:4 Petenan eei nge esoano noan aekkaew petenan kka efoatofoat noan kkepessaen Greek.

⁸ Jesus a aengaeni pwe, “Rhimwitae wa pwigi minimwu giemw nge wa faaeraeg noa.”

⁹ Oatowe rhag nge etakk noa mwaaen we; nge epwigi rhag miniwe gien nge a faaeraeg noa faan.

Minneei nge ewen wooan Sabbath,

¹⁰ iwe soamwooniir Jews kkewe ra aengaeni mwaaen we a takk noa pwe, “Sabbath minneei, ese gacch ngaeni aarh Oasoapwosoapw pwe wopwe pweipwog fetaen giemw.”

¹¹ Mwaaen we a paniuwaeni pwe, “Mwaaen we e aecchipwaeyaei tae eaengaeniaei pwe ipwe pwigi minne gie nge iya faaeraeg noa.”

¹² Ra aeineow pwe, “Iyo mwaaen na eaengaeniug pwe wopwe feeri minna?”

¹³ Nge mwaaen we a takketae ese giuneei aere iyo we e aecchipwatae, pwe igiwe reigin towunap aeremas igiwe, iwe Jesus a yo noa.

¹⁴ Enoa mwirin minneei nge Jesus a noa rhuungi mwaaen we me noan *Temple* we nge a aengaeni pwe, “Wa weri pwe wa takk igina; wosoapw oamonofit no, wopwe ina rhag nge eew min aenneew epwe wen ngaeniug.”

¹⁵ Mwaaen we a noa aengaeniir rhoowe soamwooniir Jews pwe Jesus miniwe e aecchipwatae.

¹⁶ Iwe a rhaepetae aar aewwaeiraesi Jesus pwe igiwe e aecchipwaar tae rhooa semwaai wooan Sabbath.

¹⁷ Jesus a paniuwaeniir pwe, “Mwaaen na Sema ei ina e engaang ffoarh noa rhag, iwe nge ngaang ipwan engaang.”

¹⁸ Egius mwo nge rhoowe soamwooniir Jews ra gin mw-erhaen pwe repwe niy reen miniwe mwaenian; a fasiun fereei miniwe oasoapwosoapwon Sabbath, nge a pwan iura pwe Deus nge Seman taeppei nge a aeffitaegiy ngaeni pwe iiy Deus.

Maemaewaen Mwaaen we Naiun

¹⁹ Iwe Jesus a paniuwaeniir, “Ennetaen, ipwe aengaeni-gaemi minna wenewenen: esooar minne mwaaen na Naiun epwe mmwenen feeri rhag wooan oanongan; efeeri rhag minikkena eweri pwe mwaaen na Seman efeeri. Minikkena mwaaen we Seman efeeri nge ina minikkei na mwaaen we Naiun epwe pwan feeri.

²⁰ Pwe mwaaen we Seman nge eaerhaengi mwaaen we Naiun nge epwaeri ngaeni oanongaen meeta kkewe iiy efeeri. Epwe pwaeri ngaeni mwo nge minikkena etemoag saengi me mmwaen ieei, iwe aaemi oawpwe mwaar reen.

²¹ Pwan taeppen rhag iga mwaaen we Seman eaemenewaar tae rhooa mae, epwan ina rhag mwaaen na Naiun epwe fang menaw ngaeniir rhoakkena e tipaeniir.

²² Nge mwaaen we Seman nge esoapw pwan apwiungiu mwo nge erhai aeremas. A fang ngaeni mwaaen na Naiun oanongaen maemaewan pwe epwe apwiungiuur aeremas,

²³ iwe ina nge oanongeer aeremas nge repwe aesirowu minna Naiun, taepfen rhag aar aesirowu minna Seman. Iyo na ese aesirowu minna Naiun nge ina ese aesirowu minna Seman ina efangeto iiy.

²⁴ “Ennetaen, ipwe aengaenigaemi minna wenewenen: iyo kena rerongorong ngaeni minikka mwaeniaei nge reniugiuniug ngaeni iiy iyo na efangeto ngaang nge repwe menaw foarhofoarh. Iir resoapw apwiung, pwe ra fasiun nigiti mae ra noa ngaeni menaw.

²⁵ Ennetaen, ipwe aengaenigaemi minna wenewenen: oatowe ina a itto, a fasiun no igei, nge rhoa mae repwene rongorong minna mwaenian minna Naiun Deus, nge rhoakkena re rongorong repwe menaw sefaen.

²⁶ Taepfen rhag iga mwaaen na Seman rhaepin menaw, taepfen rhag minnei a pwan feori minna Naiun pwe rhaepin menaw.

²⁷ Nge a fasiun ngaennei minna Naiun maemaewan pwe epwe apwiung, pwe iga iiy minne Naiun Aeremas.

²⁸ Oawsoapw riu reen minnei, pwe a itto oatowe oanongeer manimae nge repwene rongorong mwaenian,

²⁹ nge ra maegewow me noan paeyeer: rhoa feoffeoor mwamwaa i repwene menaw tae, nge rhoa feoffeoor aenneew ra noa apwiung.

Rhoan Pwaeritae Jesus

³⁰ “Saapw tipaei rhag iya feori minikkei; Ngaang i apwiungiuur rhag kka Deus e aengaeniaei, iwe aaei apwiung ina e wenewen, pwe iga ngaang ise feori minna i tipaeni pwe ifeori minna tipaeniaen iyo na efangeto ngaang.

³¹ “Aere igine ngaang i pwaeritae kkepesaei, ina nge repwe iura pwe minikka mwaeniaei nge ese nnet.

³² Iwe nge eyor erhai ina epwe mmwenen aepesa kkepesaei, nge ngaang igiuneei pwe minna e aepesa reen minna mmwenei nge ina ennet.

³³ John miniwe oawfang pwe rhoan pweipwogin kkepas, nge iiy e aepesa minna e wenewen.

³⁴ Saapw menaen epwe yor naeyi aeremas rhoan pwaeritae; i aepesa rhag minnei pwe aaei oawpwe menaw.

³⁵ John iwe eweei rhag eew oappwun, iwe eppwun nge eseram, nge aaei nge noan eew oat nge oawkker pwe oawpwe no noan sereman.

³⁶ Iwe nge ngaang eno erhai naeyi rhoan pwaeritae ina e taegias saengi mwo nge John: minikka ifeori, me minikka

mwaanen na Semaiei engoatto pwe ipwe feeori, oanongaen minikkeei nge e aepesa mmwenei pwe mwaaen na Semaiei minne efangeto ngaang.

³⁷ Mwaaen na Semaiei ina efangeto ngaang, iiy epwan pwaeritae kkepeseai. Esaan yor mwo aaemi rongorong mwaenian me weri mesan,

³⁸ aaemi oawse iseni minna mwaenian noan tipaemi, pwe aaemi oawse niugiuniug ngaeni iyo na iiy efangeto.

³⁹ Aaemi oawaeraegi Pwapwior we eSantus, pwe oawniuwaennei pwe oawpwe weri menaw na esooar ssiaaenin me ee. Nge iiy Pwapwior kka e santus ina re aepesa kkepeseai!

⁴⁰ Nge inamwo oawse mwerhaen pwe oawpwe itto reei pwe oawpwe menaw foarhfoarh.

⁴¹ “Ngaang ise giutteon aeremas repwe oassoaraeyaei.

⁴² Pwe ngaang i giuneei wunuunumi, pwe esooar ffayeon Deus me noan pwwunomi.

⁴³ Ngaang itto faaen itaen minna Semaiei, nge aaemi oawse aetiwaeyaei; iwe ngaere aekkaerhai reitto faaen iteer nge aaemi oawpwe aetiwaar.

⁴⁴ Oawtipaeni pwe oawpwe gaen oassoara fengaenni-gaemi rhag, oawse giutta minne epwe yor ssoaromi me reen ina iiy noa rhag minne Deus; epwe ifa wusun rhag nge oawwa niugiuniug ngaeniaei?

⁴⁵ Oawsoapw niuwaennei pwe ngaang minne ipwe oamonofitigaemi reen mwaaen na Semaiei. Pwe Moses iwe oawgaen aeni aepiniugiuniug iiy minne epwe oamonofitigaemi.

⁴⁶ Pwe ngaere igine oawniugiuniug ngaeni Moses, nge oawpwe niugiuniug ngaeniaei, pwe igiwe iiy e foatogi minna wunuunuy.

⁴⁷ Pwonno igiwe oawse niugiuniug ngaeni miniwe efoatogi, nge epwe ifa wusun aaemi niugiuniug ngaeni mwaeniaei?”

6

*Jesus e Oamwongoor Nimingeras Aeremas
(Mat 14.13-21; Mark 6.30-44; Luke 9.10-17)*

¹ Weni mwirin minnee nge Jesus a noa noan meoneoiniuniun Galilee (aere meoneoiniuniun Tiberias).

² Eew pwuwaen aeremas etettapwei, pwe igiwe ra weri kkeman kkewe efeeori reen aan aecchipwaar rhooa semwaai.

³ Jesus a ittae wooan eew rhug a ittae mooat tiw reer rhoaan kkayeo kkewe naiun.

⁴ Oatowe oaton gupwunon *Passover* a arapeto.

⁵ Jesus efaaen fetaen nge a weri eew pwuwaen aeremas pwe ra feffaaeraeg to reen, iwe a aeiineow Philip pwe, “Iya iga sipwe mmwenen chuwaai mwongo me ee, pwe aeremas kaan repwe mwongo?” (

⁶ E aepesa minneei pwe epwe soatoni Philip; iwe nge minna iiy ina a fasiun giuneei minne epwe feeori.)

⁷ Philip a iura pwe, “Inamwo igine epwe paer saengi riiuwapwiugiww faiun *silver* eyor nge esoapw pwan toaw paniuwaenin fenoawa pwe erhai nge e angi egius.”

⁸ Andrew pwan erhai rhoan kkayeo kkewe naiun, iwe pwiin Simon Peter, a iura pwe,

⁹ “Erhai aet iye eno niffai fenoawa *barley* me riiurhai iig reen. Iwe nge esoapw toaw mwo nge wooar rhoanap eei.”

¹⁰ Jesus a aengaeniir pwe, “Aengaeniir oanongeer aeremas pwe repwe mooat tiw.” (Egin ssow fetin igiwe.) Iwe nge oanongeer aeremas ra mooat tiw; akkarap nimingeras nepeer mwaaen kkewe.

¹¹ Jesus a pwwigi fenoawa we, a fang ngaeni Deus aan aerhigerhig, a inetiy wooar aeremas kkewe remooat. Pwan ina miniwe efeeori ngaeni iig we, iwe aeremas ra mwongo nepaen minne re tipaeni.

¹² Igiwe ra mat noa, a aengaeniir rhoan kkayeo kkewe naiun pwe, “Oaw pwwigi oanongaen nuseg, sisoapw oasonopa mwo nge egiufet.”

¹³ Iwe ra pwwigi nusegin fenoawa *barley* kkewe, ngoannong noan seig me ruwowu rhiug.

¹⁴ Igiwe ra weri kkeman we Jesus efeeori, rhoa kkewe ra iura pwe, “Ennetaen pwe ieei iiy profeta we epwe itto noan faeinaengiy!”

¹⁵ Jesus a giuneei pwe repwene torofi pwe repwe feeori noa pwe *king*, iwe iiy rhag a pwan noa neeiin taeiit kkewe.

Jesus e Faaeraeg Noa Weei Saaet
(*Mat 14.22-33; Mark 6.45-52*)

¹⁶ Enoa nee oatofaaef rhoan kkayeo kkewe naiun Jesus ra maegetiw ngaerhen meoneoiniun we,

¹⁷ ra teeotae rhiun efoarh pwoot ra seraeg noa noan meoneoiniun we pwe repwe noa ngaeni Capernaum. Enoa pwoong noa, nge Jesus esaaen tooto mwo reer.

¹⁸ Enoa oatonaan nge a kekkaein noa rhag aaeng nge a iutae mesaei saet.

¹⁹ Igiwe epwe enuww aere faawu *miles* aar rhoan kkayeo kkewe fatiun, nge ra weri aaen Jesus faaeraegto weei saet, enoa arap ngaeni pwoot we nge ra mesag.

²⁰ Jesus a aengaeniir pwe, “Oawsoapw mesag pwe iye ngaang!”

²¹ Nge re ateeotae rhiun pwoot we, nge ese mmwaei mwo nge ra toori faniuw igiwe re nenna ngaeni ee.

Aeremas ra Giutta Jesus

²² Mmasetaen iwe eraaen, pwuwaen aeremas we eno peig we epeig ra giuneei pwe efoarh rhag pwoot eno igiwe. Ra giuneei pwe Jesus ese tapweer rhooran kkayeo kkewe naiun, pwe iir rhag miniwe renoa.

²³ Aekkaew pwoot saengi Tiberias re tooto pwiuneoi we pwuwaen aeremas we remwongo fenoawa me ee, mwirin aen Soamwoon fang aerhigerhig.

²⁴ Igiwe pwuwaen aeremas we enoa weri pwe Jesus e soanono igiwe, fengaen me rhooran kkayeo kkewe naiun, ra teeotae rhiun pwoot kkewe iwe ra noa Capernaum, ra noa giutta fetaeneei.

Jesus Minne Fenoawaen Menaw

²⁵ Igiwe aeremas kkewe ra weri Jesus me reen peigin meo-neoiniun we, ra aengaeni pwe, "Sinsei, ineeta minne wo tooto igei?"

²⁶ Jesus a paniuwaeniir pwe, "Ennetaen, ipwe aengaeni-gaemi minna wenewenen: oawgiuttayaei pwe iga oawwa mat noa pwe oawwa mwongo fenoawa, nge soapw reen aaemi metaf reen kkeman kkewe ifeori.

²⁷ Oawsoapw engaang ngaeni mwongo kkena epwe mmwenen aenneew noa; nge oawpwe faer engaang ngaeni mwongo kkena epwe noa ffoarh ngaeni minna menaw na esooar ssiaaenin. Ieen mwongo e mwaaen na Naiun Aeremas epwe ngaennegaemi, pwe iga Deus, ina Seman, a aeffeta noa pwe a fini pwe iga efin tipaen reen."

²⁸ Iwe ra aeineow pwe, "Iwe meeta minne aeipwe feori nge a mmwen aeipwe feori minikkena Deus e tipaeni?"

²⁹ Jesus a paniuwaeni pwe, "Minna Deus e tipaeni pwe oawpwe feori, ina oawpwe niugiuniug ngaeni manna efangeto."

³⁰ Ra iura pwe, "Meeta kkeman kena wopwe feori pwe aeipwe weri nge aeipwe niugiuniug ngaeniug? Meeta minne wopwe feori?"

³¹ Rhaepeto kkewe aemaem re mwommwongo *manna* me noan *desert*, taeppen rhag miniwe Pwapwior we e Santus eiura pwe, 'A ngaenneer fenoawa ittiw me naaeng pwe repwe mwongo.'

³² Jesus a iura pwe, "Ennetaen, ipwe aengaenigaemi minna wenewenen: miniwe we Moses engaennegaemi nge saapw fenoawa ittiw me naaeng; manna Semaeni minne efang ngaenigaemi minna oanongonniuwaen fenoawa ittiw me naaeng.

33 Pwe fenoawa we Deus efang, ina iiy iyo we eittiw me naaeng ina a aemenewa faeinaengiy.”

34 Iir ra aengaeni pwe, “Menap, ngaennegemaem fenoawa eei oanongaen oat.”

35 Jesus a aengaeniir pwe, “Ngaang minne fenoawaen menaw. Rhoakka re itto reei resoapw rhiuwen pecchai no; nge rhoakka re niugiuniug ngaeniaei resoapw moar no.

36 Iwe iaengaenigaemi pwe oawwa weriaei nge oawse niugiuniug.

37 Rhoakkena mwaaen na Semaei engaenneaei, repwe itto reei. Esooar faaen eew ipwe toagun saengi manna e itto reei,

38 pwe ise ittiw me naaeng pwe ipwe ittiw feori minna aaei mwerhaen, pwe ipwe feori aaen mwerhaen manna efangeto ngaang.

39 Aaen mwerhaen manna efangeto ngaang ina esoapw ppiung saengiaei mwo nge erhai me neeiir rhoawe enganneaei, pwe ipwe faer aemenewaar tae oanongeer woan minna oarosaen raaen.

40 Pwe mwaaen na Semaei ina e mwerhaen pwe oanongeer aeremas kena reweri minna Naiun nge re niugiuniug ngaeni iwe nge repwe menaw foarhfoarh. Nge ipwe aemenewaar tae woan minna oarosaen raaen.”

41 A rhaepetae aar aeremas ngiuniungiuniuw pwe igiwe e iura pwe, “Ngaang fenoawa we e ittiw me naaeng.”

42 Nge ra iura pwe, “Ieen iiy mwaaen we naiun Joseph, aere? Sigiuneei seman me inan. Nge ifa wusun nge eiura pwe e ittiw me naaeng?”

43 Jesus a paniuwaeniir, “Oawsoapw ngiuniungiun rhag woami.

44 Esooar ne epwe mmwenen itto reei pwe aeggaen igine rhag mwaaen na Semaei ina efang to ngaang minne epwigiir to reei; iwe nge ipwe aemenewaar tae woan minna oarosaen raaen.

45 Profeta kkewe re foatogi pwe, ‘Oanongeer aeremas nge Deus epwe aerrepiaar.’ Oanongeer rhoai rongorong ngaeni Semaei nge re reepiy me reen, nge re itto reei.

46 Ise iura pwe oanongeer aeremas nge reweri minna Semaei; pwe iyo na e itto me reen Deus ina rhag aeremas na a fasiun weri manna Semaei.

47 Ennetaen, ipwe aengaenigaemi minna wenewenen: iyo na e niugiuniug, ina epwe menaw foarhfoarh.

48 Ngaang minne fenoawaen menaw.

49 Rhoaa kkewe rhaepetomi remwongo *manna* me noan *desert*, nge remae noa.

⁵⁰ Iwe nge fenoawa na e ittiw me naaeng ina ese tiwegin ne emwongo nge esoapw mae.

⁵¹ Ngaang minne fenoawa na e ittiw me naaeng. Aere oawangi fenoawa een, nge oawpwe toori menaw na esooar ssiaaenin. Fenoawa e ipwe ngaennegaemi ina fitigoi, ina epwe fang pwe faeinaengiy epwe menaw.”

⁵² Iwe rhag re Jew kkewe erhaepetae aar aengimaaw fengaen. Ra aeineow pwe, “Epwe ifa wusun aan ngaennegirh fitigon pwe sipwe mwongo?”

⁵³ Jesus a aengaeniir pwe, “Ennetaen, ipwe aengaenigaemi minna wenewenen: aere oawse angi minna fitigon mwaaen we Naiun Aeremas nge oaw iun me reen cchaan, nge esoapw yor menewaemi.

⁵⁴ Iyo kena re mwongo fitigoi nge re iun cchaei, nge repwe menaw foarhohoarth, ipwe aemenewaar tae wooan minna oarosaen raaen.

⁵⁵ Pwe minne fitigoi ina oanongonniuwaen mwongo, iwe nge minne cchaei ina oanongonniuwaen menaen iun.

⁵⁶ Iyo kena re mwongo minna fitigoi nge re iun me reen minna cchaei nge iir reno noan ngaang nge ngaang ino noan iir.

⁵⁷ Saam na e menaw efangeto ngaang, iwe ngaang ipwan menaw pwe aegin iiy. Epwe pwan ina rhag pwe iyo kena re angi fitigoi repwe pwan menaw pwe aegin ngaang.

⁵⁸ Iwe ieen iiy fenoawa we e ittiw me naaeng; ese weei taeppen iiy fenoawa we rhaepeto kkewe aaemi re mwongo nge faeiyegeius noa nge remae noa. Nge iyo kena re mwongo fenoawa een nge repwe menaw noa rhag.”

⁵⁹ Jesus eaepesa minikkeei igiwe efenai noan wutt we wutteer Jews me Capernaum.

Kkpesaen Menaw na Esooar Ssiaaenin

⁶⁰ Towuneppeer rhoa kkewe rhoaniuwaar rerongorong minnee nge ra iura pwe, “Eigin waeiraes aerrepiei. Iyo na epwe mmwenen aiussaening ngaeni?”

⁶¹ Rese aengaeni nge Jesus egiuneei miniwe re ngiuniungiuniuw, iwe a aengaeniir pwe, “Minne ifeori a aetippaegaemi ina oawwa nigiti noa aaemi niugiuniug?”

⁶² Ngaere pwetae oawweri mwaaen we Naiun Aeremas aan sefaaen tae reen pwiuneoi we e fasiun no ee?

⁶³ Espritu na aaen Deus minne efang menaw; esooar ipitaen minne maemaewaen aeremas. Pwe kkepas kka iya ngaennegaemi nge kkepesaen Ngeon me menaw.

⁶⁴ Nge ina rhag aaemweoi aaemi oawse giuneei.” (Saengi rhag rhaepetaen nge Jesus e giuneei iyo kena rese niugiuniug, me iyo na epwe fangenoa tinnimaen.)

⁶⁵ Jesus a iura pwe, “Ieei faaen iiy miniwe i aengaenigaemi pwe esooar aeremas kka repwe mmwenen itto reei pwe igine rhag mwaaen na Semaai efeeri pwe epwe mmwen pwe repwe itto.”

⁶⁶ Iwe aegin minnee, retowunap rhoa kkewe rhoani-uwaen Jesus ra sefaaen resa mwerhaen tapweei noano.

⁶⁷ Iwe a aeineeor rhoan kkayeo kkewe seig me riiurhai, “Iwe nge aaemi, oawpwan mwerhaen noa?”

⁶⁸ Simon Peter a paniuwaeni, “Soamwoon, nge iyo aeipwene noa reen? Eno reemw kkepas na efang menaw na esooar ssiaaenin.

⁶⁹ Iwe igina aei niugiuniug nge aei giuneei pwe een miniwe wo santus iwe wo itto me reen Deus.”

⁷⁰ Jesus a iura pwe, “Ngaang miniwe i finigaemi tae seig me riiurhai, aere saapw ngaang? Nge ina rhag ina erhai me neemi nge mwuniaan!”

⁷¹ A aepesa kkepesaen Judas, iwe naiun Simon Iscariot. Pwe Judas, inamwo igiwe iiy erhai rhoaawe seig me riiurhai, nge epwene fangenoa tinnimaen Jesus.

7

Jesus me Mwaaen Kkewe Pwiin

¹ Mwirin minnee nge Jesus a no fetaen rhag noan Galilee; ese tipaeni pwe epwe noa fetaen noan Judea pwe igiwe soamwooniir Jews ra mwerhaen repwe niyi noa.

² Oaton Gupwunon Penaes a arapeto,

³ iwe mwaaen kkewe pwiin Jesus ra aengaeni pwe, “Wone nigiti igeei pwe wopwene noa Judea, pwe rhoakka rhoaniuwoamw repwe weri minikka wa feeeri.

⁴ Aeremas rese oapa minikka repwe feeeri igine re tipaeni pwe repwe pwae noa, nge iga wa feoffeeri minikkei, pwaeri ngaeni faeinaengiy pwe repwe giuneog!” (

⁵ Mwaaen kkewe mwo pwiin nge rese niugiuniug ngaeni.)

⁶ Jesus a aengaeniir pwe, “Esaen oato mwamwaaion pwe ipwe noa. Aaemi ese tiwegin eew oat nge efin ngaenigaemi.

⁷ Faeinaengiy ese mmwen epwe oapwutaegaemi, nge ngaang e oapwutaeyaei, pwe iga ngaang i aengaeni rhag pwe minikka feoffeeriur iga e aenneew.

⁸ Oawnoa aaemi oawpwe noa tapweei gupwun na. Ngaang isoapw noa tapweei gupwun na pwe esaen itto mwo minna oatoi.”

⁹ E aengaeniir minnee iwe a notiw noan Galilee.

Jesus a Noa Tapweei Gupwunon Penaes we

10 Mwirin aar mwaaen kkewe pwiin noa tapweei gupwun we iwe nge Jesus a pwan noa; ese pwaeri noa aan noa, pwe eyopo noa rhag.

11 Rhooa kkewe soamwooniir Jews ra giutta fetaeneei rhag me faaen gupwun we. Ra aeineow pwe, "Ifa iiy wonowe?"

12 Ra igin towunap rhoan mwangiuniungiun me noan pwuwa we. Aemweoi ra iura pwe, "Erhai aeremas gacch." Nge aekkaemweoi re iura pwe, "Aapw, pwe e oatupwutupw aeremas."

13 Aeremas rese fioangei fetaeneei pwe re mesagiur soamwooniir Jews.

14 A nugunupan noa aan epwene moann gupwun we nge Jesus a noa noan *Temple* we iwe a noa rhaepiy tae aan fenai.

15 Rhooa kkewe soamwooniir Jews ra igin riutae ra iura pwe, "Eifa wusun nge mwaaeneei nge e giuneei minikkeei nge esooar aan suguun?"

16 Jesus a paniuwaeniir pwe, "Minikka i fenaiuw nge saapw aaei fenai pwe e itto me reen Deus, iwe efangeto ngaang.

17 Iyo na e mwerhaen epwe feeri minna tipaen Deus nge epwe giuneei pwe aere minikka i fenaiuw nge e itto me reen Deus, ngaere ngaang iya aepesa wow mwaeniaei woan oanongaei.

18 Iyo kka iir re aepesa wow mwaenieer woan oanongeer nge iir re giutta rhag ssoaron iteer. Nge iyo na e mwerhaen giutta ssoaron iyo na efangeto iiy ina e wenewen, esooar eew min oatupwutupw reen.

19 Moses engaennegaemi anniug we, ngaere? Nge esooar erhai me neemi ne e tapweei. Nge meeta oawwa mwerhaen pwe oawpwe niaei noa reen?"

20 Nge pwuwa we a paniuwaeni pwe, "Eyor mwuniaan woamw. Iyo na e mwerhaen epwe niug noa?"

21 Jesus a paniuwaeniir pwe, "Ifeeri eew kkeman nge oanongaemi nge oawwa maegin riutae reen.

22 Moses a akkiuneogaemi pwe oawpwe *circumcise* aegini naimi aetemwaaen (nge iwe saapw Moses pwe rhoawe rhaepetomi miniwe rerhaepiy tae), iwe oawwa *circumcise* aegini erhai aetemwaaen woan Sabbath.

23 Ngaere re *circumcise* aegini erhai aetemwaaen woan Sabbath pwe minni ete fereei anniug we aen Moses, nge meeta oawwa soong woai iga i aecchipwatae erhai aeremas woan Sabbath reen?

24 Oawsoapw apwiung aeremas reen meeta na oawweri, pwe oawpwe apwiung reen minna e wenewen."

Iiy Minne Kristus?

25 Aemweoi re Jerusalem ra iura pwe, “Saapw ieen mwaaen we soamwoon kkewe re mwerhaen repwe niy noa?

26 Pipiiy! A kkepas neeiir rhoanap, nge esooar meeta minne re iura reen! Meeta, re giuneei pwe iiy Kristus?

27 Nge aere Kristus enoa itto, esooar erhai ne epwe giuneei aere iiy aeremesaen iya. Nge oanongarh nge si giuneei iya iga mwaaen een e itto me ee.”

28 Iwe Jesus a feffenai noan *Temple* we, a kkepas temoag tae nge a iura pwe, “Oaw oanongonniywaen giuneaai me iga i itto me ee? Saapw ngaang minne tipaei pwe ipwe itto. Nge iiy iyo na efangeto ngaang ina e wenewen. Aaemi oawse giuneei,

29 nge ngaang igiuneei, pwe iga itto me reen nge iiy efangeto ngaang.”

30 Iwe rhoowe ra menaen repwe torofi, nge esooar mane e anngaeni, pwe igiwe esaaen gona mwo oaton.

31 Nge towuneppeer rhoowe re niugiuniug ngaeni me noan pwuwa we ra iura pwe, “Oatona epwe itto Kristus, epwe ssow kkeman kka epwe feeri me mmwaen mwaaen een?”

Poos ra Noa Repwe Torofi Jesus

32 Pharisees reno noan pwuwa we ra rongorong aar aere-mas ngiuniungiuniuw kkepesaen Jesus, iwe iir me soamwooniir patere kkewe ra fangenoa aemweoi poos repwe noa torofi.

33 Jesus a iura pwe, “Ipwene no egius rhag reemi, nge iya noa reen iyo we efangeto ngaang.

34 Oawpwe giuttayaei nge oawsoapw rhuungiaei, pwe aaemi oawsoapw mmwenen noa iga ipwe noa ee.”

35 Rhooa kkewe soamwooniir Jews ra aeineo fengaen woar, “Iya iga epwe noa ee nge sisoapw mmwenen weri? Epwene noa woan eew aepinoamwon Greece igiwe aere-mas kkewe naiurh reno ee, iwe a noa fenaiuw ngaeniir re Greeks?

36 Nge eiura pwe sipwe noa giutta nge sisoapw rhuungi, nge sisoapw mmwenen noa iga epwe no ee. Meeta faan minna eiura?”

Rhan we Efang Menaw

37 Oarosan raaenin gupwun we eigin yor ipitan, Jesus a iutae nge a kkepas temoag tae, “Iyo ne a moar epwe itto reei,

38 iwe nge iyo ne e niugiuniug ngaeniaei epwe iun. Pwe iwe Pwapwior we e Santus e iura pwe, ‘Rhan we efang menaw epwe pwuutiw me wenepeigin.’ ”

39 Jesus e kkepesaen mmwenen Espritu, pwe aere-mas kka ra niugiuniug ngaeni nge repwene pwigi. Noan oatonaan nge Espritu esaaen fang mwo pwe iga Jesus esaaen toonong mwo noan minna nningen.

Aeiyaegin Nee Finaen Aeremas

40 Aemweoi aeremas kkewe noan pwuwa we rerongorong aan aepesa miniwe nge ra iura pwe, "Mwaaeneei nge oanongaen pwe iiy Profeta we!"

41 Aemweoi re iura pwe, "Iiy minne Kristus!"

Nge aemweoi re iura pwe, "Kristus esoapw itto me Galilee!"

42 Pwapwior we e Santus nge eiura pwe, 'Kristus nge teo-
teon *king* David nge epwe supw me Bethlehem, aepinoamw
we David eno ee.' "

43 Iwe a yor aeiyaegin nee finaen aeremas me reen pwuwa
we pwonno faan ngaeni iiy Jesus.

44 Aemweoi ra mwerhaen torofi, nge esooar mane
emmwenen angetae paiun wooan.

Soamwooniir Jews Kkewe Rese Niugiuniug

45 Igiwe renoa sefaaen poos kkewe, soamwooniir patere
kkewe me Pharisees ra aeiineeor pwe, "Meeta oawse pwigito
reen?"

46 Poos kkewe ra iura pwe, "Esaen yor erhai ne eweei aaen
kkepas mwaaen een!"

47 Pharisees kkewe ra aeiineeor pwe, "Aaemi mwo nge
epwan oatupwugaemi?"

48 A yor mwo erhai soamwoon kaan aere Pharisees pwe
re niugiuniug ngaeni?"

49 Pwuwa eei nge ese giuneei anniug kkewe aaen Moses,
iwe iir ra no faaen aaen Deus aegaeregaer!"

50 Erhai Pharisee itan Nicodemus, mwaaen we a fasiun noa
mwo reen Jesus. A aengaeniir pwe,

51 "Noan aarh Anniug nge sisoapw mmwenen oamonofiti
erhai iga sisiaen apwiungiur mwo pwe sipwe giutta meeta
na efeeri."

52 Ra iura pwe, "Iwe, nge een erhai rhoan Galilee? Aeraegi
Pwapwior we e Santus pwe wopwe giuneei pwe esooar pro-
feta e ikkitto me Galilee." [

53 Iwe erhai nge enoa reen imwan.

8

Rhoapwut we e Feoffeoor Aenneew

1 Iwe nge Jesus a noa wooan rhugun *Olives*.

2 Nee oatosor moawugowugon raaenin we eraaen nge a
noa noan *Temple* we. Ra maegeto aeremas reen, a mooat tiw
pwe a fenai ngaeniir.

3 Sinsein anniug me Pharisees kkewe ra pwigito erhai
rhoapwut iwe retorofi pwe e maiur ngaeni pwiuniuwaen
erhai, ra itto aiuw noa me weni mmweer oanongeer.

⁴ Ra aengaeni Jesus pwe, “Sinsei, rhoopwut een retorofi pwe e mwoarho pwiuniuwan.

⁵ Noan aarh oasoapwosoapw nge Moses e iura pwe taeppen rhoopwut een nge sipwe tera pwe epwe mae. Iwe igina nge meeta een wopwe iura?”

⁶ Reaepesa minnee pwe repwe aegina Jesus pwe repwe oamonofitiy wooan. Iwe nge iya pwoarotiw a ittiw foatfoat fetaen wooan ppweon reen aiuttiun.

⁷ Reen oatowe ra iu igiwe pwe ra kkepas aeiyege ngaeni, a fattae nge a aengaeniir pwe, “Iyo erhai me neemi ne esooar monofitin nge iyy minne epwe aerhee minna mesaemmwaen faai.”

⁸ A pwan pwoar sefaaen tiw a pwan ittiw foatfoat fetaen wooan ppweon.

⁹ Igiwe ra rongorong minnee nge a erhai me erhai neeiir ra siussiu noa, rhaepetae me wooar rhooa kkewe retugufaeyi. Iwe a noa rhag noatiw Jesus me rhoopwut we e iu.

¹⁰ A fattae nge a aengaeni pwe, “Ra maegenoa iya? Esooar erhai ne enotiw pwe epwe oamonofitiug?”

¹¹ Rhoopwut a paniuwaeni nge a iura pwe, “Esooar menap.” Jesus a iura pwe, “Iwe ina pwan ngaang nge isoapw oamonofitiug. Wonoa nge wosoapw rhiuwen feeori no eew monofit.”]*

Jesus Minne Seremaen Faenaengiy

¹² Jesus a pwan mwaenieniy sefaaen ngaeniir Pharisees kkewe, a iura pwe, “Ngaang minne seremaen faenaengiy. Iyo noa epwe tapweaei nge epwe no reen minna seremaen menaw, iwe nge esooar faaen eew ne epwe faaeraeg noan rorhapiung.”

¹³ Pharisees kkewe ra aengaeni pwe, “Meeta kkomwu wo iura igina nge kkepesaen oamw pwaeritae wunuunumw; nge minikkomwu wo iura nge ese nnet.”

¹⁴ Jesus a iura pwe, “Inamwo iga ngaang iaepesa sipegin kkepesaei, iwe nge minne iaepesa ina ewenewen, pwe iga igiuneei iga itto me ee iwe nge igiuneei iya iga ipwene noa ee. Aaemi oawse giuneei iga itto me ee aere iga ipwe noa ee.

¹⁵ Aaemi oaw aeni rhag aar aeremas apwiung; nge ngaang esooar mane i apwiungiu.

¹⁶ Pwe ngaere igine ipwe apwiungiiur aeremas, iwe nge ipwe apwiungiiur noan wenewen, pwe iga saapw ngaang rhag minne ifeeri minnee; pwe mwaaen na Semaei ina efangeto ngaang epwan tapweaei.

* **8:11** Petenan eei nge esoano noan aekkaew petenan kka efoatfoat noan kkepesaen Greek.

17 Pwe eno noan Oasoapwosoapw we aaemi pwe ngaere riiurhai rhooran pwaeritae e aeffitaeg mwaenieer iwe ina nge minna re aepesa nge e wenenen.

18 Ngaang iaepesa mmwenei wooan oanongaei, iwe nge mwaaen na Semaiei iwe efang to ngaang, epwan aepesa mmwenei.”

19 Ra aeiineow pwe, “Pwe ifa mwaaen na Semoamw?”

Jesus a iura pwe, “Aaemi oawse giuneaei iwe oawse pwan giuneei mwaaen na Semaiei. Aere igine oaw giuneaei ina nge oawpwan giuneei mwaaen na Semaiei.”

20 Oanongaen minikkei nge Jesus e aepesa igiwe e fenai noan *Temple* we, noan pwiuneoi we eno kakoonan niffang kkewe ee. Nge esooar ne e torofi pwe igiwe esaaen itto mwo minna oaton.

Oawsoapw Mmwenen Noa Iga Ipwe Noa Ee

21 Jesus a pwan aengaeniir pwe, “Ngaang ipwene noa; oawpwe giuttayaei nge oawpwe maenoa noan aaemi monofit. Oawsoapw mmwenen noa iga ipwe noa ee.”

22 Iwe mwaaen kkewe soamwooniir Jews ra iura pwe, “Eiura pwe sisoapw mmwenen noa iga epwe noa ee. Eiura minneen pwe iiy epwe sipegin niy noa oanongan?”

23 Jesus a iura pwe, “Aaemi oawitto me reen faniuw efaan, nge ngaang itto me reen ina weei naaeng. Aaemi oawno noan faeinaengiy, nge ngaang ise itto me reen faeinaengiy.

24 Ina faaen minne iaengaenigaemi pwe oawpwe maenoa noan aaemi monofit reen. Oawpwe maenoa noan aaemi monofit igine oawse niugiuniug pwe ‘Ngaang ina Ngaang’.”

25 Ra aeiineow pwe, “Een iyo?”

Jesus a iura pwe, “Miniwe iaengaenigaemi me rhaepetaen.

26 Ngaang e igin ssow minne ipwe aepesa reen mmwenei, iwe me minne ipwe oamonofitigaemi wooan. Nge iyo na efangeto ngaang ina ewenecchar, nge ngaang iya aengaeni faeinaengiy minikkenan ngaang iya rongorong saengi.”

27 Iir rese metefaaegini pwe Jesus a fioangei ngaeniir mmwenen minna Semaen.

28 Iwe a aengaeniir pwe, “Oatona oawpwe aetaegiasaetae mwaaen na Naiun Aereamas, ina nge oawpwe giuneei pwe, ‘Ngaang ina Ngaang’; nge ina oawpwe giuneei pwe ngaang saapw tipaei rhag iya feeori minikkei, pwe ngaang iaepesa rhag minna mwaaen na Semaiei eaengaeniaei pwe ipwe aepesa.

29 Nge iyo na efangeto ngaang ina eno reei; esaaen nigitiaei mwo; pwe iga ngaang ifeeri rhag meeta kena iiy e tipaeni.”

30 Retowunap rhooa kkewe rerongorong aen Jesus aepesa minikkei nge ra niugiuniug ngaeni.

Wenewen Epwe Saenetigaemi

³¹ Iwe Jesus a aengaeniir Jews kkewe re niugiuniug ngaeni pwe, “Ngaere oawtapweei aaei fenai, aaemi minne oanongonniywaen naeyi rhoosan kkayeo;

³² oawpwe giuneei minna ewenewen nge minna ewenewen epwe saenetigaemi.”

³³ Ra iura pwe, “Aemaem minikka teoteeon Abraham, iwe nge esaen yor mwo ne epwigigemaem pwe aemaem pwe naiun rhoosan akkiuneo. Iwe meeta faaen miniwe wo iura pwe, ‘Oawpwene saenetaeg reen?’”

³⁴ Jesus a aengaeniir pwe, “Ennetaen, ipwe aengaenigaemi minna wenewenen: oanongeer rhoos akka re monofit nge ina iiy naiun monofit rhoosan akkiuneo.

³⁵ Rhoosan akkiuneo ina esoapw mmwenen no noa pwe naiun eew famini, iwe nge aetemwaaen emmwenen no noa pwe naiun famini ne esooar iaenin.

³⁶ Aere igine mwaaen na Naiun Deus epwe saenetigaemi, iwe nge oawpwe oanongonniywaen saenetaeg.

³⁷ Ngaang i giuneei pwe aaemi nge teoteeon Abraham. Iwe nge aaemi oawwa menaen oawpwe niaei noa, pwe oawse mwerhaen aetiwa minikka mwaeniaei.

³⁸ Ngaang iaepesa meeta minne mwaaen na Semaai a pwaeri ngaeniaei, nge aaemi oawfeeri minikkena manna semaemi e aengaenigaemi.”

³⁹ Ra iura pwe, “Mwaaen na semmaem nge Abraham.”

Jesus a iura pwe, “Ngaere igine oanongonniywaen aaemi naiun Abraham, ina nge oawpwe pwan feeri minikkewe iiy epwan feeri.

⁴⁰ Minna rhag ngaang ifeeri ina iaengaenigaemi minna wenewenen ina i rongorong me reen Deus, nge aaemi oawwa menaen oawpwe niaei noa. Esooar taeppen minnee ne Abraham efeeri!

⁴¹ Aaemi oawfeeri meeta na semaemi efeeri.”

Ra paniywaeni pwe, “Deus ina iiy rhag minne Semmaem, nge aemaem pwiungiuncheraen naiun.”

⁴² Jesus a aengaeniir pwe, “Ngaere igine Deus minne oanongonniywaen Semaemi, nge oawpwe aerhaengiaei, pwe iga ngaang iitto me reen Deus iwe igina ngaang iya no igei. Saapw tipaei rhag iya noa ittiw, pwe iiy minne efangetiw ngaang.

⁴³ Meeta oawse metefaaegini minne i iura reen? Faan ina pwe iga oawse mwerhaen rongorong ngaeni aaei fenai.

⁴⁴ Aaemi naiun miniwe semaemi, iwe Saetan, oawmwerhaen tapweei minna aeen mwerhaen minna semaemi. Saengi rhag rhaepetaen nge iiy rhoosan niy menaw nge esaen yor mwo faaen eew eno noan wenewen, pwe

iga esooar wenewen neetipan. IGINE epwe oatupwutupw, iwe nge efeeori minna fasiun aan feoffeoor, pwe iiy fasiun erhai man oatupwutupw, nge iiy minne semaaen oanongaen oatupwutupw.

45 Iwe nge iaengaenigaemi minna e wenewen, iwe ina faan minne oawse niugiuniug ngaeniaei reen.

46 Iyo erhai neemi ne epwe mmwenen pwaeritae pwe imonofit? Ngaere igine iaengaenigaemi minna e wenewen, iwe nge meeta oawse niugiuniug ngaeniaei reen?

47 Iyo na e itto me reen Deus ina e rongorong ngaeni minna mwaeniaen Deus. Iwe nge aaemi oawse itto me reen Deus, iwe ina faan minimwu oawse rongorong reen.”

Jesus me Abraham

48 Ra aeiineow Jesus pwe, “Ese nnet ngaenigemaem igiwe aeiura pwe een erhai re Samaria nge eyor mwuniaan woamw?”

49 Jesus a paniuwaeniir pwe, “Ngaang esooar mwuniaan wooai. Ngaang ioassoara manna Semaei, nge aaemi oawse oassoaraeyaei.

50 Ngaang ise giutteon aaei ssoar wooan oanongaai. Nge a yor erhai ina ekiukkiutta aaei ssoar nge ewenewen aan apwiung.

51 Ennetaen, ipwe aengaenigaemi minna wenewenen: erhai ne epwe tapweei aaei fenai nge esooar faaen eew ne epwe mae.”

52 Ra aengaeni pwe, “Igina aeiya oanongonniuwani giuneei pwe eyor mwuniaan woamw! Abraham emae noa nge profeta kkewe repwan mae noa, iwe nge een wo iura pwe erhai ne e tapweei oamw fenai nge esooar faaen eew ne epwe mae.

53 Manewe semmaem Abraham iwe a mae; nge een wo iura pwe wo taegias me mmwaen Abraham? Nge profeta kkewe mwo nge repwan mae noa. Wo niuwaennei pwe een iyo?”

54 Jesus a paniuwaeniir pwe, “Aere igine ngaang rhag ioassoaraeyaei wooan oanongaai, nge ssoar naan esoapw yor ipitan. Manna e oassoaraeyaei ina manna Semaei—ina iiy mwaaen we oaw iura pwe aaemi Deus.

55 Aaemi oawse fasiun giuneei, iwe nge ngaang igiuneei. Ngaere igine iaengaenigaemi pwe ise giuneei, ina nge ipwene oatupwugaemi. Iwe nge ngaang igiuneei, iwe nge itapweei minna mwaenian.

56 Manewe semmaemi Abraham a pwapwa reen aan epwe weri oaton aaei itto; a weri iwe nge a kker nee tipan.”

57 Ra aengaeni pwe, “Esaen toori mwo nimeig raeg raegimw nge wa iura pwe woweri Abraham?”

⁵⁸ Jesus a paniuwaeniir, “Ennetaen, ipwe aengaenigaemi minna wenewenen: wenimmwaen aan supw Abraham, ‘Ngaang ina Ngaang’.”

⁵⁹ Iwe ra pweipwog faai pwe repwe tera, iwe nge Jesus a mwoan saengiir nge a siusaengi *Temple* we.

9

Jesus e Aeffeta Noa Erhai Mwaaen Masparh

¹ Igiwe Jesus a feffaaeraeg noa nge a weri erhai mwaaen esupwuto nge eparh mesan.

² Rhooan kkayeo kkewe naiun ra aeiineow pwe, “Sinsei, monofitin iyo minne mwaaen efeeori pwe epwe wupwutiw nge eparh mesaen? Monofitin aere monofitin inan me seman?”

³ Jesus a paniuwaeniir, “Aan masparh saapw menaen aan monofit aere aar inan me seman. Eparh mesan pwe epwe pwaeri noa minna mamaawan aaen Deus engaang wooan.

⁴ Iga erhiuwen raaen sa feeori aaen engaang manna efangeto ngaang; akkarapto pwoong nge esooar ne epwe rhiuwen mmwenen engaang.

⁵ Iga erhiuwen no noan faeinaengiy nge ngaang minne seremaen faeinaengiy.”

⁶ Mwirin aan aepesa minnee nge Jesus a oattuffa tiw nee ppweon a tonaeni fengaenniy me ppweon we iwe a toafi ngaeni mesaen mwaaen we

⁷ iwe nge a aengaeni pwe, “Wonoa wa noa woraes noan rhaan na Siloam.” (Faaen itaen rhaan we nge “Fang”) Iwe mwaaen we a noa, a noa woraes, a sefaaeneto pwe a ffat noa mesan.

⁸ Rhooan no oaron me rhooa kkewe reweri aaen mwaaen we tingoar maaw fetaen rhag ammwenen ra aeiineo pwe, “Saapw ieei mwaaen we emooaton tingoar maaw fetaen rhag?”

⁹ Aemweoi re iura pwe, “Ooa, ina iiy,” Nge aemweoi ra iura pwe, “Aapw, saapw iiy; eweei rhag pwe iiy mwaaen we.”

Nge iiy mwaaen we a iura pwe, “Ngaang iiy mwaaen we.”

¹⁰ Ra aeiineow pwe, “Ifa wusun rhag nge a ffatenoa mesoamw?”

¹¹ Iiy mwaaen we a iura pwe, “Mwaaen we itan Jesus epwigi aekkaew ppweon a toafitae wooan mesaai, iwe a aengaeniaei pwe ipwe noa noan rhaan we Siloam pwe ipwe noa woraes. Iwe iya noa, nge igiwe rhag i woraes, nge a ffat noa mesaai.”

¹² Ra aeiineow pwe, “Ifa iiy?”

Nge a paniuwaeniir pwe, “Ngaang ise giuneei.”

Pharisees Kkewe ra Kiukkiutta Mwirin Aecchipwa we

¹³ Iwe ra pwingi noa mwaaen we eparh mwo mesan reer Pharisees kkewe.

¹⁴ Raaenin we Jesus efeeri ppweon kkewe pwe epwe aecchipwa ngaeni mwaaen masparh we nge eew Sabbath.

¹⁵ Iwe Pharisees kkewe ra pwan aeiineow mwaaen we wunuunun aan ffat noa mesan. Nge a aengaeniir pwe, “Etoafitae ppweon wooan mesaei; iya noa woraes iwe igina a ffat noa mesaei.”

¹⁶ Aaemweoi Pharisees kkewe ra iura pwe, “Mwaaen we efeeri minnee nge ese itto me reen Deus, pwe iiy ese tapweei oasoapwosoapwon Sabbath.”

Nge aaemweoi re iura pwe, “Nge epwe ifa wusun aen erhai mwaaen monofit epwe mmwenen aan feeri minikkei?” Iwe a yor giniginin nee fineer.

¹⁷ Nge Pharisees kkewe ra pwan aeiineow sefaaeny mwaaen we pwe, “Wo iura pwe iiy minne e aecchipwa oamw masparh—iwe meeta wopwe iura reen mmwenen?”

Mwaaen we a paniuwaeniir pwe, “Iiy erhai profeta.”

¹⁸ Mwaaen kkewe soamwooniir Jews rese mwerhaen repwe niugiuniug pwe mwaaen we e masparh mwo nge igina a pwan ffat noa mesan, toori igiwe ra faingiir rhoawe inan me seman,

¹⁹ nge ra aeiineeor pwe, “Naimi mwaaen een? Oawiura pwe esupwutiw nge eparh mesan; nge e ifa wusun rhag nge a ffat noa mesan?”

²⁰ Rhoawe inan me seman ra iura pwe, “Aeigiuneei pwe iiy naimaem, iwe nge aeigiuneei pwe esupw nge eparh mesan.

²¹ Iwe nge aeise giuneei eifa rhag wusun nge a ffat noa mesan, iwe nge aeise giuneei iyo eaeffeta noa mesan. Oawaeiineow, pwe imwu a reepiy, iwe imwu epwene mmwenen aesefaaeni aeiineo mwu aaemi!”

²² Rhoaa kkewe inan me seman re aepesa minnee pwe igiwe re mesagiiur rhoawe soamwoonin Jews, ikkiwe iir ra fasiun tipieew pwe erhai ne e iura pwe Jesus minne Kristus iwe nge repwe aerheei wow me noan wutteer Jews.

²³ Ina faaen miniwe inan me seman re iura pwe, “A reepiy, oawaeiineow!”

²⁴ Pharisees kkewe a oaruwowwaen aar faingi mwaaen we eparh mesan nge ra aengaeni pwe, “Wopwe aekkepan faaen mesaen Deus pwe wopwe aepesa minna e wenewen! Aeigiuneei pwe mwaaen e aecchipwoag nge erhai mwaaen monofit.”

²⁵ Mwaaen we a iura pwe, “Ngaang ise giuneei aere erhai mwaaen monofit aere saapw. Nge eew minne igiuneei: eparh mwo mesaei nge igina nge a ffat noa.”

26 Ra aeiineow pwe, “Meeta minne efeeori ngaeniug? Eifa wusun aan aeffeta noa mesoamw?”

27 A paniuwaeniir pwe, “Iya moannon aengaenigaemi, nge aaemi oawse aiussaening. Meeta faaen oawpwe pwan rongorong sefaaen ngaeni reen? Meeta, maeni faer aaemi mwo nge oaw mwerhaen pwe oawpwe no pwe naiun rhoan kkaye?”

28 Ra kkepas aenneew ngaeni nge ra aengaeni pwe, “Een mini naiun aeremas we rhoan kkaye; pwe aemaem nge naiun Moses rhoan kkayeo.

29 Aemaem aeigiuneei pwe Deus e mwaenieniy ngaeni Moses; nge mwaaen na, aeise giuneei mwo nge igine e itto me ee!”

30 Mwaaen we a paniuwaeniir pwe, “Aeina mwo amwaraeran minna! Oawse giuneei iya iga eitto me ee, nge iiy e aeffeta noa mesaei!

31 Sigiuneei pwe Deus ese aiussaening ngaeniir rhoa monofit; nge e aiussaening ngaeniir rhoakka re aesirowu iwe me refeori minikkena aan mwerhaen.

32 Saengi rhag rhaepetaen faeinaengiy nge esaaen yor mwo erhai ne sirongorong pwe e aeffeta noa perhaen mesaen erhai e esupwuto nge e fasiun parh.

33 Aere igine mwaaeneei ese itto me reen Deus, nge esoapw mmwen ngaeni mwo nge eew minikka efeeori.”

34 Ra paniuwaeni pwe, “Wosupw nge woffooan tae noan monofit – iwe nge wa menaen pwe wopwe itto fenaiugimaem?” Iwe rhag nge re aerheei wow me noan wutteer Jews we.

Perhaen Mesaen Ngeoniur

35 Igiwe Jesus a rongorong pwe ra aerheei wow mwaaen we me noan wutteer Jews we, enoa rhuungi mwaaen we nge a aeiineow pwe, “Wo niugiuniug ngaeni mwaaen na Naiun Aeremas?”

36 Mwaaen we a paniuwaeni pwe, “Menap, aengaeniaei mwaaen e iiy, ina nge ipwe niugiuniug ngaeni!”

37 Jesus a aengaeni pwe, “Wa fasiun weri, pwe iiy minne e mwaenieniy ngaeniug igina.”

38 Iwe mwaaen we a foatotiw me mmwaen Jesus nge a aengaeni pwe, “Ngaang iniugiuniug, Soamwoon!” iwe a foatotiw weni mmwaen Jesus.

39 Jesus a iura pwe, “Ngaang iittiw noan faeinaengiy pwe ipwe ittiw aettiweginiy wunuunuur aeremas, pwe rhoakka reparh repwe ffat noa, iwe nge rhoakka reffat repwe parh noa.”

⁴⁰ Aaemweoi Pharisees kkewe reno reen nge re rongorong aan aepesa minneei, nge ra aeineow pwe, “Woiura pwe aemaem mwo nge aeipwan masparh?”

⁴¹ Jesus a paniuwaeniir pwe, “Ngaere igine oawparh, ina nge oawse no noan monofit, nge igomwu oaw iura pwe oawfat ina nge aaemi oawno noan monofit.”

10

Fioang Awewen Rhooan Neginin Maan

¹ Jesus a iura pwe, “Ennetaen, ipwe aengaenigaemi minna wenewenen: mwaaen na ese toonong me noan aesemaen gurun *sheep* we pwe etonong me eew pwiuneoi, nge iiy erhai maan mwoarho me esooaw piraf.

² Aeremas na etonong me noan aesemaen gurun *sheep* we nge ina rhooan neginegin *sheep* kkewe. ³ Rhooan poosun guruwe epwe sugi ngaeni asam, nge iir *sheep* kkewe repwe rongorong mwaeniaen igine epwe faingi iteer nge a wummwuur wow niugiun.

⁴ Igiwe a paeniir wow, nge ina epwe gommw memmweer, nge *sheep* kkewe ra tapweei mwirin pwe iga ra aeginna mwaenian.

⁵ Esooar erhai ne repwe tapweei; pwe repwe faer fattapw saengi aeremas we, pwe iga rese aeginna ttigin mwaenian.”

⁶ Jesus a fioangei ngaeniir fioangon awewe eei, nge iir rese metefaaegini faan.

Jesus Minne Erhai Rhooan Neginin Kkewe e Mwamwaai

⁷ Jesus a pwan aengaeniir pwe, “Ennetaen, ipwe aengaenigaemi minna wenewenen, pwe ngaang minne aesemeer *sheep* kkewe.

⁸ Oanongeer rhoa kkewe regommwoto me mmwaei nge iir maan mwoarho me soaw piraf, pwe *sheep* kkewe rese rongorong mwaeniier.

⁹ Ngaang minne asam. Iyo kka re itto toonong me reei nge repwe menaw; repwe itto toonong nge retowow nge repwe rhurhu mwongo.

¹⁰ Maan mwoarho we ina e itto rhag pwe epwe mwoarho me nni me oatoaropa. Ngaang itto pwe aegin oawpwe menaw—ina menaw na oarosaen mwamwaai.

¹¹ “Ngaang rhooan neginegin *sheep* kkewe e mwamwaai, iwe i mwerhaen mae noa faaen iteer *sheep* kkewe.

¹² Mwaaen we refang paniuwan pwe rhoai neginegiir *sheep* kkewe, nge iir *sheep* kkewe nge saapw pwan naiun. Epwe weri rhag itton erhai *wolf* nge epwe fattapw saengiir *sheep* kkewe; iwe *wolf* we a itto niir nge re peraseras noa.

¹³ Mwaaen we refang rhag paniuwaen pwe rhoosan neginegin *sheep* kkewe, ina e fattapw noa pwe iga ese tepaar *sheep* kkewe pwe saapw naiun.

¹⁴⁻¹⁵ Ngaang rhoosan neginegin *sheep* kkewe e mwamwaa. Mwaaen na Semaai e giuneaai nge ngaang i giuneai mwaaen na Semaai, ina epwan ina wusun pwe ngaang i giuneer naeyi *sheep* nge *sheep* kka naeyi repwan giuneaai. Ngaang ipwe fangenoa menewaei faaen iteer.

¹⁶ Epwan no aekkaerhai *sheep* ikka naeyi iga re soano noan guru eei. Ipwan pwigiir to, nge iir repwe rongorong mwaeni-aei nge ra itto no pwe eew cchon *sheep*, nge erhai rhag rhoosai neginegiir.

¹⁷ “Mwaaen na Semaai e aerhaengiaai pwe iga imwerhaen fangenoa menewaei, pwe ipwe mmwenen pwan pwigi sefaaeny.

¹⁸ Esooar ne epwe pwigi saengiaai menewaei. Ngaang minne ipwe sipegin fangenoa. Eyor maemaewaei aaei ipwe sipegin fangenoa, nge eyor maemaewaei aaei ipwe pwan pwigi sefaaeny. Ieei minne mwaaen na Semaai e ammwir ngaeniaai pwe ipwe feeri.”

¹⁹ Iwe a pwan yor ginigin nepeteer aeremas pwe reen kkepas kkeei.

²⁰ Etowunap rhoakka reiura pwe, “Eyor mwuniaa woan! A mmang noa! Meeta oaw rhiuwen aiussaening ngaeni reen?”

²¹ Nge aekkaaemweoi reiura pwe, “Mwaaen eyor mwuniaa woan nge ese mmwen epwe ieen wusun mwaenian! Epwe ifa wusun aen mwuniaa aeffeta noa meseer rhoosai parh?”

Aar Oapwuta Jesus

²² A oaton nefaeng, nge a toori oaton gupwunon oatonongon *Temple* we me Jerusalem.

²³ Jesus e faaeraeg fetaen faaen pweranta we regaen iura pwe Pwerantaen Solomon me reen *Temple* we,

²⁴ iwe aeremas ra maeto reen ra aeineow pwe, “Epwe ifa ssiunaein oamw aeppaeti fetaenegemaem? Aengaenigemaem minna wenewenen: aere een minne Kristus?”

²⁵ Jesus a paniuwaeniir pwe, “Ngaang iya fasiun aengaeni-gaemi, nge aaemi oawse niugiuniug ngaeniaai. Minikka igaen feeri reen maemaewaan minna Semaai ina egaen pwaeritae mmwenei;

²⁶ nge aaemi oawse niugiuniug, pwe iga aaemi saapw aaemi naeyi *sheep*.

²⁷ *Sheep* kka naeyi re aiussaening ngaeni minikka mwaeni-aei; ngaang i giuneer nge iir re tapweaei.

28 Ingaenner menaw na esooar ssiaaenin nge esooar faaen eew ne repwe mae. Esooar erhai ne epwe mmwenen torofiir saengiaei.

29 Meeta na manna Semaiei engaaeneaei, ina etaegias saengi oanongaen aegiaeg, nge esooar erhai ne emmwenen epwe torofiir noa me noan paiun manna Semaiei.

30 Manna Semaiei me ngaang nge aei eew rhag.”

31 Iwe rhag nge aeremas ra pwan pweipwog faai pwe repwe tera.

32 Jesus a aengaeniir pwe, “Eigin ssow min mwamwaai kka iitto feori me weni mmwaemi iga manna Semaiei efang ngaeniaei pwe ipwe feori; ifa me neeiin minikkaan minne oawtipaeni pwe oawpwe terayaei reen?”

33 Ra iura pwe, “Aeise mwerhaen aeipwe teroag reen mini mwamwaai kka wofeori, pwe faer reen oamw fioang aenneewa Deus! Een rhag erhai aeremas nge wa itto feoriug noa pwe een Deus!”

34 Jesus a paniuwaeniir pwe, “Effoat noan oasoapwosoapw we aaemi pwe Deus e iura pwe, ‘Aaemi minikka deus.’

35 Sigiuneei pwe minna Pwapwior we e Santus e iura nge ennet nge esooar iaenin; iwe Deus e faingiir aeremas kenaan pwe iir deus, aeremas kenaan nge ikkina aeremas kkewe efang mwaenian ngaeniir.

36 Iwe nge ngaang, manna Semaiei minne e finiaei iwe a fangeto ngaang noan faeinaengiy. Iwe epwe ifa wusun rhag oawwa mmwenen iura pwe i fioang aenneewa Deus iga iura pwe ngaang Naiun Deus?

37 Aere ise feorin minikkena minna Semaiei e mwerhaen ipwe feori, iwe ina nge oawsoapw niugiuniug ngaeniaei.

38 Nge aere ifeorin, nge inamwo oawse niugiuniug ngaeniaei, ina nge engang kka aaai mwo nge oawpwe niugiuniug ngaeni, pwe aegin oawpwe giuneei gacchiuw pwe minna Semaiei eno reei nge ino reen minna Semaiei.”

39 Ra pwan aegina aar repwe torofi Jesus, nge ennus noa me noan paiiur.

40 Jesus a pwan sefaaen noa noan pwupwu we Jordan, pwiuneoi we e paptismus John me ee, iwe a noa no ee.

41 Retowunap aeremas ra itto reen, ra iura pwe, “John esooar aeginn ne egaen feori, iwe oanongaen minikka e aepesa pwe kkepessaen mwaaen een nge ennet.”

42 Iwe re towunap aeremas kkewe reno igiwe ra niugiuniug ngaeni.

¹ Erhai mwaaen itan Lazarus iwe eno Bethany a semwaa'i noa. Bethany itaen eew aepinoamw iwe Maria we pwiin Martha re nonno ee. (

² Ieen iiy Maria we e aekkitiw neoningas wooan pirheen Soamwoon nge a toafi noa chogin reen aennirhimwen; nge man semwaa'i we Lazarus nge mwengeyan.)

³ Rhooapwut pwipwi kkewe ra fangenoa eew kkepas reen Jesus nge re iura pwe, "Soamwoon, maereyaer aecchaeng we oamw iye a semwaa'i."

⁴ Igiwe Jesus a rongorong miniwe nge a iura pwe, "Amwiucchiunoan semwaa'i een nge saapw reen maenoan Lazarus; minnee'i nge a wen pwe epwe pwaeri noa minna nningen Deus, pwe ina nge mwaaen na Naiun Deus epwe yo ngaeni minna nningen."

⁵ Jesus e aerhaengi Martha me miniwe pwiin me Lazarus.

⁶ Igiwe e itto kkepas we reen Jesus pwe Lazarus a semwaa'i, iwe a pwan no aegini mwo riuraen.

⁷ Iwe a aengaeni rhoan kkaye'o kkewe naiun pwe, "Sa pwan sefaaen noa Judea."

⁸ Rhooan kkaye'o kkewe ra paniuwaeni pwe, "Sinsei, esaen ssiunaeni mwo aar aeremesaen iginaan menaen repwe teroag, nge wa pwan mwerhaen sefaaen noa?"

⁹ Jesus a iura pwe, "Eraen nge seig me ruwowu awa noan, aere? Iwe rhoakkena refaeraeg noan seremaen raen ina resoapw toroppiung, pwe ra weri minna seremaen faeinaengiy.

¹⁰ Iwe nge aere re faeraeg nee pwoong nge repwe toroppiung, pwe esoar seram."

¹¹ Jesus e aepesa miniwe nge a pwan iura pwe, "Lazarus we maereyaer'rh nge a maiur noa, ipwene noa pwe ipwe noa faingitae."

¹² Rhooan kkaye'o kkewe ra iura pwe, "Soamwoon, ngaere igine e maiur, nge iiy ina epwe cchipw sefaaen noa."

¹³ Jesus e aengaeniir pwe Lazarus a maenoa, nge iir re maengiy pwe e kkepesaen aan maiur.

¹⁴ Iwe Jesus a aeffeta ngaeniir pwe, "Lazarus a mae,

¹⁵ nge aegin aaemi minne egacch tipae'i iga ise no reen Lazarus, pwe aaemi oawpwe niugiuniug. Sa noa reen."

¹⁶ Thomas (iwe repwan gaen iura pwe Nippwei) a aengaeniir rhoa kkaye'o kkewe aaemweoi pwe, "Oawsa tapweei noa Sinsei pwe sipwe noa rhag mae nong wooan!"

Jesus Iiy Minne Menaw Sefaaen me Menaw

¹⁷ Igiwe enoa tooto Jesus a itto weri pwe a fapwoong mwirin aan nipwaenipw noa Lazarus.

18 Bethany nge ese yo mwo nge ruwowu *miles* saengi Jerusalem,

19 iwe nge re igin towunap re Judea rhooran itto emwaeriir Maria me Martha reen maen mwaaen we mwengeyeer.

20 Igiwe Martha a rongorong pwe Jesus a itto, a itiwow pwe a itiwow rhuungi, nge Maria eno rhag nee iimw.

21 Martha a aengaeni Jesus pwe, “Soamwoon, aere igine wono igei nge mwaaen e mwengeaei esoapw mae!”

22 Nge i giuneei pwe igina mwo nge Deus epwe ngaenneog ese tiwegin minne wo tingoareei.”

23 Jesus a aengaeni pwe, “Mwaaen mwu mwengeyoamw epwe menaw sefaaen tae.”

24 Rhoopwut we a iura pwe, “Ngaang i giuneei pwe woan minna oarosaen raaen nge epwe menaw sefaaen tae.”

25 Jesus a aengaeni pwe, “Ngaang minne menaw sefaaen me menaw. Iyo kka re niugiuniug ngaeniaei nge repwe menaw, inamwo igine ra mae noa;

26 iwe iyo kka remenaw nge re niugiuniug ngaeniaei nge esooar faaen eew ne repwe mae. Woniugiuniug ngaeni minnee?”

27 Rhoopwut we a iura pwe, “Ooa, Soamwoon! Ngaang i niugiuniug pwe een Kristus iwe Naiun Deus iwe epwe itto noan faeinaengiy.”

Jesus a Saeng

28 Mwirin aaen Martha aepesa minnee, a sefaaen a noa faingi mwoanomwoanei Maria we pwiin. A aengaeni pwe, “Sinsei a no igei, iwe nge e aekkaeyiyeg een.”

29 Igiwe Maria e rongorong miniwe, a iutae rhag nge a gucchuwow reen Jesus. (

30 Jesus esaaen toori mwo aepinoamw we, pwe erhiuwen no igiwe Martha erhuungi me ee.)

31 Rhoawe reno reen Maria noan iimw we ra pwan tapweei wow igiwe e iutae pwe epwene noa. Re niuwaennei pwe epwene noa reen paeyi we pwe epwe noa saeng me ee.

32 Maria enoa tooto igiwe Jesus eno ee, igiwe rhag eweri, nge efoatotiw me wenimmwan a aengaeni pwe, “Soamwoon, aere igine wo fasiun no igei nge mwaaen we mwengeaei esoapw mae!”

33 Jesus eweri aan saeng, me pwan aeremas kkewe repwan tapweeito aar pwan saeng; iwe a gin tiwto waeiraesiy nee tipan me aenneewaen nee rhiun.

34 A aeineeor pwe, “Iya iga oaw paeia me iya?”

Ra paniuwaeni pwe, “Soamwoon, itto wopwe noa weri.”

35 Jesus a saeng.

³⁶ Aeremas kkewe ra iura pwe, “Oawweri nepaen aan aerhaengi!”

³⁷ Aaemweoi ra iura pwe, “Iiy miniwe e aeffeta noa mesaen erhai masparh, aere? Esoapw mmwen aan epwe feeori pwe esoapw mae Lazarus?”

Jesus a Aemenewaetae Lazarus

³⁸ A pwan gin tiwto aenneewaen nee tipaen Jesus, igiwe a noa reen paeyi we, iwe eew ngat me peigin eew rhug, iwe eno eew fai temoag reen asaeman.

³⁹ Jesus a akkiuneeor pwe, “Peniy noa fai mwu!”

Martha iwe mwengeyaen mwaaen we a mae a iura pwe, “Soamwoon, epwene aenneew pwoon, pwe a fapwoong pwongin aan nipwaenipw noa!”

⁴⁰ Jesus aengaeni pwe, “Isaen aengaeniug pwe wopwe weri minna nningen Deus igine wo niugiuniug?”

⁴¹ Ra peniy noa fai we. Jesus a fattae naaeng nge a iura pwe, “Wa aerhigerhig Semaiei, reen oamw aiussaening mwaeniaei.

⁴² Igiuneei pwe wogaen aiussaening ngaeniaei rhag, nge iaepesa minneeii pwe aegiiir aeremas kka igeei, pwe repwe niugiuniug pwe een minne wofangeto ngaang.”

⁴³ Mwirin aan aepesa minneeii nge a kkepas temoag noa, “Lazarus, toowow!”

⁴⁴ A toowow, nge erhiuwen tiugiutiug noa rhag paiun me pirheen reen mengaag iwe epwan yor mengaag tiugiutiug ngaeni mesan. Jesus a aengaeniir pwe, “Oaw pwaeisi noa nge oawwa nigiti noa.”

Aar Rhiu Aenneewa Jesus

(Mat 26.1-5; Mark 14.1-2; Luke 22.1-2)

⁴⁵ Towuneppeer rhooawe reitto reen Maria ra weri meeta we Jesus efeeori, iwe ra niugiuniug ngaeni.

⁴⁶ Iwe nge aekkaerhai iir ra noa ngaeniir Pharisees kkewe iwe ra aengaeniir meeta kkewe Jesus efeeori.

⁴⁷ Iwe Pharisees me soamwooniir patere kkewe ra rhungaeni *council* we iwe ra iura pwe, “Meeta sipwene feeori? Oaw pipiiy oanongaen kkeman kka mwaaeneei a feeorin!”

⁴⁸ Ngaere igine sipwe nigiti noa rhag pwe epwe ieei wusun, oanongeer aeremas nge repwene niugiuniug ngaeni, nge manekka soamwoonin Rome repwe itto fereei noa *Temple* e aarh me minne faniuwarh!”

⁴⁹ Erhai me neeiir itan Caiaphas, iiy miniwe Soamwoonin Patere noan raeg we, a iura pwe, “A inamwo pwurhomi!”

⁵⁰ Oawse giuneei pwe egacch ngaenigaemi igine erhai emae noa faaen iteer rhooa towunap, mmwaen igine oanongeer aeremas repwe toaroporop noa?”

⁵¹ Ese tipan rhag wooan oanongan pwe epwe aepesa min-nee; pwe iga iiy miniwe Soamwoonin Patere noan raeg naan, iwe e aepesa pwe Jesus epwe mae noa faaen iteer re Jews,

⁵² nge saapw faaen iteer rhag, pwe pwan minni epwe oarhuur nong rhag noan eew tipieew oanongeer aeremas kka naiun Deus ikka re meganagan fetaen.

⁵³ Saengi raaenin we a noa, soamwooniir Jews kkewe ra feori noa aar niunniywaen pwe repwe niy noa Jesus.

⁵⁴ Iwe Jesus esa pwaeri noano aan faaeraeg fetaen me wooan Judea, iwe a noa reen eew pwiuneoi iwe eno oaron *desert* we, reen eew aepinoamw itan Ephraim, a noa no ee iiy me rhoan kkayeo kkewe naiun.

⁵⁵ Oaton gupwunon *Passover* we a arapeto, retowunap aeremesaen aepinoamw kkewe ra maegeto Jerusalem pwe repwe itto feori engaengaen aenimenimen weni mmwaen gupwun we.

⁵⁶ Ra kiukkiutta Jesus, nge igiwe ra rhu me noan *Temple* we ra aeiineo fengaen wooar pwe, “Meeta oaw maengiy? Ennetaen esoapw itto tapweei gupwun eei, aere?”

⁵⁷ Soamwoonin patere me Pharisees kkewe ra fasiun aeti-wenig ngaeniir aeremas pwe aere yor e eweri Jesus, nge a iura, pwe repwe noa torofi.

12

Ra Aepiti Jesus me Bethany (*Mat 26.6-13; Mark 14.3-9*)

¹ Wonowu raaen me wenimmwaen *Passover*, nge Jesus a noa Bethany, iwe pwugusaen Lazarus, mwaaen we e aemenewaetae me reen mae noa.

² Ra oamoannatae eew mwongoon faaef pwe aan, iwe Martha a tipaengiir reen feoriun; Lazarus iwe erhai mwaaen kkewe emooat reen Jesus reen *table* we.

³ Maria a pwigi eew neoningas eigin cchoaw paniuwaen a aekkitae wooan pirheen Jesus, iwe ooa toafi noa chogin pirheen reen aennirhimwen. Miniwe pwongesaen neowe a rheoi noa noan iimw we.

⁴ Erhai rhoan kkayeo kkewe naiun itan Judas Iscariot—mwaaen we epwe fangenoa tinnimaen—a iura pwe,

⁵ “Meeta rese chuwaiuw noa neoningas een reen eniup-wiugiuw *silver* iwe nge ra ngaenneer man affayeo minna senaapian?”

⁶ Eiura miniwe nge saapw iga e faayeeor man affayeo pwe iga iiy erhai man mwoarho. Iiy minne pweipwog tutuun senaapiy nge egaen piraf naiun senaapiy me reen.

⁷ Jesus a iura pwe, “Oawsoapw amwagiutiu, nigiti pwe epwe iseni meeta kkomwu aan pwe ammwennen raaenin na ipwe nipwaenipw noa reen.

⁸ Pwe rhooa affayeo repwe fasiun yor reemi oanongaen oat, nge ngaang isoapw no rhag reemi oanongaen oat.”

Ra Rhiu Aenneewa Lazarus

⁹ Re towunap aeremas ra rongorong pwe Jesus eno Bethany iwe ra noa igiwe, soapw pwonno rhag reen Jesus nge pwonno repwe pwan weri Lazarus, iwe Jesus e aemenewaetae me reen mae noa.

¹⁰ Iwe soamwoonin patere kkewe ra feeori noa aar niunni-uwaen pwe repwe pwan niyy noa Lazarus,

¹¹ pwonno reen Lazarus minne ra igin towunap Jews kka ra toangun saengiir ra noa niugiuniug ngaeni Jesus.

Toonongon Jesus Noan Jerusalem

(Mat 21.1-11; Mark 11.1-11; Luke 19.28-40)

¹² Mmasetaen iwe eraaen, eew pwuwa temoag a itto tapweei miniwe gupwunon *Passover* pwe ra rongorong pwe Jesus a itto noan Jerusalem.

¹³ Iwe ra pweipwog to paeneaei niu pwe repwene itiwow aewenimmwei Jesus, nge ra gaen aekkepwas pwe, “Aepingepinga Deus! Deus epwe aewenepwuwa aeremas na epwe itto faaen itaen Soamwoon! Deus epwe aewenepwuwa *king* na aar re Israel!”

¹⁴ Jesus enoa rhuungi erhai *donkey* a teeotae woan, taepen rhag miniwe Pwapwior we e Santus iwe e iura pwe,

¹⁵ “Wosoapw mesag, een aepinoamwon Zion!

Emwaeri, a itto *king* we noawumw, iye e waawa erhai *donkey* mwittig.”

¹⁶ Noan oatowe nge rhoaan kkayeo kkewe naiun rese metefaaegini miniwe; nge oatowe enoa menaw sefaaen Jesus a ittiw noan nningen nge ra naaen maengiy pwe ina miniwe Pwapwior we e Santus eiura reen, nge e ina wusun miniwe refeeri ngaeni.

¹⁷ Rhooa kkewe reno reen Jesus oatowe efaingiwow Lazarus me noan miniwe paeian nge a aemenewa sefaaeniy tae iwe ra aepesa fetaeneei miniwe a wen.

¹⁸ Ina faaen miniwe pwuwa we a itiwow rhungaeni pwe iga ra rongorong wunuunun kkeman we efeeori.

¹⁹ Iwe Pharisees kkewe ra iura fengaenniy woar pwe, “Oawwa weri pwe esooar mwo nge eew meeta ne emmweng ngaenigirh! Oawpipiiy, oanongaen faeinaengiy nge a tapweei!”

Aaemweoi Rhoan Greeks re Kiukkiutta Jesus

²⁰ Aaemweoi re Greeks reno neeiir rhooawe renoa Jerusalem repwe noa maeipin oaton gupwunon *Passover*.

²¹ Ra noa reen Philip (erhai re Bethsaida e nonno Galilee), iwe ra aengaeni pwe, “Menap, aei mwerhaen rhuungi Jesus.”

²² Philip a noa a aengaeni Andrew, iwe iir ra noa aengaeni Jesus.

²³ Jesus a paniuwaeniir pwe, “Awa we iye a itto igina pwe miniwe Naiun Aeremas epwene pwae noa minna nningen.

²⁴ Ennetaen, ipwe aengaenigaemi minna wenewenen: ngaere efai faiun *wheat* ese ppiungtiw nee ppweon nge a mae noa, nge epwe no rhag pwe efai faiun. Iwe ngaere epwe mae noa ina nge epwe towunap uwaan.

²⁵ Rhoakka re aerhaengi meneweer nge epwe ppiung saengiir, nge rhoakka rese aerhaengi meneweer me noan faeinaengiy ina epwe yo ngaeniir menaw na esooar iaenin.

²⁶ Iyo na e mwerhaen epwe engaang ngaeniaei epwe tapweaei, pwene naeyi rhoaan engaang epwe no reei iga ino ee. Iwe nge minna Semaiei epwe fang ssoar ngaeniir ikkina re engaang ngaeniaei.

Jesus a Fioangei Aan Mae Noa

²⁷ “Igina a waeiraes neetipaei —meeta ipwe iura? Ipwe iura pwe, ‘Semaiei, wosoapw aefengato oaton eei woai?’ Nge ina rhag ina faaen aaei itto, pwe ipwe toonong noan oaton affayeo eei.

²⁸ Semaiei, pwaeri noa nningen minna itoamw!”

Nge eew mangiungiu a ittiw naaeng, “Iya fasiun pwaeri noa nningen, nge ipwe rhiuwen feeori sefaaeniy.”

²⁹ Pwuwa we re iu igiwe re rongorong mangiungiu we, nge aaemweoi ra iura pwe pacch, aaemweoi re iura pwe, “Erhai angkenus minne e mwaenieniy ngaeni!”

³⁰ Iwe nge Jesus a aengaeniir pwe, “Saapw aegin ngaang minne mangiungiu naan ittiw me noan naaeng reen, pwe aegin aaemi.

³¹ Igina a itto oatowe faeinaengiy epwene apwiung; nge igina mwaaen e soamwoonin faeinaengiy epwene asiuw me wooan nenien.

³² Aere iya aetaegiasaetae saengi faeinaengiy, nge ipwene pwigiir to oanongeer aeremas reei.” (

³³ Noan aan aepesa minneei, nge a aepesa wunuunun mae na epwe aeni.)

³⁴ Pwuwa we a iura pwe, “Aemaem anniug e aengaenigemaem pwe Kristus epwe menaw foarhifoarh. Epwe ifa wusun oamw iura pwe mwaaen na Naiun Aeremas epwe aetaegiasaetae? Iyo iiy minne Naiun Aeremas?”

³⁵ Jesus a iura pwe, “Iiy seram we epwe no faeiyegeius fetaen mwo neemi. Oawsoapwei noa aaemi faaeraeg iga seram erhiuwen no reemi, pwe roorh ete gonaegaemi; pwe erhai ne efaaeraeg nee roorh nge esoapw giuneei igine efaaeraeg noa ee.

³⁶ Iwe oawpwe niugiuniug ngaeni seram naan, noan faei oaton aan no reemi, pwe aaemi oawpwe no pwe aeremesaen ne seram.”

Aar Aeremas Se Niugiuniug

Mwirin aaen Jesus aepesa minnee, a nigitir pwe a noa wop saengiir.

³⁷ Inamwo igiwe a feori oanongaen kkeman kkeei me weni mmweer, nge rese niugiuniug ngaeni,

³⁸ pwe aegin miniwe mwaeniaen profeta Isaiah epwe pwae noa iwe e iura pwe,

“Soamwoon, iyo eniugiuniug ngaeni kkepas we aeiya aepesa?

Nge iyo na Soamwoon e pwaeri ngaeni minna maemaewan?”

³⁹ Iwe rese mmwenen niugiuniug, pwe igiwe Isaiah epwan iura pwe,

⁴⁰ “Deus a aeperha noa meseer nge a oarorha noa noan tipeer, pwonno meseer ete weriwer nge nee tipeer ese metaf, nge resoapw toagun ngaeniaei, aaen kkepas Deus, nge ngaang ipwe aemaemaewaar tae.”

⁴¹ Isaiah e aepesa minnee pwe igiwe a weri minna nningen Jesus iwe a fioangei kkepasan.

⁴² Oateen mwo nge retowunap soamwooniir Jews ra niugiuniug ngaeni Jesus; nge pwonno reer Pharisees kkewe minne esoar minne re aepesa, pwe rete aerheer wow me noan wuttee Jews.

⁴³ Re aerhaengi pwe aeremas repwe aepingepingaar mmwaen aaen Deus epwe aepingepingaar.

Petenaen Mwaeniaen Jesus Minne Epwe Kapwiungiu Aeremas

⁴⁴ Jesus a kkepas temoag tae nge a iura pwe, “Iyo na eniugiuniug ngaeniaei nge ese niugiuniug ngaeniaei rhag, pwe pwan iyo na efangeto ngaang.

⁴⁵ Nge iyo na eweriaei nge epwan weri iyo na efangeto ngaang.

⁴⁶ Ngaang itto noan faeinaengiy pwe eew seram, pwe iyo na eniugiuniug ngaeniaei esoapw no noan rorhappiung.

⁴⁷ Rhoakka rerongorong mwaeniaei nge rese tapweei, isoapw apwiungiiur. Ngaang ise itto ipwe itto apwiungiu faeinaengiy, pwe itto pwe ipwe aemenewa.

⁴⁸ Iyo kena rese aetiwaeyaei nge rese aetiwa mwaeniaei nge eno erhai ina epwe itto apwiungiiur. Iir ina repwe

apwiung reen minikka petenaen mwaeniaei wooan minna oarosaen raaen!

⁴⁹ Wenewenen minikkeei, pwe saapw tipaei rhag wooan oanongaei, pwe mwaeniaen minna Semaiei ina efangeto ngaang, nge e ammwir ngaeniaei meeta ipwe iura me aepesa.

⁵⁰ Nge ngaang igiuneei, pwe oasoapwsoapw e aan epwe pwigito menaw na esooar iaenin. Iwe meeta iura nge ina minna manna Semaiei e aengeniaei pwe ipwe iura.”

13

Jesus e Toafi Pirheer Rhooan Kkayeo

¹ Igina nge a eraaen me weni mmwaen miniwe gupwunon *Passover*. Jesus a giuneei pwe a itto oaton aan epwene nigiti faeinaengiy pwe epwene noa reen miniwe Seman. Iiy e fasiun gin aerhaengiir rhooakka noan faeinaengiy ikka naiun, nge e aerhaengiir toori noa amwiucchiun aan menaw.

² Jesus me rhooan kkayeo kkewe naiun ra mwongoon faaef. Nge Saetan a fasiun iseni nong nee tipaen Judas, mwaaen we naiun Simon Iscariot, pwe epwe fangenoa tinnimaen Jesus.

³ Jesus e giuneei pwe mwaaen we Seman nge efang ngaeni oanongaen mamaaw; e giuneei pwe iiy e itto me reen Deus nge epwene sefaaen ngaeni Deus.

⁴ Iwe a iutae me reen *table* we, a iseni tiw mengaagiun niugiun, nge a geonitae eew toawun nugunupan.

⁵ Iwe a aekkinong rhaan noan eew saepiy nge a rhaepetae aan toafi pirheer rhooan kkayeo kkewe naiun, nge e aepaena ngaeni toawun we e geeogeeo nugunupan.

⁶ A itto reen Simon Peter, nge Peter a aengani pwe, “Soamwoon, wopwe toafi pirheei?”

⁷ Jesus a paniuwaeni pwe, “Igina wose metefaaegini minne ifeeri, nge faeiyegius noa nge wopwe naaen metaf.”

⁸ Peter a iura pwe, “Esooar faaen eew ne wopwe toafi pirheei!”

Jesus a aengani pwe, “Aere igine ise toafi pirhemw nge wosoapw nono pwe een naeyi rhooan kkayeo.”

⁹ Simon Peter a aengani pwe, “Soamwoon, ina nge saapw pirheei rhag minne wopwe toafi! Wopwe pwan toafi paeyi me rhimwei!”

¹⁰ Jesus a iura pwe, “Rhooakka ra tiutiu nge a nimegacch noa wooar, nge resoapw tiutiu no pwe pirheer rhag epwe tiutiu. Oanongaemi nge oawwa aenimenim—nge erhai rhag ese aenimenim.” (

¹¹ Jesus a fasiun giuneei iyo epwene fangenoa tinnimaen; ina faaen miniwe e iura pwe, “Oanongaemi nge oawwa aenimenim—nge erhai rhag ese aenimenim.”)

12 Wenimwirin aalen Jesus toafi pirheer, a iseni sefaalen tae minikkewe mengaagiun nge a noa mooat sefaalen tiw reen *table* we. A iura pwe, “Oaw metaf reen miniwe ifeori ngaenigaemi?”

13 Oawfaingi ngaeniaei pwe Sinsei me Soamwoon, nge efin pwe oawpwe ina wusun ngaeniaei, pwe iga ina minna ngaang.

14 Ngaang, aaemi Soamwoon me Sinsei, nge iya toafi pirhemi. Iwe nge aaemi oawpwan toafi pirheen erhai me erhai me neemi.

15 Iaweri ngaenigaemi minneen pwe oawpwe giuneei, pwe oawpwe feori wunuunun meeta we ifeori ngaenigaemi.

16 Ennetaen, ipwe aengaenigaemi minna wenewenen: esooar *slave* ne e taegias saengi aan maasta, nge esooar rhooran pweipwogin kkepas ne e taegias saengi iyo na e akkiuneo.

17 Iga oawwa giuneei minneei, ifa mwo aaemi kker igine oawpwene noa pomwoni!

18 “Ngaang ise kkepas reemi oanongaemi; i giuneer iyo kka i finiir. Iwe nge miniwe mwaeniaen Pwapwior we e Santus epwe pwae noa iwe e iura pwe, ‘Mwaaen we emwongo reei a appaniuwaeniaei.’

19 Igina iaengaenigaemi minneei wenimmwaen epwe wen, pwe epwe noa wen nge oawniugiuniug pwe, ‘Ngaang ina ngaang.’

20 Ennetaen, ipwe aengaenigaemi minna wenewenen: iyo e aetiwa iiy iwe iaefenga e aetiwaeyaei; nge iyo e aetiwaeyaei epwan aetiwa iyo na efangeto ngaang.”

*Jesus a Aepesa Wunuunun Aar Aefenganoa Tinnimaen
(Mat 26.20-25; Mark 14.17-21; Luke 22.21-23)*

21 Wenimwirin aalen Jesus aepesa minneei a igin cchoaw neetipan iwe a iura pwe, “Ennetaen, ipwe aengaenigaemi minna wenewenen, pwe erhai me neemi epwene fangenoa tinnimaei.”

22 Rhooran kkayeo kkewe ra wegitaeg fengaan woar pwe resa metaf reen miniwe e iura.

23 Erhai me neeiir rhooran kkayeo kkewe, mwaaen we Jesus eigin aerhaengi, iwe emooat oaron Jesus.

24 Simon Peter a cchimw ngaeni nge a iura pwe, “Aeiineow ngaere iyo mwu e iyaekkepesa?”

25 Iwe rhooran kkayeo we e aeppwaenaeg ngaeni Jesus nge a aeiineow pwe, “Soamwoon, iyo na?”

26 Jesus a panuwaeni pwe, “Teei ipwene rhirinong fenoawa een nge iya ngaenneei; nge ina manna iiy.” Iwe a rhirinong fenoawa we nge ngaenneei Judas we naiun Simon Iscariot.

27 Igiwe rhag Judas epwigi fenoawa we nge Saetan a toonong noan pwunnon. Jesus a aengaeni pwe, “Mwetekkaei, wonoa feeori minna wopwe feeori!”

28 Esooar erhai neeiir rhoowe oaron *table* we ne emetefaaegini faaen miniwe Jesus e aengaeni.

29 Iwe nge pwonno igiwe Judas miniwe rhoan pweip-wogin tutuun senaapiy, aaemweoi rhoan kkayeo kkewe reniuwaennei pwe Jesus e aengaeni pwe epwe noa a noa chuwaituw aemwetaen gupwun we, aere ngaenneer rhooa affayeo eew aegiaeg.

30 Judas epwigi rhag fenoawa we nge a noa. A neepwoong miniwe.

Anniug Ffeo we

31 Mwirin aaen Judas noa nge Jesus a iura pwe, “Igina epwene pwae noa nningen mwaaen we Naiun Aeremas; nge minna nningen Deus ina epwene pwae noa pwe aegin iiy.

32 Iwe ngaere minna nningen Deus epwaetae me reen, iwe Deus wooan oanongan epwe pwan pwaeritae nningen mwaaen we Naiun Aeremas, nge epwe feeori igina rhag.

33 Aaemi naeyi, a egius mmwaai rhag nge ipwene nigit-igaemi. Oawpwene giuttayaei; iwe nge igina ipwene aengaenigaemi miniwe iaengaeniir soamwoonin Jews, ‘Oawsoapw mmwenen noa iga ipwene noa ee.’

34 Iwe igina ipwene ngaennegaemi eew anniug ffeo: oawaerhaengi fengaennigaemi. Taeppen rhag aaei aerhaengigaemi, iwe aaemi oawpwe aerhaengi fengaenni-gaemi.

35 Aere igine oawaerhaengi fengaennigaemi, ina nge oanongeer aeremas repwe giuneei pwe aaemi minikkewe naeyi rhoan kkayeo.”

Jesus e Aepesa Aaen Peter Iura pwe Ese Giuneei (*Mat 26.31-35; Mark 14.27-31; Luke 22.31-34*)

36 Simon Peter a aeiiineow pwe, “Soamwoon, wopwene noa iya?” Jesus a aengaeni pwe, “Wosoapw mmwenen tapweaei noa igina ngaang ipwe noa ee, epwe mwirin noa nge oawp-wapw tapweto mwiriy.”

37 Peter a aeiiineow pwe, “Soamwoon, meeta isoapw mmwenen tapweog noa iginaan reen? Ngaang iya moannotae pwe ipwe mae noa faaen itoamw!”

38 Jesus a paniuwaeni pwe, “Wa moannotae pwe wopwe mae noa faaen itaei? Ennetaen, ipwe aengaeniug minna wenewenen, pwe weni mmwaen aan epwe keokkeok maniug nge epwe faaen enuw oamw iura pwe wose giuneei.”

14

Jesus Minne Ennap Ngaeni Minna Seman

¹ Jesus a aengaeniir pwe, “Oawsoapw aiuraeg. Oawniugiuniug ngaeni Deus nge oawpwan niugiuniug ngaeniaei.

² Egin towunap neny me noan iimw na imwaen manna Semaiei, nge ipwene noa oamoannatae neniemi me ee. Aere ese nnet minnee nge isoapw aengaenigaemi.

³ Epwe weni mwirin aaei noa oamoannatae minna neniemi, nge iya sefaaen pwe ipwe itto pwigigaemi, pwe oawpwe noano pwiuneoi na ngaang ino ee.

⁴ Oaw giuneei ennap na epwe noa reen pwiuneoi na ipwe noa ee.”

⁵ Thomas a aengaeni pwe, “Aemaem aeise giuneei igomwu wopwe noa ee; iwe epwe ifa wusun nge aeipwe giuneei minna ennepan?”

⁶ Jesus a paniuwaeni pwe, “Ngaang minne ennap me ennet me menaw; esoar ne enoa reen minna Semaiei igine ese sefaaen me reei.

⁷ Igina iga oawwa giuneei, oawpwene pwan giuneei manna Semaiei, iwe saengi igina a noa, oawwa giuneei iwe me oawwa weri iiy iyo.”

⁸ Philip a aengaeni pwe, “Pwaeri ngaenigemaem manna Semoamw, ina rhag aemaem mwerhaen.”

⁹ Jesus a iura pwe, “A igin ssiunaei aaei no reemi oanongaemi; iwe nge een Philip wosaen pwan giuneei mwo? Mane a weriaei nge ina nge a pwan weri manna Semaiei, nge meeta wo iura pwe, ‘Pwaerito remaem manna Semoamw’?”

¹⁰ Wosaen niugiuniug mwo pwe ngaang ino reen manna Semaiei nge manna Semaiei eno reei? Petenaen kkepas kkewe iaengaenigaemi nge ese itto me reei. Pwe manna Semaiei ina eno reei, ina efeeri aan engaang.

¹¹ Oawniugiuniug ngaeniaei reen ikka iaepesa pwe ngaang ino reen manna Semaiei nge manna Semaiei eno reei. Ngaere oawse niugiuniug ngaeni ina, ina nge oawniugiuniug ngaeni minikkewe ifeeri.

¹² Ennetaen, ipwe aengaenigaemi minna wenewenen: iyo kena re niugiuniug ngaeniaei ina repwe feeri minikkena ifeeri—ooa, epwe faer tettemoag minikka iir repwe feeri pwe, iga ngaang ipwene noa reen manna Semaiei.

¹³ Nge ese tiwegin meeta kka oawpwe tingoar faaen itaei nge ipwe feeri, pwonno nningen Semaiei epwe pwae noa me reen minna Naiun.

¹⁴ Ina ngaere oaw tingoar pwe ipwe feeri eew meeta, nge ipwe feeri.

Ppwon Reen Espritu Santus

15 “Aere oawaerhaengiaei, oawpwe tapweei oasoapwosoapw kka aaei.

16 Ipwe tingoareei manna Semaiei, nge ina epwe ngaen-negaemi erhai pwe Rhooan Tipaengigaemi, nge epwe no reemi e esooar iaenin.

17 Ina manna Espritu, ina epwe pwaeri minikkenae wenewen pwe wunuunun Deus. Aeremesaen faeinaengiy ese mmwen epwe aetiwa, pwe iga ese weri me iga ese giuneei. Iwe nge aaemi oawgiuneei, pwe iga eno reemi nge eno neemi.

18 “Aere ipwene noa, nge esoapw aaemi noa rhag; pwe ipwe sefaaen to reemi.

19 A egius rhag nge faeinaengiy esoapw rhiuwen weriaei no, nge aaemi oawpwe weriaei; pwe iga ngaang i menaw iwe aaemi oawpwan menaw.

20 Epwe noa itto raaenin naan, oawpwene giuneei pwe ngaang ino reen manna Semaiei nge aaemi oawno reei, taep-pen rhag iga ngaang ino reemi.

21 “Rhooakka eno oasoapwosoapw e aaei reer nge retapweei, ikkina rhooakkena reaerhaengiaei. Semaiei eaerhaengiir rhooakkena reaerhaengiaei; ngaang ipwan aerhaengiir nge ipwe pwan pwae ngaeniir.”

22 Judas (saapw Judas we Iscariot) a iura pwe, “Soamwoon, epwe ifa wusun oamw wopwe pwae ngaenigemaem nge wosoapw pwae ngaeni faeinaengiy?”

23 Jesus a aengaeni pwe, “Rhooakka reaerhaengiaei nge repwe tapweei aaei fenai. Semaiei epwe aerhaengiir, nge Semaiei me ngaang aeipwe itto aeiya itto no reer.

24 Rhooakkena rese aerhaengiaei ina resoapw tapweei aaei fenai. Iwe fenai kkewe oawwa rongorong ikkina saapw aaei, pwe e itto me reen manna Semaiei iwe efangeto ngaang.

25 “Iaengaenigaemi minikkee i iga i rhiuwen no reemi.

26 Manna Rhooan Tipaengigaemi, ina Espritu Santus ina manna Semaiei efangeto faaen itaei, pwe epwe itto kapwiung ngaenigaemi oanongaen meeta, pwe oawpwe maengiy oanongaen meeta kkewe iya aengaenigaemi.

27 “Oapoas minne iya nigitiw reemi; ina oapoas na aaei ina iya ngaennegaemi. Niffang na aaei ina esoapw weei niffang na aeen faeinaengiy. Oawsoapw aiuraeg nge oawsoapw mesag.

28 Oawwa rongorong aaei aengaenigaemi pwe, ‘Ipwene noa, nge ipwe sefaaeneto reemi.’ Aere oawaerhaengiaei nge oawpwe kker iga ipwene noa reen manna Semaiei; pwe iiy e taegias saengiaei.

²⁹ Igina iya aengaenigaemi minikkeei weni mmwaen epwe wen, pwe igine epwene wen, iwe nge oawpwe niugiuniug.

³⁰ Esoapw ssiunaei aaei kkepas ngaenigaemi, pwe manewe soamwoonin faeinaengiy epwene itto. Esooar maemaewan wooai,

³¹ pwe faeinaengiy epwe giuneei pwe ngaang iaerhaengi manna Semaiei; ina faaen minne ifeeri oanongan meeta kka e iura pwe ipwe feeri.

“Oaw itto, oawsa siusaengi pwiuneoi eei.

15

Jesus Minne Aeggaen Waniwan we

¹ “Ngaang minne oanongonniuwaen aeggaen *grape* we, nge manna Semaiei minne rhooan foat. ² E gopiy noa oanongaen rae kka eno wooai ikka esooar uwaan, nge a maeneti ikkina e uwwa pwe epwe towunap wow uwaan.

³ Iwe aaemi oawwa fasiun fin reen fenai kkewe iya aengaenigaemi.

⁴ Oawpwe no rhag reei nge ngaang ipwe pwan no rhag reemi. Ese mmwen eew rae epwe uwa aere epwe iiy noa rhag; nge epwe uwa aere epparh ngaeni miniwe rhaepin. Epwan ina rhag wusumi pwe oawsoapw uwa igine oawsoano reei.

⁵ “Ngaang minne *grapevine* we, iwe nge aaemi raaen. Iyo kka reno reei nge ngaang ino reer, epwe igin towunap uwaar; pwe esooar meeta oawpwe feeri igine i soano reemi.

⁶ Rhooakka re soanotiw reei nge repwe taeppen raaen irae kka e aekkaerh wow a noa ppwass noa; rae kena ina regaen ioni fengaenniy ra aerheei tae wooan aengaet pwe repwe ppwun noa.

⁷ Aere oawno reei nge minikka petenaen mwaeniaei eno reemi, ina nge ese tiwegin minne oawtingoar nge epwe yo ngaenigaemi.

⁸ Nningen manna Semaiei ina epwe pwae noa igine a igin ssow uwaemi; iwe epwe ieei wusun aaemi oawpwene no pwe naeyi rhooan kkayeo.

⁹ Ngaang iaerhaengigaemi eweei rhag aaen minna Semaiei aerhaengiaei; oawno rhag noan aerhaengerhaeng e aaei.

¹⁰ Aere oaw tapweei oasoapwosoapw kka aaei oawpwe no rhag noan aaei aerhaengerhaeng, taeppei rhag aaei tapweei rhag aaen manna Semaiei oasoapwosoapw iwe iye ino rhag noan aan aerhaengerhaeng.

¹¹ “Iya aengaenigaemi minikkeei pwe epwe kker nee tipaemi, iwe nge kker na aaemi epwe wunus.

12 Ieen minne aaei oasoapwosoapw ngaenigaemi: oawaerhaengi fengaennigaemi, taeppen rhag aaei aerhaengigaemi.

13 Aerhaengerhaeng na eoarosaen taegias ina oawpwe fang ngaeniir maereyaeremi ina oawpwe fang noa me-newaemi pwe faan ngaeniir.

14 Aaemi maereyaerei igine oawfeori meeta kka iakkiuneogaemi.

15 Isa faingigaemi no pwe *slave*, pwe *slave* rese giuneei meeta aar maasta efeori; iya faingigaemi pwe aaemi maereyaerei, pwe iga iya aengaenigaemi oanongaen minikka i rongorong me reen manna Semaai.

16 Oawse finiaei; ngaang i finigaemi nge iya akkiuneogaemi pwe oawpwe noa pwe epwe gin noa ssow noa uwaemi, taeppen uwa kena esoapw meoyiur noa. Iwe manna Semaai epwe ngaennegaemi ese tiwegin meeta oawtingoar faaen itaei.

17 Iwe ieen oasoapwosoapw we iaengaenigaemi: oaw aerhaengi fengaennigaemi.

Kkoapwut we Aaen Faenaengiy

18 “Aere igine faenaengiy e oapwutaegaemi, nge oawpwe maengiy rhag pwe ngaang minne epwe mwaaen oapwutaeyaei.

19 Aere aaemi naiun faenaengiy, ina nge faenaengiy epwe aerhaengigaemi pwe iga aaemi naiun. Nge ngaang i finigaemi me noan faenaengiy, iwe aaemi soapw naiun faenaengiy; ina faaen minne faenaengiy e oapwutaegaemi reen.

20 Oawmaengiy rhag miniwe iaengaenigaemi: ‘Esooar *slave* ne etaegias saengi aan maasta.’ Aere aeremas reaewwaeiraesiaei iwe ina nge repwe pwan aewwaeirae-sigaemi; aere retapweei fenai kka aaei iwe ina nge repwe pwan tapweei fenai kka aaemi.

21 Repwe feori ngaenigaemi oanongaen minikkeei pwe iga aaemi naeyi; pwe iga rese giuneei iyo na efangeto ngaang.

22 Aere ise itto mwaenieniy ngaeniir nge ina resoapw monofit; iwe igina esooar no minne repwe rhiuwen tipi ngaeni reen aar monofit.

23 Iyo na e oapwutaeyaei epwan oapwuta manna Semaai.

24 Resoapw monofit aere ise feori me neeiir meeta kkewe aeremas resaaen feori mwo; nge igina iga iya feori nge ra weri meeta kkewe ifeori, iwe ra oapwutaeyaei noa me manna Semaai.

²⁵ Minneen e fasiun ffeeor to pwe minni epwe pwae noa meeta we e foatofaot noan aar anniug pwe ennet: ‘Ra oapwutaeyaei ne esooar faan.’

²⁶ “Manewe Rhooan Tipaengiaemi ina epwe itto—Espritu ina epwe pwaeritae minikkaena ewenewen pwe wunuunun Deus nge iiy e itto me reen manna Semaiei. Ipwe ne fangeto iiy reemi saengi manna Semaiei, iwe nge iiy epwe aepesa wunuunuy.

²⁷ Iwe aaemi mwo nge oawpwe aepesa wunuunuy, pwe igiwe oawno reei saengi rhag rhaepetaen.

16

¹ “Iya aengaenigaemi minneei pwe ete ppiung noa aaemi niugiuniug.

² Repwe asiugaemi wow me noan wutteer Jews, nge epwe noa gona oatona nge rhoakkena reninnigaemi ina iir repwene niuwaennei pwe ra feori eew engaang kkena aaen Deus.

³ Aeremas repwe feori minikkeei pwe iga rese weri manna Semaiei aere ngaang.

⁴ Iwe nge iya fasiun aengaenigaemi minneei, pwe epwe noa itto oatona repwe noa feori ngaenigaemi iwe nge emaeng ngaenigaemi minikka iya aengaenigaemi.

Aaen Engaang Espritu Santus

“Ise aengaenigaemi minikkeei rhaepetaen pwe igiwe irhiuwen no reemi.

⁵ Iwe nge igina ipwe ne noa reen iyo na efangeto ngaang, iwe nge erhai mwo me neemi nge ese aeineo iya ipwe noa ee.

⁶ Nge igina iga iya aengaenigaemi, iwe ina oawpwene nee tip cchoaw noa.

⁷ Nge iaengaenigaemi minna wenewenen: pwe efaer mwamwaa i gine ipwe nigitigaemi, pwe ngaere ise noa nge manewe Rhooan Tipaengigaemi esoapw itto reemi. Iwe nge ngaere i gine inoa, ina nge ipwe noa fangeto reemi.

⁸ Nge oatonoa epwe noa itto, ina epwe pwaeri ngaeniir aeremesaen faeinaengiy pwe rerug reen wunuunun monofit iwe me wunuunun minikka epwiung iwe me wunuunun aaen apwiung Deus.

⁹ Rerug reen monofit, pwe iga rese niugiuniug ngaeniaei;

¹⁰ rerug reen wunuunun minikka epwiung, pwe iga ngaang ipwe ne noa reen manna Semaiei iwe nge oawsoapw rhiuwen weriaei no;

¹¹ iwe nge rerug reen wunuunun apwiung, pwe iga manna soamwoonin faeinaengiy nge a fasiun no noan aegaeregaer.

12 “Erhiuwen gin towunap minikka ipwe aengaenigaemi, iwe nge ina rhag maeni epwene igin cchoaw pwut ngaeni-gaemi.

13 Iwe ngaere epwe noa itto Espritu ina nge epwaeritae minikka e wenewen pwe wunuunun Deus, iwe nge epwe aeiti ngaenigaemi oanongaen minikkena ennet. Soapw mwae-nian wooan oanongan minikka epwe aepesa, pwe epwe aepesa meeta kena erongorong, nge epwan aepesa meeta kka epwan itto.

14 Epwene ngaenneaei nning, pwe epwene pwigi minikka iaepesa iwe nge a itiwow aengaenigaemi.

15 Oanongaen minikka aaen manna Semaiei nge aaei; iwe ina faaen minne iura pwe Espritu epwe pwigi meeta iaepesa nge a aengaenigaemi.

Nee Tip Cchoaw me Kker

16 “A faeiyegeius rhag nge oawsoapw weriaei no, nge epwe pwan faeiyegeius noa nge oawpwene weriaei.”

17 Aekkaerhai me neeiir rhooran kkayeo kkewe ra aeineo fengaen woar, “Iwe meeta faaen minnee? Eiura pwe a faeiyegeius rhag nge sisoapw weri no, nge epwe pwan faeiyegeius noa nge sa pwene weri; iwe nge epwan iura pwe, ‘Pwe iga ipwene noa reen manna Semaiei.’

18 Iwe nge meeta faaen minne, ‘a faeiyegeius rhag’? Sise giuneei faaen meeta kka e iukkiura!”

19 Jesus e giuneei meeta kkewe re mwerhaen aeineow, iwe a aengaeniir pwe, “Iaengaenigaemi pwe, ‘A faeiyegeius rhag nge oawsoapw weriaei no, nge epwe pwan faeiyegeius noa nge oawwa weriaei.’ Ieen miniwe oaw aekkaeyiineo fengaen woami?”

20 Ennetaen, ipwe aengaenigaemi minna wenewenen: oawpwe saeng nge aenneew noa neetipaemi, iwe nge faeinaengiy epwene gacch tipan; aaemi oawpwene cchoaw neetipaemi, iwe nge aaemi neetip cchoaw epwe ssiuwen ngaeni kker.

21 Igin epwe timenaw erhai rhoopwut, a igin neetip cchoaw reen aan affaye; iwe nge oatona enoa supw aetewe a maniuwegi noa aan affaye pwe a igin kker, pwe a supwuto erhai wonigaet noan faeinaengiy.

22 E ieei pwan wunuunumi: igina oawwa neetip cchoaw, iwe nge ipwan weri sefaenigaemi rhag, nge minikkena neetipaemi epwene pwan igin kker, esoar erhai ne epwe mmwenen pwigi saengigaemi.

²³ “Epwe noa itto raaennenaan, esooar minne oawpwe aei-ineowaei. Ennetaen, ipwe aengaenigaemi minna wenewenen: manna Semaiei epwe ngaennegaemi ese tiwegin meeta oawaeiineo faaen itaei.

²⁴ Toorito igina, esaaen yor meeta ne oawtingoar faaen itaei; oawtingoar nge epwe yo ngaenigaemi, pwe epwe wunus noa aaemi kker.

Jesus a Apwiungiu Faenaengiy

²⁵ “Iya gaen aengaenigaemi minikkaan noan fioangon awewe. Iwe nge epwe noa itto eew oat ina isoapw rhiuwen fioang awewe ngaenigaemi no, ipwene aeffeta noa aaei kkepas ngaenigaemi reen mmwenen minna Semaiei.

²⁶ Epwe noa itto raaennenaan, nge oawpwe tingoar ngaeni faaen itaei; nge ngaang ise iura pwe ipwe tingoar ngaeni reen mmwenemi,

²⁷ pwe iiy mwo manna Semaiei nge eaerhaengigaemi. Eaerhaengigaemi pwe iga oawaerhaengiaei, iwe nge oaw niugiuniug pwe ngaang itto me reen Deus.

²⁸ Ngaang itto me reen Deus, iwe iya itto noan faenaengiy; iwe igina ipwene nigiti faenaengiy iwe nge iya sefaaen noa reen manna Semaiei.”

²⁹ Rhoan kkayeo kkewe naiun ra aengaeni pwe, “Igina nge a ffat mwaenioamw, inamwo ikka wose aeyae fioangon awewe.

³⁰ Igina aeigiuneei pwe wogiuneei oanongaen aegiaeg; esooar ipitaen aar aeremas kkepas aekkaeyiyeg ngaeniug. Reen minneeii minne aeiya niugiuniug pwe een woitto me reen Deus.”

³¹ Jesus a paniuwaeniir pwe, “Oawwa niugiuniug igina?”

³² A itto oatowe iye a no igeei, oatowe erhai me erhai aaemi epwene mwetoar, erhai nge enoa nee pwugusan, nge ngaang oawpwene nigitiaei tiw. Nge esoapw ngaang noa rhag, pwe manna Semaiei iye eno reei.

³³ Iya aengaenigaemi minneeii pwe oawpwe nonoan oapoas reen aaemi rhu ngaeniaei. Faenaengiy epwe affayeogaemi. Oawaemenetaegaemi! Pwe ngaang iya appiungiu faenaengiy!”

17

Jesus a Maeipinaar Rhoan Kkayeo Kkewe Naiun

¹ Weniwirin aaen Jesus oamoanna noa minneeii nge a fannoa naaeng nge a iura pwe, “Semaiei, a tooto oatowe. Fang ngaeni mwaaen we Noawumw nningen, pwe aegin mwaaen na Noawumw epwe fang ngaeniug nningen.

² Pwe een wa ngaenneei mamaaw pwe epwe aeni noa wooar oanongeer aeremas, pwe aegin epwe fang ngaeniir aeremas kena wo ngaenneei menaw na esooar iaenin.

³ Nge wewen menaw na esooar iaenin ina repwe giuneog, pwe een rhag minne oanongonniywaen Deus, nge repwe pwan giuneei Jesus Kristus iwe wo fangetiw.

⁴ Iya pwaeri noa nningeomw me wooan feoniufan; nge iya oamoanna noa engaang we wo ngaenneaei.

⁵ Semaai, igina fang ngaeniaei nningei me faaen mesoamw, taepfen rhag nning we i aeni me reemw weni mmwaen aan ffeor faeinaengiy.

⁶ “Iya pwaeri itoamw ngaeniir iyo kkewe wa ngaenneaei me noan faeinaengiy. Iir noawumw, nge wa fangeto reei pwe naeyi. Re tapweei mwaenioamw,

⁷ iwe igina ra giuneei pwe oanongaen minikkewe wofang ngaeniaei nge e itto me reemw.

⁸ Iya fang ngaeniir kkepas we wo ngaenneaei, iwe nge iir ra pwigi; ra giuneei pwe ennet pwe ngaang itto me reemw, iwe nge re niugiuniug pwe een minne wo aefengaeyaei to.

⁹ “Ngaang i maeipinaar. Ngaang ise maeipina faeinaengiy pwe imaeipinaar rhoawe wofang ngaeniaei, pwe iir noawumw.

¹⁰ Oanongaen minikka aaei nge oamw, nge oanongaen minikka oamw nge aaei; nge a pwae noa nningei me reer.

¹¹ Iwe igina iya itto reemw; ngaang isoapw nono noan faeinaengiy, iwe nge iir repwe no noan faeinaengiy. Semaai ina esantus, aefaenniir reen kkemenaen minna itoamw, itiwe wo ngaenneaei, pwe aegin pwe repwe eew rhag, taepfen iga een me ngaang si eew rhag.

¹² Igiwe ino reer, nge iaemmwenaar faaen kkemenaen minna itoamw, itiwe wo ngaenneaei. I aefaenniir nge erhai mwo me neeiir nge ese mwaenirh noa, pwe aeggaen mwaaen we rhag e fasiun itto pwe epwe mwaenirh noa – pwe epwe nnet noa miniwe noan Pwapwior we e Santus.

¹³ Iwe igina iya itto reemw, iwe nge i aepesa minikkei me noan faeinaengiy pwe repwe iseni kker na aaei reer.

¹⁴ Iya fang ngaeniir kkepas we oamw, iwe nge faeinaengiy a oapwutaar, pwe iga iir saapw naiun faeinaengiy, taepfen rhag iye saapw ngaang naiun faeinaengiy.

¹⁵ Ngaang ise tingoareog pwe wopwe pwigiir wow me noan faeinaengiy, pwe ifaer tingoareog pwe wopwe aefaenniir me reen Man Aenneew we.

¹⁶ Taepfen rhag iga ngaang saapw naiun faeinaengiy, iwe iir saapw naiun faeinaengiy.

¹⁷ Aeyimweoiiur wow reemw noan wenewen; mwae-nioamw nge e wenewen.

18 Iya fang wow iir noan faeinaengiy, taeppen een igiwe wofang to ngaang noan faeinaengiy.

19 Pwonno reer minne iya aeyimweoi wow oanongaei reemw, pwe pwonno iir repwe pwan fang wow oanongeer reemw noan wenewen.

20 “Ngaang ise maeipinaar rhag, pwe ipwan maeipinaar iyo kena re niugiuniug ngaeniaei pwe reen petenaen minikken mwaenieer.

21 Semaiei, i maeipin pwe iir repwe eew rhag, nge iir repwe no reerh, taeppen rhag iga wono reei nge ngaang ino reemw, pwe iir repwe eew rhag, pwe ina nge faeinaengiy epwe niugiuniug pwe een wofang to ngaang.

22 Ngaang iya fang ngaeniir nning we wo ngaenneaei, pwe aegin iir repwe eew, taeppen rhag iga een me ngaang si eew rhag:

23 ngaang ino reer, iwe nge een wono reei, pwe aegin iir repwe oanongonniuwaen eew rhag, pwe aegin faeinaengiy epwe giuneei pwe een minne wofangeto ngaang, iwe een wo aerhaengiir taeppen rhag oamw aerhaengiaei.

24 “Semaiei, wa ngaenneaei to iir reei, nge ngaang imwerhaen repwe no reei iga ino ee, pwe repwe weri minna nningei, nning we wofang ngaeniaei; pwe een wo fasiun aerhaengiaei to rhag me wenimmwan aan epwe feor noa faeinaengiy.

25 Semaiei we wo oanongonniuwaen ennet, faeinaengiy ese giuneog, iwe nge ngaang i giuneog, nge rhooa eei re giuneei pwe een minne wofangeto ngaang.

26 Ngaang iya pwaeri itoamw ngaeniir, nge ipwan sesoapwei noa rhag, pwe aegin aerhaengerhaeng na oamw ngaeniaei epwe no reer, ina nge ngaang ipwan no reer.”

18

Ra Torofi Jesus

(Mat 26.47-56; Mark 14.43-50; Luke 22.47-53)

1 Wenimwirin aalen Jesus aeni maeipin eei, iwe iiy me rhoan kkayeo kkewe naiun ra noa reen rhan pwupwu we Kidron. Eno eew maat pwiuneoi we, iwe Jesus me rhoan kkayeo kkewe naiun ra noa ee.

2 Rhoan a fang tinnimae we Judas e giuneei pwiuneoi we, pwe a gin towunap aalen Jesus me rhoan kkayeo kkewe naiun renoa rhu me ee.

3 Iwe Judas a noa noan maat we, iiy me cchon sonotaweer Rome kkewe, iwe me aemweoi poosun *Temple* we, aefengayeer soamwoonin patere me Pharisees kkewe; re itto fengaen me nimeer me oappwun me tiun.

⁴ Jesus efasiun giuneei oanongaen meeta epwene wen ngaeni, iwe a faaeraeg ngaeniir nge a aeiineeor pwe, “Iyo mwu oawkiukkiutta?”

⁵ Ra iura pwe, “Jesus re Nazareth.”

Nge a iura pwe, “Ngaang ieei.”

Rhooan a fang tinnimae we Judas e iugiu reer.

⁶ Oatowe Jesus e aengaeniir pwe, “Ngaang ieei,” nge ra mer sefaaen iwe ra ppiungtiw wooan ppweon.

⁷ Jesus a pwan aeiineeor pwe, “Iyo mwu oawkiukkiutta?”

Ra iura pwe, “Jesus re Nazareth.”

⁸ Jesus a iura pwe, “Iya moannon aengaenigaemi pwe ngaang iiy. Iwe ngaere ngaang minne oawkiukkiuttayaei, ina nge oawpwe nigitiir noa ikka aaemweoi.” (

⁹ Jesus eaepesa minnee pwe menaen kkepas we e aengaeniir epwe pwae noa: “Sema ei, esooar mwo erhai me neeiir rhoowe wongaenneaei ne e mwaenirh saengiaei.”)

¹⁰ Simon Peter, iwe epwigi epeo saeitan, ewaeititae rhag a gopiy noa peig mwaaenen saeningaen erhai rhoon akki-uneo kkewe naiun Soamwoonin Patere we. Itaen rhoon akkiuneo we nge Malchus.

¹¹ Jesus a aengaeni Peter pwe, “Iseni noa saeitan mwu noawumw! Woniwaennei pwe isoapw iuniumi kkepaen affayeo mwu manna Sema ei efang ngaeniaei?”

Jesus me Weni Mmwaen Annas

¹² Iwe sonotawaen Rome kkewe me soamwoon kkewe aar fengaen me poos kkewe aar Jews ra torofi Jesus iwe ra geoni noa,

¹³ iwe ra pwigi noa reen Annas. Iiy minne semaen rhoon ngaenne aaen Caiaphas, iwe iiy minne Soamwoonin Patere noan raegin we.

¹⁴ Caiaphas minne e aengaeniir soamwoonin Jews kkewe pwe egacch igine erhai aeremas epwe mae noa faaen iteer rhoa towunap.

Peter e Iura pwe Ese Giuneei Jesus

(Mat 26.69-70; Mark 14.66-68; Luke 22.55-57)

¹⁵ Simon Peter me erhai rhoon kkayeo kkewe re tettapw noa weni mwirin Jesus. Iiy rhoon kkayeo we erhai iwe efasiun gin me reen Soamwoonin Patere we, iwe a tapweei noa Jesus niugiun wororaen iimw we imwaen Soamwoonin Patere we,

¹⁶ iwe nge Peter iwe e iu rhag reen aese maen iimw we. Iwe rhoon kkayeo we erhai a sefaaen wow niugiun a noa itiwow kkepas ngaeni rhoopwut we reen wororaen iimw we, iwe a noa paeni nong Peter.

¹⁷ Rhooapwut we reen aesemaen iimw we a aengaeni pwe, “Saapw pwan een erhai rhooran kkayeo kkewe rhoaniuwaen mwaaen naan?”

Peter a iura pwe, “Aapw, saapw ngaang.”

¹⁸ Epatapat noan oatowe, iwe rhooran akkiuneo kkewe me poos kkewe ra sonitae eew aengaet iwe ra iu roangoroangei noa pwe re aepwerhikkeraar. Iwe Peter a faaeraeg noa reer iwe a noa aepwerhikkera oanongan.

Manewe Soamwoonin Patere a Kkepas Aeiyege Ngaeni Jesus (Mat 26.59-66; Mark 14.55-64; Luke 22.66-71)

¹⁹ Soamwoonin Patere we a aeiyegeiy Jesus wunuunun rhooran kkayeo kkewe naiun me fenai kkewe aan.

²⁰ Jesus a iura pwe, “Oanongaen aaei mwaenieniy ngaeniir rhoa towunap; me aaei fenai nge isooaw no rhag noan wutteer Jews kkewe me *Temple* we, pwiuneoi we oanongeer aeremas regaen itto aemmweoiu ee. Esooar faaen eew ne i mwaenieniy nge i mwaenieniy noan mwoanomwoan.

²¹ Iwe ina nge meeta faan oawwa aeineowaei reen? Aeiineeor rhoawe re aiussaening ngaeniaei. Aeiineeor meeta we i aengaeniir—iir re giuneei meeta kkewe i aepesa.”

²² Oatowe Jesus e aepesa minnee, nge erhai me neeiir poos kkewe a pigiri nge a aengaeni pwe, “Meeta e ina wusun oamw kkepas ngaeni man mwu Soamwoonin Patere reen!?”

²³ Jesus a aengaeni pwe, “Aere eyor eew min mwaerhei ne iaepesa nge wa aengaeniir rhoa eei minne iiy. Iwe ngaere epwiung minne iaepesa, iwe nge meeta faaen oamw peosepaeyaei?”

²⁴ Iwe Annas a fangenoa iiy reen Caiaphas Soamwoonin Patere we, nge e rhiuwen geeogeeo noa rhag.

Peter a Pwan Iura Sefaaeniy pwe Ese Giuneei Jesus (Mat 26.71-75; Mark 14.69-72; Luke 22.58-62)

²⁵ Peter iwe erhiuwen iu igiwe pwe eapwerhikkera oanongan. Iwe ra aengaeni pwe, “Saapw pwan een erhai rhooran kkayeo kkewe naiun mwaaen naan?”

Iwe Peter a iura pwe, “Saapw ngaang.”

²⁶ Erhai me neeiir *slave* kkewe naiun Soamwoonin Patere we, iwe re pwugusaen mwaaen we Peter egopiy noa saeningan, a iura pwe, “Pwe ise weriug me reen noan maat we?”

²⁷ Iwe Peter a pwan iura pwe, “Saapw ngaang.” Iwe rhag nge e keokkeok noa maniug we.

Jesus me Weni Mmwaen Pilate

(Mat 27.1-2, 11-14; Mark 15.1-5; Luke 23.1-5)

²⁸ Nee oatosor moawugowug rhag nge ra pwiigi Jesus me reen imwaen Caiaphas iwe ra pwiigi noa reen imwaen *governor*. Soamwooniir re Jew kkewe rese toonong noan imwaen *governor*, pwe rete nimaenneew noa nge epwe yo aar repwe mwongo mwongoon *Passover* we.

²⁹ Iwe Pilate a toowow niugiun a itiwow aeiineeor pwe, “Meeta minne oaw oamonofituy aeremas een wooan?”

³⁰ Ra paniuwaeni pwe, “Aeisoapw pwigito reemw igine esooar eew min aenneew ne efeeri.”

³¹ Pilate a aengaeniir pwe, “Iwe ina nge aaemi oawpwiigi iwe oawwa noa apwiungiu reen aaemi anniug.”

Ra paniuwaeni pwe, “Esooar aemaem mamaaw pwe aeipwe niy noa erhai.” (

³² A wen minneei pwe epwe pwaetae miniwe mwaeniaen Jesus igiwe e aemmetefa wunuunun mae na epwe aeni.)

³³ Pilate a sefaaen nong noan iimw we imwan nge a faingi Jesus. A aeiineow pwe, “Een minne aar *king* re Jews?”

³⁴ Jesus a iura pwe, “Kkepas aeiyege na e itto me reemw, aere aaemweoi minne re aengaeniug mmwenei?”

³⁵ Pilate a iura pwe, “Wo niuwaennei pwe ngaang erhai re Jew? Sipegin noawumw aeremas me soamwoonin patere kkomwun minikkomwu re pwiigiug to reei. Meeta wa feeri?”

³⁶ Jesus a iura pwe, “Minna Mweoiuy ina ese itto me reen faeinaengiy; pwe ngaere minna Mweoiuy eitto me reen faeinaengiy, nge rhoakkena rhoaniuwaei repwe moawun faaen itaei pwe ete mmwenen aar iseniaei nong noan paiiur soamwoonin Jews. Aapw, minna Mweoiuy ese no igeei!”

³⁷ Iwe Pilate a aeiineow pwe, “Iwe een erhai *king*?”

Jesus a paniuwaeni pwe, “Een minne wo iura pwe ngaang erhai *king*. Faaen aaei supw me aaei noa itto noan faeinaengiy ina faaen ngaeni rhag eew aegiaeg, ipwe itto aepesa minna wenewen. Ese tiwegin iyo na etipaeni wenewen, nge epwe rongorong ngaeniaei.”

³⁸ Pilate a aeiineow pwe, “Iwe meeta minna wenewen?”

Ra Aettiweginiy Aaen Jesus Mae Noa

(*Mat 27.15-31; Mark 15.6-20; Luke 23.13-25*)

Pilate a sefaaen wow reer rhoawe niugiun nge a aengaeniir pwe, “Esooar meeta iweri pwe teren mwaaen een.”

³⁹ Nge eew kkomi, iwe ngaang igaen fasiun aessaenetaegiy erhai rhoaan kanepwus noan gupwunon *Passover*. Oawmwerhaen ipwe saeneti ngaenigaemi mane aar *king* Jews?”

⁴⁰ Ra paniuwaeni reen aar aekkepwas tae, “Aapw, saapw iiy! Aeitipaeni Barabbas!” (Barabbas iwe erhai rhoa mwoarho.)

19

¹ Iwe Pilate a pwigi noa Jesus ra noa woawuti.

² Sonotaw ra fiti eew mwaer saengi irae towfanfan nge ra ngaettae wooan rhimwen; iwe ra pwigi eew mengaag siungiurhoan enaenaiei pwe mengaagiun ³ nge ra itto reen nge ra iura pwe, “Sirow woamw, Kingaen Jews!” Nge regaen faaeraeg ngaeni nge re pigiri sepan.

⁴ Pilate a pwan sefaaen nge a pwan aengaeni pwuwa we pwe, “Oawpipiyy, ipwene paeni wow reemi pwe oawpwe weri pwe ngaang esooar meeta ne iweri pwe teren mwaaen een.”

⁵ Iwe Jesus a toowow nasam nge e mwaermwaer irae towfanfan we nge e memmengaag mengaag siungiurhoan enaenaiei we. Pilate a aengaeniir pwe, “Ieen iyy mwaaen we!”

⁶ Oatowe soamwooniir patere kkewe me soamwoonin *Temple* we reweri nge ra aepwesaegini pwe, “Kurusuw noa! Kurusuw noa!”

Pilate a aengaeniir pwe, “Oawpwigi aaemi pwe oawpwe noa kurusuw noa. Ngaang esooar minne iweri pwe teren mwaaen een.”

⁷ Pwuwa we a pwan paniuwaeni pwe, “Eyor aemaem oa-soapwosoapw nge e iura pwe epwe mae, pwe iga e iura pwe iyy Naiun Deus.”

⁸ Oatowe Pilate a rongorong miniwe, a kkaein noa aan mesag.

⁹ A pwan sefaaen nong noan iimw we imwan a pwan aeiineow Jesus pwe, “Wo itto me iya?”

Jesus ese paniuwaeni.

¹⁰ Pilate a aengaeni pwe, “Wose mwerhaen mwaenieniy ngaeniaiei? Maengiy pwe ngaang minne eyor maemaewaei pwe ipwe saenetiug noa aere ipwe kurusug noa.”

¹¹ Jesus a paniuwaeni pwe, “Eyor rhag maemaewoamw wooai pwe iga Deus engaenneog. Ina minne aeremas we efang noa menewaei ngaeniug ina epwe igin temoag monofit na aan.”

¹² Igiwe Pilate a rongorong miniwe, a giutta epwe ifa wusun aan saeneti noa Jesus. Iwe nge pwuwa we a pwan aekkepwas aegini pwe, “Aere igine wosaeneti noa nge saapw een maereyaeren Soamwoonin Rome we! Erhai ne e iura pwe iyy *king* nge ina nge a appaniuwaeni minna soamwoonin Rome!”

¹³ Igiwe Pilate a rongorong petenaen kkepas kkewe iwe a paeni wow Jesus nasam iwe a mooat tiw wooan miniwe nenien soaw apwiung iwe regaen iura pwe “Taeyif”. (Iwe nge noan kkepesaen Hebrew nge “Gabbatha”).)

14 A aerepa nugunupaen oanowas noan raaenin we weni mmwaen *Passover*. Pilate a aengaeniir aeremas kkewe pwe, “Iteen iiy *king* we naimi!”

15 Nge iir ra aekkepwas pwe, “Niiy noa! Niiy noa! Kurusuw noa!”

Pilate a aeineeor pwe, “Oaw mwerhaen ipwe kurusuw noa *king* e aaemi?”

Soamwooniir patere kkewe ra iura pwe, “Esooar aemaem *king* pwe Soamwoonin Rome rhag!”

16 Iwe Pilate a ateeow nong Jesus noan paiiur pwe repwene noa kurus noa.

A Kurus Noa Jesus

(*Mat 27.32-44; Mark 15.21-32; Luke 23.26-43*)

Iwe rhoawe ra pwigi noa Jesus.

17 E itiwow a aiufera kurus we aan a itto reen eew pwiuneoi itan “Nenien Peopeoi rhimw”. (Noan Hebrew nge “Golgotha”.)

18 Pwiuneoi we ra kurus noa me ee; nge repwan kurusuur noa riiurhai mwaaen, erhai iir nge eno me epeig, iwe nge Jesus eno nepeteer.

19 Pilate a foatogi eew pwapwior nge a iseni tae woan kurus we. E iura pwe, “Jesus aen Nazareth, iiy minne *Kingaen* Jews.”

20 Re igin towunap rhoan aeraegi pwapwior we, pwe iga pwiuneoi we Jesus ekurus noa me ee nge ese taaw saengi aepinoamw. Pwapwior we nge e foatfoat noa Hebrew, Latin me Greek.

21 Man kkewe soamwooniir patere ra aengaeni Pilate pwe, “Wosoapw foatogi pwe ‘king reer Jews’, pwe wopwe faer foatogi pwe ‘Mwaaen een e iura pwe, Ngaang minne *king* reer Jews.”

22 Pilate a aengaeniir pwe, “Minne iya foatogi nge ina minna epwe foat.”

23 Weni mwirin aar sonotaw kkewe kurusuw noa Jesus, ra pwigi minikkewe mengaagiun iwe ra itto giniy woar faaen faawu, erhai sonotaw nge epeo. Ra pwan pwigi mengaag enaenaeni we, iwe effeoor saengi epeo mengaag nge esooar oarhurhun teteen.

24 Sonotaw kkewe ra iura fengaenniy pwe, “Sisoapw fereei; sipwe aekkaerh *dice* iyo ne epwe pwigi.” A wen minnee pwe epwe nnet miniwe Pwapwior we e Santus, iwe e iura pwe:

“Re inetiy minikka mengaagiuy woar nge re aekkaerh *dice* reen mengaag enaenaeni we mengaagiuy.”

Iwe nge ina miniwe sonotaw kkewe refeeri.

²⁵ Rhooakka re igin iu arap ngaeni miniwe kurusun Jesus, nge manewe inan, manewe pwiin inan, Maria we pwiuni-
uwaen Clopas, me Maria Magdalene.

²⁶ Jesus a weri miniwe inan me rhooan kkayeo we naiun
iwe e igin aerhaengi pwe re iu; a aengaeni miniwe inan pwe,
“Ina iiy mwaaen we noawumw.”

²⁷ Iwe nge a aengaeni rhooan kkayeo we pwe, “Ina iiy
minimwu inoamw.” Iwe saengi oatowe a noa, rhooan kkayeo
we a pwiigi niewe pwe epwe noa no reen noan iimw we
imwan.

Maenoan Jesus

(Mat 27.45-56; Mark 15.33-41; Luke 23.44-49)

²⁸ Jesus a giuneei pwe oanongaen meeta nge a moann; pwe
epwe nnet miniwe eno noan Pwapwior we eSantus, nge a
iura pwe, “Ngaang iya moar.”

²⁹ Eew saepiy eno pwiuneoi we ne esseogiun *wine* kkewe
emwaenn; ra rhirinong eew faerewa noan, ra ngaettae
woan efoarh raaen *hyssop*, ra seigi tae reen ewan.

³⁰ Jesus a iuniumi *wine* we nge a iura pwe, “A moann!”

Jesus a aiuneorhimw tiw rhag nge a fangetae ngeoniun.

Ra Towuuw Wenepeigin Jesus

³¹ Iwe man kkewe soamwooniir Jews ra tingoareei Pilate
pwe epwe fang ngaeniir pwe repwe gopiy pirheer mwaaen
kkewe rekurusuur noa, iwe me repwe aetiweer tiw me
woan kurus kkewe. Retingoar miniwe pwe igiwe a aeni-
mowu, nge rese mwerhaen pwe rhooa kkewe repwe no rhag
woan kurus woan Sabbath, pwe igiwe Sabbath we epwe
itto nge e igin ssoar.

³² Iwe sonotaw kkewe ra noa gopiy pirheen mwaaen we
erhai, iwe me pwan iwe erhai, iwe rekurusuur noa reen
Jesus.

³³ Nge igiwe re itto reen Jesus, ra weri pwe a fasiun mae, iwe
resa gopiy no pirheen.

³⁴ Iwe nge erhai me neeiir sonotaw kkewe a pwiigi wopwaei
we a towuuw ngaeni wenepeigin Jesus, iwe a pwupwu noa
ccha me rhaan. (

³⁵ Aeremas na eweri minnee a fioangei fetaenei pwe
oawpwe niugiuniug. Miniwe e aepesa nge e wenewen, nge iiy
e giuneei pwe e aepesa minna e wenewen.)

³⁶ A wen minnee pwe epwe nnet miniwe noan Pwapwior
we eSantus, iwe eiura pwe, “Eew mwo rhiun nge reswapw
gopiy.”

³⁷ Nge epwan yor eew miniwe noan Pwapwior we
eSantus iwe eiura pwe, “Aeremas ra oawruru mwaaen
we re towuuw.”

*Paeyinoan Jesus**(Mat 27.57-61; Mark 15.42-47; Luke 23.50-56)*

³⁸ Mwirin minnee nge Joseph, erhai re Arimathea, a aeineow Pilate aere epwe mmwenen pwi miniwe oanongaen Jesus. (Joseph iwe erhai naiun Jesus rhoan kkayeo, nge ese aekkefaet fetaen, pwe e mesagiur soamwoon kkewe aar Jews.) Pilate a aengaeni pwe epwe mmwenen pwi oanong we. Iwe Joseph a noa pwi oanong we.

³⁹ Nicodemus, iwe egommwaei noa sengaeri Jesus neepwoong, a tapweei noa Joseph iwe nge epwi epwiugi uw poawunon waningas tonaaen *myrrh* me *aloes* pwe angesan.

⁴⁰ Iwe mwaaen kkewe riiurhai ra pwi oanong we, iwe ra tiugiumi noa noan mengaag pwerhepwerh fengaen me waningas kkewe, e tapweei wunuunun kkoor Jews reen aar nipwaenipw.

⁴¹ Yor eew maat pwiuneoi we re kurusuw Jesus me ee, iwe nge eno paeyi ffeo esaaen yor mwo mane enipwaeni nong noan.

⁴² Ra iseni nong rhag miniwe oanongaen Jesus igiwe pwonno igiwe a eraen rhag me weni mmwaen Sabbath, iwe me igiwe paeyi we e arap.

20*Paeyi we Epeo**(Mat 28.1-8; Mark 16.1-8; Luke 24.1-12)*

¹ Neo oatosora ei Sunday, igiwe erhiuwen pwoong, nge Maria Magdalene a noa reen paeyi we, iwe nge a noa weri pwe fai we tittin aesemaen paeyi we a mwagiut saengi miniwe nenien.

² A fattapw noa reen Simon Peter me rhoan kkayeo we erhai, mwaaen we Jesus eigin aerhaengi, nge a aengaeniir pwe, "Ra pwi noa Soamwoon me noan paeyi we, nge aeise giuneei igine ra pwi noa ee!"

³ Iwe Peter me rhoan kkayeo we erhai ra noa reen paeyi we.

⁴ Iir me riiurhai nge refattapw ppag noa, nge rhoan kkayeo we erhai enang me mmwaen Peter, iwe a gommwonoa gona paeyi we.

⁵ A pwoar tiw iwe a weri mengaag pwerhepwerh kkewe, iwe nge ese teogach nong noan paeyi we.

⁶ Simon Peter epwan mwiriy to, eitto rhag itto teo foar nong noan paeyi we. A weri mengaag pwerhepwerh kkewe pwe ewon

⁷ fengaen me mengaag we geegeeon rhimwen Jesus. Ese rhunong neeiin mengaag kkewe aaemweoi pwe iiy e oawunnu noa rhag.

⁸ Nge iwe rhooran kkayeo we erhai, iwe egommwaen gonoa paeyi we, iiy a pwan toonong; a weri iwe a niugiuniug. (

⁹ Resaaen metefaaegini mwo reen miniwe eno noan Pwapwior we e Santus iwe e iura pwe iiy epwe menaw saengi mae noa.)

¹⁰ Iwe rhag nge rhooran kkayeo kkewe ra pwan sefaaen noa nee pwuguseer.

Jesus a Pwae Ngaeni Maria Magdalene

(Mat 28.9-10; Mark 16.9-11)

¹¹ Maria erhiuwen iu saeng niugiun paeyi we. Igiwe erhiuwen sessaeng, a pwoar tiw pwe a fan nong noan paeyi we

¹² iwe a weriir riiurhai angkenus re mengaag pwerh ffat noa rhag, remooat igiwe eno miniwe oanongaen Jesus ee, erhai emooat reen rhimwen nge erhai reen pirheen.

¹³ Ra aeiineow pwe, “Rhoopwut mwuun, meeta wosaeng reen?”

A paniuwaeniir pwe, “Ra pwigi noa aaei Soamwoon nge ise giuneei igine ra pwigi noa ee!”

¹⁴ Enoa toagun sefaaen nge a weri Jesus pwe e iu igiwe; nge ese giuneei pwe Jesus.

¹⁵ Jesus a aeiineow pwe, “Rhoopwut mwuun, meeta wosaeng reen? Iyo mwo wo kiukkiutta?”

Niewe e niuwaennei pwe rhooran maat we, iwe a aengaeni pwe, “Menap, ngaere wa pwigi noa iwe nge wopwe aengae-niaei igine wonoa iseni noa ee, pwe ipwe noa iya noa pwigi.”

¹⁶ Jesus a aengaeni pwe, “Maria!”

Niewe a toagun ngaeni nge a iura noan kkepessaen Hebrew pwe “Rabboni!” (Faan nge “Sinsei”.)

¹⁷ Jesus a aengaeni pwe, “Wosoapw kkemwarh tae wooai, pwe ngaang isaaen ittae mwo reen miniwe Semaai. Iwe nge wopwe sefaaen noa reer rhoowe pwiiy nge wa aengaeniir pwe ngaang ipwene sefaaen noa reen miniwe Semaai me Semeer, aaei Deus me aar Deus.”

¹⁸ Maria Magdalene a noa aengaeniir rhooran kkayeo kkewe pwe a weri Soamwoon, nge a pwan aengaeniir meeta we Soamwoon e aengaeni.

Jesus a Pwae Ngaeniir Rhooran Kkayeo Kkewe Naiun

(Mat 28.16-20; Mark 16.14-18; Luke 24.36-49)

¹⁹ A nee oatofaaef noan iiy Sunday we, nge rhooran kkayeo kkewe ra mweoiu fengaen, iwe ra noakkei noa asam pwe igiwe re mesagiir Soamwoonin Jews kkewe. Jesus a itto iunoa neeiir, nge a iura pwe, “Oapoas epwe no reemi.”

²⁰ Mwirin aan aepesa minnee nge a pwaeri ngaeniir noan paiun me miniwe wenepeigin. Rhooan kkayeo kkewe ra igin kker tae igiwe ra weri Soamwoon.

²¹ Jesus a pwan aengaeniir pwe, “Oapoas epwe no reemi. Taeppen Semaiei a fangeto ngaang, iwe ngaang iya fangenoa aaemi.”

²² Iwe Jesus a nngastiw wooar iwe nge a aengaeniir pwe, “Epwe no Espritu Santus woami.

²³ Aere oawsaeneti monofitiir aeremas nge epwe saene-taeg; nge aere oawse saeneti nge esoapw saenetaeg.”

Jesus me Thomas

²⁴ Erhai me neeiir rhooa kkayeo kkewe seig me riiurhai itan Thomas (iwe regaen iura Nippwei), e soano reer reen oatowe Jesus e itto.

²⁵ Rhooan kkayeo kkewe aaemweoi ra aengaeni pwe, “Aeiya weri Soamwoon!”

Thomas aengaeniir pwe, “Aekkaen igine iweri nepeyin kinaesen chiufan kkewe noan paiun nge iya aetinong aiuttiuy noan ginesaen paiun me tugunong noan ginas we wenepeigin, iwe nge ipwe naaen niugiuniug.”

²⁶ Enoa eew *week* me mwirin, rhoon kkayeo kkewe ra pwan rhu fengaen me nee iimw, iwe nge Thomas a no reer. Asam kkewe nge e noak, iwe nge Jesus e itto a itto iunoa neeiir nge a aengaeniir pwe, “Oapoas epwe no reemi.”

²⁷ Nge a aengaeni Thomas pwe, “Aeiti nong aiuttiumw iga, iwe wa pipiiy minikka paeyi; iwe nge wa aeitito poawumw pwe wopwe tugunong noan minne wenepeigi. Wone iugiu noa mwo me oamw se niugiuniug, iwe wone niugiuniug!”

²⁸ Thomas a paniuwaeni pwe, “Aaei Soamwoon nge aaei Deus!”

²⁹ Jesus a aengaeni pwe, “Woniugiuniug rhag iga woweriaei? Ifa mwo aar kker rhoakka re niugiuniug nge rese weriaei!”

Ipitan Pwapwior Ieen

³⁰ Egin towunap kkeman kka Jesus a feori weni mmweer rhoon kkayeo kkewe naiun ikka ese foat noan pwapwior eei.

³¹ Iwe nge ikkeei a foatotiw pwe aegin pwe oawpwe niugiuniug pwe Jesus minne Kristus, Naiun Deus, iwe nge noan aaemi niugiuniug ngaeni oawpwe weri menaw.

21

Jesus a Pwae Ngaeniir Rhooan Kkayeo Kkewe Fiusiومان

¹ Weni mwirin minnee nge Jesus a pwan pwae ngaeniir rhoan kkayeo kkewe naiun reen meoneoiniun we Tiberias. E ieen wusun aan pwae ngaeniir.

² Simon Peter, Thomas (iwe regaen iura pwe Nippwei), Nathanael (erhai re Cana me noan Galilee), mwaaen kkewe naiun Zebedee, iwe me riiurhai rhoan kkayeo kkewe naiun Jesus re sseoiu fengaen.

³ Simon Peter a aengaeniir ikkiwe aaemweoi pwe, "Ipwene noa fita."

Rhooa kkewe ra aengaeni pwe, "Aemaem aeipwe tapweog." Iwe ra noa wooan eew pwoot, nono e nee oatosor noa nge erhai mwo iig nge rese nipaeni.

⁴ Enoa taetae aenet, nge Jesus a iu ngaerhen nooamw we, nge rhoan kkayeo kkewe rese aeginna pwe Jesus.

⁵ Iwe a aeineeor pwe, "Mwaaen kkomwun, eyor minne oaw nipaeni?"

Ra iura pwe, "Ese erhai mwo."

⁶ Jesus a aengaeniir pwe, "Aerheitiw wuug mwu naimi me peig mwaaenen pwoot na, nge ina nge oawpwe nipaeni aekkaerhai." Iwe ra aerheitiw wuug we wenepeigin pwoot we, nge resa mmwenen taiuw no, pwe a sseog noa reen iig.

⁷ Iwe nge rhoan kkayeo we Jesus egin aerhaengi a aengaeni Peter pwe, "Soamwoon minna!" Igiwe Peter erongorong pwe Soamwoon miniwe nge egeonitae rhag minikkewe mengaagiun wooan (pwe iwe e aetiwa noa mwo) iwe nge ennus noa nee set.

⁸ Rhooan kkayeo kkewe aaemweoi ra itto mwoarhoisaet rhiun pwoot we, ra pwan tettaiuw nong wuug we pwe iwe a sseog noa reen iig. Rhooawe rese pwan taaw saengi faniuw, maeni epwe epwiugiuw iyaach taaw noar.

⁹ Renoa tiw tae mwoarhoisaet, ra weri aengaet we eyor iig me fenoawa wooan.

¹⁰ Jesus a aengaeniir pwe, "Oawpwigito fitiman iig kkomwu oawnaen nipaeni."

¹¹ Simon Peter a itiwow wooan pwoot we, a noa taiuw nong wuug we a sseogiun iig tettemoag, ina epwiugiuw nimeig me eoniurhai nepan; inamwo igiwe a igin sseog nge ese ffeir wuug we.

¹² Jesus a aengaeniir pwe, "Oawitto mwongo." Erhai mwo me neeiir rhoan kkayeo kkewe nge ese mmwen pwe repwe aeineow pwe, "Een iyo?" pwe igiwe regiuneei pwe Soamwoon miniwe.

¹³ Jesus a faaeraeg noa, a noa pwigi fenoawa we nge a ngaanneer; a pwan ngaanneer iig kkewe.

¹⁴ Iwe a ieei aeinuwaen aen Jesus pwae ngaeniir rhoan kkayeo kkewe weni mwirin aan menaw tae.

Jesus me Peter

¹⁵ Weni mwirin aar moannon mwongo, Jesus a aengaeni Simon Peter pwe, “Simon mwu naiun John, aerhaengerhaeng mwu oamw ngaeniaei, etemoag saengi aar rhooa kkomwu aaemweoi aerhaengiaei?”

A paniuwaeni pwe, “Ooa Soamwoon, een wogiuneei pwe ngaang i aerhaengiug.”

Jesus a aengaeni pwe, “Aemmwenaar naeyi *sheep*.”

¹⁶ Oaruwowwan Jesus a pwan aengaeni pwe, “Simon mwu naiun John, wo aerhaengiaei?”

A paniuwaeni pwe, “Ooa Soamwoon, wogiuneei pwe i aerhaengiug.”

Jesus a aengaeni pwe, “Aefaenniir *sheep* kka naeyi.”

¹⁷ Aeinuwan Jesus a pwan aeineow, “Simon naiun John, wo aerhaengiaei?”

A aenneew nee tipaen Peter pwe igiwe a faaen enuun aen Jesus aeineow pwe, “Wo aerhaengiaei?” Iwe a aengaeni pwe, “Soamwoon, wogiuneei oanongaen meeta, wogiuneei pwe i aerhaengiug!”

Jesus a aengaeni pwe, “Aemmwenaar *sheep* kka naeyi.

¹⁸ Ennetaen, ipwe aengaeniug minna wenewenen: oatowe worhiuwen anian, wopwe memmengaag tae rhag wonoa ese tiwegin igine wopwe noa ee; nge iga wa tugufaeyi, ina wopwe aeti wow poawumw nge erhai a geoniug noa a wummwug noa igina wose mwerhaen wopwe noa ee.”

¹⁹ (Jesus eaepesa minnee, pwe eaeffeta noa epwe ifa wusun aen Peter epwe mae nge epwe fang ngaeni Deus minna nningen.) Iwe nge Jesus a aengaeni pwe, “Tapweto mwiriy!”

Jesus me Rhoan Kkayeo we Egin Aerhaengi

²⁰ Peter etoagun sefaaen mwirin nge a weri rhoan kkayeo we erhai iwe Jesus eigin aerhaengi – iwe eaepwaenaeg ngaeni Jesus nupwaen aar mwongoon faaef nge a aeineow pwe, “Soamwoon, iyo epwene fangoa tinnimaem?”

²¹ Igiwe Peter eweri, iwe a aeineow Jesus pwe, “Soamwoon, nge eifa wusun mwaaen een?”

²² Jesus a paniuwaeni pwe, “Ngaere i mwerhaen pwe epwe no toori aaei noa sefaaeneto, nge pwan meeta faan ngaeniug? Een tapweto mwiriy!”

²³ Iwe a teo fetaen kkepas neeiir rhoawe rhoaniuwaen Jesus pwe rhoan kkayeo we nge esoapw mae noa. Nge Jesus ese iura pwe esoapw mae; pwe eiura pwe, “Ngaere imwerhaen pwe epwe no toori aaei noa sefaaeneto, nge pwan meeta faan ngaeniug?”

²⁴ Iiy rhoan kkayeo we minne eaepesa minikkei, iiy minne efoatogin tiw; iwe nge sigiuneei pwe minikka eaepesa nge ikka ewenewen.

Amwiucchiun

²⁵ Iwe nge epwan igin ssow aekkaew minikka Jesus epwan feeori. Iwe ngaere igrine oanongan nge foatofototiw, iwe nge maeni faeinaengiy mwo nge esoapw faer iiy pwapwior kenaan noan.